

O Le Iahona

Saunoaga o le Konafesi Aoao

Ua Valaauina Fitugafulu
fou ma le Au Peresitene
Aoao o le Aoga Sa





© HOWARD LYON, E LE MAFAI ONA KOPINA

Tasi le Leoleo Mamoe, saunia e Howard Lyon

O i o loo asiati atu ai Iesu Keriso ia sa Nifae i le laueleele o Amerika i le faataunuuina o se valoaga na Ia faasoa atu ia i latou sa i ai i Ieruselema: “Ua ia te au foi isi mamoe e le o i lenei lotoa; e tatau ona ou taitaiina mai o i latou foi, e faalogo foi i latou i lo’u leo; ona tasi ai lea o le lafu mamoe, ma le leoleo mamoe e toatasi” (Ioane 10:16; tagai foi i le 3 Nifae 15:21).

SAUNIGA O LE TAEAO O LE ASO TOONAI

- 4 Susū Maia i le Konafesi
Peresitene Thomas S. Monson
- 6 O Le Tau—ma Faamanuiaga—
o le Avea ma Soo
Elder Jeffrey R. Holland
- 9 O Le Avega Faafiafiaina o le Avea
ma Soo
Elder Ronald A. Rasband
- 12 O Keriso le Togiola
Elder Carlos H. Amado
- 15 Puipuiga mai Ponokalafi—
o se Aiga e Taulai atu ia Keriso
Linda S. Reeves
- 18 O Asiosio Faaleagaga
Elder Neil L. Andersen
- 22 O Se Tofi o le Faamoemoe e Le
Mafaatauina
Peresitene Henry B. Eyring

SAUNIGA O LE AFIAFI O LE ASO TOONAI

- 26 O Le Lagolagoina o Taitai
o le Ekalesia
Peresitene Dieter F. Uchtdorf
- 28 Lipoti a le Matagaluega Suetusi
a le Ekalesia, 2013
Kevin R. Jergensen
- 28 Lipoti Faafuainumera, 2013
Brook P. Hales
- 29 Ia Faaalia Lo Outou Faatuatua
Elder Russell M. Nelson
- 32 "Ua Ou Avatu le Faaa'oa'o ia
te Outou"
Elder Richard G. Scott
- 35 "Afai Tou Te Alofa Mai ia te Au,
Ia Outou Tausi Mai i Au Poloaiga"
Elder Robert D. Hales
- 39 Aua Ne'i o Tatou Ui i le Auala Sese
Elder Claudio D. Zivic
- 41 O Le A Sou Manatu?
Elder W. Craig Zwick
- 44 O Aa ma Lala
Elder Quentin L. Cook

SAUNIGA A LE AU PERISITUA

- 49 O Ki ma le Pule o le Perisitua
Elder Dallin H. Oaks
- 53 O A Ituaiga o Tagata?
Elder Donald L. Hallstrom
- 56 O Le Tupulaga o Filifiliga
Randall L. Ridd
- 58 O E Moe i Lenei Taimi o le
Toefuataiga?
Peresitene Dieter F. Uchtdorf
- 62 O Le Alii Perisitua
Peresitene Henry B. Eyring
- 66 Ia Faamalosi ma Loto Tele
Peresitene Thomas S. Monson

SAUNIGA O LE TAEAO O LE ASO SA

- 70 Ia Lotofaafetai i Soo Se Tulaga
Peresitene Dieter F. Uchtdorf
- 78 Toe Tulitatao
Elder M. Russell Ballard
- 81 "Aua Le Fefe; Ou Te Ia Te Oe"
Jean A. Stevens
- 84 O Lau Fa Minute
Epikopo Gary E. Stevenson
- 87 Tauave ma le Faigofie a Latou
Avega
Elder David A. Bednar
- 91 O Le Alofa—o le Ute lea
o le Talalelei
Peresitene Thomas S. Monson

SAUNIGA O LE AFIAFI O LE ASO SA

- 94 O Le Molimau
Peresitene Boyd K. Packer
- 97 Ola Tutumau i Faatuatua
Elder William R. Walker
- 100 Usiusitai e ala i lo Tatou Faatuatua
Elder L. Tom Perry
- 103 O Le Perofeta o Iosefa Samita
Elder Lawrence E. Corbridge
- 106 O Le Mea Ua I Ai Lo Outou Oa
Elder Michael John U. Teh
- 108 Ae Afai Ua Leai Se Poto i So Outou
Elder Marcos A. Aidukaitis
- 111 O Le Toetu o Iesu Keriso
Elder D. Todd Christofferson
- 115 Seia Tatou Toe Feiloai
Peresitene Thomas S. Monson

SAUNIGA AOA O TAMAITAI

- 116 O Le Tausiga o Feagaiga e Puipuia
ai i Tatou, Saunia ai i Tatou, ma
Faamalosi ai i Tatou
Rosemary M. Wixom
- 119 Le Usoga: Oka, so Tatou
Manaomiaina o le Tasi ma Le Isi
Bonnie L. Oscarson
- 122 Manaomia: Lima ma Loto e
Faanatinati le Galuega
Linda K. Burton
- 125 O Afafine o le Feagaiga
Peresitene Henry B. Eyring
- 72 Au Pulega Aoao ma Taitai Aoao
o Le Ekalesia a Iesu Keriso o le Au
Paia o Aso e Gata Ai
- 129 Faasino Upu o Tala o le Konafesi
- 130 Sa Latou Saunoa mai ia i Matou: O
Le Avea o le Konafesi ma Vaega o o
Tatou Olaga
- 132 Tala Fou o le Ekalesia



Aotelega mo le Konafesi Aoao Lona 184 Faaletausaga

TAEAO O LE ASO TOONAI, 5 APERILA, 2014, SAUNIGA AOAO

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo amata: Elder Carl B. Cook. Tatalo faaii: Elder W. Christopher Waddell. Musika na saunia e le aufaipese a le Tapeneko; Mack Wilberg ma Ryan Murphy, faatonu; Clay Christiansen ma Richard Elliott, ta okeni: “Le Fa’avae Malosi, *Viiga*, nu. 45; “Le Au Paia Uunai i Luma, *Viiga*, nu. 44, arr. Wilberg, e lei lolomiina; “Le Atua, le Tama e,” *Viiga*, nu. 97, arr. Wilberg, e lei lolomiina; “Filifili Tau o Mea Tonu, *Viiga*, nu. 149; “O Le Poloaiga Fou Ou Te Tuu Atu ia te Outou,” Gates, lolomiina. e Jackman; “Le Tupu o tupu, Afio Mai, *Viiga*, nu. 25, arr. Murphy, e lei lolomiina.

AFIAFI O LE ASO TOONAI, 5 APERILA, 2014, SAUNIGA AOAO

Pulefaamalumu: Peresitene Thomas S. Monson. Taitai: Peresitene Henry B. Eyring. Tatalo amata: Elder Ian S. Ardern. Tatalo faaii: Linda K. Burton. Musika na saunia e se aufaipese tuufaatasi mai le Inisititui a Orem Iuta; Ryan Eggett, faatonu; Bonnie Goodliffe ma Linda Margetts, i le okeni: “Mamalu i le Atua,” *Viiga*, nu. 40, arr. Manookin, lolo. e Jackman; “I Lived in Heaven,” *Tusipese a tamaiti*, 4, arr. Beebe, lolomi. saunia e Larice Music; “Ia Vii Oe le Atua,” *Viiga*, nu. 10; “I Luga o Mauga,” *Viiga*, nu. 4, arr. Duffin, lolo. e Duffin.

AFIAFI O LE ASO TOONAI, 5 APERILA, 2014, SAUNIGA A LE AU PERISITUA

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo amata: Elder LeGrand R. Curtis Jr. Tatalo faaii: Russell T. Osguthorpe. Musika na saunia e se aufaipese a le au perisitua mai le Iunivesite o Polika Iaga-Idaho; Randall Kempton ma Kevin Brower, taitaipese; Andrew Unsworth, i le okeni: “Saints, Behold How Great Jehovah,” *Viiga*, nu. 28, arr. Kempton, e lei lolomiina; “Tatalo Faalilo, *Viiga*, nu. 79, arr. Kasen, lolomi. e Jackman; “Fiafia, o le Alii o le Tupu,” *Viiga*, nu. 38; “Afio Mai!” *Viiga*, nu. 92, arr. Kempton, e lei lolomiina.

TAEAO O LE ASO SA, 6 APERILA, 2014, SAUNIGA AOAO

Pulefaamalumu: Peresitene Thomas S. Monson. Taitai: Peresitene Henry B. Eyring. Tatalo amata: Elder L. Whitney Clayton. Tatalo faaii: Neill F. Marriott. Musika na

saunia e le Aufaipese a le Tapeneko; Mack Wilberg, taitaipese; Richard Elliott ma Andrew Unsworth, i le okeni: “E Alolofa i le Atua, *Viiga*, nu. 64; “On This Day of Joy and Gladness, *Hymns*, no. 64; “Faamalosi ia i le Galuega Nei,” *Viiga*, nu. 152, arr. Eliota, e lei lolomiina; “Aoao Mai ia Ou Ui i le Malamalama,” *Viiga*, nu. 187; “A Child’s Prayer,” *Tusipese a Tamaiti*, 12, arr. Perry, lolomi. e Jackman; “Teova e, ia Tautai Pea i Matou,” *Viiga*, nu. 47, arr. Wilberg, e lei lolomia.

AFIAFI O LE ASO SA, 6 APERILA, 2014, SAUNIGA AOAO

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo amata: Epikopo Dean M. Davies. Tatalo faaii: Elder Benjamín De Hoyos. Musika na saunia e le aufaipese a le Tape-neko; o Mack Wilberg ma Ryan Murphy, o taitaipese; Linda Margetts ma Bonnie Goodliffe, ta okeni: “Le Atua Malie Lau Galuega, *Viiga*, nu. 82, arr. Murphy, e lei lolomiina; “Ou Te Tu ma Ofo,” *Viiga*, nu. 107, arr. Murphy, e lei lolomiina; “Faalogo Nuu Uma!” *Viiga*, nu. 165; “Come, Let Us Anew,” *Viiga*, nu. 217, arr. Wilberg, e lei lolomia.

AFIAFI O LE ASO TOONAI, 29 MATI, 2014, SAUNIGA AOAO A TAMAITAI

Pulefaamalumu: Peresitene Thomas S. Monson. Taitai: Bonnie L. Oscarson. Tatalo amata: Emri Elizabeth Smith. Tatalo faaii: Ofa Kaufusi. Musika na saunia e se aufaipese tuufaatasi a le Peraimeri, Tamaitai Talavou, ma le Aualofa mai siteki i le Wasatch Front; o Emily Wadley, o le taitaipese; Bonnie Goodliffe, o le taokeni: “Faalogo, Nuu Uma!” *Viiga*, nu. 165; “Daughters in His Kingdom,” Creamer, e lei lolomiina, faatasi ai ma le okeni, fagufagu, vaiolini, ma le selo; “O Le Atua lou Tama,” *Viiga*, nu. 184, arr. DeFord, e lei lolomiina; suifefiloi, arr. Mohlman, e lei lolomiina: “Faaola e ia Ou Alofa,” *Viiga*, nu. 150, ma le “Ia Fealofani,” *Viiga*, nu. 195; “Faamalosi ia i le Galuega Nei,” *Viiga*, nu. 152, arr. Huff, e lei lolomia.

E MAUA SAUNOAGA O LE KONAFESI

Ina ia maua saunoaga o konafesi aoao i luga o le Initoneti i le tele o gagana, asiasi i le conference.lds.org ma filifili se gagana. O loo maua foi lauga i luga o le Gospel Library app feaveai. E masani lava i totonu o le ono vaiaso i le mavae ai o le konafesi aoao, e maua ai lipine faalologolo i faletusi autu.

SAVALI A FAIAOGA O AIGA MA FAIAOGA ASIASI

Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetau lelei ma tulaga o loo manaomia e i latou tou te asia.

I LE FAAVAA

Luma: Ata na pueina e Christina Smith.

I Tua: Ata na pueina e Leslie Nilsson.

PUEGA O ATA O LE KONAFESI

Vaaiga o le konafesi aoao i le Aai o Sate Leki na pueina e Welden C. Andersen, Cody Bell, Randy Collier, Weston Colton, Scott Davis, Craig Dimond, Nathaniel Ray Edwards, Lloyd Eldredge, Ashlee Larsen, John Luke, Leslie Nilsson, Christina Smith, ma Byron Warner; i Gilbert, Arisona, ISA, saunia e Jamie Dale Johnson; i Highlands Ranch, Colorado, ISA, saunia e Rebecca Morgeneegg; i le Aai o Mekisiko, Mekisiko, saunia e Israel Gutiérrez; i Norcross, Georgia, ISA, saunia e David Winters; i Palamaira, Niu Ioka, ISA, saunia e Brent Walton; i Pleasant Grove, Iuta, ISA, saunia e Jeremy Hall; i Raymond, Alberta, Kanata, saunia e Rhonda Steed; i Saint Petersburg, Rusia, saunia e Vladimir Egorov; i São Paulo, Pasila, saunia e Lauren Fochetto; i Sini, Ausetalia, saunia e Colin Ligertwood; i Ulaanbaatar, Monokolia, saunia e Kylie Sneddon; i Viena, Ausetaria, saunia e Frank Helmrich; ma i Uosigitone, Iuta, ISA, saunia e James Iloff Jeffery.



ME 2014 VOL. 38 NU. 5

O LE LIAHONA 10985 890

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Jose L. Alonso, Mervyn B. Arnold, Shayne M. Bowen, Stanley G. Ellis, Christoffel Golden

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Au Tusitusi ma Faatonutonu: Brittany Beattie, David Dickson, David A. Edwards, Jennifer Grace Fallon, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Jennifer Grace Fallon, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, Mandie M. Bentley, C. Kimball Bott, Tom Child, Nate Gines, Colleen Hinkley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le

initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le *Liahona* (o Iona uiga i le Tusi a Mamona o le "tapasa" po o se "faatonuuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Igilisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafigofieina), Silovenia, Sipaniolo, Suetena, Swahili Tagaloka, Tahiti, Tai, Toga, Iukureini, Urutu, ma Viatename. (E eese lava gagana.)

© 2014 Puletaofia e le Intellectual Reserve, Inc. Ua toafia aia tatau uma. Lomia i le lunaite Setete o Amerika.


E mafai ona kopi tala ma ata o le *Liahona* mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

May 2014 Vol. 38 No. 5. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



**FAILAUGA I LE FAASOLOGA
FAAALAFAPETA**

Aidukaitis, Marcos A., 108
Amado, Carlos H., 12
Andersen, Neil L., 18
Ballard, M. Russell, 78
Bednar, David A., 87
Burton, Linda K., 122
Christofferson, D. Todd, 111
Cook, Quentin L., 44
Corbridge, Lawrence E., 103
Eyring, Henry B., 22, 62, 125
Hales, Robert D., 35
Hallstrom, Donald L., 53
Holland, Jeffrey R., 6
Monson, Thomas S., 4, 66,
91, 115
Nelson, Russell M., 29
Oaks, Dallin H., 49
Oscarson, Bonnie L., 119
Packer, Boyd K., 94
Perry, L. Tom, 100
Rasband, Ronald A., 9
Reeves, Linda S., 15
Ridd, Randall L., 56
Scott, Richard G., 32
Stevens, Jean A., 81
Stevenson, Gary E., 84
Teh, Michael John U., 106
Uchtdorf, Dieter F., 26, 58, 70
Walker, William R., 97
Wixom, Rosemary M., 116
Zivic, Claudio D., 39
Zwick, W. Craig, 41

FAASINO AUTU

Agaalofa, 91
Agaga Paia, 22, 94, 100
Agalelei, 91
Agavaa, 53
Aiga, 44, 49
Alofa, 6, 32, 41, 58, 91,
115, 119
Alofa Mama, 91
Amio pulea, 84
Amio Sa'o, 29, 66
Amiotonu, 6
Auaua atu, 9, 32, 53, 58, 62,
119, 122
Avea ma Soo, 6, 9, 18, 122
Faaaliga, 103, 108
Faaiipoipoga, 18, 41, 49
Faamagaloga, 91
Faamaoni, 62
Faamasino tonu, 111
Faamoemoe, 22
Faataitaiga, 32, 62
Faatuatua, 29, 78, 81, 97,
100, 108
Faifeautalai a le Au Paia, 78
Faigata, 9, 18, 70, 81, 87, 106
Faitalia, 35, 56, 100
Feagaiga, 22, 84, 87, 116,
122, 125
Fesootaiga, 41
Galuega faaifeautalai,
32, 78
Iesu Keriso, 6, 9, 12, 18, 22,
29, 32, 35, 39, 58, 70, 87,
94, 103, 111
Igoa o le Ekalesia, 78
Iosefa Samita, 22, 39, 66, 103
Konafesi aoao, 4, 115
Le Atua Le Tama, 81, 94
Loto faafetai, 70

Lotomauualalo, 106
Lototele, 6, 18, 66
Maliu, 12, 111
Malumalu, 4, 44, 97, 116
Manatu faapito, 58
Mea e faamuamua, 58, 106
Molimau, 94
Ola faavavau, 22
Paionia, 70, 75, 97
Perisitua, 49, 53, 62
Perofeta, 97, 103, 108
Ponokalafi, 15, 53, 60
Poto, 103, 108
Pule, 49
Salamo, 39, 84
Sauaga, 6
Sauniga, 94
Tala faasolopito o aiga, 44
Tamaitai, 49, 119
Tatalo, 15, 56, 62, 81
Taulaga, 97
Tekinolosi, 44, 56, 108
Tiapolo, 29
Toefuataiga, 58
Toetu, 12, 111
Togiola, 12, 15, 18, 87, 111
Tulaga Faamatua, 94
Tusi a Mamona, 18
Tusitusiga Paia, 29, 56
Upumoni, 29, 94, 103, 108
Usiusitai, 6, 18, 35, 84, 100
Usoga a tamaitai, 119, 125
Vaisu, 15, 58



Saunia e Peresitene Thomas S. Monson

Susū Maia i le Konafesi

Ua tatou . . . lotogatasi i lo tatou faatuatua ma i lo tatou manao ia faalogo atu ma aoao mai i savali o le a fofogaina mai ia i tatou.

Ou uso e ma tuafafine pele, ua ou fiafia lava e faafeiloai atu ia te outou i lenei konafesi i le lalolagi atoa a Le Ekalesia a Iesu Keriso o le Au Paia o Aso e Gata Ai. Ua tatou potopoto faatasi o se aiga tēle, ua silia ma le 15 miliona tagata malolosi, ua lotogatasi i lo tatou faatuatua ma i lo tatou manao ia faalogo atu ma aoao mai i savali o le a fofogaina mai ia i tatou.

Ua vave lava ona mou atu le isi ono masina a o agai pea i luma le galuega a le Ekalesia e aunoa ma le faalavelaveina. Sa ou maua se avanoa e silia ma se masina talu ai e faapaia ai le Malumu o Gilbert Arisona, o se maota ofoofogia. O le afiafi a o lumanai ai le faapaia sa faia ai se faafiafiaga faaleaganuu i le malae na lata ane o Discovery Park. Sa faatino e le autalavou e sefululua afe se polokalama e 90 minute. Sa matua mataina ia siva, ma pesega, ma faatinoga faamusika.

O le eria lea sa taia i se vaitau mūgālā uiga ese, ma ou te talitonu sa tele ni tatalo na auina atu i le lagi i le gasologa o vaiaso ona sa matua

manaomia le timu. Ae paga lea, na oo mai le timu ae o le a amata le faafiafiaga ma timu ai lava i le faafiafiaga atoa! E ui lava la i le susu uma o le autalavou i le timu ma maalilili ona o le malulu, ae sa matou lagonaina uma le Agaga o le Alii. O le autu o le polokalama o le, “Ola Tutumau i Faatuatua,”—mafaufau i lena mea: “Ola Tutumau i Faatuatua”—lea sa faatinoina ma le ofoofogia e ala i le laumata fiafia ma le naunautai o alii ma tamaitai talavou. E ui sa malulu ma timuga, ae o se aafiaga lenei sa faatumulia i le faatuatua ma musuia o le a teuloto pea e le autalavou ma o le a latou faamatalaina i a latou fanau ma fanau a fanau i tausaga o lumanai.

O le aso na sosoo ai, na faia ai le faapaia o le Malumu o Gilbert Arisona. Ua avea nei ma malumu lona 142 o loo faaogaina i le Ekalesia. E ese mai i le afiafi na muamua ai, o lea aso sa matagofie ma faatumulia i le la susulu. Sa musuia moni lava ia sauniga. Sa matou auai faatasi ai ma Peresitene Henry B. Eyring, Elder ma Sister Tad R. Callister, Elder ma Sister



William R. Walker, ma Elder ma Sister Kent F. Richards.

Ia Me o le a faapaia ai le Malumu o Fort Lauderdale Florida. Ua fuafuaina isi malumu ina ia faamaeaina ma faapaia i se taimi o mulimuli mai i le tausaga. I le 2015 ua matou faamoemoe ai e faamaeaina ma faapaia ni malumu fou i le tele o vaega o le lalolagi. O le



a faaauau pea lenei faagasologa. A maea uma loa malumalu ia na faasilasila atu talu ai nei, ona atoa ai lea o le 170 o malumalu o loo faaaogaina i le lalolagi atoa.

E ui o loo matou tulaia atu a matou taumafaiga i le faamaeaina o malumalu na faasilasila atu talu ai nei ma o le a le toe faasilasilaina nisi malumalu fou i se taimi vave i le lumanai, ae o

le a faaauau pea le faagasologa o le fuafuaina o manaoga ma le sailia o nofoaga mo ni malumalu i le lumanai. Ona toe fai atu ai lea o ni faasilasilaga i konafesi aoao i le lumanai. O i tatou o ni tagata fau malumalu ma ni tagata e o i malumalu.

O lenei, ou uso e ma tuafafine, ua tatou naunau lava e fia faalogologo atu i savali o le a fofogaina mai ia i

tatou i le asō ma ā taeao. O i latou o le a saunua mai na sailia le fesoasoaniga ma le taitaiga a le lagi a o latou saunia a latou savali.

Tau ina ia faatumulia—i tatou uma, iinei ma soo se mea—i le Agaga o le Alii ma ia siitiaina ma musuiaina a o tatou faalogologo atu ma aoao. I le suafa o Iesu Keriso, lo tatou Faola, amene. ■



Saunia e Elder Jeffrey R. Holland

○ Le Korama a Aposetolo e Toasefululua

O Le Tau—ma Faamanuiaga—o le Avea ma Soo

Ia faamalosi. Ola ma le faamaoni i le talalelei e tusa lava pe e le o ola ai isi o siomiaina outou.

Peresitene Monson, matou te alofola ia te oe. Ua e tuuina atu loto ma lou malosi i valaauga uma ua tuuina atu e le Alii ia te oe, aemaise lava i le tofi paia o loo e umiaina nei. E faafetai atu lenei Ekalesia atoa ia te oe mo lau auaunaga mausali ma mo lau faataitaiga maumaututu o le tuuto atu i tiute.

Faatasi ai ma se faamemelo ma le faamalosiuga mo tagata uma o e o le a manaomia ona tutu mausali i nei aso e gata ai, ou te fai atu i tagata uma aemaise lava i le autalavou o le Ekalesia pe afai tou te lei faia, o le a e oo lava i se tulaga o le a manaomia ai ona e puipuia lou faatuatua pe atonu foi o le onosaia o nisi o sauaga faaletagata ona o oe o se tasi o Le Ekalesia a Iesu Keriso o le Au Paia o Aso e Gata Ai. O ia taimi faapea o le a manaomia uma ai le lototele ma le amio solia mai ia te outou.

Mo se faataitaiga, sa tusi mai ia te au talu ai nei se tamaitai faifeautalai: “Sa ma vaaia ma lau soa se alii o saofai i luga o se nofoa umi i totonu o le tau-laga ma tausami lana ‘aiga o le aoauli.

A o ma latalata atu, sa ia tilotilo mai i luga ma iloa mai ma pine faifeautalai. Faatasi ai ma se foliga pāū, sa ia oso i luga ma sii lona lima e po au. Sa fetauilelei lava ma lau ‘alo, o lea sa ia luai mai ai ana meaai ma leaga uma ai ofu ma amata ona palauvale i upu sili ona mataga. Sa ma savavali ese e aunoa ma se upu. Sa ou taumafai e soloese meaai mai ou mata, ae lagona ai le tau o le potoi pateta i tua o lou ulu. O nisi taimi e faigata le avea ma se faifeautalai aua sa ou manao e toe foi i ai i lena taimi, uu lena alii, ma fai i ai, ‘O LE A LAU TALA!’ Ae ou te lei faia.”

Ou te fai atu i lenei faifeautalai tuuto, lau pele, na e faia i lau lava ala faamaulalo ua laasia ai se li’o o tamaitai ma alii tulagaese o e, e pei ona fai mai le perofeta o Iakopo o le Tusi a Mamona, na “manatunatu i le maliu [o Keriso], ma mafatia i lona satauro ma [tauave] tauemuga a le lalolagi.”¹

Ioe o Iesu Lava Ia, na tusia ai e Iakopo le uso o Nifae: “Ma o le lalolagi, ona o lo latou amioletonu, o le a faamasino ia te ia o se meanoa; o le mea lea latou te sasa ai ia te ia, ae tuu

atu e ia i ai; ma latou taia o ia, ae tuu atu e ia i ai. Ioe, latou te tuufeanu ia te ia, ae tuu atu e ia i ai, ona o lona agalelei alofa ma lona tali-tiga i le fanauga a tagata.”²

I le ogatasi ai ma le aafiaga a le Faaola lava ia, sa i ai se talafaasolopito umi o le teenaina ma le tau mauulaga na tofogiina ma le tiga e perofeta ma aposetolo, faifeautalai ma tagata i augatupulaga uma—o i latou uma o e na taumafai e faamamaluina le valaauga a le Atua ia siitia le aiga o tagata i “se ala e silisili ona lelei.”³

“Se a foi la’u e toe fai atu [ia i latou]?” na fesili ai le tusitala o le tusi a Eperu.

“O [i latou] na . . . pupuni ai gutu o leona,

“Na tinei ai le malosi o le afi, na sao i ai i le mata o le pelu, . . . na avea ai ma fitafita i taua, na tutuli . . . au . . .

“Na [vaa]i o latou tagata oti ina ua toe tu mai . . . [a o] faataugaina nisi, . . .

“Na tofotofoina . . . i tauemuga, ma sasaina, . . . ma noanoataga ma tuuina i le fale puipui:

“Na fetogia i latou i maa, . . . na vaevaeesea i ili, na tofotofoina, na oti i latou na fasia i le pelu: . . . feoai solo ma oofu i pau mamoe ma pau oti; o mativa i latou, ma puapuagatia, [ma] faasaunoaina;

“([O i latou] e le aoga le lalolagi ona i ai o i latou:) . . . feoai solo i latou i vao, ma mauga, ma ana, ma lua i le elelee.”⁴

E moni sa tutulu agelu o le lagi a o latou faamaumauina leni tau o le avea ma soo i se lalolagi e matele ina tetee i poloaiga a le Atua. O le Faaola Lava Ia na maligi Ona lava loifofoga mo i latou o e ua fia selau tausaga na teena ma fasiotia i Lana galuega. Ma na teena foi o Ia ma fasiotia.

“Ierusalem e, Ierusalem e,” na aiosi atu ai Iesu, “o lē fasiotia perofeta, ma fetogi i maa i e ua aauina atu ia te oe, ua tele lava ou manao e faapotopototo i

lau fanau, e pei o le moa ona ofaofatai i lana toloai i lalo i ona apaau a e lei mafafai outou!

“Faauta, ua tuua lo outou fale, e faatafunaina.”⁵

Ma o loo taoto ai iina se savali mo alii ma tamaitai talavou uma i lenei Ekalesia. Atonu tou te mafaufau pe e talafeagai lou tu atu e puipui ma le lototoa au amioga mama i le aoga maualuga po o le alu i se misiona ae na o le ulagia ai o ou talitonuga sili ona pele po o le tetee atu i le tele o mea i le olaga lea o nisi taimi e ulagia ai se olaga tuuto faalelotu. Ioe, e tauia, aua o le sui o lenei mea o le “faatamaia” lea o o tatou “fale”—faatamaia tagata taitoatasi, faatamaia aiga, faatamaia alalafaga, ma faatamaia ia malo.

Ua faaalua i lenei mea avega a i latou ua valaauina e tauave le savali faalemesia. E le gata i le aoao atu, uunaia, ma faamalosiuaia ia tagata (o le vaega manaia lenei o le avega ma soo), ma i lea taimi ma lea taimi ua valaauina ai nei avefeau ina ia tausia, lapatai atu, ma o nisi taimi e na o le fetagisi lava (o le vaega tiga lenei o le avega ma soo). Ua latou silafia lelei le auala e oo atu ai i le nuu o le folafolaga o loo “tafe ai le suasusu ma le meli”⁶ ma mea e manaomia e ui atu ai i le ala o le Mauga o Sinai lea o loo tafe ai “ia e” ma “aue e te.”⁷

O le mea e faanoanoa ai, o avefeau ia ua tuuina mai o poloaiga faatonuina paia a le Atua ina ia faamanuia ma puipuia i tatou ua matele ina le iloa tele i lenei vaitaimi e pei foi o le vaitaimi anamua, lea e mafai ona faamaonia mai nei e tamaitai faifeautalai e toalua na tuufeanu i ai ma tauai i pateta. O le *inoi* o se upu mataga, ae e i ai nisi i lenei vaitaimi e pei o Aapo lē amiotonu o fai mai, “Ou te inoino [i le perofeta o Mekaio]; aua na te le vavalo mai ia te au i mea lelei, a o mea leaga [e vavalo mai ai] e le



aunoo.”⁸ O lenei ituaiga inoino ona o le faamaoni o se perofeta na aveesea ai le ola o Apinati. A o ia fai atu i le Tupu o Noa: “Ona ua ou tau atu ia te outou le upumoni, ua outou faitai mai ia te au. . . . Ona ua ou tautala atu le afioga a le Atua ua outou faamasino mai ia te au fai mai ua ou fasa”⁹ pe mafai foi ona tatou faaopopo i ai, ua pasiā, pulepuletutu, sauā, faailogalanu, agaleaga, papa’u le tofa, le toe taulia, ma matua.

E pei o le auega a le Alii Lava Ia i le perofeta o Isaia:

“O [nei] fanau e le mafafai ona faalogo i le tulafono a Ieova:

“[Ua latou] fai atu i tagata vaai, Aua tou te vaai; latou te fai atu foi i perofeta, Aua tou te faaali mai ia te i matou mea tonu, ina fai mai ia ia te i matou upu malie, ina faaali mai ia mea pepelo:

“Alo ese ia outou i le ala, ina o ese ia i le ala, ina faateaseina ia le Paia o Isaraelu i o matou luma.”¹⁰

O le mea e faanoanoa ai, au uo talavou e, o se amioga a lo tatou vaitaimi lea afai e mananao tagata i soo se atua, latou te mananao i ni atua e le

tele ni mea e manao ai, o atua filemu, e le gata latou te le lueina le vaa ae latou te le aloina foi, o atua ia e mili-miliina o tatou ulu, faaata i tatou, ona fai mai lea tatou te tamomoe e piki fugalaa lanu samasama.¹¹

O le mea tonu lava lenei e tau o le foafoaina e le tagata o le Atua i lona lava faatusa! O nisi taimi—ma o le mea sili lea ona malie—e faaoga ai e nei tagata le suafa o Iesu o se tasi e faapei o lenei ituaiga o Atua “eva”. E moi? O Le na fetalai mai e le gata ina le tataua ona tatou solia poloaiga ae e le tataua foi ona tatou *mafaufau* e soli. Ma afai tatou te mafaufau e soli poloaiga, ua uma ona tatou solia i totonu o o tatou loto. Pe e foliga ea o se aoaoga faavae “eva” lenei mea, e manaia i le faalogo ma iloga pe a potopoto tagata ina ia maua so latou lava lagona lelei?

Ma ae faafea i latou o e e na o le mananao lava e tilotilo i le agasala pe pa’i i ai mai se tulaga mamao? Na fetalai mai Iesu i se taimi vave, afai e te tausui i lou mata, ia sali ese. Afai e te tausui i lou lima, tipiese.¹² “Ou te lei sau e [aumai] le filemu, a

o le pelu,”¹³ Sa Ia lapataia i latou o e manatu na Ia fetalai atu na o upu faamafanafana. Leitioa foi, ina ua mavae lena lauga, na “aioi atu” ia tagata o le nuu “ina ia maliu ese atu ia i lo latou nuu.”¹⁴ Leitioa foi, ina ua uma ona faia vavega, na faailoa atu e lei faia Lona mana mo le Atua ae mo le tiapolo.¹⁵ E manino lava, o le fesili i luga o le pepa faapipii i le taluamea o le taavale “O le a se mea e faia e Iesu?” o le a le aumaia ai i taimi uma se tali lelei.

I le faatumutumuga o Lana galuega faaletino, na fetalai ai Iesu, “Ia outou fealofani, pei ona ou alofa atu ia te outou.”¹⁶ O le faamautinoaina ua latou malamalama moni lava i lena ituaiga alofa, na Ia fetalai mai ai, “Afai tou te alofa mai ia te au, ia outou tausia mai

i au poloaiga”¹⁷ ma “o se . . . tatalaina se poloaiga e tasi e aupito itiiti, *ma faapea ona aoao i tagata, e*, aupito itiiti [o ia] i le malo o le lagi.”¹⁸ O le alofa faaKeriso o se manaoga sili lea o loo tatou mauaina i se vaega i lenei paneta aua e tatau lava ona o faatasi ma le amiotonu. Afai la o le alofa o la tatou anavatau lea, e pei ona *tatau* ai, ia ala atu la i le upu o ia te Ia lea o loo faatino ai le alofa ona tatau ai ona tatou lafoai ese le agasala ma soo se faaiteite o le lagolagoina e isi. Na malamalama manino lava Iesu i le mea e foliga mai o loo galo i le toatele o la tatou aganuu faanei onapo: e i ai se eseese ga taua i le va o le poloaiga ia faamagalo le agasala (lea sa Ia maua le mana le faatapulaa e faia ai) ma

lapataiga e tetee ai i le le amanaiaina (lea Na te lei faia lava i se taimi e tasi).

Uo, aemaise lava au uo talavou, ia maua le alofa. O le alofa mama faaKeriso e tafe mai le amiotonu moni e mafai ai ona suia le lalolagi. Ou te molimau atu ua i ai i le lalolagi le talalelei moni ma le ola a Iesu Keriso ma o outou o tagata o Lana Ekalesia moni ma le ola, o loo taumafai e faasoaina atu. Ou te molimau atu i lena talalelei ma i lena Ekalesia, ma se molimau faapitoa o le toefuataina mai o ki o le perisitua lea ua tatalaina ai le mana ma le taua o sauniga faaola. Ou te matua mautinoa ua toefuatai mai na ki ma ua toe avanoa na sauniga e ala atu i Le Ekalesia a Iesu Keriso o le Au Paia o Aso e Gata Ai ma ou te mautinoa a o



ou tu atu i o outou luma i lenei pule-
laa ma a o outou alala mai i ou luma i
lenei konafesi.

Ia faamalosi. Ola ma le faamaoni i
le talalelei e tusa lava pe e le o ola ai
isi o siomiaina outou. Puipui o outou
talitonuga ma le amio solia ma le
agaalofa, ae ia puipuia i latou. O se
talafaasolopito umi o leo musuia, e
aofia ai i latou o le a outou faafofoga i
ai i lenei konafesi ma le siufofoga lea
na faatoa uma ona outou faafofoga i
ai i le tagata o Peresitene Thomas S.
Monson, o le a faasinoa outou e agai
atu i le ala o le ave a ai ma soo Keri-
siano. O se ala sao ma o se ala itiiti e
aunoa ma se avanoa lautele i nisi o itu,
ae e mafai ona malaga fiafia ma lelei
ai, “o le . . . tumau ia Keriso, . . . o se
susulu atoatoa o le faamoemoe, ma le
alofa i le Atua ma tagata uma.”¹⁹ O le
savalia ma le lototoa o sea ituaiga ala,
o le a e maua ai le faatuatua le malue-
lue, ma o le a maua le saogalemu e
tete e atu i matagi o le amioleaga, e oo
lava i ave o asiosio, ma o le a e maua
le malosi e pei o le papa o lo tatou
Togiola lea afai o le a outou fausia ai
le ave a outou ma soo faamaoni, o le
a le mafai ona outou pauu.²⁰ I le suafa
paia o Iesu Keriso, amene. ■

FAAMATALAGA

1. Iakopo 1:8.
2. 1 Nifae 19:9.
3. 1 Korinito 12:31; Eteru 12:11.
4. Eperu 11:32–38.
5. Mataio 23:37–38.
6. Esoto 3:8.
7. Tagai Esoto 20:3–17.
8. 2 Nofoaiga Tupu 18:7.
9. Mosaea 13:4.
10. Isaia 30:9–11.
11. Tagai Henry Fairlie, *The Seven Deadly Sins Today* (1978), 15–16.
12. Tagai Mataio 5:29–30.
13. Mataio 10:34.
14. Mareko 5:17.
15. Tagai Mataio 9:34.
16. Ioane 15:12.
17. Ioane 14:15.
18. Mataio 5:19; faaopoopo le faamamafa.
19. 2 Nifae 31:20.
20. Tagai Helamana 5:12.



Saunia e Elder Ronald A. Rasband

○ Le Au Peresitene o Fitugafulu

O Le Avega Faafiafiaina o le Avea ma Soo

*O le lagolagoina o o tatou taitai o se faamanuiaga; e
vaavaalua mai ma se tiutetauave patino ina ia fefaasoai
a latou avega ma ia ave a ma soo o le Alii o Iesu Keriso.*

I le aso 20 o Me o le tausaga ua
tea, sa matua faaleagaina ai e se
asiosio maoae nuu i tua o le Aai
o Okalahoma, i le vaega tutotonu o
Amerika, ma pei na sua ai se auala e
silia ma le maila (1.6 km) le lautele ma
le 17 maila (27 km) le umi. O lenei afa,
o se osofaiga o asiosio matautia, na suia
ai le faataatiaga o le lauelele ma olaga
o tagata na aafia i lona ala matagi.

I le na o le vaiaso talu ona mavae
le afa matautia, sa tofia ai au e asiasi
i le eria lea na i ai fale na solo i lalo
ma meatotino na felelele solo i nuu na
matua faaleagaina.

Ae ou te lei alu, sa ou talanoa ma
lo tatou perofeta pele, o Peresitene
Thomas S. Monson, lea e fiafia tele e
fai nei feau mo le Alii. Faatasi ai ma le
faaaloalo e le gata i lona tofi ae faapea
foi i lona agalelei, sa ou fesili ai, “O le
a se mea e te finagalo ou te faia? O le
a se mea e te finagalo ou te tau atu?”

Sa ia uu atu lo’u lima ma le agalelei,
lea semanu na te faia foi i tagata taitasi
ua mafatia ma tagata taitoatasi o le a

fesoasoani atu i le faalavelave pe ana
i ai o ia iina, ma fai mai:

“Muamua, tau atu ia i latou ou te
alofa ia i latou.

“Lua, tau atu ia i latou o loo ou
tatalo mo i latou.

“Tolu, faamolemole faafetai atu
ia i latou uma o loo fesoasoani.”

I le ave a ai ma se tasi o le Au
Peresitene o Fitugafulu, na mafai
ona ou lagonaina le avega i ou tauave
i upu na fetalai ai le Alii ia Mose:

“Ina faapotopoto mai ia ia te au
o tagata e toafitugafulu o toeaina o
Israelu o e ua e iloa lava o toeaina i
latou o le nuu ma o latou faipule; . . .

“Ona ou alu ifo ai lea ta te tautala
ma oe i lea mea: ou te avae foi nisi
o le agaga o loo ia te oe [Mose], ma
ou tuuina atu ia te i latou; ona latou
tauave ai lea faatasi ma oe le avega o
le nuu ina ia e le ave a toatasi.”¹

O upu nei mai aso anamua, peitai
e lei suia lava ala o le Alii.

I le taimi nei i le Ekalesia, ua
valaauina e le Alii ni Fitugafulu e



317, o loo galulue i ni korama se 8, e fesoasoani i Aposetolo e Toasefululua i le tauaveina o le avega ua tuuina i luga o le Au Peresitene Sili. Ou te lagonaina ma le fiafia lena tiutetauave i le taele o lou lava agaga, e pei foi o ou Uso. Peitai e le na o i tatou o loo fesoasoani i lenei galuega mamalu. I le avega ai ma tagata o le Ekalesia i le lalolagi atoa, ua tatou maua uma le avanoa matagofie o le faamanuiaina o olaga o isi.

Sa ou aoaoina mai lo tatou perofeta pele le mea na manaomia e tagata na mafatia i le afa—o le alofa, tatalo, ma le agaga faafetai mo lima fesoasoani.

I lenei aoauli o le a taitasi i tatou ma siiina o tatou lima taumatau i le sikuea ma lagolagoina le Au Peresitene Sili ma le Korama a Aposetolo e Toasefululua o ni perofeta, tagatavaai, ma talifaaaliga o Le Ekalesia a Iesu Keriso o le Au Paia o Aso e Gata Ai. O lenei mea ua le na o se faiga faatupulagaina, pe o se mea ua faapolopolo mo i latou e valaauina i tofiga aoao. O le lagolagoina o o tatou taitai o se faamanuiaga; e vaavaalua mai ma se tiutetauave patino ina ia fefaasoai a latou avega ma ia avega ma soo o le Alii o Iesu Keriso.

Na saunoa mai Peresitene Monson: “Ua siomia i tatou e i latou e manaomia lo tatou gauai atu, la tatou faamalosiaiu atu, la tatou lagolago, la tatou faamafanafana, lo tatou agalelei—pe o nisi o le aiga, uo, paaga, po o ni tagata ese. O i tatou o aao o le Alii i luga o le fogaeleele, faatasi ai ma le poloaiga e auauna atu ma ia sii ae Ana fanau. O loo faalagolago mai o Ia ia i tatou taitoatasi. . . .

“ . . . Aua na faia e outou i le tasi o e aupito itiiti o ou uso nei . . . , o au lea na outou faia i ai.’ [Mataio 25:40].”²

Pe o le a tatou tali atu ea ma le alofa pe a tatou mauaina se avanoa e fai ai se asiasiga, po o se valaau i le telefoni, tusi se tusi, po o le faaalu o se aso e taulima ai manaoga o se isi tagata? Pe o le a tatou faapei o le alii talavou lea na faailoa atu ua mulimuli i poloaiga uma a le Atua:

“Ua ou tausia na mea uma talu ina ou itiiti: se a se mea o toe ou te lei faia?”

“Ua tali atu Iesu ia te ia, Afai e te manao ina ia atoatoa ona lelei o lau amio, ia e alu ma e faatau atu au mea, i le e avatau ai i e matitiva, ona ia te oe lea o le faulaigaoloa i le lagi, i le e sau ma mulimuli mai ia te au.”³

Na valaauina le alii talavou i se

auaunaga sili atu i le itu o le Alii e faia le galuega o le malo o le Atua i le lalolagi, ae peitai sa ia alu ese, “aua e tele lava ana mea.”⁴

O le a se taua o a tatou meatotino faalelalolagi? Ua tatou vaai i le mea e mafai ona faia e se asiosio i na mea i ni nai minute. E taua tele mo i tatou taitoatasi le taumafai ina ia teuina a tatou oa faaleagaga i le lagi—e faaoga ai o tatou taimi, taleni, ma le faitalia e auauna ai i le Atua.

O loo faaauau pea ona tuuina mai e Iesu Keriso le valaau “Sau ma mulimuli mai ia te au.”⁵ Sa Ia savalia Lona nuu faatasi ma Ona soo i se aga le manatu faapito. O loo faaauau pea ona Ia savali faatasi ma i tatou, tu mo i tatou, ma taitai i tatou. O le mulimuli i Lana faataitai-iga atoatoa o lona uiga o le iloa lea ma faamamalu le Faaola, o le na tauaveina a tatou avega uma e ala i Lana Togiola paia ma faaolaina, o le galuega tupito lea o le auauna atu. O le mea o loo Ia aioi mai ia i tatou taitoatasi ia mafai ma naunau e tauave ma le fiafia le “avega” o le avega ma soo.

A o i ai i Okalahoma sa ou maua le avanoa e feiloai ai i nai aiga na matua lofituina e le asiosio malosi. A o ou asia le aiga o Sorrels, sa ou

matua ootia lava i le mea na oo i lo la afafine, o Tori, a o i le vasega lima i lena taimi i le Aoga Mauualalo o Plaza Towers. O loo tatou faatasi ai iinei ma ia ma lona tina i le asō.

Na faapupuu Tori ma se vaega o ana uo i le faleletaua mo se lafitaga a o osofaia e le asiosio le aoga. Faafogoga a o ou faitau atua upu a Tori lava ia i le tala o lena aso:

“Sa ou faalogo i se mea o tau i le tualuga. Sa ou faapea ua na o se faailo. Na faasolo ina leotele. Sa ou faia se tatalo ina ia puipui ma tausia saogalemu i matou uma e le Tama Faalelagi. Na faafuasei lava ona matou faalogoina se pa’o leotele e pei o se masini mimiti otaota, ma na nimo ese le tualuga i luga ae o o matou ulu. Sa matua tele le savili ma otaota na felele solo ma taia ai lo’u tino atoa. Sa pogisa atu fafo ma na foliga mai ua pouliuli le lagi, ae leai—o totonu lea o le asiosio. Sa na o lo’u moeiini ma faamoemoe ma tatalo o le a vave ona mouese atu.

“Na faafuasei lava ona filemu.

“Ina ua ou pupula atu, sa ou vaaia se laupapa faailo taofi i luma tonu o ou mata! Na toetiiti lava a pai i lou isu.”⁶

O Tori, lona tina, ma ona tei e toatolu, ma le tele o uo, ia na latou i ai foi faatasi i le aoga, na faasaoina faavavega mai i lena asiosio; ae toafitu a latou uo aoga sa lei faasaoina.

I le faaiuga o lena vaiaso na faia ai e uso perisitua le tele o faamanuiaga i tagata na mafatia i le afa. Sa faamaualaloina au e tuu atu se faamanuiaga ia Tori. A o ou tuuina ou lima i luga o lona ulu, na oo mai i lou mafaufau se mau ou te fiafia lava i ai: “O le a Ou alu muamua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo’u Agaga i o outou loto, ma sio faataamilo outou e au agelu, e sapaapapai outou i luga.”⁷

Sa ou fautuaina Tori ina ia manatua le aso na faaee atu ai e se auauna a le Alii ona lima i luga o lona ulu ma folafola atu o le a puipuia o ia e agelu i le afa.

O le aapa atu o le tasi e laveai mai le isi, i soo se tulaga, o se fuataga faavavau lea o le alofa. O le auaunaga lea sa ou molimauina i Okalahoma i lena vaiaso.

E tele lava, ina tatou maua le avanoa e fesoasoani ai i isi i o latou taimi o mafatiaga. I le aveai ai ma tagata o le Ekalesia, ua tofua maua uma e i tatou le tiutetauave paia “e tauave avega a le tasi, ina ia mama,”⁸ “e faanoanoa faatasi ma e faanoanoa,”⁹ ma ia “sii i luga lima ua tautau i lalo,



ma faamalosi tulivae ua vaivai.”¹⁰

Uso e ma tuafafine, ua matuai faafetai le Alii mo outou taitoatasi, mo itula lemafaitaulia ma auaunaga faatino, pe tele pe itiiti, ua tou tuuina atu ma le lotofoa ma le agalelei i aso taitasi.

Na aoao mai le Tupu o Peniamina i le Tusi a Mamona, “Pe a outou auauna atu i o outou uso-a-tagata, ua nao lo outou auauna atu lava lea i lo outou Atua.”¹¹

O le taulai atu i le auauna atu i o tatou uso ma tuafafine e mafai ona taitai atu ai i tatou i le faia o ni faaiuga paia i o tatou olaga i aso uma ma saunia ai i tatou e faataua ma fiafia i mea e fiafia i ai le Alii. O le faia o lea mea, tatou te molimauina ai i o tatou lava olaga o i tatou o Ona so’o. A tatou punouai i Lana galuega, tatou te lagonaina le faatasi mai o Lona Agaga ma i tatou. Tatou te tuputupu ae i le molimau, faatuatua, talitonu, ma le alofa.

Ou te iloa o loo soifua lou Togiola, o Iesu Keriso; ma o loo Ia fetalai mai ma ala mai i Lana perofeta pele, o Peresitene Thomas S. Monson, i o tatou nei aso.

Tau ina ia tatou maua uma le olioli lea e sau mai auaunaga paia o le tauaveina o avega a le tasi ma le isi, e oo lava i na avega faatauvaa ma itiiti, o lau tatalo lea i le suafa o Iesu Keriso, amene. ■

FAAMATALAGA

1. Numerā 11:16–17.
2. Thomas S. Monson, “O Le a se Mea ua Ou Faia mo se Tasi i le Aso?” *Liahona*, Nov. 2009, 86, 87.
3. Mataio 19:20–21.
4. Mataio 19:22.
5. Mataio 19:21.
6. Aafiaga o Victoria (Tori) Sorrels, na toe faamatalaina i le aso 16 Ian., 2014.
7. Mataupu Faavae ma Feagaiga 84:88.
8. Mosaea 18:8.
9. Mosaea 18:9.
10. Mataupu Faavae ma Feagaiga 81:5.
11. Mosaea 2:17.



Saunia e Elder Carlos H. Amado

○ Le Fitugafulu

○ Keriso le Togiola

O le taulaga [o le Togiola] na faamanuiaina ai tagata uma, mai ia Atamu, o le tagata muamua e oo i le tagata mulimuli o tagata soifua uma.

○ Iesu Keriso, o le Alo o le Atua, sa soifua mai ma maliu i se tulaga uiga ese. Sa ia soifua ma tuputupu ae i tulaga maualalo, e aunoa ma ni mea faaletino. Sa ia fetalai e uiga ia te Ia lava, “E fai lua o alope, e fai foi mea e momoe ai manu felelei; a o le Atalii o le tagata, e leai se mea e moe ai o ia” (Luka 9:58).

Na te lei mauaina ni viiga, ni faamamaluga, aloaiaina, po o se taulimaina faapitoa mai i ni taitai faalemalo o le lalolagi pe mai i taitai faalelotu o Ona aso. Pe sa Ia nofoia foi le nofoa sili i sunako.

Sa faigofie Lana talaiga, ma e ui na toatele tagata sa mulimuli ia te Ia, ae o Lana galuega i taimi uma sa aofia ai le faamanuiaina o tagata taitoatasi. Sa ia faatinoina le anoanoai o vavega ia i latou na taliaina o Ia o Le na auina mai e le Atua.

Na Ia tuuina atu i Ana Aposetolo le pule ma le mana e fai ai vavega “ma galuega sili” nai lo na [galuega] sa Ia faatinoina (Ioane 14:12), ae sa Ia le faamatuu atu lava ia i latou le avanoa e faamagaloina ai agasala. Sa le fiafia Ona fili ina ua latou faalogo ia te Ia o fetalai atu, “Alu ia oe, aua e te toe agasala” (Ioane 8:11) po o le “Ua faamagaloina [au] agasala” (Luka 7:48). O lena aia tatau sa na o Ia e onaina aua

o Ia lava o le Alo o le Atua ma o le a Ia togotia na agasala i Lana Togiola.

○ Lona Mana i le Oti

O Lona mana e pulea ai le oti o se isi uiga paia. O Iairo maoae, o se pule i le sunako, sa ia aioi atu “ia maliu atu o ia i lona fale: aua o lona afafine e toatasi, . . . o le a oti ia” (Luka 8:41–42). Sa faafofoga le Matai i lana aioi, ma a o latou savavali, sa oo atu se auauna ia Iairo ma tau atu ia te ia, “Ua oti lou afafine; soia e te faalavelaveina le A’oa’o” (Luka 8:49). Ina ua Ia ulufale atu i le fale, sa talosaga atu Iesu i tagata uma e o i fafo, ma i le taimi lena, a o tago atu i lona lima, sa Ia fetalai atu ia te ia, “Tulai ia!” (Luka 8:54).

I se tasi taimi, a o Ia malaga i le aai o Naina, sa Ia tau atu i se savaliga mo se maliu, o se fafine ua oti lana tane o loo tutulu ona o le maliu a lona atalii e toatasi. Ma le faatumulia i le alofa mutimutivale, sa Ia pa’i atu ai i le fata ma fetalai atu, “Le taulealea e, ou te fai atu ia te oe, Ina tulai ia” (Luka 7:14). Ina ua latou vaaia le vavega, sa latou vivii, “Ua tu mai ia te i tatou le perofeta sili; ma . . . ua asiiasi mai le Atua i lona nuu” (Luka 7:16). Sa sili atu ona ofoofogia lena vavega ona sa tau atu ia i latou ua oti moni lava le taulealea ma sa o atu e tanu o ia. Faatasi ai ma

ni talavou se toalua na toe faaolaina, o le faamaoniga o Lana pule ma le mana i le oti na maofa ai e talitonu ma matata’u ai ē na le fiafia ia te Ia.

O le taimi lona tolu na sili atu ona faagaetia. O Mareta, Maria, ma Lasalo o ni uso ma se tuagane e masani ona asiiasi i ai Keriso. Ina ua logoina o Ia e tagata i le gasegase o Lasalo, sa Ia nofo mo aso e lua ao le i oo atu ai i le aiga. A o faamafanafana atu ia Mareta i le maea ai o le maliu a lona tuagane, sa Ia molimau atu ia te Ia ma le manino, “O A’u nei o le toetu, ma le ola: o lē faatuatua mai ia te au, e ui lava ina oti, a e ola lava ia” (Ioane 11:25).

Ina ua fetalai atu le Faaola mo e na faanoanoa e aveese le maa mai le tuugamau, sa musumusumu atu Mareta ma le matamuli ia te Ia, “Le Alii e, ua oo ina manogi: aua o lona po fa lena!” (Ioane 11:39).

Ona faamanatu atu lea o ia ma le alofa e Iesu, “Pe na ou le fai atu ea ia te oe, Afai e te talitonu, ona e iloa lea o le mamalu o le Atua?” (Ioane 11:40). Ma ina ua maea ona ia fetalai atu i lena mea, sa Ia alaga atu ma le leotele:

“Lasalo e, ina sau ia i fafo.

“Ona alu ai lea i fafo o le na oti” (Ioane 11:43–44).

Ina ua mavae aso e fa o Lasalo i le tuugamau, sa fetalai ai fili o le Alo o le Atua ma faamaoniga maumaututu sa o latou lē mafai ona lē amanaiaina, ta’ufaatauvaaia, pe faaseseina, ma lo latou faavalevave ma le lotoleaga “talu foi i lea aso . . . ua latou taupulepule ai e fasioti ia te ia” (Ioane 11:53).

○ Le Poloaiga Fou

Mulimuli ane, sa faamanatuina e le Keriso soifua i Ierusalem, faatasi ai ma Ana Aposetolo, o Lana Tausamaaga mulimuli o le Paseka, faavaeina o le sauniga o le faamanatuga, ma tuuina atu le poloaiga ia i latou ia fealofani e ala i le auauna atu ma le faamaoni.



O Ona Mafatiaga i Ketesemane

Ina ua mavae lena, i le faaaliga sili-sili o Lona alofa mo tagata soifua, ma le faatinoga atoa i Lona finagalo, sa savalia ma le lototoa ma le naunautai ia fetaii ma Lona tofotofoga sili ona faigata. I le Faatoaga o Ketesemane, ma le tuuatoatasi atoa, sa Ia pagatia i mafatiaga sili ona ogaoga, ma le toto na tafe mai i ona pu afu uma. I le usi-usitai atoa i Lona Tama, sa Ia togiola ai mo a tatou agasala ma ave i Ona luga o tatou ma'i ma mafatiaga ina ia mafai ona iloa fesoasoani ia i tatou (tagai Alema 7:11–13).

O loo tatou nofo aitalafu ia te Ia ma loo tatou Tama Faalelagi, aua o Lana tau-laga na faamanuiaina ai tagata uma, mai

ia Atamu, o le tagata muamua e oo i le tagata mulimuli o tagata soifua uma.

O Le Faasalaga ma le Faasatauroga o le Faaola

O le taimi lava na faaiu ai Lona mafatiaga i Ketesemane, sa Ia tuuina atu o Ia lava ma le loto malie i Ona fili. I le faalataina ai e se tasi o Ona lava [soo], sa vave ona faasalaina o Ia, i se auala o le amioletonu ma le solitulafono, i se faamasinoga na faaseseina ma lē atoatoa. O lena lava po sa tuuaia ai o Ia i le solitulafono o le upuleaga ma faasalaina ai i le oti. I lo latou ita ma le ma'ema'ea mo le tauimasui—ona sa Ia molimau atu ia i latou o Ia o le Alo o le Atua—sa taupulepule Ona

fili mo Pilato e faasala ia te Ia. Mo lena mafuaaga, sa o latou suia ai le tuuaiga o le upuleaga i le fouvale ina ia maliu o Ia e ala i le faasatauroina.

O Lona faasalaga sa sili atu ona mataga i tagata Roma: o a latou tau-emuga ma faitioga e tusa ai ma Lona malo faaleagaga, o le maasiasi o le faapaleina i se pale tuitui, o le sasaina o Ia ma le tiga, ma le mafatia faaumiumi o Lona Faasatauroga i luma o tagata sa avea uma ma se lapataiga manino mo tagata uma o e sa ono tofotofu e tautino atu o ia lava o Sona soo.

I taimi uma o Ona mafatiaga, sa faaalai ai e le Togiola o le lalolagi se loto pulea tulaga ese. Sa ia manatu i taimi uma i le faamanuiaina o isi;

faatasi ai ma le agalelei ma le agaalofa, sa ia augani atu ia Ioane e tausi Lona tina, o Maria. Sa Ia talosaga atu i Lona Tama i le Lagi e faamagalo i tagata faaosala na faasatauroina o Ia. Faatasi ai ma Lana galuega ua faataunuina i le lalolagi, sa Ia tuuina atu ai Lona agaga i le Atua ma to ai Lana manava mulimuli. Sa avatu i le tuugamau le tino faaletino o Keriso ma tuu ai iina mo aso e tolu.

O Le Galuega a le Faaola i Ē ua Oti

A o mafatia Ona soo mai le faanoanoa, lotovaivai, ma le le mautonu, sa faalatele atu ai e lo tatou Faaola, i se isi vaega o le fuafuaga matagofie a Lona Tama, Lana galuega i se auala fou. I se vaitau puupuu o aso e tolu, sa Ia galue ai ma le le faavaivai e faatulaga le galuega tele o le faaolataga

i e ua oti. O na aso na avea ma nisi o aso sa sili ona faatumulia i le faamoe-moe mo le aiga o le Atua. I le taimi o lena asiasiga, sa Ia faatulagaina ai Ona soo faamaoni ina ia o latou tau atu le tala lelei o le faaolataga ia i latou o e lei mauaina se malamalama o le fuafuaga matagofie i lenei olaga po o e na latou teenaina. O le a o latou maua nei le avanoa e saoloto ai mai lo latou nofopologa ma ia togiolaina e le Atua i latou uma o e ola ma e oti (tagai MF&F 138:19, 30–31).

O Uluai Fua o le Toetu

Faatasi ai ma Lana galuega na faamaeaina i le lalolagi o agaga, sa Ia toe foi mai ai i le lalolagi—e tuufaatasia lona Agaga ma Lona tino faaletino e faavavau. E ui lava sa Ia faaalua atoa Lona mana i le oti, ae o tala

faatatusigaga paia o i latou sa Ia toe faafoisia mai i le ola a o lei oo i Lona Toetu ua faailoa mai ai ua na ona latou toe o mai i se olaga sa faaaauau pea ma le ofoofogia; ae o le a latou maliliu lava.

O Keriso o le tagata muamua na toetu ma o le a le toe maliu lava, ina ia maua se tino atoatoa e faavavau. I Lona tulaga toetu, sa ia faaali atu ai ia Maria, o lē sa vave ona ia iloaina o Ia, ma amata ai ona tapuai ia te Ia. Na lapatai atu lo tatou Togiola ma le agalelei tele ia te ia e tusa ai ma Lona tulaga fou ma le mamalu: “Aua e te tago mai ia te au; aua ou te lei alu ae lava i lo’u Tama” (Ioane 20:17)—na tuuina atu ai se faamaoniga faaopoopo o Lana galuega i le lalolagi o agaga e moni ma atoatoa. Ona sosoo lea, o le faaaogaina o upu e faamautu ai le moni o Lona Toetu, sa Ia fetalai ai, “Ou te alu ae i lo’u Tama, ma lo outou Tama; o lo’u Atua, ma lo outou Atua” (Ioane 20:17). Ina ua maea ona alu ae i Lona Tama, sa Ia toe foi mai ma faaali mai i Ana Aposetolo; “Ona faaali atu lea ia te i latou o ona lima ma lona itu. Ona olioli ai lea o le au soo ina ua latou vaai atu i le Alii” (Ioane 20:20).

O Le A Toe Afio Mai le Togiola

Ou te molimau atu o le a toe afio mai Keriso i se auala e matuai ese lava mai Lona uluai afio mai muamua. O le a Ia afio mai i le mana ma le mamalu, faatasi ai ma Au Paia amiotonu ma faamaoni. O le a Ia afio mai o se Tupu o Tupu ma le Alii o alii, o le Aloalii o le Filemu, o le Mesia na folafolaina, o le Faaola ma le Togiola, e faamasino i e ola ma e ua maliliu. Ou te alofa ma auauna ia te Ia ma lou loto atoa, ma ou te aioi atu ina ia mafai ona tatou auauna atu ma le olioli ma le tuuto, ma ia mafai ona tatou tumau faamaoni ia te Ia seia oo i le iuga. I Lona suafa, o Iesu Keriso, amene. ■





Saunia e Linda S. Reeves

Fesoasoani Lua i le Au Peresitene Aoao o le Aualofa

Puipuiga mai Ponokalafi—o se Aiga e Taulai atu ia Keriso

O le faamama silisili i le lalolagi . . . le faamama lea e i totonu o le tagata lava ia lea e oo mai i se molimau loloto ma tumau.

Uso e ma tuagane, ua faamanu-
iaina lava au i le aso, i le i ai o
fanau a fanau pito i matutua e
toa 13 i le faapotopotoga. O le latou
i ai iinei ua mafua ai ona ou fesili atu
“O le a se mea ou te manao ia iloa e
fanau a au fanau?” O lenei taeao ou te
fia talanoa tuusao atu lava i lo’u aiga
atoa ai ma o outou [aiga].

I le avea o i tatou ma ni taitai, ua faa-
teleina ai lo tatou popole e uiga i le faa-
tamaiga o loo faia e ponokalafi i olaga o
tagata o le Ekalesia ma o latou aiga. Ua
osofai mai Satani ma le maemaea tele.

O se tasi o mafuaaga ua tatou i
ai iinei i le fogaeleele ina ia aoao e
pulea o tatou tuinanauga ma lagona
o o tatou tino faaletino. E fesoasoani
nei lagona ua tuuina mai e le Atua ia i
tatou ia mananao e faaiipoipo ma maua
fanau. O le sootaga vavalalata faale-
ulugalii i le va o le tane ma le ava lea e
aumaia ai fanau i le olaga faitino e faa-
tatau foi lea i se aafiaga matagofie ma
faapelepele lea e noatia faatasi ai loto
tuuto e lua, tuufaatasia uma ai le agaga
ma le tino, ma aumaia ai le atoaga o le

olioli ma le fiafia a o tatou aoao ina ia
faamuamua e le tasi le isi. Na aoao mai
Peresitene Spencer W. Kimball e uiga
i le faaiipoipoga, “o le toalua . . . o le
faatumutumuga lea o le olaga o le tane
po o le ava, ma . . . [e leai] se isi lava
mea e suitulaga i luma atu o lau soa
po o lou toalua.

“O le faaiipoipoga e manaomia ai le
tuuto atoatoa ma le faamaoni a’ia’i.”¹

I le tele o tausaga ua mavae sa
iloagofie ai le popole o se tasi o le
ma fanau. Sa ou savali atu i lona potu-
moe, lea sa ia tatala mai ai lona loto ma
faamatala mai ia te au lona i ai i le fale
o se uo—ma faafuasei lava ona vaaia ni
ata ma ni amioga le lelei na faateia ai i
luga o le televise i le va o se alii ma se
tamaitai sa lē lavalavā. Sa amata ona ia
tagi masusu ma faaalua lona lagona le
fiafia i le mea sa ia vaaia ma moomoo
mimau pe ana mafai ona aveese mai
lona mafaufau. Sa ou matua faafetai i
lona tauina mai ia te au, tuu mai ai ia
te au se avanoa e faafilemu ai lona tau-
maimana ma le loto tiga ma fesoasoani
ina ia ona iloa le auala e maua ai le

fesoasoani e ala i le Togiola a lo tatou
Faaola. Ou te manatua ia lagona paia
sa ou maua ao ma tootutuli faatasi, o se
tina ma se tama teine, ma talosagaina le
fesoasoani a lo tatou Tama Faalelagi.

O le toatele o tamaiti, talavou,
ma tagata matutua o loo aafia fua i
ponokalafi, ae o se fuainumera faatu-
pulaia o alii ma tamaitai o loo filifili e
matamata i ai ma toe tosina soo pea i
ai seia oo ina avea ma se vaisu. Atonu
o nei tagata ua mananao ma o latou
loto atoa ina ia o ese mai lenei mailei,
ae o le tele o taimi ua le mafai ona faa-
toilalo ai e i latou lava. Tatou te matua
faafetai pe a filifili nei tagata e pele ia
i tatou e tauina mai ia i tatou o matua
po o se taitai o le Ekalesia. O le a tatou
atamamai e le tali atu ma le te’i, ita, po
o le tetee, lea e ono mafua ai ona latou
le toe talanoa mai.

I le avea ai o i tatou ma matua ma
taitai, e manaomia le fefautuaai ma
a tatou fanau ma talavou i se tulaga
faifaipea, faalogo atu ma le alofa ma le
malamalama. E tatau ona latou iloa le
matautia o ponokalafi ma le auala na
te puleaina ai olaga, lea e mafua ai le
aluese o le Agaga, lagona lē mautonu,
taufaasese, faatamaiaina ai mafutaga,
leai ai se loto pulea, ma le toetiiti faaalu
atoa ai le taimi, mafaufau, ma le malosi.

Ua sili atu le mataga, faatiapolo,
ma faatosina o ponokalafi i le taimi
nei nai lo se isi lava taimi muamua.
Ao tatou fefautuaai ma a tatou fanau,
o le a mafai ona tatou fatuina faatasi
se fuafuaga faaleaiga i tulaga faatonu-
ina ma tuaoi, ia mataala i le puipuia
o o tatou aiga i le faafoeina o masini
faaeletonika. Matua, o tatou iloaina ea
o masini feaveai o loo i ai gafatia tau
Initoneti, e le o komepiuta, o le faafita-
uli silisili lena?²

Autalavou ma tagata matutua,
afai ua saisaitia oe i mailei a Satani o
ponokalafi, ia manatua le alofa muti-
mutivale o lo tatou Faaola pele. Pe



Raymond, Alberta, Kanata

ua e iloaina le loloto o le alofa ma le pele o oe i le Alii, e oo lava i le taimi nei? Ua i ai i lo tatou Faaola le mana e faamama ma faamalolo ai oe. E mafai ona Ia aveesea le tiga ma le faanoanoa o loo e lagonaina ma toe faamamaina oe e ala i le mana o Lana Togiola.

I le avea ai o i tatou ma taitai, ua matua popole tele e uiga i taitoalua ma aiga o i latou o loo mafatia mai le vaisu o ponokalafi. Na aioi mai Elder Richard G. Scott: “Afai o e saoloto mai se agasala matuia, aua nei e pologa fua i taunuuga o agasala a se isi tagata. . . . E mafai ona e lagonaina le agaalofa . . . Ae e le tatau ona e tauaveina i ou lava luga se lagona o le noatiaina mo na amioga.”³ Ia e iloa e le o tuua na o oe. E i ai se fesoasoani. O loo ua i ai fonotaga o le faaleleia mai vaisu, e aofia ai fonotaga e faia i telefoni, lea e faataga ai taitoalua e valaau mai i se fonotaga ma auai mai i o latou lava fale.

Uso e ma tuagane, o faapefea ona tatou puipua a tatou fanau ma talavou? O faamama o ni meafaigaluega aoga, ae o le faamama silisili i le lalolagi, ma e na o le pau lea o le mea o le a iu ina aoga, o le faamama lea e i totonu o le tagata lava ia lea e oo mai i se molimau

loloto ma tumau i le alofa o lo tatou Tama Faalelagi ma le taulaga togiola a lo tatou Faaola mo i tatou taitoatasi.

E faapefea ona tatou taitaiina a tatou fanau i le liua loloto ma ia maua le Togiola a lo tatou Faaola? Ou te fiafia i le folafolaga a le perofeta o Nifae e uiga i mea na faia e lona nuu e faamallosia ai le autalavou i lona vaitaimi. “Ua matou tautalatala e uiga ia Keriso, ua matou olioli ia Keriso, ua matou talai atu Keriso, [ma] ua matou vavalo e uiga ia Keriso . . . ina ia mafai ona iloa e a matou fanau po o le a le puna e mafai ona latou tepa taulai i ai mo se faamagaloga o a latou agasala.”⁴

E faapefea ona tatou faia lenei mea? i totonu o tatou aiga? O nisi o outou na faalogo o ou faamatalaina le ala na faagaetia ai i maua ma lo’u toalua o Mel i le avea ai ma matua o se fanau talavou e toafa. A o ma fetaiai ai ma luitau faamatua i le faataunuaina o manaoga o le olaga, sa ma matua manaomia lava se fesoasoani. Sa ma tatalo ma aioi atu ia iloa le mea e fai. Na oo mai se tali manino: “E le afaina pe a palapala le fale ma o loo ofuina pea e tamaiti o latou ofu moe ma e lei faia nisi o feau. E na o le pau le mea e

tatau lava ona fai i le aiga o le suesue i tusitusiga paia ma tatalo i aso uma, ma afiafi faaleaiga faalevaiaso.”

Sa ma taumafaia nei mea, ae sa lei avea i taimi uma ma mea e faamuamua, i le totonugalemu o le le mautonu, na le faataunuaina ai i nisi o taimi. Sa suia la ma vaaiga e aua nei popole i mea e itiiiti le taua. O le ma taulaiga o le talanoa, olioli, talai, ma molimau atu ia Keriso e ala i le taumafai e tatalo ma suesue i tusitusiga paia i aso uma ma faia afiafi faaleaiga faalevaiaso.

Sa lapatai mai se uo talu ai nei, “A e talosagaina ia tamaitai e faitau tusitusiga paia ma tatalo soo, e faapopoleina ai i latou. O latou lagona o i ai e pei ua tele naua mea o latou faia.”

Uso e ma tuagane, talu ai ua ou iloa mai ou aafiaga, ma aafiaga a lou toalua, e tatau ona ou molimau atu i faamanuiaga o le suesue i tusitusiga paia i aso uma, ma tatalo, ma afiafi faaleaiga faalevaiaso. O faataitaiga tonu ia o le a fesoasoani i le aveesea o le popole, ma taitaia o tatou olaga, ma faaopopo atu se puipuga i o tatou aiga. Afai e osofaia o tatou aiga e ponokalafi po o nisi faafitauli, e mafai ona tatou ole atu i le Alii mo se fesoasoani ma faamoemoe

mo se taitaiga sili mai le Agaga, i le iloaina na tatou faia le mea na finagalo mai lo tatou Tama tatou te faia.

Uso e ma tuagane, afai e lei faaitaia nei mea i o tatou aiga, e mafai ona tatou amataina nei loa. Afai e matutua atu a tatou fanau ma e mumusu e faatasi ma i tatou, e mafai ona tatou faia e i tatou lava. A tatou faia, o le a amata ona faatumulia o tatou aiga ma o tatou olaga e le uunaiga a le Agaga ma i le aluga o taimi, e ono tali mai le fanau.

Ia manatua ua folafola mai foi e Aposetolo soifua, a o tatou saili o tuua ma saunia igoa o o tatou lava aiga mo le malumalu, o le a puipuia i tatou i le taimi nei ma i o tatou olaga atoa a o tatou tausia i tatou lava ia agavaa mo se pepa faataga o le malumalu.⁵ Oka o ni folafolaga!

Talavou, ia galue mo lou lava tulaga manuia faaleagaga. Tape lau telefoni pe a tatau ai, usu se pese Peraimeri, tatalo mo se fesoasoani, mafaufau i se mau, savali i fafo mai se ata tifaga, mafaufau i le Faaola, tago atu ma le agavaa i le faamanatuga, suesue i le *Mo le Malosi o le Autalavou*, aveva ma faaitaiga i au uo, talanoa i se matua, alu e vaai lou epikiopo, fesili mo se fesoasoani, ma saili ni fautuaga faapolofesa, pe a manaomia.

O le a se mea ou te mana'o ia iloa e fanau a au fanau? Ou te mana'o ia i latou faapea ma outou ia iloa ou te iloa o loo soifua le Faaola ma e alofa ia i tatou. Ua uma ona Ia totogiina le tau mo a tatou agasala ae e tatau ona tatou tootutuli i luma o lo tatou Tama oi le Lagi, i le matua faamaualalo lava, tautau atu a tatou agasala, ma ole atu ia te Ia mo le faamagaloga. E tatau ona tatou manana'o ia suia o tatou loto ma o tatou manaoga ma ia lava le lotomaualalo e saili ai le fesoasoani ma le faamagaloga a i latou atonu na tatou faatiga i ai pe na tuulafoaia.

Ou te iloa na vaai Iosefa Samita i

le Atua, lo tatou Tama Faalelagi, ma lo tatou Faaola, o Iesu Keriso. Ou te molimau atu ua i ai so tatou perofeta soifua i luga o le fogaeleele o, Peresitene Thomas S. Monson. Ou te molimau atu foi o le a le taitaiseseina i tatou pe afai tatou te mulimuli i fautuaga a le perofeta a le Atua. Ou te molimau atu i le mana o a tatou feagaiga ma faamanuiaga o le malumalu.

Ou te iloa e moni le Tusi a Mamona! E le mafai ona ou faamatalaina le mana o lenei tusi maoae. E na o lou iloaina o lena mea, faatasi ai ma le tatalo, o le Tusi a Mamona e tauaveina le mana e puipuia ai aiga, faamalositia ai mafutaga, ma aumaia ai le talitonuga patino i luma o le Alii. Ou te molimau atu ai

i nei mea uma i le suafa paia o Iesu Keriso, amene. ■

FAAMATALAGA

1. *Aoaoga a Peresitene o le Ekalesia: Spencer W. Kimball* (2006), 223–24.
2. Tagai Clay Olsen, “What Teens Wish Parents Knew” (address given at Utah Coalition Against Pornography Conference, Mar. 22, 2014); utahcoalition.org.
3. Richard G. Scott, “Ia Saoloto Mai Avega Mamafa,” *Liahona*, Nov. 2002, 88.
4. 2 Nifae 25:26.
5. Tagai David A. Bednar, “O Le A Liliu Atu Loto o Fanau i o Latou Tama,” *Liahona*, Nov. 2011, 24–27; Richard G. Scott, “O Le Olioli i le Faaolaina o E ua Maliliu,” *Liahona*, Nov. 2012, 93–95; Neil L. Andersen, “Find Our Cousins!” (lauga na tuuina atu i le RootsTech 2014 Family History Conference, Feb. 8, 2014); lds.org/prophets-and-apostles/unto-all-the-world/find-our-cousins.





Saunia e Elder Neil L. Andersen

○ Le Korama a Aposetolo e Toasefululua

○ Asiosio Faaleagaga

Aua nei tuuina atu i asiosio e tosoina outou i lalo. O o outou aso nei—e tutu malolosi ai o ni soo o le Alii o Iesu Keriso.



○ u te faafeiloai atu ia te outou i lenei taeo—aemaise lava le tupulaga talavou o e o i ai iinei i le Maota Autu mo Konafesi ma le lalolagi atoa. O outou o se tupulaga filifilia o se taunuuga faapitoa, ma ou te talanoa faapitoa atu ia te outou.

I le tele o tausaga ua mavae a o matou asiasi atu i lo matou aiga i Florida, sa agi ai se asiosio e le mamao tele mai le nofoaga sa matou i ai. O se tasi o tamaitai sa nofo i se fale feaveai, sa alu i lona faleletaua mo le saogalemu. Sa amata ona luluina le fale feaveai. Na mavae sina taimi. Ona ia faalogoina lea o le leo o lona tuaoi: “O au lea ou te i i le potu i luma.” Ina ua sau i fafo mai le faleletaua, sa faateia o ia i lona iloa ai sa sii e le asiosio lona fale feaveai ma ave i luga i le ea, ma faatu sa’o lelei i luga

tonu o le fale feaveai o lona tuaoi.

Au uo talavou, o le a le avea le lalolagi ma se nofoaga toafimalie a o tatou tulalata atu i le Afio Mai Faalua o le Faaola. Ua folafola mai e tusitusiga paia e faapea “o le a vāvāō mea uma.”¹ Na saunoa mai Polika Iaga, “Sa faaalua mai ia te au i le amataga o lenei Ekalesia, e faapea o le a salalau atu, uluola, tupu-tupuae ma faalautele atu le Ekalesia, ma o le faateleina o le salalau atu o le Talalelei i malo o le lalolagi, o le faateleina foi lena o le mana o Satani.”²

O mea e sili atu ona popole i ai nai lo o mafuie ma taua³ sa valoia, o asiosio faaleagaga e mafai ona seieseina e mai lou faavae faaleagaga ma tuuina lou agaga i tulaga e te le i mafaufauina e mafai, ma o nisi taimi e te tau lei iloaina ua sii ese oe mai lou faavae faaleagaga.

O asiosio sili ona leaga o faaososoga ia a le fili. E avea pea le agasala ma se vaega o le lalolagi, ae e lei matua faigofie lava ona oo i ai, faigofie tele ona faamalieina, ma ua matua taliaina lava. O le mea moni, o loo i ai se malosiaga mamana o le a sao ai mai asiosio o le agasala. Ua ta’ua o le salamo.

E le o asiosio uma o le olaga e mafua mai ona o au amioga. E oo mai

O laau e ola a’e i se siosiomaga e matāgiā e malolosi.

nisi [o asiosio] ona o filifiliga sese a isi, ma o nisi e oo mai ona o le olaga faaletino lenei.

A o avea ma se tama talavou, sa mafatia ai Peresitene Boyd K. Packer mai le faamai pipili. Ina ua fitu tausaga o Elder Dallin H. Oaks sa faafuasei ona maliu lona tama. A o talavou Sister Carol F. McConkie o le au peresitene aoao o Tamaitai Talavou, sa tete’a ona matua. E oo mai luitau ia te oe, ae a e faalagolago i le Atua, o le a latou faamalosi lona faatuatua.

I le natura, o laau e ola a’e i se siosiomaga matagiā e malolosi atu. Pe a agi se matagi i autafa o se laau mu’a, o malosiaga i totonu o le laau na te faia ni mea se lua. Muamua, latou te faatupuina ia a’a ina ia tutupu vave ma sosolo mamao atu. Lona lua, e amata fatu e malosiaga i totonu o le laau ni sela ia e faamafafaiaina le ogalaau ma lala ma atili lavātia ai le malosi o le matagi. O nei aa ma lala malolosi atu e puipuia le laau mai matagi ia e mau-tinoa lava e toe foi atu.⁴

E manino lava e sili atu lou taua i le Atua nai lo o se laau. O oe o Lona atalii po o Lona afafine. Na Ia foafoaina lou agaga ia malosi ma mafai ona tetee atu i asiosio o le olaga. O asiosio o lou talavou, e pei o le matagi e taia ai se laau mu’a, e mafai ona faateleina ai lou malosi faaleagaga,





e saunia ai oe mo tausaga o i luma atu.

E mafai faapefea ona e saunia mo au asiosio? “Ia manatua, o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e le tiapolo ana matagi malolosi, . . . ana ufanafana i le asiosio, . . . pe a pesi mai ia te oulua ana uatoa uma ma lana afa malosi, o le a leai sona mana i luga o oulua e toso ifo ai oulua i lalo . . . ona o le papa lea ua oulua atinae ai i luga.”⁵ O lou saogalemu lea i le asiosio.

Na saunoa mai Peresitene Thomas S. Monson faapea, “I se tasi taimi na tele lava ina tutusa tulaga faatonuina o le Ekalesia ma tulaga faatonuina o malo, o le taimi nei ua i ai se va telē i lo tatou va, ma o loo faatupulaia pea le lautelē o lena va.”⁶ Mo nisi, o lenei va telē ua tutupu mai ai ni asiosio malolosi faaleagaga. Sei ou faasoa atua se faataitaiga.

O le masina ua tea nei sa faasalalau atu ai e le Au Peresitene Sili ma le Korama a Aposetolo e Toasefululua se tusi i taitai o le Ekalesia i le salafa o le lalolagi. O loo i ai se vaega e faapea: “O suiga i tulafono faalemalo e le suia, ma e le mafai lava ona suia ai tulafono o amioga mama ua faavaeina e le Atua. Ua faamoemoeina i tatou

e le Atua ia tatou lagolagoina ma tausii Ana poloaiga e tusa lava po o a manatu eseese po o faiga i totonu o malo. O Lana tulafono o le ola mama ua manino: o sootaga faalefeusuaiga ua na o le va lava o se alii ma se tamaitai ua faaiipoipoina faaletulafono o se tane ma se ava. Matou te uunaia outou ia toe iloilo . . . le aoaoga faavae o loo i ai i totonu ‘O Le Aiga: O Se Folafolaga i le Lalolagi.’”⁷

Ao pauese atu le lalolagi mai le tulafono o le legavia a le Alii, o tatou e leai. Na saunoa Peresitene Monson: “Na faamatala e le Faaola o tagata, o ia lava sa i ai i le lalolagi ae le o se tasi o le lalolagi. E mafai foi ona tatou i ai i le lalolagi ae le o ni o le lalolagi pe a tatou teenaina manatu faavae sese ma aoaoga sese ma tumau ma le faamaoni i mea ua poloaiina ai i tatou e le Atua.”⁸

E ui o le toatele o tagata o malo ma tagata amio lelei ua toe faauiga ina le faaiipoipoga, ao le Alii e leai. I le amataga lava, na amatatia e le Alii le faaiipoipoga i le va o se alii ma se tamaitai—Atamu ma Eva. Sa ia mamauina faamoemoeina o le faaiipoipoga ia sili atu i lo le faamalieina o le tagata lava ia ma le manuia o le tagata matua, o le mea e sili ona taua, ia faateleaiina ai le faatulagaga atoatoa

mo le fanauina o fanau, tausiiaina ma faafaileleina. Ia aua lava nei o tatou faagaloina: o aiga o oa ia o le lagi.⁹

Aisea e faaauau ai pea ona tatou talanoa e uiga i lenei mea? E pei ona saunoa Paulo, “Matou [te] le manatunatu i mea ua vaaia, a o mea e le vaaia.”¹⁰ I le aveva ai ma Aposetolo a le Alii o Iesu Keriso, ua ia i tatou le tiutetauave o le aoao atu o le fuafuaga a lo tatou Foafoa mo Lana fanau ma ia lapatai atu e uiga i taunuuga o le le amanaiaina o Ana poloaiga.

Talu ai nei, sa ou talanoa ai i se Lora e nofo i le Iunaite Setete. Ou te sii mai i lana imeli.

“O le tausaga ua mavae atu nei sa amata ai ona tusia e nisi o au uo i luga o le Facebook o latou manatu e uiga i le faaiipoipoga. Sa toatele na lagolagoina le faaiipoipoga o le itupa e tasi, ma e feoloolo nai talavou o le Ekalesia sa faailoaina lo latou ‘fiafia’ i le tusiga. E leai sa’u faamatalaga na faia.

“Sa ou filifili loa e tau atu lou talitounuga i le faaiipoipoga ua masani ai i se ala magafagafa lelei.

“I lo’u ata i lou talaaga ootoo, sa ou faaopoopo i ai le faamatalaga, ‘Ou te talitonu i le faaiipoipoga i le va o se alii ma se tamaitai.’ Sa lei pine ae amata ona ou mauaina ni feau. ‘E te manatu faapito.’ ‘E te tusitusilima.’



Ina ua uma ona folafola atu lona talitonuga i le faaipoipoga ua masani ai, sa maua e se Lora ni savali le lelei mai ni uo.

Sa faatusaina au e se tasi o se pule o pologa. Ma sa ou mauaina lenei tusiga mai se uo lelei tele o ia o se tagata malosi o le Ekalesia, 'E ao ona faafou ou manatu. O loo suia lava ia mea ma ua tatau foi ona e sui.'

"Ou te le i toe finau i ai," o lana tala lea, "ae ou te le i aveesea lau faamatalaga mai luga o la'u itulau."

Sa ia faaiuina e faapea: "O nisi taimi, e pei ona saunoa mai Peresitene Monson, 'E tatau ona e tu na o oe.' E faamoemoe i le avea ai o ni talavou, o le a tatou tutu faatasi i le faamaoni i le Atua ma i aooga a Ana perofeta soifua."¹¹

O se popolega taua ia i tatou o i latou ia o loo tauivi ma le faatosina atu i le itupa e tasi. O se asiosio ua matua saosaoa tele. Ou te fia faailoa atu lou alofa ma lou talisapaia o i latou o e fetaiai ma le lototoa i lenei tofotofoga o le faatuatua ma tumau faamaoni ai i poloaiga a le Atua!¹² Ae e manaomia e tagata uma, o e saoloto i a ana filifiliga ma talitonuga, lo tatou agalelei atu ma le popolega.¹³

Na aoao mai le Faaoa e le gata ina ia tatou alolofa atu ia tatou uo ae ia faapena foi ma i latou o e le tutusa o tatou manatu—ma e o lava ia i latou o e teena i tatou. Sa Ia fetalai mai: "Aua

afai tou te alolofa atu i e ua alolofa mai ia te outou, se a ea se tau i tou te maua ai? . . . Pe afai tou te faapito lo outou fealofani i o outou uso, se a se mea sili ua outou faia?"¹⁴

Na lapataia i tatou e le Perofeta o Iosefa Samita ina ia "faaeteete i le faa-faamiotonu" ma faatetele o tatou loto agai atu ia i latou o e e ese lo latou vaaiga i le lalolagi nai lo i tatou, e oo lava i le tulaga ua "tatou . . . mananao e tauaveina i latou i luga o o tatou tauau."¹⁵ I le talalelei a Iesu Keriso, e leai se nofoaga mo le taufaalili, faasaua, po o le faailogalanu.

Afai e i ai sau fesili e faatatau i le fautuaga mai taitai o le Ekalesia, faamolemole ia talanoaina ou popolega moni faatasi ma ou matua ma taitai. E te manaomia le malosi lea e oo mai i le faatuatua o perofeta a le Alii. Na saunoa Peresitene Harold B. Lee: "O lenei, na pau lava le saogalemu o loo i ai ia i tatou ma tagata o le ekalesia o le . . . gauai i upu ma poloaiga o le a tuuina mai e le Alii e ala mai i Ana perofeta. . . . E i ai mea o le a manaomia ai le onosai ma le faatuatua. Atonu o le a e le fiafia i mea o le a tau mai . . . E ono feteenai ma ou taofi faapolokiki . . . ou taofi faale-olaga. . . . faalavelave i . . . lou olaga tafao.

Ae a e faalogo i nei mea, e pei o loo tuuina mai i le fofoga o le Alii Lava Ia, . . . 'o le a le manumalo lava faitotoa o seoli ia te outou; . . . ma o le a tafieseaa e le Atua mana o le pouliuli mai ou luma . . .' (MF&F 21:6)."¹⁶

O le isi puipuga malosi mai asiosio o le olaga o le Tusi a Mamona lea.

A o talavou Peresitene Henry B. Eyring sa siitia atu lona aiga i se aai fou. Sa vave ona ia lagonaina le le fiafia o lea masiiese ma sa itiiti ni ana uo fou. Sa ia lagona e lei fetaui lelei ona uiga ma tamaiti i lana aoga maualuga. Sa amata ona ia fetaiai ma le asiosio. O le a le mea sa ia faia? Sa ia faaalu lona malosi i le Tusi a Mamona, e faitauina i le tele o taimi.¹⁷ I ni tausaga mulimuli ane, sa molimau ai Peresitene Eyring: "Ou te [fiafia] e saga suesue soo le Tusi a Mamona ma matuai inu soo mai ai."¹⁸ "[O se] molimau tusitusia sili lea ona mamana ua tatou maua e faapea o Iesu o le Keriso."¹⁹

Ua tuuina mai e le Alii ia te outou le isi auala e tutu mausali ai, o se meaalofo faaleagaga silisili ona mamana nai lo asiosio a le filii! Na Ia fetalai, "Tutu . . . i nofoaga paia, ma aua le masi'i ese."²⁰

A o ou talavou, sa na o le 13 malumu i le Ekalesia. O le taimi nei ua 142. E valu sefululima pasene tagata o



le Ekalesia ua aumau nei i totonu o le 200 maila (320 km) o se malumalu. Ua tuuina mai e le Alii i la outou tupulaga ia maua se avanoa tele atu e ulu atu ai i Ona malumalu paia nai lo se isi lava tupulaga i le talafaasolopito o le lalolagi.

Pe ua e tu ea i totonu o le malumalu, ua laei i laei papae, ma faatalitali e faia ni papatisoga? O a ni ou lagona? O loo i ai se lagona mamana o le paia i totonu o le malumalu. E faatoilalo e le filemu o le Faaola ia taaviliga o asiosio o le lalolagi.

O ou lagona i totonu o le malumalu o se mamana lea mo le auala e te manao ia lagonaina i lou olaga.²¹

Saili ou tamamatutua ma tinamatu-tua ma ou tausoga e vavā mamao le sootaga ua maliliu. Ia e alu i le malumalu ma ave o latou igoa.²² A o outou aoao e uiga i o outou tuua o le a outou vaaia ni mamana o le olaga, o faaipopoga, o fanau; o mamana o le amiotonu; ma i nisi taimi o ni mamana o le a e manao e aloese mai ai.²³

Mulimuli ane i totonu o le malumalu, o le a e aoao atili ai e uiga i le Foafoaga o le lalolagi, e uiga i le mamana o olaga o Atamu ma Eva, ma le mea e sili ona taua, e uiga i lo tatou Faaola o Iesu Keriso.

Ou uso e ma tuafafine talavou, matou te alolofa ia te outou, faamemelo ia te outou, ma tatalo mo outou. Aua nei tuuina atu i asiosio e tosoina outou i lalo. O o outou aso nei—e tutu malolosi ai o ni soo o le Alii o Iesu Keriso.²⁴

Ia fausia mausali atili o outou faavae i luga o le papa o lo outou Togiola.

Ia faaputu atili ma le atoatoa oa o Lona soifuaga ma aoaoga le mafaatusalia.

Mulimuli ma le filiga atili i Lana faataitaiga ma Ana poloaiga.

Talia atili ma le loloto le alofa o le Faaola, Lona alofa mutimutivale ma le alofa tunoa, ma meaalofoa mamana o Lana Togiola.



A e faia lenei mea, ou te folafola atu o le a e vaai i tulaga moni o asiosio—tofotofoga, faaososoga, faalavefau, po o luitau e fesoasoani i lou tuputupu ae. Ma a o e ola ai amiotonu i lea tausaga ma lea tausaga, ou te tautino atu ia te oe o le a faamautinoa atu e ou aafiaga ia te oe i lea taimi ma lea taimi o Iesu o le Keriso. O le maa faaleagaga lea i lalo o ou vae o le a mausali ma mautu. O le a e olioli ua tuuina oe e le Atua iinei ina ia ave ma se vaega o le sauniuniga faaii mo le toe afio mai faamamaluina o Keriso.

Na fetalai mai le Faaola, “Ou te le tuua outou o matuaoti, ou te sau ia te outou.”²⁵ O Lana folafolaga lea ia te oe. Ou te iloa e moni lenei folafolaga. Ou te iloa o loo soifua o Ia, i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 88:91.
2. *Discourses of Brigham Young*, sel. John A. Widtsoe (1954), 72.
3. Tagai Dallin H. Oaks, “Sauniuniga mo le Afio Mai Faalua,” *Liahona*, Me 2004, 7–10.
4. Tagai A. Stokes, A. H. Fitter, and M. P. Coutts, “Responses of Young Trees to Wind and Shading: Effects on Root Architecture,” *Journal of Experimental Botany*, vol. 46, no. 290 (Sept. 1995), 1139–46.
5. Helamana 5:12.
6. Thomas S. Monson, “Mana o le Perisitua,” *Liahona*, Me 2011, 66.
7. Tusi a le Au Perisitene Sili, 6 Mat, 2014; tagai foi David A. Bednar, “Matou Te Talitonu i le Nofomama,” *Liahona*, Me 2013, 41–44; Dallin H. Oaks, “Leai Ni Atua Ese,” *Liahona*, Nov. 2013, 72–75; *Mo le Malosi o le Autalavou* (tamaitusi, 2011), 35–37.

8. Thomas S. Monson, *Liahona*, Me 2011, 67.
9. Na saunoa Elder Russell M. Nelson: “O le faaipopoga o le faavae lea o sootaga fegalegaleai. . . . O lena tuufaatasiga ua le na o le va o le tane ma le ava; o loo aofia ai ma se faigapaaga ma le Atua” (“Faafailleina o Faaipopoga,” *Liahona*, Me 2006, 36). Tagai foi i le Mataio 19:5–6.
10. 2 Korinito 4:18.
11. Tusi ma talatalanoaga patino, 17. Mati, 2014; tagai foi Thomas S. Monson, “Ia Lototele e Tu Na o Oe,” *Liahona*, Nov. 2011, 60–67.
12. Tagai Jeffrey R. Holland, “Fesoasoani ia i Latou o loo Tauivi ma le Tosina Atu i Itupa Tutusa,” *Liahona*, Oke. 2007, 40–43.
13. E ui lava na saili e le anetikeriso o Korioa le faatamaia o le faatuatua o tagata, na puipuia o ia e tulafono a le Atua mai le tau ai atu: “Sa leai se tulafono e faasaga i talitonuga o se tagata; ona sa matua le tusa ai ma poloaiga a le Atua le i ai o se tulafono o le a aumai ai tagata i ni tulaga le tutusa. . . . Afai ua manao se tagata e auuina i le Atua, o lana aia lea; . . . ae afai e le talitonu o ia ia te ia sa leai se tulafono e faasala ai o ia” (Alema 30:7, 9). O le mataupu faavae o le faatuatua lona sefulutasi e faitauna faapea, “Ua ia i matou le aia tatau matou te tapuai atu ai i le Atua Mamana e tusa ai ma o matou lava lotofuatiaifo, ma ua matou tuuina atu foi lea aia tatau i tagata uma, e faitalia i latou, pe faapefea, po o fea, po o le a foi le mea latou te tapuai atu i ai.”
14. Mataio 5:46–47.
15. *Aoaoga a Perisitene o le Ekalesia: Iosefa Samita* (2007), 462.
16. *Aoaoga a Perisitene o le Ekalesia: Harold B. Lee* (2000), 92; tagai foi Robert D. Hales, “Konafesi Aoao: Faamalosi o le Faatuatua ma le Molimau,” *Liahona*, Nov. 2013, 6–8.
17. Tagai Robert I. Eaton ma Henry J. Eyring, *I Will Lead You Along: The Life of Henry B. Eyring* (2013), 40.
18. Henry B. Eyring, *Choose Higher Ground* (2013), 38.
19. Henry B. Eyring, *To Draw Closer to God* (1997), 118.
20. Mataupu Faavae ma Feagaiga 87:8; tagai foi Mataupu Faavae ma Feagaiga 45:32.
21. Tagai Mataupu Faavae ma Feagaiga 52:14.
22. Tagai Neil L. Andersen, “Find Our Cousins!” (address given at RootsTech 2014 Family History Conference, Feb. 8, 2014); lds.org/prophets-and-apostles/unto-all-the-world/find-our-cousins.
23. Tagai David A. Bednar, “O Le a Liliu Atu Loto o Fanau i o Latou Tama,” *Liahona*, Nov. 2011, 24–27.
24. Tagai Helamana 7:9.
25. Ioane 14:18.



Saunia e Peresitene Henry B. Eyring
Fesoasoani Muamua i le Au Peresitene Sili

O Se Tofi o le Faamoemoe e Le Mafaatauina

A e filifili pe osia pe tausia se feagaiga ma le Atua, ua e filifili foi pe o le a e tuua se tofi o le faamoemoe mo i latou e ono mafai ona mulimuli i au faataitaiga.

O uso e ma tuafafine, o nisi o outou sa valaauliaina i lenei sauniga e faifeautalai o Le Ekalesia a Iesu Keriso o le Au Paia o Aso e Gata Ai. O na faifeautalai atonu ua uma ona latou valaauliaina outou ia faia se filifiliga e osifeagaiga ma le Atua e ala i le papatisoina.

O isi o outou o loo faafofoga mai ona sa outou taliaina le valaaulia a se matua, pe atonu foi o se tamaitiiti, na tuu atu ia te outou ma le faamoemoe o le a outou filifili e tuu ia feagaiga ua uma ona outou osia ma le Atua i le totonugalemu o o outou olaga. O nisi o outou o loo faafofoga mai ua uma ona faia lenei filifiliga e tofoi atu i le Faaola ma o loo lagonaina i le asō le olioli o Lona talileleia o oe.

Po o ai lava oe ma po o fea foi o e i ai, ua e umia i ou lima le gafatia e maua ai le fiafia o le toatele o tagata e sili atu i lo le aofai e mafai ona e mafaufauina. O aso uma ma itula uma e mafai ai ona e filifili e osia pe tausia se feagaiga ma le Atua.

Po o fea lava o e i ai i luga o le ala e maua ai le meaalofa o le ola e faava-vau, ua e umia i ou lima le avanoa e faaali atu ai i le tele o tagata le auala e tau atu i le fiafiaga sili atu. A e filifili pe osia pe tausia se feagaiga ma le Atua, ua e filifili foi pe o le a e tuua se tofi o le faamoemoe mo i latou e ono mafai ona mulimuli i au faataitaiga.

Ua faamanuiaina i tatou i le folafolaga o sea tofi. Ou te nofoitalafu pea i le tele o lo'u fiafia i le olaga i se tamalii ou te lei feiloai ai lava i lou olaga faaletino. O ia o se tamaitiiti matuaoti na avea ma se tasi o o'u matua o matua matutua. Sa ia tuua mo au se tofi o le faamoemoe le mafaatauina. Sei ou faamatala atu ia te outou nisi o vaega na ia faia i le fatuina o lenei tofi mo au.

O lona igoa o Heinrich Eyring. Sa fanau mai o ia i se aiga mauoa. O lona tama, o Edward sa umiaina se esetete tele i Coburg, lea ua avea nei ma Siamani. O lona tina o Viscountess Charlotte Von Blomberg. O lona tama o le tausii fanua o le Tupu o Perusia.

O Heinrich o le atalii ulumatua a Charlotte and Edward. Na maliliu Charlotte i le 31 tausaga, ina ua mavae le fanau mai o le la tama lona tolu. Sa lei pine ae maliliu Edward, ma maumau uma ai ana meatotino ma lona tamao-aiga i se teugaoa na gau. Sa na o le 40 ona tausaga. Sa ia tuua se fanau matua-oti se toatolu.

O Heinrich, le tama o lo'u tama-matua, sa maliliu uma ona matua ma maumau uma ai se tofi sili faalela-lolagi. Sa lei sana tupe. Sa ia tusia i lana talafaasolopito sa ia lagonaina o lona faamoemoe sili ua faalagolago lea i le alu i Amerika. E ui lava sa lei ma sona aiga po o ni uo iina, ae sa ia lagonaina lava le faamoemoe e uiga i le alu i Amerika. Sa muamua alu o ia i le Aai o Niu Ioka. Mulimuli ane na ia masii atu i St. Louis, Misuri.

I St. Louis, o se tasi na la faigaluega faatasi o se tagata o le Au Paia o Aso e Gata Ai. Sa ia maua mai ia te ia se kopi o se tamaitusi na tusia e Elder Parley P. Pratt. Sa ia faitauina ona ia suesue lea i soo se mea na mafai ona ia maua e uiga i le Au Paia o Aso e Gata Ai. Sa ia tatalo ia iloa pe moni lava o loo i ai ni agelu e faaali mai i tagata, pe o i ai se perofeta soifua, ma pe o lea ua ia mauaina se tapuaiga moni ua faaali mai [e le Atua].

Ina ua mavae le lua masina o suesuega maeaea ma tatalo, sa faia ai e Heinrich se miti lea na tau atu ai ia te ia e ao ona papatisoina o ia. O se tamalii ou te faamamaluina lona igoa ma le perisitua, o Elder William Brown, sa ia faatinoina le sauniga. Sa papatisoina Heinrich i se faatanoo vai timu i le aso 11 o Mati, 1855, i le 7:30 i le taeao.

Ou te talitonu na iloa e Heinrich Eyring i lenei taimi e moni le mea lea ua ou aaoaina atu ia te outou i le asō. Sa ia iloa ina o le fiafia o le ola e faava-vau e sau mai i sootaga faaleaiga lea e faaauau pea e faavavau. E tusa lava pe na ia faatoa mauaina le fuafuaga o le



fiafia a le Alii, sa ia iloaina lava o lona faamoemoe mo le olioli e faavavau sa faalagolago lea i filifiliga saoloto a isi ia mulimuli i lana faataitaiga. I lona faamoemoe o le fiafia e faavavau sa faalagolago i tagata sa lei fananau mai.

O se vaega o le tofi o le faamoemoe o lo matou aiga, sa ia tuua ai se talafaasolopito mo ona suli.

I lona talafaasolopito ou te lagonaina ai lona alofa mo i matou o le a mulimuli ia te ia. I ana upu ou te lagonaina ai lona faamoemoe ia mafai e ona suli ona filifili e mulimuli ia te ia i luga o le ala e toe foi atu i le aiga faalelagi. Sa ia iloaina e le faia i se filifiliga tele se tasi ae o le tele o tamai filifiliga laiti. Ou te sii mai i lana talafaasolopito:

“Mai le taimi faatoa ou faalogo muamua ai ia Elder Andrus o saunoa . . . sa ou auai ai lava i taimi uma i sauniga a le Au Paia o Aso e Gata Ai ma o le mea moni, sa seasea o’u misia ni sauniga, aua o lo’u tiute le auai i ia sauniga.

“Ua ou tusia lenei mea i la’u talaaga ina ia mafai e la’u fanau ona mulimuli i la’u faataitaiga ma ia le lafoaia lava lenei tiute taua o le faapotopoto faatasi ma le Au Paia.”¹

Sa iloa e Heinrich e faapea i sauniga faamanatuga e mafai ai ona faafouina la tatou folafolaga ia manatua pea le Faaola ma maua Lona Agaga e faatasi ma i tatou.

O le Agaga lena na lagolagoina o ia i le taimi o le misiona lea na valaau i ai o ia i nai masina talu ona ia taliaina le feagaiga o le papatisoga. Sa ia tuua e pei o le tuua o lona tofi, lana faataitaiga o le tumau faamaoni i lana misiona mo le ono tausaga i le nofoaga na taua i lona taimi o Teritori Initia. Ina ia maua lona faamalologa mai lana misiona, sa ia savali ai ma pu’e se nofoaafi mai Okalahoma i le Aai o Sate Leki, o se mamao pe tusa o le 1,100 maila (1,700 km).

E lei pine lena ae valaauina e le perofeta a le Atua ia masii atu i Iuta

i saute. Mai iina sa ia taliaina ai se isi valaauga e auauna atu i se misiona i lona atunuu moni o Siamani. Ona ia taliaina lea o le valaaulia a se Aposetolo a le Alii o Iesu Keriso e fesoasoani atu i le fausiaina o aai tau faato’a a le Au Paia o Aso e Gata Ai i Mekisiko. Mai iina sa valaauina ai o ia i le Aai o Mekisiko e toe avea ma se faifeautalai faamisiona. Sa ia faamamaluina na valaauga. O loo tanumia nei o ia i se fanuatanu itiiti i Colonia Juárez, Chihuahua, Mekisiko.

Ua ou taua nei mea moni ina ia le tautino atu ai sona maoae tele po o ni mea na ia faia mo ona suli. Ae ua ou faamatalaina na mea moni e faamamalu ai o ia mo le faataitaiga o le faatuatua ma le faamoemoe sa i ai i lona loto.

Sa ia taliaina na valaauga ona o lona faatuatua i le faaali atu o le Keriso toetu ma lo tatou Tama Faalelagi ia Iosefa Samita i se togavao i le setete o Niu Ioka. Sa ia taliaina na mea ona sa ia te ia le faatuatua ua toefuatai mai ki o le perisitua i le Ekalesia a le Alii faatasi ai ma le mana e faamau ai aiga e faavavau, pe a lava lo latou faatuatua e tausia ai a latou feagaiga.

E pei o Heinrich Eyring, lo’u tuua, atonu e avea oe ma tagata muamua i lou aiga e taitai le ala i le ola e faavavau i luga o le ala o feagaiga paia ua osia ma tausia ma le filiga ma le faatuatua. O le feagaiga faaEnoka ua aumai faatasi ai tiute ma folafolaga. Mo i tatou uma, e pei ona i ai mo Heinrich, o na tiute o nisi taimi e faigofie ae e tele lava ina faigata. Ae manatua, o tiute o nisi taimi e tatau lava ona faigata ona o lo latou faamoemoega o le tuleia o i tatou i luga o le ala ina ia ola e faavavau faatasi ma le Tama Faalelagi ma Lona Alo Pele, o Iesu Keriso.

E te manatua upu mai le tusi a Aperaamo:

“Ma sa tulai mai se tasi i totonu o i latou sa pei o le Atua, ma sa fai atu o ia ia te i latou o e sa faatasi ma ia:

O le a tatou o i lalō, ona o loo i ai se avanoa iina, ma o le a tatou ave mai mea nei, ma o le a tatou faia se lalolagi e nonofo ai i latou nei;

“Ma o le a tatou tofotofoina ai i latou, e vaai pe latou te faia mea uma o soo se mea e poloaiina ai i latou e le Alii lo latou Atua;

“Ma o i latou o e e tausia lo latou esetete muamua, o le a faaopoopoina i luga o i latou; ma o i latou o e e le tausia lo latou esetete muamua o le a latou le maua le mamalu i le malo e tasi faatasi ma i latou o e e tausia lo latou esetete lona lua o le a faaopoopo i luga o o latou ulu le mamalu e faavavau ma faavavau lava.”²

O le tausia o lo tatou esetete lona lua e faalagolago lea i lo tatou osia o feagaiga ma le Atua ma le faatunuuina ma le faamaoni o o tatou tiute ua manaomia mai ia i tatou. E manaomia le faatuatua ia Iesu Keriso o lo tatou Faaola e tausia ai feagaiga paia mo le olaga atoa.

Ona sa pauu Atamu ma Eva, ua tatou oo ai i faaososoga, tofotofoaga, ma le oti e fai ma o tatou tofi aoao. Peitai, na tuu mai e lo tatou Tama Faalelagi alofa ia i tatou le meaalofa o Lona Alo Pele, o Iesu Keriso, e fai ma o tatou Faaola. O lona meaalofa maoae ma le faamanuiaga o le Togiola a Iesu Keriso ua aumaia ai se tofi mo tagata uma: le folafolaga o le Toetu ma le mauaina o le ola e faavavau mo i latou uma e fananau mai.

O le faamanuiaga silisili o faamanuiaga uma a le Atua, le ola e faavavau, ua na o le osia o feagaiga o loo maua i le Ekalesia moni a Iesu Keriso e oo mai ai ia i tatou e ala i Ana auuna faatagaina. Ona o le Pa’u, tatou te manaomia uma ai aafiaga faamainaina o le papatisoga ma le faae atu o lima e maua ai le meaalofa o le Agaga Paia. O nei sauniga e tatau ona faatinoina e ala mai ia i latou o loo umiaina le pule tatau o le perisitua.

Ona faatasi ai lea ma le fesoasoani a le Malamalama o Keriso ma le Agaga Paia, e mafai ai ona tatou tausia feagaiga uma tatou te osia ma le Atua, aemaise lava feagaiga o loo maua i totonu o Ona malumalu. Ua na o le pau lava lena o le auala, ma faatasi ai ma lena fesoasoani, e mafai ai e tagata uma ona maua lona tofi moni o se atalii po o se afafine o le Atua i se aiga e faavavau. .

I nisi o loo faafofoga mai ia te au, o lena mea e ono foliga mai o se miti toetiiti lava a leai se faamoemoe.

Ua outou vaaia ni matua faamaoni o loo faanoanoa ona o fanau o e ua teena feagaiga pe ua filifili foi e solia a latou feagaiga ma le Atua. Ae o na matua e mafai ona maua le mafanafana ma le faamoemoe mai i aafiaga o isi matua.

Na toe foi mai le atalii o Alema ma atalii o le Tupu o Mosaea mai le fouvale tele e faasaga i feagaiga ma poloaiga a le Atua. Na vaaia e Alema le Itiiti lona atalii o Korianetona o liliu ese mai le solia o agasala matuia i auunaga faamaoni. O loo faamaumauina foi i le Tusi a Mamona le vavega na oo i sa Lamana i le lafoaia o tu ma aga masani o le ita i le amiotonu ma osifeagaiga e oti ina ia faatumauina ai le filemu.



Sa auina mai se agelu ia Alema le Itiiti ma atalii o Mosaea. Na afio mai le agelu ona o le faatuatua ma tatalo a o latou tama ma le nuu o le Atua. Mai na faataitaiga o le mana o le Togiola o loo galue i loto o tagata, e mafai ai ona e mauaina le lototele ma le mafanafana.

Ua tuuina mai e le Alii ia i tatou uma le puna o le faamoemoe a o tatou tauivi e fesoasoani ia i latou tatou te alolofa i ai ia talia lo latou tofi e faavavau. Ua Ia faia ni folafolaga ia i tatou pe a tatou taumafai pea e faapotopoto mai tagata ia te Ia, ae e le faavaivai lava o Ia, ma e le tatau foi ona tatou faavaivai. Ua Ia faia se faataitaiga atoatoa mo i tatou i Lona alofa tumau: “Ma ou te toe fai atu, ua faafia ona ou manao e faapotopoto mai outou e pei ona ofaofatai mai e se matuamoa lana toloai i lalo o ona apaau, ioe, outou e tagata o le aiga o Isaraelu, outou o e o nonofo i Ierusalema, e pei o outou ua pauu; ioe, ua faafia ea ona ou manao e faapotopoto mai outou e pei ona ofaofatai mai e se matuamoa lana toloai, ae outou le mananao i ai.”³

E mafai ona tatou faalagolago i lona faanaunaga lemafaatolaloina o le Faaola ia aumai fanau agaga uma a le Tama Faalelagi ma faafoi atu i lo latou aiga faatasi ma Ia. O matua faamaoni uma, matua matutua, ma matua o matuamatutua ua tofi maua uma i lona manao. O le Tama Faalelagi ma le Faaola o o tatou faataitaiga atoatoa ia o mea e mafai ma e tatau ona tatou faia. La te le faamalositia lava i tatou ia amiotonu ona o le amiotonu e tatau ona filifili ai. La te faia le amiotonu ia tatou iloatinoina, ma La te tuu mai ia tatou vaaia o ona fua e suamalie.

O tagata uma e fananau mai i lenei lalolagi e mauaina le malamalama o Keriso, lea e fesoasoani ia i tatou ia vaaia ma lagonaina le mea e sa’o ma le mea e sese. Ua auina mai e le Atua ni auuna faaletino o e e mafai, e ala



i le Agaga Paia, ona fesoasoani ia i tatou ia iloa mea ua Ia finagalo tatou te faia ma mea ua Ia faasaina. Ua faia e le Atua ia tosina atu i le filifilia o le mea sa'o e ala i le faatagaina o i tatou ia lagonaina aafiaga o a tatou filifiliga. Afai tatou te filifilia le mea sa'o, o le a tatou mauaina le fiafia—i le taimi mulimuli. Afai tatou te filifilia le leaga, o le a oo mai le faanoanoa ma le maasiasi—i le taimi mulimuli. Ua mautinoa lava na aafiaga. Ae e tele lava ina faatuai mai ona o se faamoe-moega. Afai e vave maua faamanuiaga, o le filifilia o le mea sa'o o le a fausia ai le faatuatua. Ma e talu ai o le faanoanoa i nisi taimi foi e matua tuai ai lava ona oo mai, ae e manaomia le faatuatua e lagona ai le manaomia ona saili atu i le faamagaloga o agasala i se taimi vave i lo le tatou lagonaina o ona aafiaga faanoanoa ma le tigo.

Sa faanoanoa le Tama o Liae i filifiliga na faia e nisi o ona atalii ma o latou aiga. Sa avea o se tamalii maoae ma lelei—o se perofeta a le Atua. Sa tele ina ia molimau atu ia i latou e uiga i lo tatou Faaola, o Iesu Keriso. O ia o se faataitaiga o le ususitai ma le auuina atu pe a valaau mai le Alii ia tuua uma ana meatotino faalelalagi ae faasao lona aiga mai le faafanoga. I le pulapulalagoto ai o lona soifua, sa ia molimau atu pea i lana fanau. E faapei o le Faaola—ma e ui i lona mana e iloaitino ai o latou loto ma iloa ai le lumanai i le faanoanoa ma le matagofie—ae sa faaloaloa atu pea aao o Liae e taitai mai lona aiga i le faaolataga.

O aso nei e faitau miliona suli o le Tama o Liae o loo faamaoniaina lona faamoemoe mo i latou.

O le a se mea e mafai ona e faia ma ou faia e aao ai mai le faataitaiga a Liae? E mafai ona tatou utuvai ma lana faataitaiga e ala i le suesueina o tusitusiga paia ma le agaga tatalo ma e ala i le tausisi i ai.

Ou te fautua atu ia vaai lata mai ma vaai mamao a o e taumafai e tuu atu le tofi o le faamoemoe i lou aiga. I se taimi puupuu, o le a i ai faafitauli ma o le a faasaolo solo Satani. Ma o le a i ai ni mea e faatalitali i ai ma le onosai, i le faatuatua, ma le iloina e galue le Alii i Lana lava taimi ma i Lana lava ala.

E i ai mea e mafai ona e vave faia, pe afai e talavou i latou e te alofa i ai. Manatua e faigofie atu ma sili atu ona aoga ia tatalo faaleaiga i aso uma, suesueina o tusitusiga paia faaleaiga, ma le fefaasoaiina o a tatou molimau i sauniga faamanatuga pe afai e laiti le fanau. E tele lava ina lagonagofie e fanau iti le Agaga nai lo i tatou.

A latou matutua ae, o le a latou manatuaina viiga sa latou usuina faatasi ma outou. E oo lava i le manatuaina o musika, o le a latou manatuaina upu o tusitusiga paia ma molimau. E mafai ona faamanatu mai e le Agaga Paia mea uma ia i tatou, ae o upu o mau ma viiga o le a umi ona tumau. O na manatuaga o le a uunaia ai i latou e toe foi mai pe a latou se ese mo se taimi, masalo mo ni tausaga, mai le ala i le aiga i le ola e faavavau.

O le a tatou manaomiaina le vaai mamao pe a lagonaina e i latou tatou te alolofa i ai ia faatosinaga a le lalolagi faapea ai ma lagona masalosalo lea e foliga mai e lofituina ai lo latou faatuatua. Tatou te maua le faatuatua, faamoemoe, ma le alofa mama e taiala ai i tatou ma ia faamalosi ai i latou.

Ua ou vaai i lena mea i le avea ai ma se fesoasoani i perofeta soifua se toalua a le Atua. O i laua o ni tagata taitoatasi e i ai ni uiga faaletagata uiga ese. Ae sa foliga mai na la tofua maua uma se

faamoemoe tumau. Pe a faaali mai e se tasi se popolega e uiga i se mea i totonu o le Ekalesia, o la latou tali e tali soo ai “Oi, o le a lelei lava mea uma.” O le a latou iloina atili lava le faafitauli i lo tagata e faaalua se popolega.

Latou te iloina foi le ala a le Alii, ma o lea latou te faamoemoe ai lava i taimi uma i Lona malo. Latou te iloina o loo i ai o Ia i lona faauluuluga. O Ia e ou le malosi uma lava ma e popole o Ia. Afai e te faatagaina o Ia e avea ma taitai o lou aiga, o le a lelei mea uma.

O nisi o suli o Heinrich Eyring sa foliga mai na se ese. Ae o le toatele o ana fanau a fanau a fanau a fanau e o i malumalu a le Atua i le 6:00 i le taeao e faatino ia sauniga mo tuua latou te lei feiloai lava i ai. Latou te o ona o le tofi o le faamoemoe na ia tuua. Sa ia tuua se tofi lea ua mauaina e le toatele o ona suli.

A uma ona tatou faia o mea uma i le faatuatua, o le a faamaoniaina e le Alii o tatou faamoemoe mo faamanuiaga sili atu mo o tatou taiga i lo mea e mafai ona tatou mafaufauina. E finagalo o Ia mo mea silisili mo i latou ma i tatou, o Ana fanau.

O i tatou uma o fanau a se Atua soifua. O Iesu le Nasareta o Lona Alo Pele ma o lo tatou Faaola toetu. O Lana Ekalesia lena. Ua i ai ia ki o le perisitua, ma o lea e mafai ai ona faavavau aiga. O lo tatou tofi lemafaatauina lena. Ou te molimau atu e moni i le suafa o le Alii o Iesu Keriso, amene. ■

FAAMATALAGA

1. Tagai Henry Eyring, *Reminiscences*, circa 1880–1896, typescript, Church History Library, 16–21.
2. *Aperaamo* 3:24–26.
3. 3 Nifae 10:5.



Fofogaina e Peresitene Dieter F. Uchtdorf
Fesoasoani Lua i le Au Peresitene Sili

O Le Lagolagoina o Taitai o le Ekalesia

Etuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma o le Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O e finagalo i ai ia faailoa mai.

O i latou e au ese ai pe afai e i ai, faailoa mai.

E tuuina atu ia tatou lagolagoina

Boyd Kenneth Packer o le Peresitene o le Korama a Aposetolo e Toasefululua ma uso nei o lena korama: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ma Neil L. Andersen.

O e finagalo i ai, faamolemole ia faailoa mai.

A i ai se faatuiese ia faailoa mai.

E tuuina atu ia tatou lagolagoina

ia fesoasoani i le Au Peresitene Sili ma Aposetolo e Toasefululua o ni perofeta, tagatavaai, ma talifaaaliga.

O e uma e finagalo i ai, faailoa mai.

O e faatuiese, pe afai o i ai, i le faailoga lava lea.

E tuuina atu ina ia faamalolo mai ma le agaga faafetai tele ia Elder Tad R. Callister o se Pulega Aoa ma uso o le Au Peresitene o Korama a Fitugafulu.

O outou e fia auai faatasi ma i matou i se palota o le agaga faafetai, faamolemole ia faailoa mai.

E tuuina atu ina ia tatou lagolagoina ia Elder Lynn G. Robbins e avea ma uso o le Au Peresitene o Korama a Fitugafulu.

O e uma e finagalo i ai, faamolemole faailoa mai.

O e faatuiese pe afai e i ai.

E tuuina atu ina ia faamalolo ina mai Fitugafulu Eria nei, e amata atu i le aso 1 o Me, 2014: Pedro E. Abularach, Julio A. Angulo, Victor A. Asconavieta, Duck Soo Bae, Juan C. Barros, Colin H. Bricknell, Dennis C. Brimhall, Thomas M. Cherrington, Kim B. Clark, Wynn R. Dewsnup, Rodolfo C. Franco, G. Guillermo Garcia, Julio C. González, Mauro Junot De Maria, Larry S. Kacher, David E. LeSueur, Paulo C. Loureiro, Steven J. Lund, Abraham Martinez, Hugo E. Martinez, Sergey N. Mikulin, Christopher B. Munday, Hirofumi Nakatsuka, Chikao Oishi, Alejandro S. Patania, Renato M. Petla, Anatoly K. Reshetnikov, Jonathan C. Roberts, J. Craig Rowe, Robert B. Smith, Warren G. Tate, Hesbon O. Usi, Taniela B. Wakolo, Randy W. Wilkinson, ma Chi Hong (Sam) Wong.

O e fia au faatasi ma i matou e faailoa atu le lotofaafetai mo la latou tautua matavela, faamolemole faailoa mai.

E tuuina atu ina ia faamalolo mai faatasi ai ma le lotofaafetai ia Brother Russell T. Osguthorpe, David M. McConkie, ma Matthew O. Richardson



Uosigitone, Iuta, ISA



sa avea ma au peresitene aoao o le Aoga Sa.

E faapena foi ona faamaloloina mai ma sui uma o le fono faatonu aoao o le Aoga Sa.

O e uma e fia afaatasi ma i matou i le faailoa atu o le agaga faafetai i nei uso ma tuafafine mo la latou auaunaga maoae ma le tuuto, faamolemole ia faailoa mai.

E tuuina atu ina ia tatou lagolago-ina e avea ma uso fou o le Korama Muamua a Fitugafulu Chi Hong (Sam) Wong ma Jörg Klebingat faapea ai ma uso fou o le Korama Lua o Fitugafulu Larry S. Kacher ma Hugo E. Martinez.

O e uma e lagolagoina, ia faailoa mai.

O e faatuiese i le faailoga lava e tasi.

E tuuina atu ina ia tatou lagolago-ina e avea ma Fitugafulu Eria fou: Julio Cesar Acosta, Blake R. Alder, Alain C. Allard, Taiichi Aoba, Carlos F. Arredondo, Vladimir N. Astashov, Jorge T. Becerra, Michael H. Bourne, Romulo V. Cabrera, Jose Claudio F. Campos, Nicolas Castañeda, Walter Chatora, Fook Chuen Zeno Chow, J. Kevin Ence, K. Mark Frost, Mauricio G. Gonzaga, Leonard D. Greer, Jose Isaguirre, Michael R. Jensen, Adolf Johan Johansson, Tae

Gul Jung, Wisit Khanakham, Serhii A. Kovalov, Sergio Krasnoselsky, Milan F. Kunz, Bryan R. Larsen, Geraldo Lima, W. Jean-Pierre Lono, Tasara Makasi, Khumbulani Mdletshe, Dale H. Munk, Eduardo A. Norambuena, Yutaka Onda, Raimundo Pacheco De Pinho, Marco Antonio Rais, Steven K. Randall, R. Scott Runia, Alexey V. Samaykin, Edwin A. Sexton, Raul H. Spitale, Carlos Walter Treviño, ma Juan A. Urra.

O e uma e lagolagoina, faamole- mole faailoa mai.



O e faatuiese pe afai e i ai.

E tuuina atu ina ia tatou lagolago-ina Tad R. Callister e avea ma peresi- tene aoao o le Aoga Sa, faatasi ai ma John S. Tanner e avea ma fesoasoani muamua ma Devin G. Durrant e avea ma fesoasoani lua.

O e lagolagoina ia faailoa mai.

A i ai se faatuiese ia faailoa mai.

Matou te matau atu o Uso Tanner ma Durrant o loo auauna atu i le taimi nei o ni peresitene o misiona ma o lea, e le o auai ai iinei i le Maota Autu mo Konafesi.

O le a amataina la lua auaunaga aloaia i le au peresitene aoao o le Aoga Sa pe a faamaloloina mai o ni peresitene o misiona ia Iulai 2014.

E tuuina atu ina ia tatou lagolago-ina isi Au Pulega Aoao, Fitugafulu Eria, ma au peresitene aoao o ausilali e pei ona i ai nei.

O e uma e lagolagoina, faamole- mole ia faailoa mai.

O e faatuiese ia faailoa mai.

Faafetai atu uso e ma tuafafine, mo la outou palota lagolago ma lo outou faatuatua faifai pea ma tatalo mo i matou.

Matou te valaau atu i Pulega Aoao faatoa valaauina nei ia malaga mai i o outou alalafaga i luga nei. ■

Lipoti a le Matagaluega Suetusi a le Ekalesia, 2013

Fofogaina e Kevin R. Jergensen

Pule Faatonusili, Matagaluega Suetusi a le Ekalesia

I Le Au Peresitene Sili o Le Ekalesia a Iesu Keriso o le Au Paia o Aso e Gata Ai

Uso Pele: E pei ona faatonuina ai e ala i le faaaliga i le vaega 120 o le Mataupu Faavae ma Feagaiga, o le Aufono e Faafocina ia Sefuluai, e aofia ai le Au Peresitene Sili, le Korama a Aposetolo e Toasefululua, ma le Au Epikopo Pulefaamalumu, e faatagaina tupe faaalu o tupe a le Ekalesia. E faamatuu atu e totino o le Ekalesia tupe e tusa ai ma paketi ua faamaoniaina, aiaiga faavae, ma faiga faavae.

O le Matagaluega Suetusi a le Ekalesia, lea e aofia ai suetusi ua faamaoniaina ma e tutoatasi mai isi matagaluega uma a le Ekalesia, ua i ai le tiutetauave e faatino ai suetusi mo le faamoemoega o le tuuina atu o le faamautinoaga talafeagai e tusa ai ma saofaga na maua, tupe na faaalu, ma

le malupuipua o aseta a le Ekalesia.

E faavae i suetusi ua uma ona faatino, ua i ai nei le manatu i le Matagaluega Suetusi a le Ekalesia e faapea, i tulaga uma, o saofaga na maua, o tupe na faaalu, ma aseta a le Ekalesia mo le tausaga 2013 ua faamaumuina ma taulimaina uma e tusa ai ma paketi na faamaoniaina a le Ekalesia, aiaiga faavae, ma faiga masani tau tausitusi. O loo mulimulitaia e le Ekalesia ia faiga masani o loo aoao atu i ona tagata o le ola lea i totonu o se paketi, aloese mai le nofoaitalafu, ma le faapolopoloina o mea mo aso leaga.

Ma le faaaloalo lava
Matagaluega Suetusi a le Ekalesia
Kevin R. Jergensen
Pule Faatonusili ■



Lipoti Faa-fuainumera, 2013

Fofogaina e Brook P. Hales

Failautusi a le Au Peresitene Sili

Mo faamatalaga o tagata o le Ekalesia, ua tuuina atu ai e le Au Peresitene Sili le lipoti faafuainumera leni e faatatau i le tuputupu ae ma le tulaga o le Ekalesia e faagata mai le Aso 31 Tesema, 2013.

Iunite o le Ekalesia

Siteki.....	3,050
Misiona.....	405
Ilu.....	571
Uarota ma Paranesi	29,253

Faitau Aofai o le Ekalesia

Aofaiga o Tagata o le Ekalesia.....	15,082,028
Tamaiti Fou o Faamaumauga.....	115,486
Papatisoga Liliu Mai	282,945

Faifeautalai

Faifeautalai Faamisiona	83,035
Faifeautalai o Auaunaga a le Ekalesia.....	24,032

Malumalu

O Malumalu na Faapaiaina i le 2013 (Malumalu o Tegucigalpa Honduras).....	1
O Malumalu o loo Faagaogaina e oo mai i le Faaiuga o le Tausaga	141



Saunia e Elder Russell M. Nelson
 O le Korama a Aposetolo e Toasefululua

Ia Faaalia Lo Outou Faatuatua

I lea aso ma lea aso, i luga o outou ala e agai atu i o outou taunuuga e faavavau, ia faateleina lo outou faatuatua. Folafola atu lo outou faatuatua! Ia faaalua lo outou faatuatua!

Uso e ma tuafafine pele, matou te faailoa atu o matou lagona loloto o le alofa ma le faafetai mo outou. Matou te faafetai mo a matou tofiga e galulue faatasi ai ma outou.

I se malaga talu ai nei, na faasilasila mai ai e le matou pailate o le a matou fetaiai ma ni savili malolosi i le taimi o le a matou faaifo ai e tuluaeleele ma e tatau i pasese uma ona faamau lelei o latou fusi. E pei ona faamoemoeina, na oo mai le fetaiaiga o savili. Sa matuai fesouaiina lava. I le isi itu o le alasavali ma ni nai atulaina nofoa se lua i ou tua atu, na popole ai se tamaitai i le fefe. I taimi taufaamatau taitasi e pa’u ma taia faafuasei ai le vaa, sa ia faataiō leotele ai. Sa taumafai lona toalua e faamafanafana o ia ae sa le’i maua sona to’a. O ana faataiō atuavale na faaauau pea seia oo ina matou pāsia le sone sousou ma tuluaeleele ai ma le saogalemu. I le taimi o lona popolevale, sa ou lagona le alofa mo ia. Aua o le faatuatua o le vaifofo lea o le fefe, sa ou moomoo ma le leleoa, maimau pe ana mafai ona ou faamalosi lona faatuatua.

Mulimuli ane, a o tuua e le pasese le vaalele, na talanoa mai le toalua o



lenei tamaitai ia te au. Sa ia fai mai, “Ou te faamalie atu sa matuā fefe lava lou toalua. Na o le pau le auala na mafai ai ona ou faamafanafana ia te ia o le ta’u atu lea i ai o ‘Elder Nelson o loo i ai i lenei malaga, o le mea lea e le tatau ai ona e popole.’”

Ou te le mautinoa pe o lo’u i ai i lena malaga na tatau ai ona ia maua se mafanafana, ae ou te fai atu o se tasi o mea moni o le olaga faaletino e faapea o lo tatou faatuatua o le a tofotofoina ma luitauina. O nisi taimi

o na tofotofoga e oo mai a o tatou fetaiai ma mea e foliga mai o ni fetaiaiga o le ola ma le oti. Mo lenei tamaitai fefe, o se vaalele e matautia le luluina e tuuina mai ai se tasi o na taimi o tofotofoga pe a tofotofoina le malosi o lo tatou faatuatua.

Pe a tatou talanoa e uiga i le faatuatua—le faatuatua lea e mafai ona aveesea ai mauga—tatou te le o talanoa i le faatuatua i se tulaga lautele ae o le faatuatua i le Alii o Iesu Keriso. O le faatuatua i le Alii o Iesu Keriso e mafai ona faamalosi pe a tatou aoao e uiga ia te Ia ma ola i o tatou talitonuga faalelotu. O le mataupu faavae a Iesu Keriso na mamauina e le Alii e fesoasoani ai ia i tatou e faatuputeleina lo tatou faatuatua. Peitai, i le gagana masani ua faaaogaina i aso nei, o le upu *talitonuga faalelotu* e mafai ona eseese ona uiga i tagata eseese.

O le upu *talitonuga faalelotu* o lona uiga moni “ia toe fusia” po o le “ia noatia atu” i le Atua.¹ O le fesili e tatau ona fesiligia ai i tatou lava o le, o i ai sa tatou talitonuga malosi i le Atua ina ia faaalua ai lo tatou faatuatua, pe ua noatia moni i tatou i se isi mea? Mo se faaitaiga, ua ou faalogo i talanoaga i taeao o Aso Gafua e uiga i ni taaloga afeleti faapolofesa e faia i Aso Sa e muamua ai. Mo nisi o nei tagata tapuai tuuto, sa ou mafaufau pe o o latou “talitonuga faalelotu” o le a na ona “noatia ai i tua i latou” i nisi o ituaiga o taaloga.

Tatou te ono fesili ia i tatou lava tai-toatasi, po o fea lo tatou faatuatua? O i ai i se au? O i ai i se ituaiga o [olola]? O i ai i se tagata lauiloa? E oo lava i au e silisili ona lelei e mafai ona toilalo. E mafai ona mou ese atu tagata lauiloa. Ua na o le Tasi lava [le tagata] e saogalemu ai i taimi uma lou faatuatua, o le Alii o Iesu Keriso. Ma e manaomia ona e faaali atu ou talitonuga!

Sa folafola mai e le Atua i le poloaiga *muamua* o Ana Poloaiga e Sefulu,



“Aua ne’i e fai mo oe ni atua ese i o’u luma.”² Sa ia fetalai foi, “Vaai mai ia te a’u i mafaufauga uma; aua le masalosalo, aua le fefe.”³ Ae o le toatele o tagata ua na o a latou paleni o faletupe e vaavaai i ai mo le filemu po o uso a tagata mo ni faataitaiga e mulimuli i ai.

O fomai polofesa, polofesa o a’oga, ma le au faaupufai e tele lava ina tofotofoina le faatuatua. I le tulitulimatagauina o a latou sini, pe o le a faaaliga ea o latou talitonuga faalelotu pe o le a natia? Pe ua noatia i latou i le Atua po o le tagata?

Sa ou maua sea tofotofoga i le tele o tausaga ua mavae, ina ua aoaiina au e se tasi o au uo faigaluega faafomai mo le le mafai ona tuueseeseina o lo’u malamalama faalematata mai o’u talitonuga maumaututu faalelotu. Sa ia faatonu mai ia *aua* ne’i o’u tuufaatasia mea e lua. E mafai faapefea ona ou faia lena mea? O le upumoni o le upumoni! E le mavavaeeseina, ma o soo sona vaega e le mafai lava ona faataatia ese.

Pe o le upumoni e alia’e mai se falesuesue faasaienitisi pe e auala mai i faaaliga, o upumoni uma lava e pogai mai le Atua. O upumoni uma o se vaega o le talalelei a Iesu Keriso.⁴ Ae, na faatonuina au e natia o’u talitonuga. Ou te le i usitaia le talosaga a lo’u uso faigaluega. Sa ou faaali atu o’u talitonuga!

I taumafaiga uma faalematata, e manaomia ai le malosi o tulaga faatonuina sa’o a’ia’i. E faataua e tagata atamamai o latou saolotoga o le faaaliga o manatu. Ae o le saolotoga atoatoa e le mafai ona tupu pe afai o se vaega o le malamalama o se tasi ua pulea e tulafono a tagata “ina ia le taliaina”.

E le mafai ona le amanaiaina le upumoni faaleagaga—aemaise lava poloaiga paia. O le tausia o poloaiga paia e aumaia ai faamanuiaga,⁵ i taimi uma! O le solia o poloaiga paia e le aumaia ai faamanuiaga, i taimi uma!

Ua tele faafitauli i lenei lalolagi ona ua tumu i tagata lē atoatoa. O o latou faamoemoega ma manaoga ua uunaia malosi e lo latou faatuatua pe o le leai foi [o le faatuatua]. E toatele tagata ua faamuamuaina isi mea i lo le Atua. O nisi ua latou fesiligaina le taua o talitonuga faalelotu i le olaga o aso nei. E pei ona i ai i vaitaimi uma o le lalolagi, ua faapena foi i aso nei o loo i ai i latou o e faifai ma faitio i le faatinoga saoloto o talitonuga faalelotu. Ua oo lava i nisi ua tuuaia talitonuga faalelotu mo le tele o faafitauli i le lalolagi. O le mea moni, sa i ai taimi sa faatino ai le amioleaga e faaoga ai talitonuga faalelotu e fai ma mafuaaga. Ae o le ola ai i le amio atua o le Alii, o lona uiga o le taumafai ia avea o se soo moni o Iesu Keriso, o le auala lea e ola ai ma se tautinoga i aso uma o

le a tuuina mai le taitaiga faalelagi. A e faatinoina ou talitonuga faalelotu, ua e faaaogaina lou faatuatua. Ua e faaaliga ou talitonuga.

Sa silafia e le Alii o le a manaomia e Ana fanau ona aoao i le auala e saili ai o Ia. “Aua e vaapiapi le faitotoa,” Na ia fetalai ai, “ma lauitiiti le ala e tau i le faaeaga . . . , ma e toaitiiti ē e i ai e mauaina.”⁶

O tusitusiga paia e maua ai se tasi o ala sili e saili ai lo tatou auala ma tumau ai. O le malamalamaaga i tusitusiga paia e maua ai foi le puipuiga taua. Mo se faataitaiga, i le talafaasolopito atoa, o siama e pei o “fiva i le taimi e fanau ai” na mafua ai ona mali-liu le toatele o tina ma pepe ta’umamaina. Peitai, sa i ai i le Feagaiga Tuai le mataupu faavae sa’o mo le taulimaina o tagata mamai, sa tusia i le silia ma le 3,000 tausaga talu ai!⁷ Sa toatele tagata na faaumatiaina ona o le sailiga a le tagata mo le atamai na le mafai ai ona faalogo i le afigoga a le Alii!

O’u uso e ma tuafafine pele, o le a le mea o loo tatou misia i o tatou olaga pe afai o loo tatou “aoaoina e le aunoa, [ae] e le āu mafai ona oo ina iloa lelei o le upumoni?”⁸ E mafai ona tatou mauaina le atamai silisili mai i tusitusiga paia ma maua musumusuga e ala i tatalo o le faatuatua.

O le faia o lena mea o le a fesoa-soani ai ia i tatou a o tatou faia faaiuga

i aso taitasi. Aemaise lava pe a fatuina ma faamalosia tulafono a tagata, e tatau lava ona avea tulafono a le Atua ma a tatou tulaga faatonuina i taimi uma. Pe a feagai ai ma mataupu fetee-nai, e tatau ona tatou saili muamua i le taitaiga a le Atua.

E tatau ona tatou “faatatauina tusi-tusiga paia uma ia te i [tatou], . . . ma o [tatou] manuia ma aoaoga.”⁹ E latalata mai tulaga lamatia pe a tatou taumafai e vaelua i tatou lava i faaupuga e pei o le “o lo’u olaga patino” po o “o la’u amio e sili ona lelei.” Afai e taumafai se tasi e vaevae lona olaga i ni vaega eseese, o le a le tulai ae se tasi i le tino atoa o le amiosao patino o le tagata lava ia—o le a le avea lava ma mea uma e mafai ona avea *moni ai* o ia lava.

O le faaososoga ia lauiloa e mafai ona faamuamua ai manatu lautele i lo le afioga a le Atua. O faatosinaga faaupufai ma fuafuaga faalauiloa ua tele ina faaaoga ai palota o manatu o tagata lautele e atiina ae ai a latou fuafuaga. O taunuuga o na palota e anoa. Ae e tau le mafai ona faaaogaina e fai ma mafuaaga e faamaonia ai le le usi-usitai i poloaiga a le Atua! E tusa lava pe o “faia e tagata uma,” o le sese e le mafai lava ona sa’o. O mea leaga, mea sese, ma le pogisa o le a lē avea lava ma upumoni, e tusa lava pe lauiloa. Ua folafola mai e se lapataiga faatusi-tusiga paia: “Oi talofa ia te i latou o e fai mai, ua lelei le mea leaga, a e leaga le mea lelei; o e fai ma malamalama le pouliuli, a e fai foi ma pouliuli le malamalama.”¹⁰

Ina ua mavae le Taua Muamua o le Lalolagi, sa lauiloa ai se pese e le lelei. I le faalauiloa ai o le ola le mama, na tautino atu ai e le mafai ona sese ia tagata e 50 miliona. Ae o le mea moni, e *mafai* ona sese le 50 miliona o tagata—e matuai sese lava. O le ola le mama o le ola le mama lava lea e tusa ai ma le silafaga a le Atua, o lē o

le a i ai se aso o le a faamasinoina uma ai a tatou galuega ma manaoga.¹¹

Faatatusata se fefe ma le leai o se faatuatua ia ua taatele i le lalolagi i le taimi nei ma le faatuatua ma le lototele o lo’u afafine pele o Emily, o lē o loo aumau nei i le isi itu o le veli. A o tuua ai e le ola faaletino lona tino sa faatumulia i le kanesa, sa tau le mafai ona tautala. Ae faatasi ai ma se ataata i ona fofoga, sa ia faapea mai ia te au, “Tama, aua e te popole mai ia te au. Ou te iloa o le a lelei mea uma!” Sa faaalua le faatuatua o Emily—sa faaalua ma le malosii—i lona taimi faamomoi-loto, i le taimi tonu sa matou matuā manaomia ai.

O lenei tina talavou lalelei e toalima le fanau sa tumu lona faatuatua i lona Tama Faalelagi, i Lana fuafuaga, ma i le manuia e faavavau o lona aiga. Sa fusia o ia ma le saogalemu i le Atua. Sa matua’i faamaoni atoa i feagaiga sa osia ma le Alii ma lona toalua. Sa ia alofa i lana fanau, ae sa filemu, e ui o le a vave ona ia aluese mai ia i latou. Sa ia te ia le faatuatua i lona lumanai, ma lo latou foi [lumanai], ona sa ia te ia le faatuatua i lo

tatou Tama Faalelagi ma Lona Alo.

I le 1986, sa saunoa ai Peresitene Thomas S. Monson: “E moni o le a tatou fetaiia ma le mata’u, lagona le tauemuina ma fetaiia ma mea e faasagatau mai. Ia tatou maua le lototele e tetee atu ai i mea ua talitonu i ai le toatele, le lototele e tutu ai mo mataupu faavae. O le lototele, ae le o le palaai, e maua ai le faamaoniga fiafia a le Atua ia i tatou. . . . Ia manatua e tofu tagata uma ma mea e fefe i ai, ae mo i latou e faafetaiaia mea latou te fefefe i ai i le [faatuatua] ua ia i latou foi le lototele.”¹²

O fautuaga a Peresitene Monson e moni lava! O lea ou te aioi atu ai ia te outou, ou uso ma tuafafine pele: I lea aso ma lea aso, i luga o outou ala e agai atu i o outou taunuuga e faavavau, ia faateleina lo outou faatuatua. Folafola atu lo outou faatuatua! Ia faaalua lo outou faatuatua!¹³

Ou te tatalo ia outou fusia ma le saogalemu i le Atua, o Ana upumoni e faavavau o le a tamau i o outou loto e faavavau. Ma ou te tatalo, i o outou olaga atoa, o le a outou faaalua lo outou faatuatua! I le suafa o Iesu Keriso, amene. ■



FAAMATALAGA

1. A fanau mai se pepe, e sautualua le tā'aiga o le uso ma e le fepiitai i le va o na uso e lua. O le uso o se nonoa—o se nonoa mau. O le upu *religion* e sau mai i a'a upu Latina, o le *re* o lona uiga o le "toe fai" po o le "toe foi i tua" ma e faapena foi le upu *ligare*, o lona uiga o le "ia noatia" po o e "ia nonoa." O le mea lea, tatou te malamalama ai o le religion po o talitonuga faalelotu e "noatia atu ai ē talitonu i le Atua."
2. Esoto 20:3. Ma le isi, na fetalai mai le Alii, "Liliu mai ia, ina liliu ese i a outou tupua; ia liliu ese . . . i a outou mea inosia uma" (Esekielu 14:6).
3. Mataupu Faavae ma Feagaiga 6:36.
4. Tagai Spencer W. Kimball, *The Teachings of Spencer W. Kimball*, ed. Edward L. Kimball (1982), 391.
5. Tagai Mosaea 2:41; Mataupu Faavae ma Feagaiga 58:30–33; 82:10. E moni lenei mataupu faavae mo tagata uma, aua "E le faailogaina tagata e le Atua" (Galuega 10:34; tagai foi Moronae 8:12).
6. Mataupu Faavae ma Feagaiga 132:22.
7. Tagai Levitiko 15:13.
8. 2 Timoteo 3:7.
9. 1 Nifae 19:23.
10. Isaia 5:20.
11. O loo aoao mai Tusitusiga Paia: "O mai ia i le Alii, le Paia e Toatasi. Ia outou manatua ua amiotonu ona ala. Faauta, o le ala mo le tagata e vaapiapi, ae ua taatia tonu i se ala sa'o i ona luma, ma o le leoleo o le faitotoa o le Paia e Toatasi o Isaraelu; ma na te le faaaogaina se auuana iina; ma ua leai se isi lava auala vagana ai i le faitotoa; ona e le mafai ona faaseseina o ia, ona o le Alii le Atua o lona suafa lea" (2 Nifae 9:41).
12. Thomas S. Monson, "Courage Counts," *Ensign*, Nov. 1986, 41. I se isi taimi, na tuu mai ai e Peresitene Monson lenei apoapoiga musuia: "Ina ia ola sili atu, e tatau ona tatou atiaaina le gafatia e faafetaiaia ai faafitauli i le lototele, le le fiafia i le fiafia, ma le manumalo i le lotomauualalo. . . . O i tatou o atalii ma afafine o se Atua soifua, o le ana le faatusa ua foafoa ai i tatou. . . . E le mafai ona tatou taofia ma le faamaoni lenei talitonuga maumaututu e aunoa ma le lagonaina o se lagona loloto fou o le malosi ma le mana, e oo lava i le malosi e ola ai i poloaiga a le Atua, le mana e tetea atu ai i faaososoga a Satani" ("Yellow Canaries with Gray on Their Wings," *Ensign*, July 1973, 43).
13. "Faafiti outou lava mai mea uma e le faaleatua" (Moronae 10:32). Aua nei sili atu ona fefe i tagata nai lo le Atua (tagai Mataupu Faavae ma Feagaiga 3:7; 59:5).



Saunia e Elder Richard G. Scott

○ Le Korama a Aposetolo e Toasefululua

"Ua Ou Avatu le Faad'oa'o ia te Outou"

O le faataitaiga aupito sili na savalia le fogaeleele o lo tatou Faaola, o Iesu Keriso. . . . Ua ia valaaulia i tatou ia mulimuli i Lana faataitaiga atoatoa.

A o ou mafaufau loloto i lou tiute e faasoa atu le talalelei, ua ou toe mafaufau ai i ē pele o e na i ai ni uunaiga agalelei sa fesoasoani ia te au e saili le taitaiga faalelagi lea na fesoasoani i lou alualu i luma faaleagaga. I nisi taimi taua i lou olaga, na faamanuiaina ai au e le Tama i le Lagi i se tasi o lē sa lava le popole mo au e fesoasoani ai e taiala au filifiliga i se itu talafeagai. Sa latou mulimuli i le fetalaiga lenei a le Faaola: "Auā ua ou avatu le faad'oa'o ia te outou, e pei na ou faia ia te outou, ia faapea lava e outou ona fai."¹

A o aveva ma se tamaitiiti laitiiti, sa le i aveva lou tama ma se tagata o le Ekalesia ma sa oo ai ina le toaga lo'u tina. Sa matou nonofo i Uosigitone, D.C., ma o matua o lou tina sa nonofo mamao ese i le 2,500 maila (4,000 km) i le setete o Uosigitone. I nai masina ina ua mavae le atoaga o lou valu tausaga, sa sau ai Tinamatua Whittle mai le isi itu o le atunuu e asi i matou. Sa popole Tinamatua i le le papatisoina o au faapea foi ma lou uso matua. Ou te le iloa le mea na ia tau atu i ou matua e uiga i lenei mea, ae ou te iloa i se tasi taeao sa ia ave ai ma'ua ma

lo'u uso i le paka ma faasoa mai ona lagona e uiga i le taua o le papatisoina ma le auai soo i sauniga a le Ekalesia. Ou te lē manatua auiliiliga o mea sa ia tau mai, ae o ana upu sa gaepuina ai se mea i lou loto, ma e le i umi ae papatisoina ma'ua ma lo'u uso.

Sa faaaauu pea ona lagolagoina i maua e Tinamatua. Ou te manatua soo se taimi na tofia ai lou uso po o au e tuuina atu se lauga i le lotu, ma te valaau atu ia te ia i le telefoni mo ni fautuaga. I totonu o ni nai aso ae taunuu mai se lauga tusilima i le meli. A mavae sina taimi e suia ana fautuaga i se oototoga lea e manaomia ai se taumafaiga sili i la maua vaega.

Sa faaaoga e Tinamatua le aofaiga talafeagai o le lototele ma le faaaloalo e fesoasoani ai i lo ma tama ina ia iloa le taua o lona aveina o i maua i le lotu mo a ma sauniga. I soo se auala talafeagai, sa ia fesoasoani ai ia i maua ia lagona se manaomia mo le talalelei i o maua olaga.

O le mea e aupito sili ona taua, sa ma iloa e alofa Tinamatua ia i maua ma sa ia alofa i le talalelei. O ia o se faataitaiga ofofofia! Ou te matuā faafetai mo le molimau sa ia faasoa mai

ia te au a o ou talavou lava. O lana faatosinaga sa suia ai le itu e agai i ai lo'u olaga mo le lelei e faavavau.

Mulimuli ane, a o latalata ina ou faauu mai le iunivesite, sa ou alofa faamama'i ai i se tamaitai talavou lalelei e igoa ia Jeanene Watkins. Sa ou manatu ua amata ona i ai foi ni ona lagona loloto mo au. I se tasi po ao ma talatalanoa ai e uiga i le lumanai, sa ia faia ai ma le faaeteete se faamatalaga na suia ai lou olaga e faavavau. Sa ia faapea mai, "A ou faaiipoipo, o le a ou faaiipoipo atu i se faifeautalai faamaoni, ua maea le misiona, i totonu o le malumalu."

A o lei faia le ma talanoaga, sa ou le i manatu tele i se misiona. Ae o lena po sa faafuasei ai ona suia vave lou naunautaiga e mafaufau i le galuega faafaifeautalai. Sa ou alu i le fale, ma sa le mafai ona ou mafaufau i se isi mea. Sa ou ala i le po atoa. Sa matuai le lelei ni a'u meā a'oga i le aso na sosoo ai. I le maea ai o le tele o tatalo, sa ou faia ai loa se faaiuga ia feiloai atu i lau epikopo ma amata faatumu au pepa talosaga o le misiona.

E le i fai mai lava Jeanene ia te au e auauna atu i se misiona *mo ia*. Sa lava lona alofa ia te au e faasoa mai ai lona talitonuga maumaututu ma tuuina mai ia te au le avanoa e filifili ai le itu e agai ai lo'u lava olaga. Sa ma tau fai auauna atu uma i ni misiona ma mulimuli ane ai faamauina i le malumalu. O le lototele o Jeanene ma le tuuto i lona faatuatua na faia uma ai se eseesea i o maua olaga faatasi. Ou te mautinoa semanu ma te lē maua lava le fiafia lea ua ma olioli ai nei pe ana le seanoa ma lona faatuatua malosi i le mataupu faavae o le auauna atu muamua i le Alii. O ia o se faaitaiga matagofie, ma le amiotonu!

Sa lava uma le alolofa o Tinamatua Whittle ma Jeanene ia te au e faasoa mai ai o lau talitonuga maumaututu



o sauniga o le talalelei ma le auauna atu i le Tama o i le Lagi o le a manuia ai lo'u olaga. E leai se tasi o i laua sa faamalosi au pe na ou lagona ai le leaga o le tagata sa ou avea ai. Sa laua alolofa ia te au ma alolofa i le Tama i le Lagi. Sa laua iloa uma e Na te mafaia ona faia ni mea silisili i lou olaga nai lo mea ou te mafaia na o au. Sa fesoasoani ma le lototoa i laua uma ia te au i auala alofa e saili ai le ala o le fiafia silisili.

E mafai faapefea ona avea i tatou taitoatasi ma se uunaiga taua? E tatou ona tatou mautinoa ia alolofa ma le faamaoni ia i latou e tatou te mananao e fesoasoani i ai ma le amiotonu ina ia mafai ona amata ona latou atiina ae

le mautinoa o le alofa o le Atua. Mo le toatele naua i le lalolagi, o le luitau muamua i le taliaina o le talalelei o le atiina ae lea o le faatuatua i se Tama i le Lagi, o Lē e alofa atoatoa ia i latou. E faigofie ona atiina ae lena faatuatua pe a i ai ni a latou uo po o ni aiga o e alolofa ia i latou i se alofa faapena.

O le tuuina atu ia i latou o le faamautinoaga i lou alofa e mafai ai ona fesoasoani e atiae lo latou faatuatua i le alofa o le Atua. Ma e ala i lau fesoatiga alofa, ma agalelei, o le a faamanuaina o latou olaga e ala i le faasoa atu o lesona na e aaoaina, o aafiaga na e maua, ma mataupu faavae ua e mulimuli i ai ia maua ai ni vaifofo i au lava tauiviga. Faaali atu lou naunautaiga



faamaoni i lo latou soifua manuia; ona faasoa atu lea o lou molimau o le talalelei a Iesu Keriso.

E mafai ona e fesoasoani i auala ua mauaa i mataupu faavae ma aoaoga faavae. Ia uunaia i latou e te alofa i ai e saili ia malamalama i mea e finagalo le Alii ia latou faia. O se tasi o auala e faia ai lenei mea o le fai atu ia i latou o ni fesili e mafai ona latou mafaufau i ai ona tuu atu lea o se taimi ia lava ia i latou—pe o ni itula, aso, masina, pe sili atu—ia mafaufau loloto ma saili ai ia maua tali mo i latou lava. Atonu e manaomia ona e fesoasoani ia i latou ia iloa le auala e tatalo ai ma pe faapefea ona iloa tali i a latou tatalo. Fesoasoani ia i latou ia iloa o tusitusiga paia o se punavai taua i le mauaina ma le iloaina o na tali. I lena auala o le a e fesoasoani ai ia i latou ia saunia ai mo avanoa ma luitau o le lumanai.

O le faamoemoega o le Atua o le “aumaia [o] le tino ola pea ma le ola faavavau o le tagata.”² O le faavae lena o mea uma tatou te faia. O nisi taimi ua tatou pupū ai i mea tatou te iloa e matagofie pe ua pupū tele o tatou loto i tiutetauave faalelailolagi masani ua galo ai ia i tatou ia faamoemoega o le Atua. A o e faaaauu pea ona taulai atu lou olaga i mataupu faavae sili ona taua, o le a e maua se malamalamaaga o mea e tatau ona e faia, ma o le a e fua mai ni fua se tele mo le Alii ma le tele o le fiafia mo oe lava.

Pe a taulai atu lou olaga i mataupu faavae autu o le ata o le faaolagata, o le a sili atu ona e punouai i le faasoa atu o mea e te iloa aua ua

e malamalama i le taua e faavavau o sauniga o le talalelei. O le a e faasoa atu mea e te iloa i se auala e uunaia ai au uo ia mananao e faamalolosia i latou faaleagaga. O le a e fesoasoani atu i e pele ia te oe ia mananao ia tuuto e usiusitai uma i Ana poloaiga ma tauave i o latou lava luga le suafa o Iesu Keriso.

Ia manatua o le liuaina o tagata tai-toatasi ua na o se vaega o le galuega. Ia saili e le aunoa e faamalolosia aiga. Aoa atu ma se vaaiga mamao o le taua o le faamauina o aiga i le malumalu. Mo nisi o aiga atonu e manaomia ai ni tausaga. O le tulaga lena sa oo ai ou matua. E tele tausaga ina ua mavae lo’u papatisoga, sa papatiso ai lo’u tama, ma mulimuli ane faamauina lo matou aiga i le malumalu. Sa au-auna atu lo’u tama o se fai faamauga i le malumalu, ma sa au-auna atu ai ma lo’u tina iina faatasi ma ia. A e mauaina le vaaiga mamao o sauniga faamau

Sini, Ausetalia



o le malumalu, o le a e fesoasoani e fausia le malo o le Atua i le lalolagi.

Ia manatua, o le alofa ia i latou o le faavae aupito sili lea ona mamana mo le uunaia o i latou e te manao e fesoasoani i ai. O le faatosinaga a lou Tinamatua o Whittle ma lou toalua, o Jeanene, semanu e itiiti sona taua pe ana ou le iloaina muamua la te alofa ia te au ma mananao ia ou maua le mea silisili i le olaga.

I le avea ai ma se soa i lena alofa, ia faatuatuaia i latou. I nisi o tulaga, atonu e foliga mai e faigata ona faatuatuaia, ae ia saili ni auala e faatuatuaia ai i latou. E mafai e fanau a le Tama i le Lagi ona faia ni mea ofoofogia pe a latou lagona le faatuatuaia. O fanau uma a le Atua i lenei olaga faaletino sa filifilia le fuafuaga a le Faaola. Ia faatuatuaia o le avanoa ua latou maua o le a latou toe faia ai lena mea.

Ia faasoa atu mataupu faavae lena e fesoasoani ia i latou e te alofa i ai ia fetaomi i luma i le ala i le ola e faavavau. Ia manatua, o loo tatou tuputupu ae i lea fuaitau i luga o lea fuaitau. Ua e mulimuli i lena mamana e tasi i lou malamalamaaga o le talalelei. Ia *faa-faigofie* lou faasoaia atu o le talalelei.

O lau molimau patino i le Togiola a Iesu Keriso o se meafaigaluega mamana lea. O punaoa o loo i ai faatasi o le tatalo, o le Tusi a Mamona ma isi tusitusiga paia, ma lou tuuto atu i sauniga o le perisitua. O mea uma nei o le a faafaigofieina le taitaiga a le Agaga, lea e matuā taua tele mo oe e faalagolago i ai.

Ina ia mataalia e pei ona faia e Keriso,³ ia punouai i lenei mataupu faavae autu o le talalelei: *o le Togiola a Iesu Keriso ua mafai ai ona tatou avea atili e faapei o lo tatou Tama i le Lagi, ina ia mafai ona tatou nonofo faatasi e faavavau i o tatou iunite faaleaiga.*

E leai se aoaoga faavae e sili atu ona taua i la tatou galuega nai lo le

Togiola a Iesu Keriso. I soo se avanoa talafeagai, ia molimau atu i le Faaola ma i le mana o Lana taulaga Togiola. Faaoga tusitusiga paia o loo aoao atu ai e uiga ia te Ia ma le mafuaaga ua avea ai o Ia ma mamana atoatoa mo tagata uma i le olaga.⁴ O le a manaomia ona e suesue ma le filiga. Aua le gauai atu i mea e leai se aoga e te misia ai le aoaoina o le aoaoga faavae ma aoaoga a le Alii. Faatasi ai ma se faavae maumaututu patino o aoaoga faavae, o le a avea oe ma se punavai mamana mo le faasoaina atu o le upumoni taua i isi o e ua matua manaomia i latou.

E sili atu ona tatou auauna atu i lo tatou Tama i le Lagi e ala i le uunaiga amiotonu o isi ma le auauna atu ia i latou.⁵ O le faataitaiga aupito sili na savalia le fogaeleele o lo tatou Faaola, o Iesu Keriso. Sa faatumulia Lana galuega faaletino i aoaoga, auaunaga, ma le alofa i isi. Sa ia nofo i lalo ma tagata taitoatasi o e sa faamasinoina ua lē agavaa i Lana mafutaga. Sa Ia alofa ia i latou taitoatasi. Sa Ia iloatino o latou manaoga ma aoao atu Lana talalelei ia i latou. Ua ia valaaulia i tatou ia mulimuli i Lana faataitaiga atoatoa.

Ou te iloa o Lana talalelei o le ala i le filemu ma le fiafia i lenei olaga. Tau ina ia tatou manatua ia faia e pei ona Ia faia e ala i le faasoaina atu o lo tatou alofa, faatuatuaina, ma le malamalama o le upumoni i isi o e e le i taliaina le malamalama susulu o le talalelei. I le suafa o Iesu Keriso, amene. ■

FAAMATALAGA

1. Ioane 13:15.
2. Mose 1:39.
3. Tagai Ioane 13:15.
4. Tagai, mo se faataitaiga, Luka 22:39–46; Ioane 8:3–11; Filipi 4:13; Iakopo 5:15–16; 1 Ioane 1:7; 2 Nifae 1:15; 2; 25:17–30; 31; Iakopo 4; Alema 7; 42; 3 Nifae 11–30; Moronae 10:32–33; Mataupu Faavae ma Feagaiga 18:10–16; 19:13–19; 29:3; 88:1–13; 138:2–4; Mose 5:6–12.
5. Tagai Mataia 22:35–40; Mosaea 2:17.



Saunia e Elder Robert D. Hales

○ Le Korama a Aposetolo e Toasefululua

“Afai Tou Te Alofa Mai ia te Au, Ia Outou Tausi Mai i Au Poloaiga”

O le faaaogaina o lo tatou faitalia e usiusitai ai o lona uiga o le filifili lea e “fai mea tonu [ma tuu] i taunuuga e mulimuli mai.”

Uso e ma tuafafine, mai lesonea uma ua tatou aoaoina mai le soifuaga o le Faaola, e leai se lesonea ua sili ona manino ma mamana nai lo le lesonea o le usiusitai.

O Le Faataitaiga a le Faaola

I le Fono i le Lagi i le muai olaga, na fouvale ai Lusifelo i le fuafuaga a le Tama Faalelagi. O i latou na mulimuli ia Lusifelo na faamutaina lo latou alu-alu i luma e faavavau—ia faaeteete i lē e te mulimuli i ai!

Ona faaalua lea e Iesu Lana tautinoga e usiusitai, i le fetalai atu, “Le Tama e, ia faia lou finagalo, ma e a oe pea le mamalu e faavavau.”¹ I Lana galuega atoa, “Sa mafatia o ia i faaosoosoga ae sa [latou] le gauai atu i ai.”² E moni lava, “o mea sa tiga ai o ia na aoaoina ai o ia ia usiusitai.”³

Ona sa usiusitai lo tatou Faaola, na Ia togiolaina ai a tatou agasala, ua mafai ai ona tatou toetutu ma saunia le ala mo i tatou e toe foi atu ai i lo tatou Tama Faalelagi, o le na silafia o le a

tatou faia ni mea sese a o tatou aoao e usiusitai i le olaga faaletino. A tatou usiusitai, ua tatou talia Lana taulaga, aua “[tatou] te talitonu e ala i le Togiola a Iesu Keriso, e mafai ai ona faaolaina tagata uma, e ala i le usiusitai i tulafono, sauniga, ma poloaiga ua tuuina mai i le talalelei.”⁴

Na aoao i tatou e Iesu ina ia usiusitai i se gagana faatauvaava lea e faigofie ona malamalama i ai: “Afai tou te alofa mai ia te au, ia outou tausii mai i au poloaiga”⁵ ma “Sau, mulimuli mai ia te au.”⁶

Pe a tatou papatiso, tatou te “ave i o [tatou] luga le suafa o Keriso” ma ulu atu “i le feagaiga ma le Atua o le a [tatou] usiusitai e oo i le iuga o o [tatou] ola.”⁷ O Aso Sa taitasi tatou te faafouina ai lena feagaiga o le papatisoga e ala i le taumamafa i le faamanatuga ma molimau atu ua tatou loto e tausii ia poloaiga. Tatou te sailia le faamagaloga mo soo se manatu, lagona, po o amioga e le o ogatusa ma le finagalo o lo tatou Tama Faalelagi. A tatou salamo e ala i le liliu ese mai le le usiusitai ma

amata ona toe usiusitai, ua tatou faaalua lo tatou alolofa mo Ia.

O Ituaiga o Usiusitai

A o tatou ola i le talalelei, tatou te alualu i luma i lo tatou malamalama i le usiusitai. O nisi taimi e ono faaososoina ai i tatou e faaitaitai le mea ou te ta'ua o le “usiusitai i le poto o tagata,” lea tatou te teena ai ma le le usiusitai le tulafono a le Atua ae filifili lo tatou

atamai po o o tatou manaoga e oo lava i le lauiloa. Ona e faia e le toatele o tagata lenei mea, o le a faaititia e lenei tulaga sese o le usiusitai ia tulaga faatonuina a le Atua i la tatou aganuu ma i a tatou tulafono.

E ono i ai ni taimi e faatino ai e tagata o le ekalesia le “usiusitai filifili,” fai mai e alofa i le Atua ma ava i le Atua ae ilo ma filifili po o fea o Ana poloaiga ma aoaoga—ma aoaoga ma

fautuaga a Ana perofeta—o le a latou mulimuli atoatoa i ai.

O nisi e filifili le poloaiga e usiusitai i ai ona latou te le o malamalama i mafuaaga uma mo se poloaiga, e pei lava foi ona le malamalama i taimi uma le fanau i mafuaaga o tulafono ma fautuaga a o latou matua. Ae ua tatou iloa ina lava ia mafuaaga tatou te mulimuli ai i perofeta, aua o le Ekalesia lenei a Iesu Keriso, ma o le Faaola o loo taitaia Ana perofeta i tisipenisione uma.

A o faateleina lo tatou malamalama e uiga i le usiusitai, ua tatou iloa le matafaioi taua o le faitalia. A o i ai Iesu i le Faatoaga i Ketesemane, sa Ia tatalo faatolu i Lona Tama i le Lagi, “Lo'u Tama e, afai e mafai, ia ave ese lenei ipu ia te au, a e aua le faia lo'u loto, a o lou finagalo.”⁸ E le mafai ona ave ese e le Atua le faitalia a le Faaola, o lea na Ia auina mai ai ma le alofa mutimutivale se agelu e faamalosi i Lona Alo Pele.

Na fetaiai le Faaola ma se isi tofotofoga i Kolokota, lea sa mafai lava ona ia valaau atu i au a agelu e ave ifo o Ia i lalo mai le satauro, ae sa Ia faia Lana lava filifiliga e tumau ai ma le usiusitai e oo i le iuga ma faamaea ai Lana taulaga togiola, e ui lava na oo ai i puapuaga matuia ma le maliu.

O le usiusitai faaleagaga faatagata matua o “le usiusitai [lea] o le Faaola”. E uunaia lea e ala i le alofa moni mo le Tama Faalelagi ma Lona Alo. A tatou usiusitai ma le loto i ai, e pei ona faia e lo tatou Faaola, ua tatou faatauaina afioga a lo tatou Tama Faalelagi: “O lo'u atalii pele lena, ua ou fiala lava ia te ia.”⁹ Ma o le a tatou tulimatai atu e faalogo, pe a ulu atu i le afioaga a lo tatou Tama Faalelagi, “Ua lelei ia, le auuuna lelei e: . . . ulufale mai . . . ia i le fiala o lou alii.”¹⁰

O le faaaogaina o lo tatou faitalia e usiusitai ai o lona uiga o le filifili lea e “fai mea tonu [ma tuu] i taunuuga e





mulimuli mai.”¹¹ E manaomia ai le lotu pulea ma aumaia ai le faamautinoaga, fiafia e faavavau, ma se lagona o le faamalieina ia i tatou ma, i se faataitaiga, ia i latou o siomiaina i tatou; ma e aofia ai lava pea se tautinoga loloto a le tagata lava ia ina ia lagolagoina taitai perisitua ma mulimuli i a latou aoaoga ma fautuaga.

O Taunuuga

I le filifili ai pe o le a tatou usiusitai, e aoga ai la i taimi uma le manatuaina o taunuuga o a tatou filifiliga. Pe na malamalama Lusifelo ma ona soo i taunuuga o le filifili e tetee i le fuafuaga a le Tama Faalelagi? Afai na malamalama, aisea la na latou faia ai sea filifiliga leaga? Atonu tatou te fesiligia i tatou lava i se fesili talitutusaa: aisea e filifili ai soo se tasi o i tatou ina ia le usiusitai ae ua tatou iloa lava ia taunuuga e faavavau o le agasala? Ua tuu mai e tusitusiga paia se tali: o le mafuaaga na filifili ai Kaino ma nisi o fanau a Atamu ma Eva ina ia le

usiusitai ona sa “sili atu lo latou alolofa ia Satani nai lo le Atua.”¹²

O lo tatou alolofa i le Faaola o le ki lea i le usiusitai faale-Faaola. I le lalolagi o aso nei, a tatou taumafai ina ia usiusitai, ua tatou tautino atu lo tatou alolofa ma le faaaloalo mo fanau uma a le Tama Faalelagi. Ae o le faigata ia ona suia e lenei alofa mo isi ia poloaiga a le Atua, lea na tuuina mai mo lo tatou lelei! Mo se faataitaiga, o le poloaiga “aua e te . . . fasioti tagata, pe e te faia soo se mea faapena”¹³ na faavaeina i luga o le tulafono faaleagaga lea e pui-puia ai fanau uma a le Atua, e oo lava i e e lei fananau mai. O aafiaga anamua o loo fautua mai ai afai tatou te le amanaiaina lenei tulafono, e lemafuaiaina taunuuga o le faanoanoa. Ae e talitonu le toatele e le taliaina le faamutaina o le ola o se tamaititi e lei fanau mai mo ni mafuaaga e fiafia i ai po o se mafuaaga talafeagai.

O le fetuunai o le usiusitai e le suia ai le tulafono faaleagaga po o ona taunuuga ae e taitai atu ai i le fenumiai, le

mautonu, fesetetai solo i ala ese, leiloa ai, ma le faavavavau. I le avea ai ma soo o Keriso, ua ia i tatou se matafaioi paia e tausia Ana tulafono ma poloaiga atoa ai ma feagaiga ia tatou te tauaveina i o tatou luga.

Ia Tesema 1831, na valaau ai nisi o le usoga ina ia fesoasoani e faatoafilemu ni lagona le fiafia na aliae e faasaga i le Ekalesia. E ala atu i le Perofeta o Iosefa Samita, na faatonuina ai e le Alii i latou i se auala e le masani ai ma faateia:

“Faafememeai o oulua fili; valaau atu ia te i latou ia latou feiloai ma oulua i luma o nuu ma tua o nuu. . . .

“O le mea lea, tuu atu ia te i latou e aumai o latou manatu malolosi e faasaga i le Alii.

“. . . e leai se auupega ua faia e faasaga ia te oulua e manumalo;

“Ma afai e i ai soo se tagata e sii lona leo faasaga mai ia te oulua o le a faafememeaina o ia i lou lava taimi e tatau ai.

“O le mea lea, ia tausii i au poloaiga; ua moni ma faamaoni i latou.”¹⁴



O Lesona mai Tusitusiga Paia

Ua tumu tusitusiga paia i faataitaiga o perofeta o e na aoaoina ni lesona o le usiusitai e ala i o latou lava aafiaga.

Na aoaoina e Iosefa Samita ni taunuuga mo le gauai atu i ta'iga a lona lagolago, uo ma tusiupu o Matini Harisi. I se tali atu i talosaga a Matini, na fesili atu ai Iosefa i le Alii mo se faatagaga e nono atu ai ia itulau e 116 o le Tusi a Mamona ina ia mafai ona faaali e Matini i lona aiga, ae na tau atu e le Alii ia Iosefa e fai atu i ai e leai. Na aoi Matini ia Iosefa e toe fesili atu i le Alii. Ina ua mavae le talosaga lona tolu a Iosefa, na aumai ai e le Alii le faatagaga mo tagata faapitoa e toalima e vaai i itulau. "O se feagaiga faamaoni na folafola atu ai e Matini o le a mulimuli i lenei maliliega. Ina ua ia taunuu i le fale, ma ua oo atu le uunaiga faamalosi i ona luga, na galo ai lana tautoga faamaoni ma ia faatagaina ai isi e matamata i itulau, ma i se taunuuga mai se togafiti ona o lona tufatufaina atu o itulau,"¹⁵ sa leiloloa ai. O se taunuuga la, na aoaiina ai Iosefa e le Alii ma taofia ai le faatagaga e faaauau ai ona faaliliu le Tusi a Mamona. Na mafatia Iosefa ma salamo mai lana solitulafono mo le gauai atu

i ta'iga a isi. Ina ua mavae se vaitau, sa faatagaina Iosefa e toe faaauau le galuega faaliliu. Na aoaoina e Iosefa se lesona taua e uiga i le usiusitai lea na aoga mo ia i lona olaga atoa!

Ua tuuina mai e le perofeta o Mose se isi faataitaiga. Ina ua faiava ma le usiusitai Mose i se fafine Kuso, sa fai upu Miriama ma Arona ia te ia. Ae na aoaiina i laua e le Alii, ma fetalai atu, "Ma te faafesagai ona ma tautala ma [Mose]."¹⁶ Na faaaoaga e le Alii lenei mea maoae na tupu e aoao ai tagata o le Ekalesia i la tatou tisipenisione. I le 1830 na fai mai Hiram Page ua ia maua faaaliga mo le Ekalesia. Na faasa'oina o ia e le Alii ma aoao atu le Au Paia, "Ia e usiusitai i mea o le a Ou tuu atu ia [Iosefa], e pei lava o Arona,"¹⁷ "ona e maua e ia . . . e pei lava o Mose."¹⁸

O le usiusitai e aumaia ai faamanu-iaga, "ma a tatou maua se faamanu-iaga mai le Atua, e maua i le usiusitai i lena tulafono ua faavae ai i luga."¹⁹

O le usiusitai e aoao atu e ala i le faataitaiga. E ala i le auala tatou te ola ai, tatou te aoao ai a tatou fanau, "Aoao le pote i lou talavou; ioe, aoao i lou talavou e tausi i poloaiga a le Atua."²⁰

O le usiusitai o le a malosi ai lo tatou alualu i luma, mafai ai ona

onosaia ma le faamaoni ia tofotofoga ma luitau i le lumanai. O le usiusitai i Ketesemane na saunia ai le Faola ina ia tumau e oo i le iuga i Kolokota.

Ou uso ma tuafafine pele, o upu a Alema e faaalua ai lagona o lo'u loto:

"Ma o lenei ou uso pele e, ua ou fai atu nei mea ia te outou ina ia mafai ai ona ou fagua o outou i se lagona o lo outou tiute i le Atua, ina ia mafai ona outou savavali ma le le pona i ona luma. . . .

"Ma o lenei ou te mana'o ina ia outou lotomauualalalo, ma augofie ma agamalu; . . . ma filiga i le tausiga o poloaiga a le Atua i taimi uma."²¹

Ou te tuu atu lau molimau faapitoa o loo soifua lo tatou Faaola. Talu ai sa usiusitai o Ia, o le a "tootuli tulivae uma, ma tautino atu laulaufaiva uma . . . o ia o [lo tatou Faaola]."²² Tau ina ia tatou matua alolofa ia te Ia ma talitonu atoatoa ia te Ia i le faatuatua ina ia tatou usiusitai foi, tausia Ana poloaiga, ma toe foi atu e nonofo faatasi ma Ia e faavavau i le malo o lo tatou Atua, o lau tatalo lea i le suafa o Iesu Keriso, amene. ■

FAAMATALAGA

1. Mose 4:2.
2. Mataupu Faavae ma Feagaiga 20:22.
3. Eperu 5:8.
4. Tagai Mataupu Faavae o le Faatuatua 1:3.
5. Ioane 14:15.
6. Luka 18:22.
7. Mosaea 5:8.
8. Mataio 26:39; tagai foi i fuaiupu 42, 44.
9. Mataio 3:17; tagai foi 3 Nifae 11:7.
10. Mataio 25:21.
11. "Fai Mea Tonu," *Viiga*, nu. 148.
12. Mose 5:13.
13. Mataupu Faavae ma Feagaiga 59:6.
14. Mataupu Faavae ma Feagaiga 71:7–11.
15. Joseph Fielding Smith, *Essentials in Church History*, (1922) 65; tagai foi Mataupu Faavae ma Feagaiga 3.
16. Numera 12:8.
17. Mataupu Faavae ma Feagaiga 28:3.
18. Mataupu Faavae ma Feagaiga 28:2.
19. Mataupu Faavae ma Feagaiga 130:21; tagai foi i le fuaiupu 20.
20. Alema 37:35.
21. Alema 7:22–23.
22. Mosaea 27:31.



Saunia e Elder Claudio D. Zivic

○ Le Fitugafulu

Aua Ne'i o Tatou Ui i le Auala Sese

Ou te tatalo ina ia le punitia la tatou vaai i luga o le ala ina ia mafai ai ona tatou fesootai atu pea i taimi uma i le lagi.

Sa aoao le tata a se tamaitiiti i le piano, ma o se faatauolua sa tilo-tilo atu ia te ia mai le faamalama, sa fesili atu, “O i ai lou tina i le fale?”

O lea na tali atu ai le tamaitiiti, “O i . . . a o le a lou manatu?”

O le ma fanau pele e toalima e ta piano uma, faafetai ai i le uunaiga a lo'u toalua! A taunuu atu le faiaoga i lo matou fale, e tamoe lo ma atalii o Adrián ma lafi ina ia faamisi ana lesona. Ae o se tasi aso, sa tupu ai se mea ofoofogia! Sa amata ona fiafia tele o ia i musika lea na ia faaauau ai ona aoao pea na o ia.

A mafai ona tatou ausia lena vaega i le faagasologa o lo tatou liuaina, o le a ofoofogia. O le a matagofie le i ai o se manaoloto i o tatou loto e tausi ia poloaiga e aunoa ma se tasi na te faamanatu mai pea ia i tatou ma ia i ai se talitonuga maumaututu e faapea, a tatou mulimuli i le ala sa'o, o le a tatou mau faamanuiaga folafolaina o loo i totonu o tusitusiga paia.

I nai tausaga ua mavae sa matou o ai i le Arches National Park ma lo'u toalua; ma lo ma afafine, o Evelin; ma se uo. O se tasi o fausaga faaofuofu sili ona lauiloa iina sa ta'ua o le Delicate Arch. Sa tonu ia i matou e savavali pe

tusa ma le 1.5 maila (2 km), ma fe'a'ei i le mauga ina ia taunuu ai i le fausaga faaofuofu.

Sa matou amata i luga o le auala i se naunautaiga tele, ae ina ua maea ona savalia sina mamao, sa manaomia e isi se malologa. Ona o lo'u naunau ia oo iina, sa ou filifili ai ou te faaauau pea na o au. Sa aunoa ma lo'u nofouta i le auala sa tataua ona ou alu ai, sa ou mulimuli ai i se alii sa muamua atu i o'u luma, sa foliga mai sa savali atu

ma le mautinoa tele. Sa faasolo ina faigata tele le auala, ma sa ao ia te au ona puna mai le tasi papa i le isi. Ona o le faigata, sa ou mautinoa ai o le a le taunuu lava tamaitai o la'u vaega. Sa faafuasei ona ou vaaia le Delicate Arch, ae o le mea na matua faateia tele ai au, sa ou vaaia o loo tu mai i se vaega e le mafai ona ou oo atu i ai.

Faatasi ai ma le le fiafia tele, na tonu ai ia te au e toe foi. Sa ou faatalitali ma le onosai seia matou toe feiloai. O la'u fesili vave na fai, “Sa outou oo i le Delicate Arch?” Sa latou ta'u mai ma le fiafia ia te au na latou oo i ai. Sa latou faamalalamama mai na latou mulimuli i faailoilo na faasinoina le auala, ma na faatasi ai ma le faaeteete ma taumafaiga, na latou oo ai i lo latou taunuuga.

Ae paga lea, sa sese le auala na ou ui ai. Oka se lesona ina a maoae sa ou aoaoina i lena aso!

E faafia ona tatou faia se mea sese e uiga i le auala sa'o, i le faatagaina o i tatou lava e taitaiina e faiga a le lalolagi? E manaomia ona tatou fesiligia pea i tatou lava, pe o tatou o ni tagata e anaana i le afioga a Iesu Keriso.





O loo maua se aoaoga ofoofogia i le tusi a Ioane:

“Ina tumau ia o outou ia te a’u, o a’u foi ia te outou. Faapei o le la e le mafai ona fua pe a na o ia, pe afai e le mau i le vine; e faapea foi outou, pe afai tou te le tumau ia te a’u.

O a’u nei o le vine, o la outou. O lē tumau ia te a’u, ma a’u ia te ia, o ia lava e fua tele mai; aua e le mafaia e outou ona fai o se mea e tasi pe a a’u le i ai” (Ioane 15:4–5).

I le faaaogaina ai o lenei faatusatusaga, ua mafai ai ona tatou vaaia le sootaga vavalalata tele lē mafaatusalia ua tatou maua ma Iesu Keriso ma le taua ua Ia tuu mai ia i tatou taitoatasi. O Ia o le puna o le vai ola ma le ala o loo tafe mai ai le vai ola ia i tatou, o le malosi lea e faatagaina ai i tatou ia faafaiileina ina ia mafai ai ona fua tele mai. Na aoaoina i tatou e Iesu Keriso i se ala o ni lala—po o tagata e faalagolago ia te Ia—e le tatau lava ona tatou manatu faatauvaa i le taua o Ana aoaoga.

O loo i ai nisi mea sese atonu e ogaoga, ma afai tatou te le faasa’oina na mea sese i le taimi sa’o, e mafai ona

latou taitaieseina tumau i tatou mai le ala sa’o. Afai tatou te salamo ma taliaina ia faasa’oga, o le a faatagaina e nei aafiaga i tatou e faalotomauualoina i tatou lava, sui a tatou amioga, ma tatou toe latalata atili atu ai i lo tatou Tama Faalelagi.

Ou te fia tuuina atu se faataitaiga i lenei manatu faavae e ala i le faasino atu i se tasi o taimi sili ona matuia na oo i ai le Perofeta o Iosefa Samita. Na auala mai i lenei aafiaga, na tuu mai ai e le Faaola ia i tatou ni aoaoga e faata-tau i mataupu faavae e tatau ona tatou manatuaina pea i o tatou olaga atoa. Sa tupu ina ua leiloloa ia Matini Harisi itulau e 116 na faaliliuina o le vaega muamua o le Tusi a Mamona.

Ina ua salamo mo le le mulimulitaia o le fautuaga a le Atua, sa maua ai e le Perofeta le faaaliga o loo maua i le vaega e 3 o le Mataupu Faavae ma Feagaiga (tagai *Aoaoga a Peresitene o le Ekalesia: Iosefa Samita* [2007], 69–71). Mai mea o loo tusia i le fuaiupu 1 e oo i le 10, ou te fia faamamafaina ai ni mataupu faavae se tolu ia e tatau ona tatou manatuaina i taimi uma:

1. O galuega ma faamoemoega o le Atua e le mafai ona faalavelaveina.
2. E le tatau ona tatou matataua i tagata i lo le Atua.
3. O loo i ai se manaoga mo le salamo faifai pea.

I le fuaiupu 13, o loo aoao ai i tatou e le Alii i ni amioga se fa e le tatau lava ona tatou faia:

1. Lafoai i fautuaga a le Atua.
2. Solia o folafolaga sili ona paia na osia i luma o le Atua.
3. Faalagolago i a tatou lava faaiuga.
4. Faamaualuga i lo tatou lava atamai.

Ou te tatalo ina ia le punitia la tatou vaa i luga o le ala ina ia mafai ai ona tatou fesootai atu pea i taimi uma i le lagi, ina ia le taitaieseina i tatou e tu ma aga o le lalolagi.

Afai e i ai se tasi o outou e oo i se tulaga o le lafoaia o ala o le Alii—i soo se vaega lava o le ala—faatasi ai ma le salamo tele o le a e lagonaina ai le oona o le lafoaia o fautuaga a le Atua, solia o folafolaga sili ona paia na osia i

luma o le Atua, ma le faalagolago i au lava faaiuga, po o le faamaualuga i lou lava atamai.

Afai o le tulaga lea, ou te apoapoai atu ia te outou ia salamo ma foi mai i le ala sa'o.

Sa i ai se tasi taimi na valaau atu ai se atalii o le fanau i lona tama matua e faamanuia i lona aso fanau. Sa ia fesili atu ia te ia po o le a lona matua. Sa ia tali mai ua atoa lona 70 tausaga. Sa mafaufau lona atalii o le fanau mo sina taimi ona faapea atu lea, "Tama-matua, sa e toe amata i le toe foi atoa i tua i le 1?"

I le taimi o le tamaititi ma le talavou, sa manatu ai tagata o le a latou le matutua lava; o le manatu o le a le oo mai lava le oti—o le mea lena mo tagata matutua tele—ma o le taunuu atu i lena tulaga o se taimi umi tele. A o gasolo le taimi, ma tea atu masina ma vaitau, seia oo ina maanuminumi foliga, e faaitiitia le malosi, ma faateleina le manaoga mo asiasiga i fomai, ma faapena ai lava.

O le a oo mai le taimi tatou te toe feiloai ai ma lo tatou Togiola ma le Faaola, o Iesu Keriso. Ou te augani atu a oo i lena taimi paia ma mamalu o le a mafai ona tatou iloaina o Ia ona o le malamalama ua tatou maua e uiga ia te Ia ma ona o le mulimuli i Ana aoaoga. O le a Ia faaali mai ia i tatou faailoga i Ona aao, ma o le a tatou auai faatasi i se feopoā'iga umi, ma loimata o le olioli i le mulimuli ai i Ona ala.

Ou te molimau atu i tuluiga e fa o le lalolagi o loo soifua Iesu Keriso. Ua Ia apoapoai mai ia i tatou, "Faalogo mai ia, outou e atunuu o le lalolagi, ma faalogo mai i fetalaiga a le [lena] Atua . . . o le na faia outou" (MF&F 43:23). Tau ina ia tatou maua le gafatia e iloa ai, faalogo, malamalama, ma faauiga sa'o le sāvali a "[lena] Atua . . . o le na faia [tatou]" ina ia tatou le se ese mai i Ona ala, ou te ole atu ai i le suafa o Iesu Keriso, amene. ■



Saunia e Elder W. Craig Zwick

○ Le Fitugafulu

○ Le A Sou Manatu?

Ou te aioi atu ia te outou ia faataitai ona fesili atu, faatasi ma se faaaloalo agamalu mo le aafiaga o se isi tagata, le fesili lena: "O le a sou manatu?"

Ua fasefulu tasi tausaga talu ai sa ou a'e ai i luga o le nofoa o le ave loli o se loli e 18 pa'u ma lo'u toalua lalelei, o Jan, ma le ma atalii laitiiti o Scotty. Sa matou aveina se uta mamafa o mea faufale i nisi o setete.

I na aso sa leai ni tulafono o fusipa'u o nofoa po o ni nofoa taavale mo pepe. Sa sii e lo'u toalua lo ma atalii pele i ona lima. O lana faamatalaga "Ua mau-tinoa lava lo tatou maualuga ese mai le elelee" sa tatau lava ona ou maua ai se faaiteite e uiga i ona lagona atuatuvalet.

A o matou pasia lelei le auala lauiloa maugā o Donner, o se vaega tifato o le alatanu, na faafuasei ma le le mafaufauina ona faatumulia le pito i luma o le loli i se asu mafiafia. Na faigata ona iloa se mea ma sa faigata ona matou manava.

Faatasi ai ma se uta mamafa, sa le mafai e taofi ona faaitiitia vave le sa-asaoa. I le faaaogaina ai o taofi o le afi ma le tasuiina faamaualalo o le kia, sa ou taumafai ai ma le popole e taofi.

A o ou afe i autafa o le auala, ae le i tu foi lena o le loli, na tatala ai e lo'u toalua le faitotoa ma oso i fafo ma le ma pepe i ona lima. Sa ou vaai atu i ai ma le leai o se mea e mafai ona faia a o la pa'u'u atu i le palapala.

O le taimi lava na tu ai le loli, sa ou oso ese mai le loli asu. I le atuatuvalet

tele, sa ou tamo'e atu ai i luga o papa ma vao ma fusi mai i laua. Sa mafoefoe uma ma tafetotoi ogalima ma lima o Jan, ae o le mea e faafetai ai sa taufai manava uma i laua. Sa ou fusi mau i laua a o to'a ifo le pefu i le itu o le alatanu.

Ina ua to'a le tātāvale o lo'u fatu ma maua foi la'u manava, sa ou alaga atu, "O le a sou mafaufau? E te iloa le matautia o lena mea [ua e faia]? Semanu e te lua feoti!"

Sa ia tepa mai ia te au, ma ona loimata o loo tafe ifo i ona alafau ua palapala i le asu, ma fai mai se upu na tuia ai lo'u fatu ma o loo tatagi pea i ou taliga: "Sa na ona ou taumafai lava e laveai le ta tama."

Sa ou iloaina i lena taimi sa ia manatu ua talali le afi o le loli, ma fefe ai ina ne'i pasae le loli, ma matou feoti ai. Peitai, sa ou iloaina o se faaletonu tau eletise—sa matautia ae lē lamatia. Sa ou tepa atu i lo'u toalua pele, o loo milimili lemu le ulu o le ma atalii pepe, ma ou mafaufau po o le a sea ituaiga o tina na te faia se mea matua lototele faapea.

O lena tulaga semanu e matautia faalelagona e pei o le faaletonu moni o le afi [o le loli]. Ma le agaga faafetai, i le maea ai ona onosaia o se taimi umi na ma le fetautalaa'i ai, na ma taufai



talitonu ai sa ma sese uma, sa iu ai ina ma faailoaina ni lagona na mafua ai lo ma le fiafia tele. I le fefaasoaiina o lagona o le alofa ma le popole mo le saogalemu o le tasi ma le isi na taofia ai le faalavelave matautia mai le faaleagaina o le ma faaipoipoga faapelepele.

Na lapatai mai Paulo, “Aua nei alu atu se upu leaga ai o outou gutu, [na o le] upu lelei [ma] aoga, e tupu ai le lelei i e faalogologo i ai” (Efeso 4:29). Ua i ai i ana upu se mama a’ia’i.

O le a le uiga ia te oe o le fasifuaaitau “aua nei alu atu se upu leaga”? Ua tatou oo i le tele o taimi i lagona faamaualuga o le ita—o i tatou lava ia ma isi’. Ua tatou vaai i se ita le mataofia e mapuna ae i nofoaga faitele. Ua tatou lagonaina foi se ituaiga o ita vave i taaloga, i faiga faaupufai, ma e oo lava i o tatou lava fale.

O nisi taimi e tautatala ai le fanau i matua pele i upu malolosi ma faatiga. O ulugalii, na atiae faatasi ni tamaoaiiga o le olaga ma ni aaftaga agamalu, ua leiloa le vaaiga mamao ma le onosai i le tasi ma le isi ma siisii o la leo i le ita. O i tatou uma, e ui lava o fanau o le feagaiga a se Tama Faalelagi agaalofo,

ae ua salamo i ni faaiuga vave faafiaamionu ma tautatala i ni upu malolosi ae tatou te le o malamalama i se tulaga o tupu mai i se isi vaaiga. Ua tatou maua uma le avanoa e aoao ai le auala e mafai ai e upu faataumaoui ona ave se tulaga mai le matautia i le lamatia.

O se tusi talu ai nei mai le Au Peresitene Sili o loo ta’ua manino ai e faapea, “Ua aoaoina i tatou e le talalelei a Iesu Keriso ia alolofa atu ma taulima tagata uma i le agalelei ma le migao—e tusa lava pe eseese o tatou manatu” (Tusi a le Au Peresitene Sili, Ian. 10, 2014). O se faamanatu sili lava lea e mafai ma e tataua ona auai ai i le faaauauina o le gagana faaaloalo, aemaise lava pe a tatou vaai atu i le lalolagi mai ni vaaiga e ese ai.

O loo fautua mai le tusitala o le Faataoto, “O le tali filemu, e liliueseina ai le ita; a o le upu faatiga e tupu ai le ita” (Faataoto 15:1). O se “tali filemu” ua i ai se tali faautauta—o ni upu pulea mai se loto e mauualalo. E le faapea la tatou te le tautatala tuusao atu ai pe tatou te fetuunaia upumoni faaleaoaoga faavae. O upu atonu e tuusao atu e mafai ona mālū i le agaga.

O le Tusi a Mamona o loo i ai se faataitaiga ofoofogia o le faamautuina o le gagana ua tuuina atu foi i manatu o se feeseeseaiga faaleulugalii. Na toe auina atu atalii o Sarai ma Liae i Ierusalemalema e aumai ia papatusi apamemea ma sa lei toe foi ane. Sa talitonu Sarai ua lamatia ona atalii ma sa faatumulia o ia i le ita ma manaomia ai se tasi e tuua’ia.

Faafofoga i le tala mai le vaaiga a lona atalii o Nifae: “Ona fa te ia [lo’u tina] ua fano i matou i le vao; ma sa muimui foi o ia e faasaga i lo’u tama, ua fai atu ia te ia o ia o se tagata mau faaaliga; fai mai: Faauta ua e taitaieseina i matou mai le fanua o lo tatou tofi, ma ua le toe i ai a’u tama tane, ma o le a tatou fano i le vao” (1 Nifae 5:2).

Ia, tatou mafaufau i le mea e masalo sa mafaufau i ai Sarai. Sa faatumulia o ia i le popole i ona atalii finauvale ia sa toe foi atu i le nofoaga sa lamatia ai le ola o lona toalua. Sa ia faafesuaia lona fale matagofie ma uo mo se faleie i se togavao tuufua a o talavou pea o ia e toe fai nisi fanau. I se taimi o le atuatuva tele ona o lona fefe, sa foliga mai ai na puna ese ma le lototoa Sarai, pe afai sa le

mafaufauina, mai le maualuga o se loli saosaoa i se taumafaiga e puipui lona aiga. Sa ia faailoaina ni popolega faamaoni i lona toalua i le gagana o le ita ma le masalosalo ma tuua'iga—o se gagana lea e foliga mai e matua lelei ai tele tagata uma.

Sa faalogo le perofeta o Liae i le fefe lea na mafua ai le ita o lona toalua. Ona ia faia lea o se tali faautauta i le gagana o le agaalofo. Muamua, sa ia umiaina le upumoni o mea na foliga moni mai i le vaai a lona toalua: “Ma sa . . . fai atu lo'u tama ia te ia, ua fai atu: Ua ou iloa o a'u o se tagata mau faaaliga; . . . ae [ana] ou nofo pea i Ierusalema, [semanu ua tatou] fano ai faatasi ma o'u uso” (1 Nifae 5:4).

Ona talanoa atu lea i ai o lona toalua i mea na fefe i ai o ia e faatautau i le tulaga manuia o o la atalii, a o molimau atu le Agaga Paia ma le le masalosalo ia te ia, e faapea:

Ae faauta, ua ou maua se laueleele o le folafolaga, o mea ia ua ou olioli ai; ioe, ma ua ou iloa o le a laveaiina e le Alii o'u atalii i fafo mai lima o Lapana. . . .

“Ma sa faapea le ituaiga o gagana sa faamafanafana atu ai lo'u tama, o Liae, . . . i lo'u tina . . . e uiga ia i matou” (1 Nifae 5:5–6).



O loo i ai i aso nei se manaoga tele mo alii ma tamaitai ia atiaeina le faaaloalo mo le tasi ma le isi e tusa lava pe eseese o latou talitonuga ma amioga ma e tusa lava pe eseese mea o loo uunaia i latou. E faigata ona iloa ina mea uma o loo i o tatou mafaufau ma loto pe le malamalama atoatoa foi i le mafuaaga o tofotofoga ma filifiliga e fetai ai ma i tatou taitoatasi.

Ae ui i lea, o le a se mea e tupu i upu leaga na ta'ua e Paulo pe afai ua aofia i latou lava tofiga le tigaalofo mo se aafiaga muamua o se isi tagata? O le taliaina atoa o tapulaa o lou lava ia lē atoatoa ma tulaga faigata, ou te aoi atu ai ia te outou ia faataitai ona fesili atu i lenei fesili, faatasi ma se faaaloalo agamalu mo le aafiaga o se isi tagata: “O le a sou manatu?”


Manatua le taimi na faateia ai e le Alii ia Samuelu ma Saulo i le filifilia

o se taulealea leoleo mamoe laitiiti, o Tavita o Peteleema, e fai ma tupu o Isaraelu? Sa faamalamalama mai e Lana perofeta, “Aua e le vaai Ieova pei o le vaai o tagata, aua e vaai tagata i le tino, a e vaai Ieova i le loto” (1 Samuelu 16:7).

Ina ua faatumulia le matou loli i le asu, sa faatino e lo'u toalua se amio sili ona toa sa mafai ona ia mafaufauina e puipuia ai lo ma atalii. Sa ou galue foi o se tagata o le puipuiga ina ua ou fesiligia lana filifiliga. O le mea e faateia ai, sa le afaina po o ai sa sili ona sa'o. O le mea na taua o le faalogo atu i le tasi ma le isi ma malamalama i le mea o loo vaai i ai le isi.

O le naunautaiga ia malamalama mai le vaaiga a le isi tagata o le a suia ai “upu leaga” ia “tupu ai le lelei.” Sa malamalama le Aposetolo o Paulo i le mea lenei, ma i nisi tulaga e mafai foi ona tatou lagonaina uma. Atonu o le a le suia pe foia ai le faafitauli, ae o le mea e sili atu ona taua atonu o le mafai lea e le alofatunoa e tupu ai le lelei ona suia i tatou.

Ou te tuu atu lau molimau faamaulalo e mafai ona “tupu ai le lelei” e ala i le gagana agaalofo pe a tuia o tatou loto i le meaalofo faafailele o le Agaga Paia i le tiga-alofa mo lagona ma aafiaga o isi. E mafai ai ona tatou suia ni tulaga matautia e avea o ni nofoaga paia. Ou te molimau atu i se Faaola alofa o le “vaai i [o tatou] loto” ma e popole i mea o loo tatou mafaufau i ai. I le suafa o Iesu Keriso, amene. ■





Saunia e Elder Quentin L. Cook

○ Le Korama a Aposetolo e Toasefululua

○ Aa ma Lala

O le faanatinatiina o talafaasolopito o aiga ma galuega o malumalu i o tatou aso e taua lea mo le faaolataga ma le faaeaga o aiga.

Ae lei maliu o ia mai le kanesa i le 1981, sa tau atu ai e se tusitala finau o William Saroyan i le au fai lipoti e faapea, “O tagata uma e ao lava ona oti, ae sa ou talitonu lava o le a i ai se tuusaunoaga mo a’u. O le a nei la?”¹

O le “o le a nei la” i le fetaiiai ai ma le oti i lenei olaga ma le “o le a nei la” i le mafaufau atu i le olaga pe a mavae le oti ua i ai i le fatu o fesili o le agaga lea o loo taliina ma le matagofie tele e le talalelei toefuataiina a Iesu Keriso i le fuafuaga o le fiasia a le Tama.

I lenei olaga, tatou te taliē, tatou te fetagisi, tatou te galulue, tatou te taaalo, tatou te ola, ona tatou feoti lea. Na fesili Iopu i se fesili puupuu, “Afai e oti le tagata, e toe ola mai ea o ia?”² O le tali o se “ioe” maumaututu, ona o le taulaga togiola a le Faaola. O se vaega o le folasaga eseese a Iopu i le fesili e mata’ina: “O le tagata ua fanau mai i le fafine, ua saasaa ona aso. . . . E tupu ae o ia e pei o le fuga, a e salaeseina. . . . Aua a ta le laau, e faamoemoe i ai e toe tupu, e le aunoa foi ma ona tatupu . . . ma tatupu ona la e pei o le laau tupu.”³

O le fuafuaga a lo tatou Tama e faatatau i aiga. O nisi o a tatou mau e sili ona ootia o loo faaaogaina le manatu faavae o le laau ma ona aa ma lala e fai ma talafaatasa.

I le mataupu faaii o le Feagaiga Tuai, o loo faaaogaina ai ma le manino e Malaki lenei talafaatasa i le faamatalaina ai o le Afio Mai Faalua o le Faaola. A o saunoa ai e faatatau i e faamaualuluga ma amioleaga, na ia ta’ua ai o le a susunuina i latou e pei o ni otaota ma “e le faatoeina ai mo i latou se aa po o se la laau.”⁴ Na tapunia e Malaki lenei mataupu i le folafolaga faamautinoa a le Alii:

“Faauta, ou te auina atu ia te outou o Elia le perofeta, a o lei oo mai le aso o Ieova e sili ma matautia:



“Na te faaliliuina loto o matua i fanau, ma loto o fanau i o latou matua, ne’i ou alu atu ma ou taia le nuu i le faafanoga.”⁵

I le amataga o le Toefuataiga, sa toe faamamafa mai ai e Moronae lenei savali i lena uluai faatonuga i le taulealea o Iosefa Samita i le 1823.⁶

E taliaina e le au Kerisiano ma le au Iutaia i le lalolagi atoa le tala ia Elia i le Feagaiga Tuai.⁷ O ia le perofeta mulimuli na umiaina le mana faamau o le Perisitua Mekisateko a o lei oo i le vaitaimi o Iesu Keriso.⁸

Ua Fuatai mai e Elia ia Ki

O le toefoi mai o Elia na tupu i le Malumalu o Katelani i le aso 3 Aperila, 1836. Sa ia tautino mai o loo ia faa-taunuuna le folafolaga a Malaki. Sa ia tuuina mai ki o le perisitua mo le faamauina o aiga i lenei tisipenisione.⁹ O le misiona a Elia sa faafaigofieina e le mea e ta’ua i nisi taimi o le agaga o Elia lea e pei ona aoao mai e Elder Russell M. Nelson e faapea, o se “faamaoniga o le Agaga Paia o loo molimau mai e uiga i le natura paia o le aiga.”¹⁰

Sa faamautu mai e le Faaola le taua o le papatisoga. Sa ia aoao mai, “E moni, e moni, ou te fai atu ia te oe, afai e le fanau se tasi i le vai ma le Agaga, e le mafai ona sao o ia i le malo o le Atua.”¹¹ Sa papatisoina patino le Faaola ina ia faia se faataitaiga. Ae faafefea i latou ua malilili e lei papatisoina?

Aoaoga Faavae o Galuega o Malumalu ma Talafaasolopito o Aiga

I le aso 11 Oketopa, 1840, i Navu, sa tusia ai e Vilate Kimball se tusi i lona toalua, o Elder Heber C. Kimball, o le sa faatasi ai ma isi uso o le Toasefululua sa auauna atu i se misiona i Peretania Tele. Sa faia le konafesi aoao o Oketopa i nai aso na muamua ai.

Ou te sii mai ni vaega o le tusi patino a Vilate: “Sa matou i ai i se

konafesi sili ona toatele ma faafiafaina talu ona faatulagaina le Ekalesia. . . . Ua saunoa Peresitene [Iosefa] Samita i se mataupu fou ofoofogia. . . . O lena mataupu o le papatisoga mo e ua maliliu. O loo talanoa Paulo e uiga i lena mea, i le Muamua Korinito mataupu 15 fuaiupu 29. Ua mauaina e Iosefa se faamalamalama sili atu ona atoatoa e ala i se faaaliga. Fai mai o ia o se faamanuiaga lea mo [tagata] o lena Ekalesia le papatisoina mo tagata o o latou aiga o e na maliliu a o lei oo mai lena talalelei. . . . I le faia o lea mea ua avea ai tatou ma o latou sui, ma tuu atu ia i latou le avanoa e o mai ai i le Uluai Toetutu. Fai mai o ia o le a talaiina atu le talalelei ia i latou i le falepuipui.”

Sa faaopoopo mai Vilate: “Ou te fia papatiso mo lo’u tina. . . . Pe le o se aoaoga faavae ofoofogia ea lena?”¹²

O le aoaoga faavae taua o le tuufaatasia o aiga na faaali mai i lea fuaiupu ma lea fuaiupu ma lea mataupu ma lea mataupu. O sauniga sui ua i ai i le totonugalemu o le tuufaatasia o aiga e faavavau, le faafesootaiina o aa i lala.

O le aoaoga faavae o le aiga i se sootaga ma talafaasolopito o aiga ma galuega o le malumalu ua manino. Sa faatatau le faatonuga a le Alii i le uluai faaaliga lea i le “papatisoga mo o *outou* maliliu.”¹³ O la tatou matafaioi faaleaoaoga faavae ua faatatau lea i o tatou lava tuua. E mafua lena mea ona o le faatulagaga faaselesitila o le lagi e faavae lea i aiga.¹⁴ Ua uunaia e le Au Peresitene Sili le au paia, aemaise lava le autalavou ma talavou nofofua matutua, ia faamamafa galuega o talafaasolopito o aiga ma sauniga mo igoa o o latou lava aiga po o igoa o tuua o tagata o a latou uarota ma siteki.¹⁵ E manaomia ona tatou fesootai atu i o tatou aa ma lala uma. O le manatu o le fesootai i malo e faavavau ua matua ofoofogia lava.



Malumalu

Sa faailoa mai e Uilifoti Uutilafi sa lava le umi o le taimi na soifua ai le Perofeta o Iosefa Samita e faataatia ai le faavae mo galuega o malumalu. E oo i le taimi mulimuli na ia, o Iosefa Samita lea, feiloai ai ma le Korama a le Toasefululua, sa ia tuu atu ia i latou o latou faaeega paia.¹⁶

Ina ua mavae le faamaturoida o le Perofeta, sa faamaea e le Au Paia le Malumalu o Navu, ma sa faaogaina

le mana faamau e faamanuia ai le faitau afe o tagata faamaoni a o lei malaga ese atu i Atumauga i Sisifo. I le tolu sefulu tausaga mulimuli ane, i le faamaeaina ai o le Malumalu o St. George, sa matauina ai e Peresitene Polika Iaga le taua e faavavau o sauniga faaola ia ua iu lava ina maua e tagata uma o soifua ma e ua maliliu.¹⁷

O lea mea na ta’ua moni e Peresitene Uilifoti Uutilafi: “E le o i ai se isi mataupu faavae ua faaali mai e le Alii



ua sili ona ou olioli i ai i lo le togi-olaina o o tatou aiga ua malilili; lea o le a tatou faatasi ai ma o tatou tama, o tatou tina, a tatou avā, ma a tatou fanau i le faatulagaga o le aiga, i le taeao o le uluai toetutu ma i le Malo Selesitila. O mataupu faavae silisili nei. E tauia i osigataulaga uma lava.”¹⁸

O se taimi sili lenei ua tatou ola ai. O le tisipenisione mulimuli lenei, ma e mafai ona tatou lagonaina le faanatinatiina o le galuega o le faaolataga i vaega uma o loo aofia ai se sauniga faaola.¹⁹ Ua i ai nei a tatou malumalu i le tele o eria i le salafa o le lalolagi ina ia maua nei sauniga faaola. O le auai ai i le malumalu mo le faafouina faaleagaga, filemu, saogalemu, ma le taitaiga i o tatou olaga o se faamanu-igaga sili foi lea.²⁰

E le i atoa le tausaga talu ona valaauina Peresitene Thomas S. Monson o se Aposetolo, ae ia faapaiaina le Faletusi o Gafa o le Malumalu o Los Angeles. Sa ia saunoa e uiga i tuua ua malilili “o loo faatalitali mo le aso o le a outou faia ma ou faia ai le sailiga lea e talafeagai e faaavanoa ai le ala, . . . [ma] faapena ai foi ona o atu i maota o le Atua ma faatino na galuega . . . ia ua le mafai . . . ona latou . . . faatinoina.”²¹

I lena taimi a o valaauina o ia ia Elder Monson, na ia tuuina atu ai lena saunoaga o le faapaiaiga i le aso 20 Iuni, 1964, sa na o le 12 malumalu sa faaaogaina. I le vaitau ua auuina atu ai Peresitene Monson i le aufono sinia o le Ekalesia, ua 130 malumalu mai le 142 o loo faaaogaina sa faia o

latou uluai faapaiaiga. E leai se mea e le o vaaia ai vavega i le faanatinatiina o le galuega o le faaolataga i o tatou aso. E lua sefuluvalu isi malumalu ua faasilasilaina mai ma o loo i ai i tulaga eseese o le faamaeaina. E valu sefululima pasene o tagata o le Ekalesia o loo nonofo nei i totonu o le 200 maila (320 km) o se malumalu.

Tekinolosi o Tala Faasolopito

Ua matua televave foi le saosasoa o tekinolosi o talafaasolopito o aiga. Na tautino mai e Peresitene Howard W. Hunter ia Novema o le 1994: “Ua amata ona tatou faaaogaina faamatalaga faatekinolosi e faanatinati ai le galuega paia o le tuuina atu o sauniga mo e ua malilili. O le matafaioi o tekinolosi . . . ua faatele’a’iina e le Alii Lava Ia. . . . Peitai, ua na o le amataga o loo tatou tutu ai o mea e mafai ona tatou faia i nei tekinolosi.”²²

I tausaga e 19 talu mai lenei saunoaga faaperofeta, ua toetoe lava a le talitunuina le televave o tekinolosi ua i ai. Sa faamatala mai ia te au talu ai nei e se tina e 36 tausaga le matua e i ai sana fanau laiti, “I le mafaufau i ai—ua tatou o ese mai le faitauina o lola mataninii i nofoaga autu o talafaasolopito o aiga ua faapaiaina, i le nofonofo ai i la’u laulau i le umukuka ma la’u komepiuta ma fai ia talafaasolopito o aiga pe a momoe la’u fanau.” Uso e ma tuafafine, o a tatou nofoaga autu o talafaasolopito o aiga ua i ai nei i totonu o o tatou fale.

O galuega o malumalu ma talafaasolopito o aiga e le na o i tatou e faatatau

i ai. Mafaufau i e o loo i le isi itu o le veli o loo faatalitali mai mo sauniga faaola ia o le a faasaolotoina ai i latou mai le nofopologa i le falepuipui o agaga. O le *falepuipui* ua faauigaina o “se tulaga o le saisaitia po o le faataga-taotauaina.”²³ O i latou o loo faataga-taotauaina atonu o loo faia le fesili a William Saroyan: “O le a nei la?”

Sa faasoa mai e se tasi o tuafafine faamaoni se aafiaga faapitoa faale-agaga i le Malumalu o Sate Leki. A o i ai o ia i le potu o faamauga, ina ua mavae se sauniga sui o le faamauina o le papatisoga, sa ia faalogoina se leo, “Ma o le a saoloto nei le pagota!” Sa ia faalogoina se lagona tele o le naunautai mo i latou o loo faatalitali mai mo o latou galuega o le papatisoga ma faamauga. Ina ua foi atu i le fale, sa ia sailia le mau mo le fasifuaitau lea sa ia faalogo i ai. Sa ia mauaina i le tautinoga a Iosefa Samita i le vaega e 128 o le Mataupu Faavae ma Feagaiga: “Ia olioli o outou lotu, ma ia fiafia tele. Tuu atu i le lalolagi e alalaga i pesega. Tuu atu i e ua oti e tautala mai i viiga e faavavau i le Tupu o Emanuelu, o le na faauuina, ae lei i ai le lalolagi, le mea e mafai ai e i tatou ona togiolaina i latou i fafo mai lo latou falepuipui; ona o le a faasaolotoina pagota.”²⁴

O le fesili, o le a se mea e manao-mia ona tatou faia? O le fautuaga a le Perofeta o Iosefa o le avatu lea i le malumalu “se talafaamaumau o o tatou tagata malilili, lea o le a agavaa mo le talia atoatoa.”²⁵

Ua tuuina mai e taitai o le Ekalesia se valaau manino i le tupulaga faiae ia taimua i le ala i le faaaogaina o tekinolosi ia maua ai le agaga o Elia, ia saili i o tatou tuua, ma ia faatino sauniga o le malumalu mo i latou.²⁶ O le tele o le mamafa o le galuega i le faanatinatiina o le galuega o le faaolataga mo e uma o soifua ma e ua malilili o le a faia e outou o tagata talavou.²⁷

Afai e le gata ina ō talavou o uarota taitasi i le malumalu ma faia papatisoga mo o latou tagata ua maliliu ae faapena foi ona galulue ma o latou aiga ma isi tagata o le uarota ia tuu atu igoa o aiga mo galuega o sauniga latou te faatinoina, o le a matua faamanuiaina uma i latou ma le Ekalesia. Aua nei manatu faatauvaa i le fesoa-soaniga a i latou ua maliliu e fesoa-soani atu i au taumafaiga ma le olioli o le feiloai atu ia i latou e te auauna i ai. O le faamanuiaga tupito e faavavau o le tuufaatasia o ou lava aiga e toetoe lava le mafai ona malamalama i ai.²⁸

I le aofaiga atoa o tagata o le Ekalesia i le lalolagi, e lima sefulutasi pasene o tagata matutua e le o i ai i le taimi nei matua uma i le vaega o le Family Tree o le saite o le Initoneti a le Ekalesia o le FamilySearch. E ono sefululima pasene o tagata matutua e le o lisiina uma ia matua matutua e toafa.²⁹ Manatua, a aunoa i tatou

ma o tatou aa ma lala, e le mafai ona laveaiina. E manaomia ona maua mai ma tuu i totonu e tagata o le Ekalesia lenei faamatalaga taua.

Ua iu ina tatou maua le aoaoga faavae, o malumalu, ma tekinolosi mo aiga ina ia ausia ai lenei galuega mamalu o le faaolataga. Ou te fautua atu se auala se tasi e mafai ai ona faia lenei mea. E mafai ona faia e aiga se “Fonotaga o le Gafa o le Aiga (Family Tree).” E tatau ona avea lenei mea o se taumafaiga faifai pea. E ao ona aumaia e tagata uma se talafaasolopito o aiga, ni tala, ma ni ata, e aofia ai ni meototino faapelepele a matua matutua ma matua. E fiafia tagata talavou e aoao e uiga i olaga o tagata o aiga—po o fea na latou o mai ai ma pe na faapefea ona latou ola. Ua toatele ua liliu atu o latou loto i tama. Latou te fiafia i tala ma ata, ma ua latou maua le tomai faatekinolosi e pue ai ma tuu i luga nei tala ma ata i le FamilyTree ma

faafesootai ia punaoa o faamaumauga i tuua e teumaluina ai nei mea mo le olaga atoa. Ioe, o le sini faamoemoeina autu lava o le fuafuaina lea po o a sauniga o loo manaomia pea ona faia ma faia ni tofiga mo galuega talafeagai o le malumalu. O le tamaitusi *O Lo'u Aiga* e mafai ona faaogaina e fesoa-soani ai e faamaumau ia faamatalaga o le aiga, o tala, ma ata ia e mafai ona uta i luga i le Family Tree.

O tautinoga ma faamoemoega faaleaiga e tatau ona laualuga i mea tatou te faamuamuaina e puipuia ai lo tatou taunuuga paia. Mo i latou o loo saili pea mo nisi mea lelei e faaoga ai le aso Sapati mo le aiga atoa, o le faanatinatiina o lenei galuega o talafaasolopito o se eleele lauusi. Sa faamatalaina ma le fiafia e se tasi tina lona atalii e 17 tausaga le matua e faapea e tuua loa le lotu i le Aso Sa ona nofo loa lea i le komepiuta e fai ia galuega o talafaasolopito o aiga





ma e fiafia lona atalii e 10 tausaga e faalogologo i tala ma matamata i ata o ona tuua. Ua faamanuiaina ai e lenei mea lona aiga atoa i le lagonaina o le agaga o Elia. E tatau ona tausaga o tatou aa ma lala faapelepele.

Na foai mai e Iesu Keriso lona soifua o se togiola sui. Sa ia taliaina le fesili tupito na faia e Iopu. Na ia faatoilaloina le oti mo tagata uma, lea e le mafai ona tatou faia mo i tatou lava. Peitai, e mafai ona tatou faatinoina sauniga sui ma avea moni lava ma ni faaola i le Mauga o Siona³⁰ mo o tatou lava aiga ina ia mafai ai ona faaeaina ma faaolaina faatasi i tatou ma i latou.

Ou te molimau atu i le taulaga togiola a le Faaola ma le mautinoa o le fuafuaga a le Tama mo i tatou ma o tatou aiga. I le suafa o Iesu Keriso, amene. ■

FAAMATALAGA

1. William Saroyan, i le Henry Allen, "Raging against Aging," *Wall Street Journal*, Tes. 31, 2011-Ian. 1, 2012, C9.
2. Iopu 14:14.
3. Iopu 14:1, 2, 7, 9.
4. Malaki 4:1. Talu ai nei o loo lipotia ai i nisi o tusitusiga se aofai faateleina naua o tagata o loo filifili pea ia le faia ni fanau ina ia faaleleia ai o latou tulaga o le olaga (tagai Abby Ellin, "The Childless Plan for Their Fading Days," *New York Times*, Fep. 15, 2014, B4). E tele atunuu ua faaitiitia le faitauaofai ona o se taunuuga o nei filifiliga faaletagata. O nisi taimi e ta'ua lenei mea o le "demographic winter" (tagai *The New Economic Reality: Demographic Winter* [documentary], byutv.org/shows).
5. Malaki 4:5–6.

6. Tagai *History of the Church*, 1:12; Mataupu Faavae ma Feagaiga 2.
7. O loo faatalitali Tagata luitaia mo le toefoi mai o Elia mo tausaga e 2,400. E oo mai i lenei aso, i a latou Tausamaaga faaletausaga, po o 'aiga o le afiafi, e latou te faaavanoa ai lava se nofoa mo ia ma o atu i le faitotoa ma le faamoemoe e taunu atu o ia e faasilasila atu le afio mai o le Mesia.
8. Tagai i le Lomifefiloi o le Tusi Paia, "Elia."
9. Tagai Mataupu Faavae ma Feagaiga 110:14–16; tagai foi Mataupu Faavae ma Feagaiga 2.
10. Russell M. Nelson, "A New Harvest Time," *Ensign*, Me 1998, 34.
11. Ioane 3:5.
12. Vilate M. Kimball to Heber C. Kimball, Oct. 11, 1840, Vilate M. Kimball letters, Church History Library; spelling and capitalization standardized.
13. Mataupu Faavae ma Feagaiga 127:5; faaopoopo le faamamafa.
14. Tagai *Aoaoga a Peresitene o le Ekalesia: Josefa Filitia Samita* (2013), 68.
15. Tagai i le tusi a le Au Peresitene Sili, Oke. 8, 2012.
16. Tagai *The Discourses of Wilford Woodruff*, sel. G. Homer Durham (1946), 147.
17. Sa taua e Polika Iaga, "Pau le mea ou te manao ai ia vaaia le tuuto atu e lenei nuu o a latou mea ma naunau e fausia le Malo o le Atua, fausia ae malumalu, ma taitai i sauniga i totonu mo e o soifua ma e ua malilili . . . ina ia mafai ona faapaleina i latou o atalii ma afafine o le Silisiliese" (*Deseret News*, Sete. 6, 1876, 498). O papatisoga mo e ua malilili na amata i le aso 9 Ianuari 9, 1877, ma o faaeega paia mo e ua malilili na faia i le lua aso mulimuli ane. O le fiafiaga o lenei mea sa faailoaina e Lucy B. Young, lea na faapea mai "sa tumu lona loto i se vaaiga o le taliaina o ia e [ona aiga ua malilili] ma le fiafia, e pei lava o tagata uma pe a taliaina e i latou e le mafai ona latou faia mo i latou lava ia galuega" (i le Richard E. Bennett, "Which Is the Wisest Course? The Transformation in Mormon Temple Consciousness, 1870–1898," *BYU Studies Quarterly*, vol. 52, nu. 2 [2013], 22).

18. *Aoaoga a Peresitene o le Ekalesia: Wilford Woodruff* (2004), 192–93.
19. O Peresitene Uitalafi (o le ua lauiloa o se tasi o faifeautalafi sili ona maoae o taimi uma i e o soifua), na saunoa e uiga i le galuega mo e ua malilili e faapea: "Ou te vaavaai atu i lenei vaega o la tatou galuega o se misiona e tutusa lona taua ma le talaiina atu o le talalelei i e o soifua; o le a faalogo e ua malilili i le leo o auuana a le Atua i le lalolagi o agaga, ma e le mafai ona latou o mai i le taeao o le [luai] toetutu, sei vagana ua faatinoina ia sauniga patino, mo i [latou]." Sa ia saunoa mai foi, "E tutusa lava le tele o mea e fai e laveai ai se tagata ua malii . . . e pei foi o se tagata o soifua" (*Aoaoga a Peresitene o le Ekalesia: Wilford Woodruff*, 188).
20. Sa valaaulia e Peresitene Howard W. Hunter tagata o le Ekalesia ia o soo i le malumalu "mo faamanuiaga patino o tapuaiga i le malumalu, mo le paia ma le saogalemu lea e maua mai i totonu o na puipui paia ma le faapaiaina. . . . E paia i le Alii. E tatau foi ona paia ia i tatou." ("The Great Symbol of Our Membership," *Tambuli*, Nov. 1994, 6).
21. "Messages of Inspiration from President Thomas S. Monson," *Church News*, Tes. 29, 2013, 2.
22. Howard W. Hunter, "We Have a Work to Do," *Ensign*, Mat. 1995, 65.
23. *Merriam-Webster's Collegiate Dictionary*, 11th ed. (2003), "prison."
24. Mataupu Faavae ma Feagaiga 128:22; tagai foi Mataupu Faavae ma Feagaiga 138:42. "Ae le i i ai le lalolagi, na faauuina e le Alii lea na mafai ai ona togiolaina agaga i le [falepuipui]" (index to the triple combination, "Prison").
25. Mataupu Faavae ma Feagaiga 128:24.
26. Tagai i le tusi a le Au Peresitene Sili, Oke. 8, 2012; tagai foi David A. Bednar, "O Le a Liliu Atu Loto o Fanau i o Latou Tama," *Liahona*, Nov. 2011, 24–27; R. Scott Lloyd, "Find Our Cousins": Apostle [Neil L. Andersen] Counsels LDS Youth at RootsTech Conference," *Church News*, Fep. 16, 2014, 8–9.
27. O se tasi o suesuega lata mai na faailoa ai o se faamamafa tele mo lenei tupulaga o le ola lea i se olaga anoa lea latou te "foai atu ai i isi ma aoao i latou lava i se faamoemoe tele atu" (Emily Esfahani Smith ma Jennifer L. Aaker, "Millennial Searchers," *New York Times Sunday Review*, Tes. 1, 2013, 6).
28. Tagai Howard W. Hunter, "O Tagata Naunau i le Malumalu," *Liahona*, Me 1995, 2–7.
29. Faafuainumera ua saunia e le Matagaluega o Talafaasolopito o Aiga.
30. Tagai Opetai 1:21.



Saunia e Elder Dallin H. Oaks

○ Le Korama a Aposetolo e Toasefululua

○ Ki ma le Pule o le Perisitua

E taitaia e ki o le perisitua tamaitai faapea foi ma alii, ma o sauniga o le perisitua ma le pule o le perisitua e faatatau foi i tamaitai e pei foi o alii.

I.

I lenei konafesi ua tatou vaaia ai le faamaloloina o nisi o uso faamaoni, ma ua tatou lagolagoina foi le valaauina o isi. I nei suiga—ua masani ai le Ekalesia—tatou te le manatu ai ua “itiiti lo tatou taua” pe a faamaloloina i tatou, ma tatou te le manatu foi ua “sili lo tatou taua” pe a valaauina i tatou. E leai se “valaauga tele pe itiiti” i le galuega a le Alii. E na o le “agai i luma po o le solo i tua,” ma o lena eseese e faalagolago lea i le auala tatou te taliaina ai ma faatinoina ai lo tatou faamalologa ma o tatou valaauga. Sa i ai se taimi na ou pulefaamalumu ai i le faamalologa o se peresitene talavou o se siteki sa auuina atu ma le lelei tele mo le iva tausaga ma o loo olioli nei i lona faamalologa i le valaauga fou ua faato’a la maua nei ma lona faletua. Ua valaauina i laua e avea ma taitai o le vasega pepe i le latou uarota. Ua na o lenei lava le Ekalesia e vaaia ai lena mea o se faamamaluga tutusa!

II.

A o lauga atu i se konafesi a tamaitai, sa saunoa ai le peresitene aoao o

le Aualofa o Linda K. Burton, “Matou te faamoemoe ia *gaepuina* i totonu o i tatou taitoatasi se faanaunautaiga sili atu ia malamalama atili i le perisitua.”¹ O lena manaoga e faatatau ia i tatou uma, ma o le a ou tulitataoina e ala i le tautalagia o ki ma le pule o le perisitua. Talu ai o nei mataupu e aafia



faatasi ai alii ma tamaitai, ua ou fiafia ai lava o loo faasalalauina ma lolomina nei tualumaga mo tagata uma o le Ekalesia. E faamanuiaina e le mana o le Perisitua i tatou uma. E taitaia e ki o le perisitua tamaitai faapea foi ma alii, ma o sauniga o le perisitua ma le pule o le perisitua e faatatau foi i tamaitai e pei foi o alii.

III.

Na faamatalaina e Peresitene Iosefa F. Samita le perisitua “o le mana o le Atua ua faamatuu atu i alii lea e mafai ai e alii ona galulue i le lalolagi mo le faaolataga o aiga o tagata.”² Ua aoaoina i tatou e isi taitai o le perisitua “o le mana silisiliese lea ua i ai i lenei lalolagi. O le mana lea sa foafoaina ai le lalolagi.”³ Ua aoao mai tusitusiga paia e faapea “O lea lava Perisitua, lea sa i ai i le amataga, o le a i ai foi i le iuga o le lalolagi” (Mose 6:7). O lea, o le perisitua o le mana lea o le a tatou toetutu ai ma agai atu i le ola e faavavau.

O le malamalama lea tatou te sailia e amata i se malamalama o ki o le perisitua. “O ki o le perisitua o le pule lea a le Atua ua tuuina mai i [e o umiaina] le perisitua e faatonu ai, faafoe ai, ma pulea ai le faaogaina o Lana perisitua i luga o le fogaelele.”⁴ O galuega po o sauniga uma e faatinoina i totonu o le Ekalesia e faia i lalo o le pule tuusao po o le pule faamatuu a le tagata o loo umiaina ki mo lena matafaioi. E pei ona faamatalaina e Elder M. Russell Ballard, “O i latou o loo i ai ki o le perisitua . . . ua latou faafaigofieina moni mo tagata uma o loo auuina atu ma le faamaoni i lalo o la latou taitaiga e faaoga le pule o le perisitua ma maua ai le mana o le perisitua.”⁵

I le puleaina ai o le faaogaina o le pule o le perisitua, o le matafaioi o ki o le perisitua na te faalauteleina ma faatapulaaina. Na te faalauteleina e ala



i le faafaigofieina ona maua le pule ma faamanuiaga o le perisitua mo fanau uma a le Atua. Na te faatapulaaina e ala i le faatonuina po o ai o le a tuu atu i ai le pule o le perisitua, o ai o le a umiaina ona tofi, ma pe faapefea foi ona faaee atu ana aia tatau ma mana. Mo se faataitaiga, o se tagata na te umiaina le perisitua e le mafai ona ia faaee atua lona tofi po o le pule i se isi tagata, sei vagana ai ua faatagaina o ia e le o loo umiaina ki. A aunoa ma lona faatagaga, o le a le aoga le faauuga. Ua faamanino ai i le mafuaaga e le mafai ai e se tasi o loo umiaina le perisitua—e tusa lava po o le a le tofi—ona faauuina se tagata o lona aiga pe faatautaia le faamanatuga i lona lava fale e aunoa ma le faatagaga mai le o loo umiaina ki e tatau ai.

Faatasi ai ma le tuusaunoaga o le galuega paia a tuafafine o loo faia i totonu o le malumalu i lalo o ki o loo umiaina e le peresitene o le malumalu, lea o le a ou faamalalalama atua i se taimi o mulimuli mai, e na o le tasi lava le tagata o loo umiaina le tofi o le

perisitua e mafai ona faatautaia se sauniga faaleperisitua. Ma o sauniga uma faaleperisitua ua faatagaina e faamau-mauina i faamaumauga a le Ekalesia.

O le faatumutumuga lava, o ki uma o le perisitua o loo umiaina e le Alii o Iesu Keriso, o Le e ana le perisitua. O Ia Na te fuafuaina po o a ki e faamatuu mai i tagata ma pe o le a faapefea foi ona faaogaina na ki. E masani ona tatou manatu o ki uma o le perisitua na faaee atu i luga o Iosefa Samita i le Malumalu o Katelani, ae ua ta'ua i tusitusiga paia e faapea o ki uma na faaee atu iina o “ki o lenei tisipenisione” (MF&F 110:16). I le konafesi aoao i le tele o tausaga ua mavae, sa faamanatu mai ai e Peresitene Spencer W. Kimball ia i tatou o loo i ai isi ki o le perisitua e lei tuuina mai i tagata i le lalolagi, e aofia ai ki o le foafoaga ma le toetu.⁶

O le natura paia o tapu e tuu i luga o le faaogaina o ki o le perisitua ua faamalalalama mai i se eseese taaui i le va o faaiuga e uiga i mataupu a le pulega o le Ekalesia ma faaiuga e aafia ai le perisitua. O Le Au Peresitene Sili

ma le Aufono a le Au Peresitene Sili ma le Korama a le Toasefululua, o loo pulefaamalumalu i le Ekalesia, ua faatagaina e faia le tele o faaiuga e aafia ai aiaiga faavae ma faiga faavae a le Ekalesia—o mataupu e pei o nofoaga o fale o le Ekalesia ma tausaga mo auaunaga faamisiona. Ae e ui lava o loo umiaina e nei pule faamalumalu ma faaoga ki uma o loo faamatuu atu i alii i lenei tisipenisione, ae e le saoloto i latou e fesui ai le mamanu na faatulagaina mai le lagi, e na o alii lava e umiaina ia tofi i le perisitua.

IV.

Ua ou oo mai nei i le mataupu o le pule o le perisitua. Ou te amata atu i mataupu faavae e tolu lea faatoa uma ona talanoaina: (1) o le perisitua o le mana o le Atua ua faamatuu mai i alii e galulue ai mo le faaolataga o le aiga o tagata, (2) o le pule o le perisitua e puleaina e i latou e umiaina ki o le perisitua, ma le (3) talu ai o loo ta'ua i tusitusiga paia “o isi pule uma po o tofi i le ekalesia o ni faaopoopoga i lenei perisitua [Mekisateko]” (MF&F 107:5), ma o mea uma e faia i lalo o le taitaiga a na ki o le perisitua faatasi ai ma le pule o le perisitua.

E faapefea la ona faatatau lenei mea i tamaitai? I se saunoaga i le Aualofa, sa saunoa ai Peresitene Iosefa Filitia Samita, o le taimi lona o loo avea ma Peresitene o le Korama a Aposetolo e Toasefululua e faapea: “E ui e le tuuina atu i tuafafine le Perisitua, e le faaeeina atu i o latou luga, ae e le faapea ai la ua le tuuina atu e le Alii ia i latou le pule. . . . E mafai ona tuu atu i se alii le pule, po o se tuafafine, e faia ai ni mea patino i le Ekalesia lea e fusia ai ma talafeagai tonu mo lo tatou faaolataga, e pei o le galuega o loo faia e o tatou tuafafine i totonu o le Maota o le Alii. Ua ia i latou le pule na tuu atu ia i latou e faia ai nisi o mea silisili ma ofoofogia,

e paia i le Alii, ma fusia atoatoa ai e pei lava o faamanuiaga o loo tuuina atu e le alii o loo umiaina le Perisitua.”⁷

I lena lauga iloga, sa tau atu pea lava pea e Peresitene Samita e faapea ua tuuina atu i tamaitai le pule. Sa ia faapea atu i tamaitai, “E mafai ona outou tautatala atu i le pule, ona ua tuu atu e le Alii le pule ia te outou.” Sa ia tau atu foi e faapea “ua tuu atu [i le Aualofa] le mana ma le pule e faia ai le tele o mea silisili. O le galuega o loo latou faia o loo faia i le pule faalelagi.” Ma e moni lava, o le galuega a le Ekalesia o loo faia e tamaitai po o alii, pe o totonu o le malumalu po o totonu o uarota po o paranesi, o loo faia i lalo o le taitaiga a i latou o loo umiaina ki o le perisitua. O lea, a o saunoa ai e uiga i le Aualofa, sa faamalamalama mai ai e Peresitene Samita, “Ua tuu atu [e le Alii] ia i latou lenei faalapotopotoga maoae lea ua latou maua ai le pule e auauna ai i lalo o taitaiga a epikopo o uarota . . . , i le vaavaaia o mea e fiafia i ai o tatou tagata i le faaleagaga ma le faaletino.”⁸

O lea, e moni lava lenei mea mo tamaitai, o le Aualofa e le na o se vasega mo tamaitai ae o se mea ua fitoitonu mo i latou—o se faaopoopoga i le perisitua na faavaeina mai le lagi.⁹

E le masani ona tatou talanoa i tamaitai i le ai o le pule o le perisitua i o latou valaauga faale-Ekalesia, ae o le a se isi pule o i ai? Pe a vaetofiaina se tamaitai—talavou pe matua—e talai le talalelei o se faifeautalai faamisiona, ua tuu atu ia te ia le pule o le perisitua e faatino ai se matafaioi faaleperisitua. E moni foi lena mea pe a vaetofiaina se tamaitai e galue o se taitai po o se faiaoga i se faalapotopotoga o le Ekalesia i lalo o le taitaiga a se tasi o loo umiaina ki o le perisitua. Po o ai lava e galue i se tofi po o se valaauga na maua mai se tasi o loo umiaina ki o le perisitua ua ia faaaogaina le pule



o le perisitua i le faatinoina o ona tiute atofaina.

Po o ai lava e faaaogaina le pule o le perisitua e tatau lava ona faagaloina o latou lava aia tatau ae taulai ato a i o latou tiutetauave. O se mataupu faavae lena o loo manaomia i le lautele o le malo. E siina mai se saunoaga a se tusitala Rusia lauiloa o Aleksandr Solzhenitsyn e faapea, “O le taimi lenei . . . e puipuia ai, e le o le tele o aia tatau o tagata, ae o matafaioi o tagata.”¹⁰ Ua iloa ma le mautinoa e le Au Paia o Aso e Gata Ai e faapea o le agavaa mo le faaeaga e le o se mataupu o le folafola atu o aia tatau ae o se mataupu o le faataunuaina o tiutetauave.



V.

Ua faatonu mai le Alii e na o alii lava o le a faauuina i tofi o le perisitua. Ae, e pei ona faamamafaina e le tele o taitai o le Ekalesia, o alii e le “o le perisitua lea.”¹¹ E umia e alii le perisitua, faatasi ai ma se tiute paia e faaaoga mo le faamanuiaina o fanau uma a le Atua.

O le mana aupito silisili na tuuina mai e le Atua i Ona atalii e le mafai lava ona faaaogaina e aunoa ma le mafutaga a se tasi o Ona afafine, ona ua na o Ona afafine lava ua tuuina atu i ai e le Atua le mana “e avefa ai ma foafoa o tino . . . ina ia ausia ai e le mamananu a le Atua ma le Fuafuaga Sili lona taunuuga.”¹² O upu na a Peresitene J. Reuben Clark.

Sa ia faaaauu: “O le tulaga lenei a o tatou taitoalua ma o tatou tina i le Fuafuaga e Faavavau. E le o i latou e tauaveina le Perisitua; e le nafa i latou ma le faatinoina o tiute ma matafaioi o le Perisitua; pe latou te amoina foi le mamafa o ona tiutetauave; ae o i latou e fausiaina ma faatulagaina i lalo o lona mana, ma o e e tofo i ona faamanuiaga, mauaina o le lagolago o mana o le Perisitua ma le mauaina o se matafaioi e pei ona valaauina faalelagi, e pei ona taua ai e faavavau i lona tulaga e pei o le Perisitua lava ia.”¹³

I na upu musuia, sa saunoa ai Peresitene Clark e uiga i le aiga. E pei ona ta’ua ai i le folafolaga i le aiga, e pulefaamalumalu le tama i le aiga, ma e eseese ona tiutetauave ma le tina, ae “e ao [ia i laua] ona fesoasoani le tasi i le isi o se paaga tutusa.”¹⁴ I nai



tausaga a o lei oo mai le folafolaga i le aiga, na tuu mai ai e Peresitene Spencer W. Kimball le faamalamalama-maga musuia lenei: “Pe a tatou talanoa e uiga i le faaipoipoga o se paaga, ia tatou talanoa i le faaipoipoga o se paaga *atoatoa*. Tatou te le mananao i o tatou tamaitai o le Ekalesia o ni paaga e *le tautatala* po o ni paaga e *tapulaa* manatu i lena tofiga e faava-vau! Faamolemole ia avea o se paaga e *saofaga* atu ma *atoatoa*.”¹⁵

I le silafaga a le Atua, pe o totonu o le Ekalesia po o le aiga, e tutusa uma tamaitai ma alii, ma ni tiutetau-ave eseese.

Ou te faamaea atu i nai upumoni e uiga i faamanuiaga o le perisitua. E le pei o ki ma faauuga o le perisitua, o faamanuiaga o le perisitua o loo avanoa mo tamaitai ma alii i tuutuuga lava e tasi. O le meaalofo o le Agaga Paia ma faamanuiaga o le malumalu o faataitaiga ia ua masani ai o lenei upumoni.

I lana lauga manino i le Vaiaso o Aoaoga a le BYU i le taumafanafana ua tea, na tuu mai ai e Elder M. Russell Ballard ia aoaoga nei:

“O le aoaoga faavae a le tatou Ekalesia ua tutusa ai tamaitai i alii

e ui e eseese. E le manatu le Atua e lelei atu pe taua atu le tasi itupa i le isi. . . .

“A malaga alii ma tamaitai i le malumalu, ua latou tau fai maua uma faaeega paia i le mana lava e tasi, o le mana lea o le perisitua. . . . O le maua-ina o le mana ma le faamanuiaga o le perisitua ua avanoa lea i fanau uma a le Atua.”¹⁶

Ou te molimau atu i le mana ma faamanuiaga o le perisitua a le Atua, ua avanoa mo Ona atalii faapea ma Ona afafine. Ou te molimau atu i le pule o le perisitua, lea e galue i tofi uma ma gaoioiga a Le Ekalesia a Iesu Keriso o le Au Paia o Aso e Gata Ai. Ou te molimau atu i le galuega na tuusao mai le lagi o ki o le perisitua, ua umia ma faaaogaina i lo latou atoatoa e lo tatou perofeta/peresitene, o Thomas S. Monson. Ma le mea muli-muli ma sili ona taua, ou te molimau atu i lo tatou Alii ma le Faaola, o Iesu Keriso, o Le ana le perisitua lenei ma o i tatou o Ana auaua, i le suafa o Iesu Keriso, amene. ■

FAAMATALAGA

1. Linda K. Burton, “Priesthood: ‘A Sacred Trust to Be Used for the Benefit of Men, Women, and Children’” (Brigham

Young University Women’s Conference address, May 3, 2013), 1; ce.byu.edu/cw/womensconference/transcripts.php.

2. Joseph F. Smith, *Gospel Doctrine*, 5th ed. (1939), 139.
3. Boyd K. Packer, “O Le Mana o le Perisitua i le Aiga” (fonotaga faaleaoaoga mo taitai i le lalolagi atoa, Fep. 2012); lds.org/broadcasts; tagai foi James E. Faust, “Power of the Priesthood,” *Ensign*, May 1997, 41–43.
4. *Tusitaulima 2: Taitaiina o le Ekalesia* (2010), 2.1.1.
5. M. Russell Ballard, “Alii ma Tamaitai i le Galuega a le Alii,” *Liahona*, Ape. 2014, 48; tagai foi O Afafine i Lou Malo: *O Le Talafaaasolopito ma le Galuega a le Aualofo* (2011), 138.
6. Tagai Spencer W. Kimball, “Our Great Potential,” *Ensign*, May 1977, 49.
7. Iosefa Filitia Samita, “Aualofo—o se Fesoasoani i le Perisitua,” *Mekasini a le Aualofo*, Ian. 1959, 4.
8. Iosefa Filitia Samita, “Aualofo—o se Fesoasoani i le Perisitua,” 4, 5; tagai foi *Aoaoga a Perisitua o le Ekalesia: Iosefa Filitia Samitah* (2013), 316–17.
9. Tagai Boyd K. Packer, “O Le Aualofo,” *Liahona*, Iulai 1998, 82; tagai foi O Afafine i Lo’u Malo, 138.
10. Aleksandr Solzhenitsyn, “A World Split Apart” (commencement address delivered at Harvard University, June 8, 1978); tagai foi Patricia T. Holland, “A Woman’s Perspective on the Priesthood,” *Ensign*, July 1980, 25; *Tambuli*, June 1982, 23; Dallin H. Oaks, “Rights and Responsibilities,” *Mercer Law Review*, vol. 36, no. 2 (winter 1985), 427–42.
11. Tagai James E. Faust, “Na Auina Mai Outou Uma Mai le Lagi,” *Liahona*, Nov. 2002, 113; M. Russell Ballard, “O La’u Galuega ma Lo’u Mamalu Lenei,” *Liahona*, Me 2013, 19; Dallin H. Oaks, “Pule o le Perisitua i le Aiga ma le Ekalesia,” *Liahona*, Nov. 2005, 26. O nisi o taimi tatou te faapea atu ai o le Aualofo o se “paaga i le perisitua.” E sao ai pe a faapea atu i le galuega a le Alii, o le Aualofo ma tamaitai o le Ekalesia o ni “paaga ma *e umia* le perisitua.”
12. J. Reuben Clark Jr., “Our Wives and Our Mothers in the Eternal Plan,” *Mekasini a le Aualofo*, Tes. 1946, 800.
13. J. Reuben Clark Jr., “Our Wives and Our Mothers,” 801.
14. “O Le Aiga: O Se Folafolaga i le Lalolagi,” *Liahona*, Nov. 2010, 129.
15. Spencer W. Kimball, “Privileges and Responsibilities of Sisters,” *Ensign*, Nov. 1978, 106.
16. M. Russell Ballard, *Liahona*, Ape. 2014, 48; tagai foi Sheri L. Dew, *Tamaitai ma le Perisitua* (2013), ae maise lava i le mataupu 6, mo se faamalamalama taua o aoaoga faavae ia o loo ta’ua iinei.



Saunia e Elder Donald L. Hallstrom
 O Le Au Perisitene o Fitugafulu

O A Ituaiga o Tagata?

O a ni suiga o manaomia mai ia i tatou ia avea ai ma ituaiga o tagata e tatau ona avea ai?

Atatou mafaufau i lenei sauniga i le lalolagi atoa, ua faamanatu mai ai ia i tatou e leai se mea e faatusalia i lenei faatasiga—i soo se mea lava. O le faamoemoega o le sauniga a le au perisitua o le konafesi aoao o le aoaoina lea o e umiaina le perisitua i le ituaiga o tagata e tatau ona avea ai i latou (tagai 3 Nifae 27:27) ma ia musuia i tatou ia ausia lena gafatia.

I tausaga o lo’u Perisitua Arona i Hawaii i le afa seneturi talu ai faapea ma se faifeautalai i Egelani, matou te

potopoto ai i falelotu ma (faatasi ai ma se taumafaiga malosi) e faalogologo i le sauniga perisitua e faaoga ai se fesootaiga i le telefoni. I ni tausaga mulimuli ane, sa mafai ai ona faasalalau atu e satellite sauniga i nofoaga fili-filia o le Ekalesia i na masini ipu tetele ina ia mafai ai ona matou faalogo uma ma matamata i tualumaga. Sa matou maofa lava i lena tekinolosi! E toaitiiti i latou sa mafaufauina le lalolagi i lenei taimi, lea ua faaoga ai e soo se tasi le Initoneti i se telefonipoto, tapeleti, po

o se komepiuta ona mauaina le savali o lenei sauniga.

Peitai, o lenei avanoa faateleina naua e faafofoga ai i siufofoga o au-auna a le Alii, lea e tutusa lava ma le siufofoga o le Alii lava Ia (tagai MF&F 1:38), e itiiti lava sona taua vagana ai ua tatou loto e talia le upu (tagai MF&F 11:21) ona mulimuli ai lea. I se faaupuga faigofie, o le faamoemoega o le konafesi aoao faapea ai ma lenei sauniga perisitua e faatoa faataunuuina pe afai tatou te loto e faatino—pe afai tatou te loto e sui.

Pe a ma le luasefulu tausaga talu ai sa ou auaina ai o se epikopo. Sa tele taimi faaumiumi sa ma feiloai ai ma se alii e matua tele ia te au i le matou uarota. O lenei uso sa i ai se faafitauli i lo la va ma lona toalua ma sa le toe fesootea ai ma le la fanau. Sa faigata ia te ia ona tumau i se galuega, sa leai ni uo mamae, ma sa oo ina faigata tele ona fegalegaleai ma tagata o le uarota lea na iu ai ina le toe naunau e auaina atu i le Ekalesia. I se tasi o talanoaga o’oo’o e uiga i luitau i lona olaga, sa ia soso mai ai i o’u luma—i le faaiuina ai o le ma talanoaga mulimuli o le mau talanoaga na ma faia—ma fai mai, “Epikopo, o au ou te ita leaga tele, ma e pau lava o au ia!”

O lena faamatalaga na faateia ai au i lena po ma ua faalavelave pea ia te au talu mai lena taimi. O le taimi lava na tonu ai i lenei alii—o le taimi lava e faaiuina ai e soo se tasi o i tatou—“E pau lava o au ia,” ua tatou lafoaia lo tatou tomai e sui ai. E sili ai lava la le togi o le solo, lafoai auupega, faiaina i le taua, ma siilima loa—ua leai se faamoemoe e manumalo. E ui e manatu nisi o i tatou e le o ni o tatou uiga ia, ae masalo o i tatou uma taitoatasi e faaalua e le itiiti ifo ma le tasi pe lua ni mausa leaga, “E pau lava o au ia.”

Ia, ua tatou feiloai i lenei sauniga perisitua ona o tagata o loo i ai tatou





ae e le o tagata e mafai ona avea ai tatou. Ua tatou feiloai i le po nei i le suafa o Iesu Keriso. Ua tatou feiloai i se talitonuga maumaututu o Lana Togiola ua maua ai e i tatou uma tai-toatasi—po o a lava o tatou vaivaiga, o tatou faaletonu, ma o tatou vaisu—le tomai e sui ai. Ua tatou feiloai ma le faamoemoe, e tusa lava po o a tatou mea na faia i le tuanai, e mafai lava ona faaleleia lo tatou lumanai.

Pe a tatou auai i lenei sauniga ma le “manatu moni” ia sui (Moronae 10:4), e mafai ona ulufale atoa le Agaga i o tatou loto ma mafaufau. E pei ona faaali atu e le Alii i le Perofeta o Iosefa Samita, “Ma o le a oo mai o le tulaga . . . latou [te] . . . faaaoga [ai] le faatuatua . . . ia te au”—manatua o le faatuatua o se mataupu faavae o le mana ma faatinoga—“o le a Ou sasaa atu lo’u Agaga i luga o i latou i le aso o le a latou faapotopoto faatasi ai i latou lava” (MF&F 44:2). O lona uiga o le po nei!

Afai e te manatu ua lemafataoila-loina ou luitau, sei ou tau atu la ia te

oe se alii sa ma feiloai i se tamai nuu i fafo atu o Hyderabad, Initia, i le 2006. Sa faaalai e lenei alii se naunautaiga e sui. Sa fanau mai Appa Rao Nulu i se nuu maotua o Initia. Ina ua tolu ona tausaga, sa aafia o ia i le faamai pipili ma sa tuua ai ma le le atoatoa o le malosi faaletino. Sa tau atu i ai e lona nuu ua faatapulaaina ma le matuia ona gafatia. Peitai, i le avea ai ma se talavou matua, sa ia feiloai atu i a tatou faifeautalaitai. Sa la aoao atu ia te ia se gafatia sili atu, e le gata i le olaga nei ae faapena foi le faavavau a sau. Sa papatisoina o ia ma faamauina o se tagata o le Ekalesia. Faatasi ai ma se vaaiga mamao na matuai siitiaina, sa ia setiina ai se sini ia maua le Perisitua Mekisateko ma auauna atu i se misiona. I le 1986 sa faauuina ai o ia o se toeaina ma valaauina ai e faamisiona i Initia. Sa le faigofie le savali—sa ia faia le mea sili, na ia mafaia e faaoga se tootoo i ona lima uma, ma sa faafia ona ia pa’u—ae sa lei avea lava le fiu ma se filifiliga. Sa ia faia se tautinoga

ia auauna atu ma le mamalu ma le tuuto i se misiona, ma sa ia faia.

Ina ua matou feiloai ma Uso Nulu, toetoe nei atoa le 20 tausaga talu ona maea lana misiona, sa ia faafeiloaia ma le fiafia i matou i le mea e gata ai le auala ma taitai atu matou i lalo i se auala goao ma palapala e tau atu i lona fale e lua potu o loo nonofo ai ma lona toalua ma le la fanau e toatolu. O se aso sa matua vevela ma lē toafimalie. O loo matua faigata pea ona savali o ia, ae sa lei sona faanoanoa. E auala i lona lava ia filiga, ua avea ai o ia ma se faiaoga, ua maua ai le a’oga mo tamaiti o le nuu. Ina ua matou ulufale atu i lona tamai fale, sa vave ona ia avatua au i le tulimanu ma toso mai i fafo se tamai pusa sa i ai ni ana mea totino sili ona taua. Sa ia manao ou te vaai i se fasi pepa. Sa faitauina e faapea, “Faatasi ai ma moomooga ma faamanuiaga lelei mo Elder Nulu, o se faifeautalaitai lototoa ma fiafia; [tusia] 25 Iuni, 1987; [sainia] Boyd K. Packer.” O le taimi lena sa asiasi atu ai Elder Packer i Initia ma saunua atu i se vaega o faifeautalaitai, sa ia faamautu atu ai ia Elder Nulu ona gafatia. I lena agaga, o le mea na tau mai e Uso Nulu ia te au i lena aso i le 2006 e faapea na suia ai e le talalelei o ia—mo se taimi tumau!

I lea asiasiga i le aiga o Nulu, sa matou malaga ai ma le peresitene o le misiona. Sa alu atu e faatalanoa ia Uso Nulu, lona faletua, ma le la fanau—mo matua ina ia maua o la faaeega paia ma ia faamauina faapea ai ma le fanau ina ia faamauina i o latou matua. Sa matou faia foi fetuunaiga uma mo le aiga e malaga ai i le Malu-malu o Hong Kong i Saina mo nei sauniga. Sa latou fetagisi ma le fiafia ona o le a faataunuaina la latou miti ua leva ona faatalitali i ai.

O le a se mea o loo faamoemoeina mai i se tasi o umiaina le perisitua a le Atua? O a ni suiga o manaomia mai ia

i tatou ia avea ai ma ituaiga o tagata e tatau ona avea ai? Ou te faia atu ni fautuaga se tolu:

1. E manaomia ona avea i tatou ma ni alii moni o le perisitua! Pe o i tatou o ni alii talavou e umiaina le Perisitua Arona po o alii o loo tauaveina le Perisitua Mekisateko, e manaomia ona avea i tatou ma ni alii moni o le perisitua, i le faaalua o le matua faaleagaga ona ua uma ona tatou osifeagaiga. Ma sa fai mai Paulo, “Ona po na ou itiiti ai, na ou tautala ai faatamaitiiti, na ou manatunatu faatamaitiiti, na ou filifili faatamaitiiti, a ua oo ina ou tagata matua, ona ou tiai lea o mea a tamaiti” (1 Korinito 13:11). E tatau ona ese i tatou ona o loo tatou umiaina le perisitua—ae le o le fiailoa po o le faamaualuga po o le fiasili—ae ia lotomauualalo ma ia aoaoina gofie ma agamalu. O le mauaina o le perisitua ma ona tofi eseese e tatau ona i ai sona uiga ia i tatou. E le tatau ona avea tau lava o se “mea ua masani ai” lea e tupu fua i ni vaitausaga patino ae o se faatinoga paia o feagaiga e osia ma le mafaufau tonu i ai. E tatau ona tatou lagonaina le faamanuiaina ma le faafetai tele i le faaalua lea i a tatou amioga uma. Afai tatou te le manatu mamafa i le perisitua, e manaomia la ona tatou sui.
2. E manaomia ona tatou auauna atu! O le ute o le umiaina o le perisitua o le “faalauteleina o o [tatou] valaauga (tagai MF&F 84:33) e ala i le auauna atu i isi. O le aloese mai lo tatou tiute sili ona taua o le auauna atu i a tatou avā ma fanau, o le le taliaina po o le le faataunuaina atoatoa o valaauga i le Ekalesia, pe o le le popole foi i isi sei iloga lava ua talafeagai [ma ou tulaga], e le o tagata ia e tatau ona avea ai



i tatou. Sa tautino mai le Faaola, “E te alofa atu i le Alii lou Atua ma lou loto atoa, ma lou agaga atoa, ma lou manatu atoa” (Mataio 22:37) ma fetalai mulimuli ane, “Afai e te alofa mai ia te a’u, e te auauna mai ia te a’u” (MF&F 42:29). O le manatu faapito e feteenai ma o tatou tiute-tauave faaleperisitua, ma afai o se vaega lea o o tatou uiga, e manaomia ona tatou sui.

3. E manaomia ona tatou agavaa! Atonu e le ia te au le tomai o Elder Jeffrey R. Holland, ina ua ia saunua i se sauniga perisitua i nai tausaga talu ai ia “tu latalata i o outou luma . . . , muāisu i le muāisu, faatasi ma se lagona o le faananau fiafia” (“Ua Tauto i Tatou Uma,” *Liahona*, Nov. 2011, 45); ae, uso pele, e manaomia ona tatou feala i luga ma mataala i mea faalelalogi ua taliaina e le toatele ia ua faavaivaiina ai lo tatou mana o le perisitua. Afai tatou te manatu e mafai ona tatou tā’alo’alo i ponokalafi pe solia foi le ola mama po o le le faamaoni i soo se ituaiga ma faapea e leai sona aafiaga leaga ia i tatou ma o tatou aiga, ua faaseina la i tatou. Na ta’ua e Moronae,

“Vaai ia outou faia mea uma ma le agavaa” (Mamona 9:29). Na faatonu mai ma le mamana le Alii, “Ma ou te tuu atu nei ia te outou se polo-aiga ia outou faaeteete e faataua ia te outou lava, ia outou gauai ma le filiga i upu o le ola e faavavau” (MF&F 84:43). Afai o i ai soo se agasala e lei faaleleia lava o loo taofia ai lo tatou agavaa, e manaomia ona tatou sui.

E na o le pau lava le tali atoa i le fesili na tuu mai e Iesu Keriso “O a ituaiga o tagata e tatau ona outou i ai?” o le tali puupuu ma le o’oo’o na Ia tuu mai: “E pei lava o au nei” (3 Nifae 27:27). O le valaaulia e “o mai ia Keriso, ma faaatoatoaina ia te ia” (Moronae 10:32) e manaomiaina uma ma e faamoemoeina ni suiga. Ma le alofa mutimutivale, Na te le o tuua lava na o i tatou. “Ma afai e o mai tagata ia te au o le a ou faaali atu ia te i latou o latou vaivaiga. . . . Ona ou faia lea o mea vaivai ia avea ma mea malolosi” (Eteru 12:27). O le faalagolago i le Togiola a le Faaola, e mafai ai ona tatou sui. Ua ou mautinoa lenei mea. I le suafa o Iesu Keriso, amene. ■



Saunia e Randall L. Ridd
Fesoasoani Lua i le Au Peresitene Aoao o Alii Talavou

O Le Tupulaga o Filifiliga


*Sa filifilia outou ia auai i Lana galuega i lenei taimi
ona ua Ia faatuatuaina outou e faia ia filifiliga sa’o.*

A lii talavou e, masalo ua outou faafofoga muamua o outou o se “tupulaga filifilia,” o lona uiga, sa filifilia outou e le Atua ma saunia e o mai i le lalolagi i lenei taimi mo se faamoemoega sili. Ou te iloa e moni lenei mea. Ae o lenei afaifi ou te fia talanoa atu ia te outou o le “tupulaga o filifiliga,” ona e le i ai muamua lava i le talafaasolopito ni tagata ua sili ona faamanuaina i le tele o filifiliga. O le tele o filifiliga o le tele foi na o avanoa, o le tele o avanoa o le tele foi lena o le gafatia e faia ai le lelei ma le leaga. Ou te talitonu na auina mai outou e le Atua iinei i lenei taimi ona ua Ia faatuatuaina outou ia iloatino lelei le anoanoai o filifiliga ofoofogia ua outou maua.

I le 1974, sa saunua ai Peresitene Spencer W. Kimball said, “e faapea, “Ou te talitonu o loo naunau le Alii e tuu mai i o tatou lima ni meafaigaluega faaonapo nei tatou te le i mafau-fauina o ni tagata faatauvaa” (“When the World Will Be Converted,” *Ensign*, Oct. 1974, 10).

Ma ua Ia faia lena mea! O loo outou tuputupu ae faatasi ma se tasi o meafaigaluega silisili mo mea lelei i le talafaasolopito o tagata: le Initoneti.

Faatasi ai ma lena meafaigaluega ua o mai faatasi ai ma le anoanoai o filifiliga. Peitai, ua o mai faatasi ia mau filifiliga ma se vaega tutusa o le tali atu o le tagata lava ia. Ua faafaigofieina ai lo outou mauaina o mea uma e silisili ona lelei ma mea foi e silisili ona leaga o loo ofoina mai e le lalolagi. O le Initoneti e mafai ai ona e ausia mea tetele i se taimi puupuu lava, po o le saisaitia ai o oe i le tele o mea le aoga e maimau ai lou taimi ma faaitiitia ai lou gafatia. E ala i le kiliki o se ki, e



mafaia ona e oo atu ai i soo mea e nau-nau i ai lou loto. O le ki lena—o le a le mea o loo naunau i ai lou loto? O le a se mea o e tosina i ai? O fea e taitai atu i ai ou manaoga?

Manatua “e tuu mai e [le Atua] i tagata e tusa ma o latou mana’o” (Alema 29:4) ma o Ia “o le a faama-sinoina tagata uma e tusa ma a latou galuega, e tusa ma le manaoga o o latou loto” (MF&F 137:9; tagai foi Alema 41:3).

Sa saunua mai Elder Bruce R. McConkie faapea: “I se lagona moni e ui e faafaatasa, o le *tusi o le ola* o se faamaumauga o galuega a tagata ona o ia lava faamaumauga o loo tusia i o latou lava tino. . . . O lona uiga, o mafaufauga uma, upu, ma galuega e i ai se [aafiaga] i le tino o le tagata; o nei mea latou te tuua ni o latou faailoga, o faailoga e faigofie lava ona faitauina e Ia o Le e Faavavau e pei o le faitauina o ni upu i totonu o se tusi” (*Mormon Doctrine*, 2nd ed. [1966], 97).

E faamaumau foi e le Initoneti ou manaoga, ua faailoaina i ituaiga o sailiga ma kiliki. O loo i ai punaoa o loo faatalitali mai e faatumuina na manaoga. A e fesuenia le Initoneti, e te tuua ni faamaoniga o mea na e sailia—o mea na e fesootai i ai, o le umi na e i ai iina, ma ituaiga o mea e te fiafia i ai. I lea auala, e fatu ai e le Initoneti se talaaga oototo o lou tagata—i se lagona, o lou “tusi o le ola i luga o le initoneti.” E pei ona i ai i le olaga, o le a tuu atu e le Initoneti ia te oe le anoanoai o mea e te sailia. Afaifi e mama a’ia’i ou manaoga, e mafai foi e le Initoneti ona faalauteleina lo latou mama, ma faigofie atili ai ona e punouai i sailiga agavaa. Ae e moni foi lona faafeagai.

Sa faamatalaina e Elder Neal A. Maxwell i le ala lenei:

“O le mea tatou te mananao pea lava pea i ai i le gasologa o taimi, o

le mea lava lena o le a avea ai i tatou, ma tatou maua i le faavavau. . . .

“. . . Ua na o le atiaaina ma le faateete o o tatou manaoga e mafai ai e na manaoga ona tautuaina pea i tatou i lo le faatiga ia i tatou!” (“E Tusa Ma O [Matou] Manao,” *Liahona*, Ian. 1997, 23).

Ou uso talavou, afai e te le o mata-ala i le atiaaina o ou manaoga, o le a faia e le lalolagi lena mea mo oe. O aso uma, e saili ai le lalolagi e faatosina ou manaoga, faaosooso oe e faatau se mea, kiliki i se mea, ta se mea, faitau pe matamata i se mea. Ae o le filifiliga e ā oe. Ua ia te oe le faitalia. O le mana lea e le gata e faatino ai ou manaoga ae e faamama, faapaia ma faaleleia ai foi ou manaoga. O le faitalia o lou mana lea e filifili ai le ituaiga tagata e avea ai oe. O filifiliga taitaisi e te latalata atili ai pe mamao atili ai foi mai le tagata e tatau ona avea ai oe; e tofu lava le kiliki ma lona uiga. Ia e fesili ia te oe lava ia, “O fea o le a taitai atu i ai lenei filifiliga?” Ia atiae le tomai e te vaai mamao ai.

E manao Satani ia puleaina lou faitalia ina ia mafai ona ia puleaina le ituaiga tagata e avea ai oe. Ua ia iloaina o se tasi o auala e faia ai lenei mea o le maileia lea o oe i ni amioga faavaisu. O au filifiliga e fuafua ai pe o tekinolosi o le a faamalosi ai oe pe faapologaina ai foi oe.

Sei ou tuuina atu ni mataupu faavae se fa e fesoasoani ai ia te oe, le tupulaga o filifiliga, ia atiae ou manaoga ma taialaina lou faaaogaina o tekinolosi.

Muamua: O Le Iloaina Po o Ai Moni Oe e Faigofie ai Ona Faia Faaiuga

E i ai sa’u uo na aoaoina lenei upumoni i se ala patino lava. Sa ola ae lona atalii i le talalelei, ae sa foliga mai na se ese faaleagaga. Sa tele taimi na ia teena ai avanoa e faaoga ai le perisitua. Sa le fiafia ona matua ina ua ia



tautino atu ua tonu ia te ia e le alu i se misiona. Sa tatalo ma le faatauina la’u uo mo lona atalii, ma le faamoemoe o le a suia lona loto. O na faamoemoga na faatamaia ina ua faasilasila atu e lona atalii ua faamau o ia mo se faaipoipoga. Na augani atu le tama i lona atalii ina ia faia sona faamanuiaga faapeteriaka. Na iu ina malie i ai le atalii ae sa manao e alu na o ia e vaai le peteriaka.

Ina ua foi mai o ia i le maea ai o le faamanuiaga, sa ootia tele o ia. Sa ia avatu lana uo teine i fafo i le mea sa mafai ona la talanoa ai na o laua. Sa autilotilo atu le tama i le faamalama ma iloa atu le ulugalii talavou faaolioli o loo solo e le tasi loimata o le isi.

Mulimuli ane sa faasoia atu e le atalii i lona tama le mea na tupu. I le ootia tele, sa ia faamatala atu ai e faapea i le taimi o le faamanuiaga, sa faatepa o ia i le tagata sa i ai o ia i le muai olaga. Sa ia vaaia lona lototele ma le malosia i le faatauina o isi ia mulimuli ia Keriso. I le iloaina ai la po o ai moni o ia, e mafai faapefea la ona le alu i se misiona?

Alii talavou, ia manatua po o ai moni lava outou. Ia manatua o loo outou umiaina le perisitua paia. O le a musuia outou e lenei mea e faia ni filifiliga sa’o pe a outou faaaogaina le Initoneti ma i o outou olaga atoa.

Lua: Sulu i le Palaka o le Puna o le Mana

Ua i ai tonu lava i lou alofilima le atamai o le vaitausaga—o le mea e sili

atu ona taua, o upu a perofeta, mai aso o le Feagaiga Tuai e oo mai ia Peresitene Thomas S. Monson. Ae afai e te le fafagaina soo lau telefoni, e leai se aoga, ma e te lagonaina le leiloa o se mea ma le leai o se fesootaiga. E te le mafaufauina lou alu ese atu i se aso e aunoa ma le fafagaina o lau maa.

E pei lava o le taua o lou alu ese atu ma le fale i aso uma ua tumu atoa le maa o lau telefoni, e matua sili atu lava ona taua le fafagaina ia tumu o lau maa faaleagaga. O taimi uma e te palakaina ai lau telefoni, ia faia o se faamanatu ia te oe lava ia pe o e palakaina i le puna e sili ona taua o le mana faaleagaga—o le tatalo ma le suesueina o tusitusiga paia lea o le a fafagaina ai oe i musumusuga e ala mai i le Agaga Paia (tagai MF&F 11:12–14). O le a fesoasoani ia te oe e iloa ai le mafaufau ma le finagalo o le Alii ia faia filifiliga itiiti ae taua i aso uma ia e iloa ai le itu e te agai i ai. O le toatele o i tatou e vave tuu lava soo se mea tatou te faia ina ia faitau se feau tusitusia—pe le tatau ea ona tatou faatauina atili ia savali mai le Alii? E le tatau lava ona tatou mafaufau e teena le fesootai atu i lenei mana (tagai 2 Nifae 32:3).

Tolu: O Le Umiaina o se Telefonipoto E Te Le Poto Ai; ae O Le Faaogaina ma le Poto e Mafai ai

Alii talavou, aua nei faia ni mea faavalevarea i a outou telefoni poto (smartphone). Ua outou iloa uma le

uiga o la'u tala (tagai Mosaea 4:29). E le mafaitaulia auala e mafai ai e tekinolosi ona aveese lou mafaufau mai mea e sili ona taua. Mulimuli i le fautuaga a le au matutua "Ia i ai i le nofoaga e te i ai pe a e i ai iina." Pe a e aveina se taavale, ia ave. A e i ai i totonu o se vasega, taulai atu i le lesona. A e faatasitasi ma au uo, tuu atu ia i latou le meaalofa o le gauai. E le mafai ona gauai atu lou mafaufau i ni mea se lua i le taimi e tasi. O le tele o mea e fai e vave fesii-tai solo ai lou taulaiga mai le tasi mea i le isi. Fai mai se muagagana ua leva, "Afai e te tuliina ni lapiti se lua, o le a e le mauaina se tasi."

Fa: Ua Saunia e le Alii Tekinolosi e Ausia ai Ona Faamoemoega

O le faamoemoega paia o tekinolosi o le faanatinatiina o le galuega o le faaolataga. I le avea ai ma tagata o le tupulaga o filifiliga, ua sili atu lo outou malamalama i tekinolosi. Faaaoga e faatele'a'i ai lou alualu i luma e agai atu i le atoatoa. Ona ua tele mea ua e maua, e tatau foi ona e foai atu (tagai "Ona Ua Maua Tele," *Viiga*, nu. 124). Ua faamoemoaina oe e le Alii e faaoga nei meafaigaluega sili e siitia ai Lana galuega i se isi tulaga maualuga atu, e faasoa atu ai le talalelei i ni auala e sili atu ma le mea o mafaufau i ai le tupulaga. I tupulaga ua tuanai a latou faatosinaga o latou tuaoi ma o latou taulaga, ae ua ia te outou le mana e ala mai i le Initoneti ma ala o faasalalauaga faale-agafesootai e aapa atu ai i tala atu o o outou tuaoi, ma faatosina le lalolagi atoa.

Ou te molimau atu o le Ekalesia lenei a le Alii. Sa filifilia outou ia auai i Lana galuega i lenei taimi ona ua Ia faatuatuaaina outou e faia ia filifiliga sa'o. O outou o le tupulaga o filifiliga. I le suafa o Iesu Keriso, amene. ■



Saunia e Peresitene Dieter F. Uchtdorf
Fesoasoani Lua i le Au Peresitene Sili

O E Moe i Lenei Taimi o le Toefuataiga?

E taua tele lenei mea mo i tatou o ni tagata taitoatasi, o ni aiga, ma ni tagata o le Ekalesia a Keriso e le tatau ai ona tuu atu na o sina taumafaiga lē atoatoa i lenei galuega paia.

Toeitiiti atoa le 200 tausaga talu ai, na avea ai le tala puupuu Amerika o le "Rip Van Winkle" o se tala masani. O le tagata autu, o Rip, e le o se tagata tinou, sa lelei tele i le faatau-mamao mai i mea e lua: galuega ma lona toalua.

I se tasi aso, a o tafaofao ai i le mauga ma lana taifau, na ia maua atu ai se vaega o alii sa ese lava o latou laei o loo inupia ma taaalo i ni taaloga. Ina ua uma ona ia inuina la latou pia, sa oo ina faanefu lana vaai ma moe-iini ai mo sina taimi. Ina ua ia pupula a'e, sa faateia o ia i le iloa ai ua leai lana taifau, ua elea lana fana, ma ua i ai nei sana soesa umi lava.

Sa toe foi atu Rip i lona nuu ma iloa ai ua suia mea uma. Ua maliu

lona toalua, ua leai ni ana uo, ma o le ata o le Tupu o Siaosi le III sa i totonu o le pa pia ua suia i se ata o se tagata na te le masani ai—o le Taitai Au o Siaosi Uosigitone.

Sa moe Rip Van Winkle mo le 20 tausaga! Ma i le faagasologa, na ia misia ai se tasi o vaitau silisili ona faafiafiaina i le talafaasolopito o lona atunuu—sa ia moe i le taimi atoa o Taua i Amerika.

Ia Me 1966, sa faaoga ai e Dr. Martin Luther King Jr. lenei tala e fai ma faataitaiga o lana lauga "Aua le Moe i le Taimi o le Taua."¹

O le asō, ou te fia faaogaina ai lea lava autu e tasi ma fautua atu se fesilia i tatou uma o loo umiaina le perisitua a le Atua: o e moe i le taimi o le Toefuataiga?



O Loo Tatou Ola i le Taimi o le Toefuataiga

O nisi taimi tatou te mafaufau ai i le Toefuataiga o le talalelei o se mea ua atoatoa, ma ua tea atu ma tatou—sa faaliliuina e Iosefa Samita le Tusi a Mamona, na ia mauaina ki o le perisitua, na faatulagaina le Ekalesia. Ae o le mea moni, o le Toefuataiga o se faagasologa faifai pea; o loo tatou ola ai i le taimi nei. O loo aofia ai “mea uma na faaali mai e le Atua, mea uma ua ia faaali mai nei,” ma le “tele o mea silisili ma le taua” lea “o le a ia faaali mai.”² Uso e, o atinaega faafiafiaina o aso nei o ni vaega o lena vaitau o sauniuniga ua leva ona muai tau mai lea o le a faaiuina i le Afio Faalua Mai ma le mamalu o lo tatou Faaola, o Iesu Keriso.

O se tasi lenei o vaitau sili ona ofofogia o le talafaasolopito o le lalolagi! Sa naunau lava perofeta anamua e fia vaai i o tatou aso.

A maea lo tatou taimi i le olaga nei, o a ni aafiaga o le a mafai ona tatou faasoa atu e uiga i lo tatou sao i lenei vaitau taua o o tatou olaga atoa ai ma le faalateleina o le galuega a le Alii? Mata e mafai ona e fai atu sa afe i luga lima o o tatou ofu ma galulue ma o tatou loto atoa, mafaufau, manatu, ma le malosi atoa? Pe o le a tatou tautino atu o o tatou matafaioi sa tele lava na o le matamata [i isi o galulue?]

Ou te manatu o loo tele mafuaaga e faigofie ai ona tatou tulimomoe e tusa ai ma le fausiaina o le malo o le Atua. Sei ou ta’ua ni mea taua se tolu. A o ou ta’ua, ou te valaaulia outou ia mafaufau loloto pe ono faatatau se tasi o ia mea. Afai e te vaaia se avanoa e faaleleia ai, ou te talosagaina outou ia mafaufau po o a mea e mafai ona faia e suia ai mo le lelei sili atu.

Manatu Faapito

Muamua, manatu faapito.

O i latou e manatu faapito latou te



sailia a latou lava mea ma mea e fiafia i ai i lo isi mea uma. O le fesili autu a le tagata manatu faapito e faapea “O le a se mea ou te maua mai ai?”

Uso e, ou te mautinoa e mafai ona e vaaia o lenei uiga ua manino lava e feteenai ma le agaga lea e manaomia i le fausiaina o le malo o le Atua.

A tatou sailia ni auaunaga mo le tagata lava ia i lo auaunaga le manatu faapito, o le a oo ina tulaui atu mea tatou te faamuamuaina i o tatou lava viiga ma le faamalieleina o o tatou lava manao.

Sa tauivi augatupulaga ua mavae ma le tele o ituaiga o faamaualuga ma le faafiasili ae ou te manatu o nei aso ua matua faateleina ituaiga eseese o faamaualuga. Pe o se mea e tupufua le folafola ai e le Oxford Dictionary talu ai nei o le upu “selfie” e fai ma upu o le tausaga?³

E masani lava, tatou te maua uma se manao mo le fiafua, ma e leai se mea e leaga ai le eva ma tatou fiafia lava i tatou. Ae a tatou sailia loa ia “oloa ma viiga o le lalolagi”⁴ e fai ma vaega autu e uunaia ai i tatou, o le a tatou misia ni aafiaga togiola ma olioli lea e o mai pe a tatou tuu atu ma le lotofoai i tatou lava i le galuega a le Alii.

O le a le vaifofo?

O le tali, e pei ona masani ai, o loo maua i afioga a Keriso:

“Ai se fia mulimuli mai ia te au, aua ne’i usiusitai o ia ia te ia, a ia

ave e ia lona satauro, i le mulimuli mai ai ia te au.

“Aua ai se fia faasaogalemuina lona ola, e maumau ai ia te ia; a o le faamaumau lona ola ona o a’u ma le tala lelei, e faasaoina e ia.”⁵

O i latou o e liua atoatoa atu o latou olaga i lo tatou Faaola ma auauna atu i le Atua ma uso a tagata, latou te iloaina se oa ma se faamalieleina atoa o le olaga lea o le a le mafai lava ona oo i ai le tagata manatu faapito ma faamaualuga. O e le manatu faapito latou te tuu atu i latou lava. Atonu i nei mea o ni mea-alofa faatauvaa o le alofa mama lea e i ai se aafiaga loloto mo le lelei: se ataata, se faatalofa, se fusi, o taimi e faalogo atu ai i isi, se upu mālū o le faamalosiā, po o se aga o le popole. O nei galuega uma o le agalelei e mafai ona suia ai loto ma olaga. A tatou faaaogaina tatau ia avanoa lē faatapulaaina e alofa ma auauna atu ai i o tatou uso a tagata, e aofia ai o tatou taitoalua ma aiga, o lo tatou gafatia e alofa ma auauna atu ai i le Atua o le a matua faateleina.

O i latou e auauna atu i isi o le a le momoe lava i le taimi o le Toefuataiga.

O Vaisū

O le isi mea e ono mafua ai ona tatou moesavali i le taimi atoa o lenei vaitau taua o le lalolagi, o vaisu.

O vaisu e masani lava ona amata-mata malie. O vaisu o filo tuaiti o amio-ga fai soo lea e taataai ma ave ma ni



mausa e puleaina i tatou. O mausa le lelei ua i ai le gafatia e avea ai ma ni vaisu e le mafai ona puleaina.

O nei vaisu e puleaina i tatou e mafai ona tino mai i soo se ituaiga, e pei o ponokalafi, ava malosi, feusu-aiga, fualaa faasaina, tapaa, taaloga faitupe, meaai, galuega, Initoneti, po o mea e faafoliga e komepiuta e mo'i. O Satani, lo tatou fili numera tasi, ua i ai le tele o meafaigaluega na te fiafia e faaoga e faoa ai mai ia i tatou lo tatou gafatia paia e ausia ai la tatou misiona i le malo o le Alii.

E faanoanoa lo tatou Tama Faalelagi i le silasila mai i le naunau o nisi o Ona atalii malualii e faatagaina i latou e puleaina e vaisu faataumaoui.

Uso e, o loo tatou umiaina le perisitua faavavau a le Atua Silisiliese. O i tatou moni lava o atalii o le Silisili Ese ma ua faamanuiaina i se gafatia le ma faamatalaina. Ua mamauina i tatou ia ausia lo tatou gafatia silisili faalelagi. E lei faamoemoeina i tatou e faamutaina lo tatou gafatia faalelagi e tuinanau

faalelalogi ma puleaina ai e vaisu.

O le a le vaifofo?

O le mea muamua e tatau ona tatou malamalama i ai, o vaisu e matua faigofie lava ona puipuia mai ai i tatou nai lo le tau togafitia. I le fetalaiga a le Faaola, “Ia outou le tuu se tasi o ia mea ia ulu i totonu o lou loto.”⁶

I nai tausaga ua mavae, sa ma maua ai ma Peresitene Thomas S. Monson se avanoa e malaga taamilo ai i le Air Force One—le vaalele ofoofogia lea e feaveaia le peresitene o le Iunaite Setete. Sa faia ni siaki vailiili a le puipuiga e le Vaega Faalilolilo, ma sa ou ataata teisi a o suesueina e sui o le puipuiga lo tatou perofeta pele a o lei faovaa.

Ona valaaulia lea o a'u e le pailate faafoe ia ou nofo i le nofoa o le kape-teni. O se aafiaga ofoofogia le toe saofai ai i le nofoa faatonutonu o se masini lele matagofie e pei o le ituaiga sa ou lele ai i le tele o tausaga. O manatuaga o ia malaga i atuvasa ma konetineta sa toe faatumulia ai lou loto ma le

mafaufau. Sa ou mafaufau i taimi faafiafiaina e masagi ai i luga ma tulaeleele ai i malaevaalele i le lalolagi atoa.

Sa toetoe a aunoa ma le mafaufauina, sa tuu atu ai ou lima i ki faatonutonu e fa o le 747. Ae ou faalogoina loa se leo pele ma le le mafaaseseina mai i ou tua—le leo o Thomas S. Monson.

“Dieter,” sa ia fai mai, “aua lava ne'i e mafaufau e tago i ai.”

Ou te le o tautino atu i se mea, ae atonu lava sa iloa e Peresitene Monson lo'u mafaufau.

A faaosoosoina i tatou e faia ni mea e le tatau ona tatou faia, ia tatou faalogo atu i le lapataiga agaalofa o aiga faatuatuaaina, ma uo, lo tatou perofeta pele, ma le Faaola i taimi uma.

O le puipuiga sili lava mo vaisu o le aua lava nei amataina.

Ae faapefea i latou ua saisaitia i latou lava i noataga o vaisu?

O le mea muamua, faamolemole ia iloa o loo i ai se faamoemoe. Ia saili le fesoasoani mai i e pele, ma faufautua aoaoina. Ua saunia e le Ekalesia se

polokalama toe faaleleia mo vaisu e ala i taitai o le Ekalesia i le lotoifale, le Initoneti,⁷ ma i nisi eria, i le Auaunaga a le AAG mo Aiga.

Ia manatua i taimi uma, faatasi ai ma le fesoasoani a le Faola, e mafai ona faasaolotoina oe mai vaisu. Atonu o se ala umi ma faigata, ae o le a le fiu lava le Alii ia te oe. E alofa o Ia ia te oe. Na puapuagatia Iesu Keriso i le Togiola e fesoasoani ina ia e sui, ia faasaoloto oe mai le nofopologa i le agasala.

O le mea sili ona taua o le taumafai—o nisi taimi e tele ni nai taumafai e faia ai a o lei maua e tagata le manuia. O lea ia aua nei fiu. Aua nei lafoaia le faatuatua. Ia faalatalata lou loto i le Alii, ma o le a Ia tuu atu ia te oe le mana o le laveaiga. O le a Ia faasaolotoina oe.

Ou uso pele, ia e matua taumamao lava i taimi uma mai mausa e ono taitai atu ai oe i vaisu. O i latou e faia lea mea o le a mafai ona tuuto atu o latou loto, manatu, mafaufau, ma le malosi i le galuega a le Atua.

O le a latou le momoe lava i lenei taimi o le Toefuataiga.

O Mea Faamuamua e Faatautavā

O se faafitauli lona tolu o loo taofia i tatou mai le punouai atoatoa i lenei galuega, o le anoanoai lea o mea faamuamua e fetautavā'i o loo tatou fetaiiai. O nisi o i tatou ua pisi tele ua tatou lagonaina ai e pei i tatou o se taavale toso o loo tosoina e ni manu o loo aoaoina e galulue—ma e tofu lava le manu ma le itu e fia alu i ai. E tele le malosi e alu ai, ae e le o minoi le taavale toso.

E tele lava ina tuuto atu a tatou taumafaiga silisili i le sailia o mea e fiafia i ai, se taaloga, ni tafaoga, ma ni mataupu faalenuu ma faaupufai. O nei mea uma atonu e lelei ma faamamaluina, ae o tatou maua ai se taimi ma se malosi mo mea e tatau ona tatou ave i

ai le faamuamua sili ona maualuga?

O le a le vaifofo?

E toe fai atu foi, e sau mai le fetalaiga a le Faola:

“E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

“O le poloaiga muamua lena ma le sili.

“E faapena foi lona lua, E te alofa atu i lē lua te tuaoi ia pei o oe lava ia te oe.”⁸

O isi mea uma i le olaga e tatau ona faalona lua i nei mea faamuamua sili e lua.

E oo lava i auaunaga faale-Ekalesia, e faigofie lava ona faaaluina ai le tele o taimi e tau ai na ona fai ni mea e aunoa ma le loto i ai pe aunoa ma le aano moni o le avea ma soo.

Uso e, o i tatou o ni tagata e tauaveina le perisitua ua tuuto atu e avea ma se nuu e alofa i le Atua ma o tatou tuaoi ma o loo loto e faaali atu lena alofa e ala i upu ma galuega. O le ute lena o ituaiga o tagata e i ai i tatou o ni soo o Iesu Keriso.

O i latou e ola i nei mataupu faavae o le a le momoe lava i lenei taimi o le Toefuataiga.

O Se Valaau ia Feala i Luga

Sa tusia e le Aposetolo o Paulo, “Ala ia oe [na] e moe ma e tulai mai i e ua oti, ona faamalamalama mai lea o Keriso ia te oe.”⁹

Au uo pele, ia outou iloa o outou o atalii o le malamalama.

Aua nei faatagaina le manatu faapito! Aua nei faatagaina mausa ia e taitai atu ai i vaisu! Aua nei faatagaina mea faamuamua faatautava e taitai atu oe i mea e leai se aoga pe aveesea mai ai oe mai auaunaga faamanuiaina o le avea ma soo ma auaunaga malualii faaleperisitua!

E taua tele lenei mea mo i tatou o ni tagata taitoatasi, o ni aiga, ma ni tagata o le Ekalesia a Keriso e le tatau ai ona tuu atu na o sina taumafaiga lē atoatoa i lenei galuega paia.

O le avea ai ma se soo o Iesu Keriso e le o se taumafaiga e faatasi ona fai i le vaiaso pe faatasi i le aso. O se taumafaiga e faia i taimi uma.

O le folafolaga a le Alii ia i latou moni o loo umiaina Lana perisitua e toetoe lava a maoae tele ona malamalama i ai.

O i latou o e faamaoni i le Perisitua



Arona ma le Perisitua Mekisateko ma le faalauteleina o o latou valaauga “e faapaiaina e le Agaga i le faafouina o o latou tino.” O le mea lea, o mea uma o i ai i lo tatou Tama o le a tuuina atu ia te i latou.¹⁰

Ou te molimau atu e mafai e le mana faamama o le Togiola a Iesu Keriso ma le mana faaliliu o le Agaga Paia ona faamaloloina ma laveaiina tagata. O lo tatou avanoa lenei, lo tatou tiute paia, ma lo tatou olioli e faalogo ai i le valaau a le Faaola; ia mulimuli atu ia te Ia ma se mafaufau naunautai ma le faamoemoe atoa o le loto. Ia tatou “lulu ese filifili ua noatia ai [tatou], ma o mai i fafo o le pouliuli, ma tutulai mai i le efuefu.”¹¹

Ia tatou mataala ma aua le faavaivai i le faia o mea lelei, aua o loo tatou “faataiatia le faavae o se galuega tele,”¹² o le saunia lea mo le toe afio mai o le Faaola. Uso e, a tatou faaopoopo atu le malamalama o a tatou faataitaiga o se molimau i le matagofie ma le mana o le upumoni toefuataiina, o le a tatou le momoe lava i lenei taimi o le Toefuataiga. Ou te molimau atu ai i lenei mea ma tuu atu ia te outou au faamanuiaga i le suafa paia o lo tatou Matai, o Iesu Keriso, amene. ■

FAAMATALAGA

1. Tagai Martin Luther King Jr., “Don’t Sleep Through the Revolution” (1966 Ware Lecture, Unitarian Universalist Association General Assembly, Hollywood, Florida, May 18, 1966).
2. Mataupu Faavae o le Faatuatua 1:9.
3. Tagai blog.oxforddictionaries.com/press-releases/oxford-dictionaries-word-of-the-year-2013.
4. 2 Nifae 26:29.
5. Mareko 8:34–35.
6. 3 Nifae 12:29.
7. Tagai, mo se faataitaiga, lds.org/topics/addiction.
8. Mataio 22:37–39.
9. Efeso 5:14.
10. Tagai Mataupu Faavae ma Feagaiga 84:33, 38.
11. 2 Nifae 1:23.
12. Tagai Mataupu Faavae ma Feagaiga 64:33.



Saunia e Peresitene Henry B. Eyring
Fesoasoani Muamua i le Au Peresitene

O Le Alii Perisitua

E mafai ona avea oe ma se faataitaiga maoae, o se tasi e faaleogalua, po o se faataitaiga leaga. Atonu e te mafaufau e le afaina lea ia te oe, ae e afaina i le Alii.

E tofu uma i tatou ma toa, aemaise lava a o tatou laiti. Na ou fanau ma ola ae i Princeton, New Jersey, i le Iunite Setete. O le au taaalo sili ona tautaua e lata i le mea sa matou nonofo ai na faamautu lea i le Aai o Niu Ioka. O le nofoaga lea o au peisipolo faapolofesa e tolu i na aso ua leva: o le Brooklyn Dodgers, le New York Giants, ma le New York Yankees. Na sili foi ona lata ane Filatofia i lo matou fale ma sa nonofo ai au peisipolo o le Athletics ma Phillies. Sa toatele ni toa peisipolo faaolioli mo au i na au.

O Joe DiMaggio, lea sa taalo i le New York Yankees, na avea ma au toa peisipolo. A matou taaalo peisipolo ma ou uso ma au uo i lotoa o le aoga i autafa o lo matou fale, ou te taumafai

lava e sasau le pate i le ala ou te mafaufau o sasau ai e Joe DiMaggio. O vaitaimi na a o lei i ai ni televise (o le talafaasolopito anamua lenei), o lea sa na o ata mai nusipepa sa ou mauaina e faaoga e kopi ai lana sasau.

A o ou tuputupu ae, sa ave au e lou tama i le Faletaalo tele a le Yankee. Na o le pau lena o le taimi sa ou vaai ai o taalo Joe DiMaggio. E pei lava o ou i ai iina, i lou vaai faalemafaufau ia te ia o sasauina le pate ma iloa atu le lele sao i luga o le peisipolo paepae i tulaga i le malae ogatotonu.

E lei taitai lava lalata atu ou tomai faapeisipolo i ou toa na a o ou tama-itiiti. Ae o nai taimi ia sa lelei ai lau ta i le peisipolo, sa ou kopiina le tulaga o le malosi o lana sasau i le mea e gata ai lou mafai.





A tatou filifiliina ni toa, tatou te amata i le kopiina, ma le iloa po o le leiloa, o le mea e sili ona tatou faame-melo i ai ia i latou.

O le mea e sili ai, na tuuina e ou matua atamamai ni toa maoae i lou ala a o ou laitiiti. E na o le faatasi lava ona aveina au e lou tama i le Faletaalo tele o le Yankee e matamata i lau toa peisipolo o taalo, ae o Aso Sa uma na te tuu mai ai ia te au e matamata i se alii perisitua lea na avea ma se toa. O lona toa na faatulagaina lou olaga. Na avea lou tama ma peresitene o le paranesi i lo matou tamai paranesi lea na faia i lo matou fale. I le isi auala, afai e te oo mai i lalo o le fogafale muamua i le taeao o le Aso Sa, ua e i ai i totonu o le lotu. E lei silia lava ma le 30 tagata e auai i lo matou paranesi.

Sa i ai se alii talavou na te aumaia lona tina i le taavale i lo matou fale mo le sauniga, ae na te le sau i totonu o le fale. E le auai i le lotu. O lou tama lea sa faamanuiaina e ala i le alu atu i fafo ia te ia i le mea sa paka ai lana taavale ma valaauina o ia i totonu o lo matou fale. Na papatisoina o ia ma avea ma ou taitai Perisitua Arona muamua ma na o le pau lava lona. Na avea o ia ma ou toa perisitua. Ou te manatua pea le faatagata laau sa ia au-mai ia te au o se tau i ina ua uma ona ma faataunuuna se galuega faatino o le tataina o fafie mo se fafine ua maliu

lana tane. Sa ou taumafai ia pei o ia i soo se taimi lava ou te tuuina atu ai ni faaviiviiga talafeagai i se auauna a le Atua.

Sa ou filifiliina se isi toa i lona lava tamai paranesi o le Ekalesia. O ia o se Maligi o le Iunaita Setete lea na sau i la matou sauniga o ofuina lona toniga maligi lanumeamata. O le taimi lea o le taua, ma i lona lava mea na avea ai o ia ma ou toa. Na auina atu o ia i le Iunivesite o Princeton e le maligi e faalautele lana aoga. Ae o le mea na sili atu nai lo le matauina o lona toniga faamiliteli, sa ou matamata o ia taalo i le Faletaalo tele i Palmer o se kapeteni o le au lakapi [faa Amerika] a le Iunivesite a Princeton. Sa ou vaai o ia taalo i le au pasiketipolo a le iunivesite ma matamata foi o ia taalo o le sapo polo tautaua a le latou au peisipolo.

Ae o le mea na sili atu, sa ia sau i lou fale i le aluga o le vaiaso e faasino mai ia te au le togiina o se pasiketipolo i ou lima uma tauagavale ma le taumatau. Sa ia tau mai ia te au o le a ou manaomia lona tomai aua o le a ou taalo pasiketipolo i se aso. Sa ou leiloina i lona taimi, ae mo le tele o tausaga sa avea o ia ma se faataitaiga o se alii perisitua faamaoni ia te au.

O le a avea outou taitoatasi o se faataitaiga o se alii perisitua e tusa lava pe tou te mananao i ai pe leai. Ua avea outou ma se lamepa susulu

ina ua outou taliaina le perisitua. Na tuuina outou e le Alii i se tuugalamepa e faamalalamaina le ala mo tagata uma o siomiaina outou. E matua moni lava lona mea mo i latou o loo i la outou korama o le perisitua. E mafai ona avea oe ma se faataitaiga maoae, o se tasi e faaleogalua, po o se faataitaiga leaga. Atonu e te mafaufau e le afaina lea ia te oe, ae e afaina i le Alii. Na Ia fetalai mai i le ala lenei:

“O outou o le malamalama o le lalolagi outou. E le mafai ona lilo le aai ua tu i luga o le mauga.

“Latou te le tutuina foi le lamepa i le tuu ai i lalo o le mea e fua ai saito, a e tuu i luga lava o le tuugalamepa ia pupula atu ai i e o i le fale uma.

“Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi.”¹

Ua ou manuia i faataitaiga a tagata maoae na umia le perisitua i korama sa faamanuiaina au ou te galue ai. E mafai ona outou faia mea sa latou faia mo au i le avea ma se faataitaiga mo isi e mulimuli i ai.

Ua ou iloina ni uiga masani se tolu o e umia le perisitua na avea ma ou toa. O le tasi o se mamamu o le tatalo, o le lua o se uiga masani o le auauna atu, ma le tolu o se filifiliga mausali ina ia faamaoni.

Tatou te tatalo uma lava, ae o le



tagata e umiaina le perisitua tou te fia avea ai e tatalo soo ma le loto i ai. I afiafi o le a outou tootutuli ma faafetai i le Atua mo faamanuiaga o le aso. O le a outou faafetai ia te Ia mo matua, mo faiaoga, ma mo faataitaiga maoae e mulimuli i ai. O le a outou faamatalaina faapitoa i a outou tatalo po o ai ma pe na faapefea foi ona faamanuiaina o outou olaga i lena aso. O le a alu ai ni nai minute ma e sili atu foi nai lo sina manatu. O le a faateia ma suia ai oe.

A outou tatalo mo le faamagaloga, o le a outou faamagalo atu i isi. A outou faafetai atu i le Atua mo Lona agalelei, o le a outou mafaufau i isi, e ala i o latou igoa, o e manaomia lo outou agalelei atu. O le a toe faateia outou i aso uma i lena aafiaga, ma o le a suia ai oe e lena mea i le aluga o taimi.

O se tasi o auala o le a suia ai oe i sea ituaiga tatalo faatauana, ou te folafola atu ia te oe, o le a e lagonaina moni o oe o se atalii o le Atua. A e iloina o oe o se atalii o le Atua, o le a e iloina foi e tele mea o Ia faamoemoe mai ia te oe. Ona o oe o Lona

atalii, Na te faamoemoeina oe e te mulimuli i Ana aoga ma aoga a Lona Alo pele, o Iesu Keriso. O le a Ia faamoemoeina oe ina ia limafoai ma agalelei atu i isi. O le a faanoanoa o Ia pe afai e te faasausili ma manatu faapito. O le a Ia faamanuiaina oe ina ia i ai le naunautaiga e faamuamua mea e fiafia i ai isi nai lo oe lava.

O nisi o outou ua leva ona avea ma faataitaiga o auaunaga faaleperisitua le manatu faapito. I malumalu i le lalolagi atoa, e taunuu ē umia le perisitua a o lei tafa ata. Ma o nisi e auauna pea e oo i le leva o le po. E leai se faamamaluga po o se faalauiloa faalauaitele i lenei lalolagi mo lena ositaulaga o le taimi ma taumafaiga. Na matou o ma tagata talavou a o latou auauna atu ia i latou o i le lalolagi o agaga, o e ua le mafai ona maua faamanuiaga o le malumalu mo i latou lava.

A ou vaai atu i le fiafia nai lo le lelavava i foliga o i latou o e auauna atu iina i le taeao ma le afiafi, ou te iloa e maoae tau i lenei olaga mo lena ituaiga auaunaga faaleperisitua

le manatu faapito, ae ua na o se faatusa itiiti o le olioli o le a latou faasoaina ma i latou o loo latou auauna atu i ai i le lalolagi o agaga.

Ua ou vaai i lena lava fiafia i foliga o i latou o e talanoa atu i isi e uiga i faamanuiaga lea e oo mai i le auai i le malo o le Atua. Ou te iloa se peresitene o se paranesi e toeitiiti lava o aso uma na te aumaia ai tagata i faifeautalai ia latou aoaoina. I ni nai masina na muamua atu sa lei avea o ia o se tasi o le Ekalesia. I le taimi nei ua i ai faifeautalai o loo aogo atu ma ua i ai se paranesi ua faatupulaia le aofai ma le malosi ona o ia. Ae e sili atu nai lo lena, o ia o se malamalama i isi o e o le a tatalaina o latou gutu ma faanatinati le faapotopotoina e le Alii o le fanau a le Tama Faalelagi.

A o e tatalo ma auauna atu i isi, o le a tuputupu ae lou malamalama o oe o se atalii o le Atua ma ou faalogona e uiga ia te Ia. O le a e nofouta atili e faanoanoa o Ia pe afai e te le faamaoni i soo se auala. O le a e naunau atili e tausia lau upu i le Atua faapea ma isi. O le a leai sou naunautaiga i le aveina o soo se mea e le o oe e anaina. O le a e faamaoni atili i ou pule. O le a e naunau atili ina ia taunuu i le taimi sao ma faamaea soo se galuega ua tuuina atu ia te oe e le Alii lea na e talia e fai.

Nai lo le mafaufau pe o le a o atu a latou faiaoga o aiga, o le a tulimatai atu ma le naunautai tamaiti o aiga ua tofia oe e te faiaoga ai, i lau asiasiga. Na maua e la'u fanau na faamanuiaga. A o latou tuputupu ae, sa latou maua ni toa perisitua na fesoasoani ia i latou i le setiina o o latou lava ala i le auauna atu i le Alii. O lena faataitaiga faamanuiaina ua pasi atu nei i le auga-tupulaga lona tolu.

O lau savali o se tasi foi o le lotofaafetai.

Ou te faafetai ia te outou mo a outou tatalo. Ou te faafetai ia te outou

mo le o ifo i o outou tulivae i le iloaina o le mea moni e le o ia te outou uma ni tali. Tou te tatalo i le Atua o le lagi e faailoa atu lou agaga faafetai ma ina ia aioi atu mo Ana faamanuiaga i luga o outou olaga ma o outou aiga. Ou te faafetai ia te outou mo a outou auaunaga i isi ma mo taimi na e te le lagonaina ai se manaoga mo le faamaluina o lau auaunaga.

Ua tatou taliaina le lapataiga a le Alii afai tatou te sailia viiga i lenei lalolagi mo a tatou auaunaga e ono taofia mai ia i tatou faamanuiaga silisili. O le a e manatuaina nei upu:

“Ia outou, nei avatu ni a outou mea alofa i luma o tagata, ina ia iloa ai e i latou: a faapea, ona leai ai lea o so outou tau mai lo outou Tama o i le lagi.

“O lea a e avatu ai ni mea alofa, aua nei e ilia le pu i ou luma, pei ona faia e tagata pepelo i sunako ma ala, ina ia viia o i latou e tagata. E moni, ou te fai atu ia te outou, ua maua e i latou lo latou tau.

“A e avatu ni mea alofa, aua nei iloa e lou lima tauagavale le mea ua faia e lou lima taumatau:

“Ina ia lilo au mea alofa: o lou Tama foi, o le silafia i le mea lilo o ia lava na te avatu faaaliali se tau i te oe.”²

E lei iloaina e i latou na avea ma ou faataitaiga sili o e umia le perisitua, o loo ia i latou ni uiga faatagatatoa. O le mea moni, e foliga mai na faigata ona latou vaaia na mea na sili ona ou faamemelo i ai. Sa ou ta’ua lou tama o se peresitene faamaoni o se tamai paranesi o le Ekalesia i New Jersey. Na avea mulimuli ane o ia o se tasi o le au faatonu aoao o le Aoga Sa mo le Ekalesia. Ae ou te faaeteete e talanoa atu i le asō ma le faamaualalo e uiga i lana auaunaga i le perisitua, aua sa tauagafau o ia.

E moni e faapena foi mo le maligi lea sa avea ma ou toa i lou laitiiti. Na te le talanoa mai ia te au e uiga i lana



auaunaga faaleperisitua po o mea na ia faia. Na o le tuuina atu lava o se auaunaga. Na ou iloa lona faamaoni mai isi. Afai na i ai se taimi na ia iloa ai ia uiga ia te ia lava lea sa ou faamemelo i ai, sa le mafai ona ou iloaina.

O lea la o lau fautuaga ia te oe lea e manao e faamanuia isi i o outou perisitua, e tatau ona faia i lou olaga le mea e faalilolilo i tagata uma vagana ai le Atua.

Tatalo atu ia te Ia. Faafetai atu ia te Ia mo mea lelei uma i lou olaga. Fesili atu ia te Ia ina ia iloa po o ai tagata sa na Ia tuu i lou ala e te auauna atu i ai. Ole atu ia te Ia ina ia fesoasoani ia te oe e tuu atu lona auaunaga. Tatalo ina ia mafai ona e faamagalo atu ma mafai ona faamagaloina oe. Ona auauna atu lea ia i latou, alofa ia i latou, ma faamagalo ia i latou.

O le mea sili o na mea uma, manatua o auaunaga uma e te tuuina atu, e leai se mea e sili atu nai lo le fesoasoani atu i tagata e filifili ina ia agavaa mo le ola e faavavau. Ua tuuina mai e le Atua ia i tatou lona taitaiga sili i le ala e faaoga ai la tatou perisitua. O Ia o se faataitaiga sili. O le faataitaiga lenei ua tatou vaai i ai i se vaega itiiti o le mea sili o Ana auaunaga faaletino:

“Ma sa fetalai mai le Alii le Atua ia Mose, ua fai mai: O lagi, e tele, ma e le mafai ona faitaulia i latou i le tagata; ae ua faitaulia i latou ia te a’u, ona e a a’u i latou.

“Ma e pei ona o le a mavae atu le tasi lalolagi, ma ona lagi o le a faapea foi ona tu mai se isi; ma e leai se gataaga i a’u galuega, pe i a’u upu.

“Aua faauta, o la’u galuega ma lo’u mamalu lenei—ia aumaia le tino ola pea ma le ola faavavau o le tagata.”³

O i tatou e fesoasoani i lona galuega. E mafai e i tatou taitoatasi ona faia se eseesega. Ua uma ona saunia o tatou taimi ma nofoaga i aso amuli mo lona galuega paia. Ua faamanuiaina i tatou taitoatasi i faataitaiga a i latou o e ua avea lona galuega ma faamoemoega sili ona taua o o latou taimi i le fogaeleele.

Ou te tatalo ina ia mafai ona tatou fesoasoani i isi ina ia tulai ae i lona avanoa.

O loo soifua le Atua le Tama ma o le a taliina a outou tatalo mo le fesoasoani o loo outou manaomia e auauna lelei atu ai ia te Ia. O Iesu Keriso o le Alii toetu. O Lana Ekalesia lenei. O le perisitua o loo outou umiaina o le mana lea e galue ai i lona suafa i Lana galuega e auauna atu ai i fanau a le Atua. A o outou tuuina atu o outou loto atoa i lenei galuega, o le a Ia faalauteleina outou. Ou te folafola atu ai i le suafa o Iesu Keriso, lo tatou Faaola, amene. ■

FAAMATALAGA

1. Mataio 5:14–16.
2. Mataio 6:1–4.
3. Mose 1:37–39.



Saunia e Peresitene Thomas S. Monson

Ia Faamalosi ma Loto Tele

E tatau ia i tatou—ia i tatou uma—ona maua le lototele e faafetaiaia ai manatu lautele, le lototele e tu atu ai mo mataupu faavae.

Ou uso pele e, ua matagofie lava le toe faatasi ai foi ma outou. Ou te tatalo mo le fesoasoaniga a le lagi a o ou tali atu i le avanoa e lauga atu ai ia te outou.

E ese mai lenei Maota Autu mo Konafesi o loo i ai foi le isi faitau afe o le au perisitua o loo potopoto i falesa ma isi nofoaga i le lalolagi atoa. O loo i ai se mea ua fusia faatasi uma ai i tatou,

aua ua faatuatua i tatou e tauave le perisitua a le Atua.

Ua tatou i ai iinei i le lalolagi i se vaitau ofoofogia i lona talafaasolopito. Ua toetoe lava a lē faatapulaaina o tatou avanoa, ae o loo tatou feagai foi ma le anoanoai o luitau, o nisi o na luitau e tulaga ese lava i o tatou vaitaimi.

Ua tatou ola i se lalolagi ua matua faateleina ai le lafoaia o tulaga

faatauaina o amioga mama, ua tafili-saunoa ai i le agasala, ma ua siomia i tatou i faaososoga ia o ese mai le ala sa’o ma le vaapiapi. Ua tatou fetaii ma osofaiga faifai pea ma faatosinaga taufaasese ua faatamaiaina ai amioga talafeagai ma taumafai ai e suitulaga i filosofia ma tu ma aga a se malo faalelalolagi.


Ona o nei luitau ma isi luitau, ua tatou fetaii ai lava ma faaiuga e faia i taimi uma lea e mafai ai ona iloa lo tatou taunuuga. Ina ia mafai ona tatou faia ni faaiuga sa’o, e manaomia le lototele—le lototele e fai atu ai leai pe a tatau ai, le lototele e fai atu ai ioe pe a talafeagai ai, le lototele e faia ai le mea sa’o ona e sa’o.

Ona o tulaga faatonuina o malo i nei aso ua see ese vave mai tulaga faatauaina ma mataupu faavae ua tuuina mai e le Alii ia i tatou, o le a mautinoa lava le valaauina o i tatou e puipui mea ua tatou talitonu i ai. Pe o le a tatou maua ea le lototele e faia ai?

Sa saunoa Peresitene J. Reuben Clark Jr., o le sa avea ma se uso o le Au Peresitene Sili mo le tele o tausaga: “Ua i ai tulaga ua lagona ai e [tagata] e manatu ua ia i latou le faatuatua . . . e faapea, talu ai o le molimau atu i lo latou faatuatua atoa e ono mafua ai ona faifai atu a latou uo e le talitonu ia i latou, o lea latou te fetuunaia ai lo latou faatuatua, faaitiitia lona taua e ala i se faamalamalama e oo ai i se tulaga e faatamaia ai, pe faafoliga foi e teenaina. O ia tagata o ni tagata pepelo.”¹ E leai se tasi o i tatou e fia ta’ua o se pepelo, ae pe o tatou mumusu ea e tautino atu lo tatou faatuatua i nisi tulaga?

E mafai ona tatou fesoasoani ia i tatou lava i lo tatou manao e faia le mea sa’o pe a tatou tuu i tatou lava i ni tulaga ma auai i gaoioga lea e faatosinaina ai o tatou mafaufauga mo le lelei ma le tulaga e lagona ai le mafanafana o le Agaga o le Alii.





Ou te manatua lo'u faitauina i se taimi ua leva o le fautuaga a se tama na tuu atu i lona atalii ina ua alu ese atu e aoga i se mea mamao: "Soo se taimi lava e te i ai i se nofoaga e le tatau ona e i ai, alu ese! Ou te tuu atu foi ia te outou taitoatasi lea lava fautuaga e tasi: "Soo se taimi lava e te i ai i se nofoaga e le tatau ona e i ai, alu ese!"

E manaomia ona maua e i tatou uma taitoatasi le lototele. O aso uma o o tatou olaga e manaomia ai le lototele—e le mo na o mea e tutupu i le taimi lava lena, ae o le tele o taimi pe a tatou faia ai ni faaiuga pe tali atu i tulaga o siomia ai i tatou. Fai mai le tusitala Sikotilani o Robert Louis Stevenson: "E itiiti lava ni molimau o faatinoga lototele i aso uma. Ae o lou lototele e malualii e ui lava e leai se tasi o uunaiaina oe ia lototele pe viia foi lou igoa."²

E tele ituaiga o lototele. Sa tusia e le tusitala Kerisiano o Charles Swindoll: "O le lototele e le na o le malaetau e tupu ai . . . po o le pueina ma le lototoa o se gaoi i totonu o lou fale.

O tofotofoga moni lava o le lototele e tele ina leleoa. O tofotofoga patino ia, e pei o le tumau i le faamaoni pe a leai se tasi o tilotilo mai, . . . e pei o le tu na o oe pe a le malamalama isi ia te oe."³ Ou te faaopoopo atu e faapea o lea lototele patino o loo aofia ai foi le faia o le mea sa'o e tusa lava pe tatou te fefefe, i le puipuia o o tatou talitonuga ma e tusa foi pe faifai mai ai tagata ia i tatou, ma le faatumauina o na talitonuga e tusa lava pe faamatauina ai le o ese o uo po o le faaletonu ai o o tatou tulaga faaleagafesootai. O le e tu mausali mo le mea sa'o e tatau ona faamatauina i nisi taimi i le faitioina ma le inosiaina.

A o ou tautua ai i le Neivi a le Iunaite Setete i le Taua Lona Lua a le Lalolagi, sa ou aao ai i galuega lototoa, o faaitaitaiga o le toa, ma faaitaitaiga o le lototele. O se tasi o ia faaitaitaiga e le mafai ona galo ia te au o le lototele leleoa o se aliivaa e 18 tausaga le matua—e le o se tasi o lo tatou faatuatua—o le sa le matamuli tele e tatalo. Mai le 250 o alii i le militeli, sa

na o ia lava le tagata e tootuli i po uma i talaane o lona moega [e tatalo], a o faifai ma tauemu atu i ai e sa le talitonu [i le Atua]. Sa punou pea o ia, ma tatalo atu i le Atua. Sa lei fefe lava o ia. Sa lei popole lava o ia. Sa ia te ia le lototele.

Sa ou faalogo i se faaitaitaiga e lei mamao tele atu e uiga i se tasi na foliga mai ua leai se lototele patino. Sa faamatala mai e se uo se sauniga faamatauga faaleagaga ma faatupu faatuatua sa la faatasi ai ma lona toalua i le latou uarota. O se alii talavou sa ia umia le tofi o le ositaulaga i le Perisitua Arona sa ootia ai loto o le faapotopotoga atoa a o ia saunoa e uiga i upumoni o le talalelei ma le olioli o le tausaiaina o poloaiga. Sa ia tuuina atu se molimau faamaoni ma ootia a o ia tu ai i le pulelaa ma foliga mama ma mamalu i lona ofutino paepae ma le fusiua.

Mulimuli ane i lena lava aso, A o tietie mai lenei tamaitai ma lona toalua i le pitonuu, sa la vaaia ai lenei lava alii talavou lea sa ia matua musuiaina i latou i ni nai itula na muamua ai. Peitai, o le taimi la lea, ua matua ese atoa



le ata lea ua ia faaali mai a o ia savali ai i tafatafā ala o loo ofuina ni ofu le talafeagai—ma o loo ulaina se sikareti. Sa le gata ina matua le fiafia tele ma faanoanoa la'u uo ma lona toalua, ae sa matua le mautonu lava i laua pe faapefea ona ia matua faatalitonuina i latou o ia o se tagata lelei i le sauniga faamanatuga ae faafuasei ona foliga mai i se isi tagata ua matua ese atoa.

Uso e, o outou ea o le tagata lava e tasi i soo se mea o outou i ai ma i soo se mea foi o outou faia—le tagata lea e finagalo le Tama Faalelagi e avea ai outou ma le tagata ua outou iloa e tatau ona avea ai outou?

I se faatalanoaga na lolomiina i se mekasini a le malo, sa talosagaina ai se alii taalo paseketipolo i le taamilosaga lauiloa o le American NCAA, o Jabari Parker, o se tasi o le Ekalesia, ina ia faasoia atu se fautuaga sili na ia maua mai i lona tama. Sa tali

atu Jabari, “Sa fai mai [lo’u tama], Ia tutusa lava lou tagata i le pogisa ma lou tagata i le malamalama.”⁴ O se fautuaga taua lea, uso e mo i tatou uma lava.

Ua faatumulia a tatou tusitusiga paia i faataitaiga o ituaiga o lototele o loo manaomia e i tatou taitoatasi i aso nei. Sa faaali mai e le perofeta o Tanielu le lototele silisili e ala i le tu atu mo le mea sa ia iloaia e sa’o ma e ala i le faaali atu o le lototele e tatalo ai, e ui lava sa faamatauaia i le oti lona faia o lona mea.⁵

O le lototele sa faamatalaina ai le olaga o Apinati, e pei ona faaali mai i lona naunautaiga e ofo atu lona ola i lo le faafitia o le upumoni.⁶

Pe le o uunaiaia ea i tatou i olaga o le autau talavou e 2000 a Helamana, o e na aoaoina ma faaalua le manaomia o le lototele e mulimuli ai i aoga a matua, ina ia mama ma paia?⁷

Masalo o tala taitasi nei mai tusitusiga paia ua taualuga i le faataitaiga a Moronae, o le sa i ai le lototele e tumau ai i le amiotonu e oo i le iuga.⁸

I lona olaga atoa, sa tuuina mai ai e le Perofeta o Iosefa Samita ni faataitaiga le mafaitaulia o le lototele. O se tasi o mea matuia na tupu, o le taimi na saisai faatasi ai o ia ma isi o le usoga i filifili—mafaufau i ai i le lokaina faatasi i filifili—ma taofia i totonu o se tamai fale e lei maea ona fau sa sosoo ma le fale faamasino i Richmond, Misuri. Sa tusia e Parley P. Pratt o le sa falepuipui faatasi ai, e uiga i se tasi po patino: “Sa matou taoto e pei o matou momoe seia oo ina tea le vaeluapo, ma sa matua tiga o matou taliga ma loto, a o matou faalogo atu mo le tele o itula i tauemuga mataga, o upu masoa, o upu faifai matuia ma gagana mataga a leoleo.”

Sa faaaau le tala a Elder Pratt:

“Sa ou faalogo pea seia oo ina ou matua inoino, faateia, ma lē fiafia, ma na matua faatumulia i lagona o le ita ua faamaoniaia lea sa ou le manofa ai i lo’u fia tu atu i luga e aoai ia leoleo; ae sa leai lava [sa’u] tala ia Iosefa, po o se isi lava, e ui sa ou taoto i ona talaane ma iloa o loo ala o ia. Ae sa faateia ona ia tu ae i luga, ma tautala atu i se leo o faititili, sa pei foi o se tagi a se liona, ma fai atu i le manino na mafai ona ou manatuaina ai upu nei:

“FIFILEMU. . . I le suafa o Iesu Keriso ou te aoai ai outou, ma faatonu outou ia fifilemu; O le a ou le ola lava i se isi minute e faalogo atu i na itu-aiga o gagana. Tuu nei na tala, a leai o outou po o au e oti NEI LAVA!”

O Iosefa, sa “tu sao i luga i se mamalu uiga ese,” e pei ona faamatalaina e Elder Pratt. Sa lokaina o ia i filifili, e aunoa ma se auupega, ae sa to’a ma malualii o ia. Sa ia tepa atu i lalo i leoleo matatau o e na faapupu atu i se tulimanu pe ua meā ifo i ona vae. O nei alii sa foliga le puleaina na



aioi mai mo lana faamagaloga ma sa lei toe pisa lava.⁹

E le o faatinoga uma o le lototele e maua ai sea taunuuga mataina pe faafuasei, ae o lototele uma e aumaia ai le filemu o le mafaufau ma se mala-malama ua puipuia le mea sa’o ma le upumoni.

E faigata ona tumau i le faamaoni i ou tulaga faatonuina pe afai o loo fua au amioga i manatu fesuisui ai pea ma mea ua malilie i ai isi. O loo manaomia le lototele o se Tanielu, se Apinati, se Moronae, po o se Iosefa Samita ina ia mafai ai ona tatou pipiimau ma le mausali i mea ua tatou iloa e sa’o. Sa latou maua le lototele e faia ai le mea sa faigofie ae o le mea sa sa’o.

O le a tatou fetai ai uma ma le fefe, lagonaina o le tauemuina, ma taia foi i e faasagatau mai. E tatau ia i tatou—ia i tatou uma—ona tatou maua le lototele e faafetaiaia ai manatu lautele, le lototele e tu atu ai mo mataupu faavae. O le lototele, e le fetuunaia, e aumaia ai faamanuiaga o le faamaoniga a le Atua. E avea le lototele ma se amio mama e ola ma faatosina pe a manatu i ai ua le na o se naunautaiga e oti ma le mamalu ae o se naunautaiga foi ia ola mama. A o tatou agai pea i luma, ma tatou taumafai e ola e pei ona tatau ai, o le a mautinoa lava tatou te mauaina le fesoasoani mai le Alii ma mafai ona maua ai le mafanafana i Ana afioga. Ou te fiafia i Lana folafolaga o loo tusia i le tusi a Iosua:

“Ou te le tuua lava oe, ou te le tuulafoai lava ia te oe. . . .

“ . . . Ia e faamalosi, ma loto tele; aua e te fefe, aua e te mata’u; aua o Ieova lou Atua o loo ia te oe i mea uma e te ala i ai.”¹⁰

Ou uso pele, faatasi ai ma le lototele o o tatou talitonuga, e tatau ona tatou tautino atu, faatasi ma le Aposetolo o Paulo, “Aua ou te le ma i le tala lelei ia Keriso.”¹¹ Ma, i lena lava lototele e tasi, ia tatou mulimuli ai i le fautuaga a Paulo: “Ia fai oe ma faaaoao i e ua faatuatua, i le upu, ma le amio, ma le alofa, ma le loto, ma le faatuatua, ma le le gaioia.”¹²

O fetauaiga matautia e oo mai ma toe mou atu, ae o le taua o loo tauina mo agaga o tagata e faaauau pea e

le faamutaina. E pei lava o se valaau manino, ua faapena le oo mai o le afioga a le Alii ia te oe, ia te au, ma e o umiaina le perisitua i soo se mea: “O le mea lea, ia tuu atu nei i tagata taitoatasi e aoao lona tiute, ma galue i le tofi ua tofi i ai o ia, i le filiga atoa.”¹³ Ona avea lea o i tatou ma “tupu ma ositaulaga,”¹⁴ ua tuu faatasia i le faamoemoega ma ua faaeeina i le mana mai luga.¹⁵

Tau ina ia tuua e i tatou taitoatasi lenei nofoaga i le po nei ma le naunautaiga ma le lototele e fai atu ai, faatasi ma Iopu o anamua, “[A o] i ai foi i o’u pogaiisu le mānava, . . . ou te le faateaina lava la’u amio sao.”¹⁶ Ou te tatalo faamaulalo ia tatou faia faapea i le suafa o Iesu Keriso, lo tatou Alii, amene. ■

FAAMATALAGA

1. J. Reuben Clark Jr., *The Charted Course of the Church in Education*, rev. ed. (1994), 7.
2. Robert Louis Stevenson, i le Hal Urban, *Choices That Change Lives* (2006), 122.
3. Charles Swindoll, i le Urban, *Choices That Change Lives*, 122.
4. Jabari Parker, i le “10 Questions,” *Time*, Mar. 17, 2014, 76.
5. Tagai Tanielu 6.
6. Tagai Mosaea 11:20; 17:20.
7. Tagai Alema 53:20–21; 56.
8. Tagai Moronae 1–10.
9. Tagai *Autobiography of Parley P. Pratt*, ed. Parley P. Pratt Jr. (1938), 210–11.
10. Iosua 1:5, 9.
11. Roma 1:16.
12. 1 Timoteo 4:12.
13. Mataupu Faavae ma Feagaiga 107:99.
14. 1 Peteru 2:9.
15. Tagai Mataupu Faavae ma Feagaiga 105:11.
16. Iopu 27:3, 5.





Saunia e Peresitene Dieter F. Uchtdorf
Fesoasoani Lua i le Au Peresitene Sili

Ia Lotofaafetai i Soo Se Tulaga

Pe le o i ai ea ni mafuaaga ia i tatou e faatumulia ai i le lotofaafetai, e tusa lava po o a ni tulaga tatou te oo i ai?

I le gasologa o tausaga ua ou maua ai le avanoa paia e feiloai ai i le tele o tagata o o latou faanoanoaga ua foliga mai ua matua nutimomoia ai o latou agaga. I ia taimi, ou te faalogo atu ai i ou uso ma tuafafine ma faanoanoa faatasi ma i latou e tusa ma a latou avega. Ou te mafaufau loloto po o a ni mea e tau atu ia i latou, ma o le faigata ia ona iloa o le auala e faamafanafana ai ma lagolagoina i latou i o latou tofotofoga.

O le tele lava o lo latou faavauvau e mafua mai ua foliga atu ia i latou o se mutaaga. O nisi o loo feagai ma se mutaaga o se mafutaga faapelepele, e pei o le maliu o sē pele po o le nofo valavala ai ma se tasi o le aiga. O nisi e lagonaina ua feagai ma le mutaaga o le faamoemoe—o le faamoemoe o le faaipopo po o le faia o ni fanau po o le faatoilaloina o se gasegase. O isi atonu o loo feagai ma le mutaaga o lo latou faatuatua, pe a faasoosoina i latou e ni faatosinaga fenumiai ma feteenai i le lalolagi ia fesiligia ai, pe lafoaia ai foi mea na latou talitonu muamua i ai e moni.

Pe vave pe tuai foi, ou te talitonu

lava tatou te oo uma lava i ni taimi e pei ai ua sese ai mea uma i o tatou olaga, ma tuuatoatasi ai i tatou i le faanoanoa ma le fesetetai.

E mafai ona tupu i soo se tasi. E leai se tasi e puipuia mai ai.

E Mafai Ona Tatou Lotofaafetai

E eseese tulaga mo tagata uma, ma o auililiga o olaga taitasi e tulagaese. E ui i lea, ua ou aoaoina o loo i ai se mea na te aveesea le oona lea e ono oo mai i o tatou olaga. O loo i ai se mea e mafai ona tatou faia ina ia suamalie atili ai le olaga, olioli atili, e oo lava i le mamalu.

E mafai ona tatou lotofaafetai!

Atonu e feteenai ma le poto faalalolagi le fautuaina o se tasi o loo mamafatu i faanoanoaga e tatau ona faafetai atu i le Atua. Ae o i latou e tiaiina le fagu oona ae tago atu i le ipu o le lotofaafetai e mafai ona latou mauaina se vai faamamaina o le faamalologa, filemu, ma le malamalama.

I le avea ai ma soo o Keriso, ua poloaiina i tatou ia “faafetai atu i le Alii [lo tatou] Atua i mea uma,”¹ ia “pepese atu ia Ieova i le [faafetai],”²

ma ia “tuu [o tatou] loto ia tumu i le faafetai i le Atua.”³

Aisea ua poloaiina ai i tatou e le Atua ia lotofaafetai?

O Ana poloaiga uma ua tuuina mai ina ia maua ai o tatou faamanuiaga. O poloaiga o avanoa ia e faatino ai lo tatou faitalia ma ia maua ai faamanuiaga. Ua silafia e lo tatou Tama Faalelagi alofa e faapea o le filifili e atiae se agaga o le lotofaafetai o le a aumaia ai ia i tatou le olioli moni ma le fiafia sili.

Ia Lotofaafetai mo Mea [e Maua]

Ae atonu e faapea nisi, “Ou te lotofaafetai mo ni ā o lea e matua lofituina au i faafitauli?”

Masalo o le taulai atu mo mea tatou te lotofaafetai ai o le auala sese lea. E faigata ona atiae se agaga o le lotofaafetai pe afai e na o le pau le mea tatou te faafetai ai ua na o faamanuiaga e mafai ona tatou faitauina. E moni lava, e taua le “faitau soo o o tatou faamanuiaga”—ma e iloaina e soo se tasi na faataitaia lenei mea le tele o faamanuiaga—ae ou te le talitonu e faamoemoeina i tatou e le Alii ia tau lē faafetai i taimi o tofotofoga





Au Pulega Aooa ma Taitai Aooa o Le Ekalesia a Iesu Keriso o le Au Paia o Aso e Gata Ai

O LE AU PERESITENE SILI



Henry B. Eyring
Fesoasoani Muamua



Thomas S. Monson
Peresitene



Dieter F. Uchtdorf
Fesoasoani Iua

O LE KORAMA A APOSETOLO E TOASEFULULUA



Boyd K. Packer



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar



Quentin L. Cook



D. Todd Christofferson



Neil L. Andersen

O LE AU PERESITENE O FITUGAFULU



Ronald A. Rasband



L. Whitney Chynon



Donald L. Haldeman



Richard J. Maynes



Craig C. Christensen



Ulisses Soares



Lynn G. Robbins

O LE KORAMA MUAMUA A FITUGAFULU

(i le faasologa faaalatapeta)



Marcos A. Adlakaris



Jose L. Alonso



Carlos H. Amado



Ian S. Anders



Mervyn B. Arnold



David S. Baxter



Shayne M. Bowen



Craig A. Cantlon



Yoon Hwan Choi



Don R. Clarke



Carl B. Cook



Lawrence E. Conbridge



Wilfrid W. Andersen



Kocchi Aoyagi



Randall K. Bennett



Bruce A. Carlson



Claudio R. M. Costa



Leifrand R. Curtis, Jr.



Benjamin De Hoyos



Edward Dube



Kevin R. Duran



Larry J. Echio Hawk



Stanley G. Ellis



David F. Evans



Enrique R. Falabella



Eduardo Gonzalez



Robert C. Gay



Carlos A. Gobby



J. Dean Cornish



Timothy J. Dyckes



Bradley D. Foster



Randy D. Funk



Christoffa Golden



Gerrit W. Gong



Walter F. Gonzalez



C. Scott Gow



James J. Hamulo



Daniel L. Johnson



Paul V. Johnson



Patrick Kearon



Jörg Klasinger



Erich W. Kopschke



Marcus B. Nash



S. Gifford Nielsen



O. Vincent Haleck



Larry S. Kacher



Kevin S. Hamilton



Larry R. Lawrence



Brent H. Nelson



Allan F. Packer



Kevin W. Pearson



Anthony D. Perkins



Paul B. Pieper



Rafael E. Pino



Bruce D. Porter



Dale G. Rehund



Michael T. Ringwood



Joseph W. Sironi



Steven E. Snow



Michael John U. Teh



Per G. Mohm



Hugo E. Morinhez



James B. Morfino



Jairo Mazzagrandi



José A. Pelegrín



Juan A. Urdeto



Amulio Valenzuela



Francisco J. Vinas



William R. Walker



Scott D. Whiting



Chi Hong (Sam) Wong



Kazuhiko Yamashita



Jorge F. Zeballos



Claudio D. Zivic



W. Cong Zurick



Adrian Ochao



Gregory A. Schweitzer



Kent F. Richards



Terence M. Finson



Larry Y. Wilson

O LE AU EPIKOPO PULEFAAMALUMALU



Dem M. Davies
Fesoosani Muamua



Gary E. Stevenson
Epikopo Pulefaamalumalu



Gerold Cansé
Fesoosani Muamua



Gerold Cansé
Fesoosani Muamua



Tia R. Callister
Peselele



Devin G. Durrant
Fesoosani Loo



Carol F. McConkie
Fesoosani Muamua



Bonnie L. Osmond
Peselele



Neill F. Marriott
Fesoosani Loo



Carole M. Stephens
Fesoosani Muamua



Linda K. Burton
Peselele



Linda S. Reeves
Fesoosani Loo




Jean A. Stevens
Fesoosani Muamua



Rosemary M. Wixom
Peselele



Cheryl A. Esplin
Fesoosani Loo



Larry M. Gibson
Fesoosani Muamua



David L. Beck
Peselele



Randall L. Ridd
Fesoosani Loo

TAITAI AAOA

AUALOFA

TAMATAI TALAVOU

ALII TALAVOU



Sa potopoto leAu Paia o Aso e Gata Ai i le lalolagi atoa mo le Konafesi Aoao Faaletausaga lona 184. O ata e faasolo i le taumatau mai le agavale pito i luga, o tagata o le Ekalesia ma faifeautalai i Viena, Auseteria; São Paulo, Pasila; Aai o Mekisiko, Mekisiko; Ulaanbaatar, Monokolia; Highlands Ranch, Kolorato, ISA; Sini, Ausetalia; Saint Petersburg, Rusia; ma Norcross, Georgia, ISA.





nai lo taimi e tele ai a tatou mea ma faigofie le olaga. O le mea moni, o le tele o maufaasino e le o talanoa i le lotofaafetai *mo* ni mea ae ua fautua mai se agaga atoa po o se uiga o le lotofaafetai.

E faigofie le lotofaafetai *mo* ni mea pe a foliga mai ua sologa lelei le olaga. Ae faafefea taimi na pe a tatou le maua ai mea tatou te mananao i ai?

E mafai ona ou fautua atu ia tatou mafaufau i le lotofaafetai o se aga masani, o se ala o le olaga e tutoatasi e aunoa ma le aafia i ni tulaga tatou te oo i ai?” I se isi faaupuga, ou te fautua atu e faapea nai lo le “faafetai *mo* mea,” ia tatou taulai atu ia “faafetai *i o* tatou tulaga”—e tusa lava po o a na mea.

O loo i ai se tala ua leva o se ueita na fesili atu i se tagata faatau pe na fiafia i lana taumafataga. Sa tali mai le mālō sa lelei mea uma, ae semanu e lelei atu pe a na latou faateleina ni falaoa. O le aso na sosoo ai, ina ua toe foi atu le alii lea, sa faaluaina e le ueita le aofaiga o falaoa, ma tuu atu ai ia te ia ni fasi falaoa se fa i lo le lua, ae sa lei fiafia lava le tamaloa. O le aso na sosoo ai, na toe faaluaina ai foi e le ueita le falaoa, ae sa le faamanuiaina lava.

O le aso lona fa, sa naunau moni ai lava le ueita e faafiafia le tamaloa.

Ma o lea sa ia avatu ai le papa falaoa e iva futu (2.7-m) le umi, tipi lua, ma faatasi ai ma si ana ataata, sa ia tuu atu ai i le tagata lea. Sa matua naunau le ueita e fia vaai po o le a se tali mai a le tamaloa.

Ina ua maea le taumafataga, sa tepa atu le tamaloa i luga ma faapea atu, “O loo lelei lava e pei ona masani ai. Ae ou te vaai atu ua e toe foi lava i fasi falaoa e lua.”

Ia Lotofaafetai i o Tatou Tulaga

Uso e ma tuafafine pele, o tatou e faia filifiliga. E mafai ona tatou filifili e faatapulaa lo tatou lotofaafetai, e tusa ai ma faamanuiaga tatou te lagonaina ua le maua. Pe mafai foi ona tatou filifili ia pei o Nifae, o le sa le faavai-vai lona lotofaafetai. Ina ua saisai o ia e ona uso i luga o le vaa—lea sa ia fauina e ave ai i latou i le nuu folafolaina—sa matua tiga lava ona tapuvae ma tapulima “sa fulafula tetele lava” faapea ai ma se matagi malosi na taufaamatauina le tofatumoanaina o ia i le loloto o le sami. “E ui i lea,” sa fai mai Nifae, “Sa ou tepa taulai a’e i lo’u Atua, ma sa ou viia o ia i le aso atoa; ma sa ou le muimui e faasaga i le Alii ona o o’u puapuaga.”⁴

E mafai ona tatou filifili ia pei o

Iopu, o le na foliga mai na i ai mea uma ae na toe maumau uma. Ae sa tali atu lava Iopu i le faapea atu, “Na ou sau le lavalava mai le manava o lo’u tina, o le a ou foi atu . . . [ma le] le lavalava; na foaiina mai e Ieova, ua aveeseina foi e Ieova; ia faamanuina le suafa o Ieova.”⁵

E mafai ona tatou filifili ia pei o paionia Mamona, o e na faatumauina se agaga o le lotofaafetai i le taimi o la latou malaga telegese ma mafatia sa agai atu i le vanu Tele o Sate Leki, e oo lava i pesega ma siva ma viiga i le lelei o le Atua.⁶ O le toatele o i tatou [pe ana ō ai] semanu e lagonaina le le fiafia, faitio, ma le faalogologotiga i faigata o le malaga.

E mafai ona tatou filifili e pei o le Perofeta o Iosefa Samita, o lē a o avea ma se pagota i tulaga faanoanoa i le Falepuipei o Lipereti, na tusiaina nei upu musuia: “Le au uso pele e, ia tatou faia ai ma le fiafia mea uma ua i ai lo tatou mana; ona mafai lea ona tatou tutu ma le mautinoa atoatoa, e vaai i le faaolataga a le Atua, ma mo lona aao e faaali mai.”⁷

E mafai ona tatou filifili ina ia lotofaafetai, e tusa lava po o le a.

O lenei ituaiga o lotofaafetai e mafai ona i ai i soo se taimi e tusa

lava po o le a le mea o tupu i o tatou talaane. E sili atu i lo le ita, lotovaivai, ma le faanoanoa. E fuga pea ma le matagofie i taimi e sou ai le tai faapena foi ma le taimi e malū ai.

A tatou lotofaafetai i le Atua *i o* tatou tulaga, e mafai ona tatou lagonaina le filemu toafimalie i le lotolotoi o faigata. I taimi o faanoanoaga, e mafai lava ona sii ae o tatou loto i viiga. I o tatou tiga, e mafai lava ona tatou viia le Togiola a Keriso. A tatou lagonaina le matuitui o tiga, e mafai lava ona tatou lagonaina le mafanafana ma le filemu o le pa'i mai o le lagi.

O nisi taimi tatou te manatu ai o le lotofaafetai o le mea lea tatou te faia pe a *mavae* ona foia o tatou faafitauli, ae e papa'u tele lena manatu. E tele naua mea tatou te misia o le olaga pe a tatou faatalitali ia vaai atu i se nuanua a o lei faafetai atu i le Atua mo le timu?

O le lotofaafetai i taimi o le faanoanoa e *le faapea* ua tatou fiafia ai i o tatou tulaga. E *le faapea* foi o le a faaoga ai lo tatou faatuatua e faapasi ai la tatou vaai i o tatou luitau o loo i ai i lena taimi.



Raymond, Alberta, Kanada



E le o le lotofaafetai lenei ua na o laugutu ae o le agaga. O se lotofaafetai lea e faamaloloina ai o tatou lagona tiga ma musuia ai o tatou mafaufau.

O Le Lotofaafetai o se Faatinoga o le Faatuatua

O le lotofaafetai *i o* tatou tulaga o se faatinoga o le faatuatua i le Atua. E manaomia ai lo tatou faatuatua o le Atua ma le faamoemoe mo mea e le o mafai ona tatou vaaia ae ua moni.⁸ E ala i le lotofaafetai, tatou te mulimuli ai i le faaitaiga o lo tatou Faaola pele, lea na fetalai mai, “Ia aua ne’i faia lo’u loto, a o lou finagalo.”⁹

O le lotofaafetai moni o se faailoaga lea o le faamoemoe *ma le* molimau. E sau mai le faailoaina atu tatou te le malamalama i taimi uma i tofotofoga o le olaga ae faatuatua lava o le a i ai se aso tatou te malamalama ai.

I soo se tulaga lava, o lo tatou lagonaina o le lotofaafetai e faafailleina i le tele o upumoni paia tatou *te* iloaina: e faapea ua tuu mai e lo tatou Tama i Ana fanau le fuafuaga sili o le fiafia, e auala mai i le Togiola a Lona Alo, o Iesu Keriso, e mafai ona tatou ola ai e faavavau faatasi ma e pele ia i tatou; ma i le iuga, o le a tatou mauaina ni tino mamalu, atoatoa, ma ola pea, ua le toe mafatia i ma’i ma le atoatoa; ma o le a suitulagaina o tatou loimata o le faanoanoa i le anoanoai o le fiafia ma le olioli, “le fua lelei, e lolomi ma luluina, e tumu ma [taumasuasua].”¹⁰

Masalo e tai faapea se ituaiga o molimau na liua ai Aposetolo a le

Faaola mai ni alii matata’u ma masalosalo, i ni avefau totoa ma olioli a le Matai. I ni nai itula na sosoo ai ma Lona faasatauroga, sa lofituina i latou i le faanoanoa ma le faavavau, na le mafai ai ona malamalama i le mea faatoa tupu. Ae tasi lava le mea na tupu na suia uma ai na mea. Na faaali atu lo latou Alii ia i latou ma tautino atu, “Ia outou vaavaai mai i o’u lima ma o’u vae, aua o a’u lava lenei.”¹¹

Ina ua iloaina e le au Aposetolo le Keriso toetu—ina ua latou vaai i le toetu mamalu o lo latou Faaola pele—na avea i latou ma ni tamalii uiga ese. Sa leai ma se mea na taofia i latou mai le faataunuaina o la latou misiona. Sa latou taliaina ma le lototele ma le nautai le sauaina, faamaasia, e oo lava i le oti lea o le a oo atu ia i latou ona o la latou molimau.¹² Sa lei taofia i latou mai le vivii atu ma le auauna atu i lo latou Alii. Sa latou suia ai olaga o tagata i soo se mea. Sa latou suia ai le lalolagi.

E le manaomia ona e vaai i le Faaola, e pei ona vaai ai le au Aposetolo, ina ia oo ai i sea liua lava e tasi. O lau molimau ia Keriso, lea e fanau mai i le Agaga Paia, e mafai ona fesoasoani ia te oe ia laaloa ai lau vaai i taunuuga lē fiafia i le olaga faaletino ae vaai atu i le lumanai manuia lea ua uma ona saunia e le Togiola o le lalolagi.

E Le i Foafoaina i Tatou mo ni Mutaaga

E tusa ai ma mea ua tatou malamalama i ai e faatatau i lo tatou taunuuga e faavavau, ua manino ai o soo se taimi

lava tatou te fetai ai ma ni taunuuga oona o le olaga, e foliga mai lava tatou te le taliaina. E foliga mai o loo i ai se mea i o tatou loto o loo teenaina ia taunuuga.

Aisea e tupu ai lenei mea? Ona ua faia i tatou i elemene o le faavavau. O i tatou o tagata faavavau, o fanau o le Atua Silisiliese, o lona suafa e le Gata¹³ ma o le ua folafolaina mai faamanu-ia e faavavau e le mafaitaulia. O mutaaga e le o lo tatou taunuuga lena.

O le faatele ona tatou aoao e uiga i le talalelei a Iesu Keriso, o le faatele foi lena ona tatou iloaina o mutaaga iinei i le olaga faaletino e le o mutaaga ia o mea uma. O na mea ua na o ni mea faalavafau—o taofiga le tumau ia o le a i ai se aso e foliga ai e faatauva pe a faatusatusa atu i le olioli e faavavau o loo faatalitali mai mo e faamaoni.

Ou te matua faafetai lava i lou Tama Faalelagi ona i Lana fuafuaga e le o i ai

ni mutaaga le moni, ua na o ni amataga e leai se iuga.

O i Latou e Lotofaafetai O Le A Faamamaluina

Uso e ma tuafafine, pe le o i ai ea ni mafuaaga ia i tatou e faatumulia ai i le lotofaafetai, e tusa lava po o a ni tulaga tatou te oo i ai?

Tatou te manaomia ea se isi mafuaaga sili atu ia tuu atu ai o tatou loto “ia tumu i le faafetai i le Atua?”¹⁴

“Pe le o ia i tatou ea se mafuaaga sili tatou te olioli ai?”¹⁵

E matua faamanuiaina lava i tatou pe a tatou faailoaina galuega alofilima o le Atua i o tatou olaga ofoofogia. O le lotofaafetai i lo tatou Tama i le Lagi e faalauteleina ai la tatou vaai ma manino ai lo tatou malamalama. Na te musuia-ina le lotomaulalo ma faafaileleina le tigaalofa i o tatou uso a tagata faapea ai ma foafoaga uma a le Atua. O le

lotofaafetai o se vaega taua o uiga paia uma faaKeriso! O le lotofaafetai o le tina lea o amioga mama uma.¹⁶

Ua tuuina mai e le Alii ia i tatou Lana folafolaga e faapea o i latou “o [e] e taliaina mea uma ma le faafetai o le a *faamamaluina*; ma o mea o le lalolagi lenei o le a faaopoopoina ia te [i latou], i le sautuaselau lava, ioe, e sili atu.”¹⁷

Tau ina tatou “ola i le faafetai i aso uma”¹⁸—aemaise lava i taimi ua foliga mai ai ua oo mai mutaaga le mafaamatalaina o vaega o le olaga faaletino. Tau ina ia tatou faatagaina o tatou agaga ia faatumuina i le faafetai i lo tatou Tama Faalelagi alofa mutimutivale. Tau ina ia tatou sii atu e le aunoa o tatou leo ma faaali atu i upu ma galuega lo tatou lotofaafetai i lo tatou Tama i le Lagi ma Lona Alo Pele, o Iesu Keriso. Ou te tatalo ai, ma tuu atu ai lau molimau ma faamanuia, i le suafa o lo tatou Matai, o Iesu Keriso, amene. ■

FAAMATALAGA

1. Mataupu Faavae ma Feagaiga 59:7; tagai foi Efeso 5:20; 1 Tesalonia 5:18; Mosaea 26:39; Alema 7:23; Mataupu Faavae ma Feagaiga 98:1.
2. Salamo 147:7.
3. Alema 37:37.
4. Tagai 1 Nifae 18:10–16.
5. Iopu 1:21.
6. Mo ni faaitaiga o paionia sa faatumuina se uiga fiafia e ui lava i faigata matuia, tagai i le Andrew D. Olsen, *The Price We Paid: The Extraordinary Story of the Willie and Martin Handcart Pioneers* (2006), 10, 366–67.
7. Mataupu Faavae ma Feagaiga 123:17.
8. Tagai Alema 32:21.
9. Luka 22:42.
10. Luka 6:38.
11. Luka 24:39.
12. Tagai Roma 5:3; 2 Korinito 4:17; 12:10.
13. Tagai Mose 1:3.
14. Alema 37:37.
15. Alema 26:13.
16. Tagai Marcus Tullius Cicero, *Oratio Pro Cnaeo Plancio*, XXXIII, section 80; o loo ta'ua i totonu o le saunoaga a Joseph B. Wirthlin, “Live in Thanksgiving Daily,” *Ensign*, Sept. 2001, 8.
17. Mataupu Faavae ma Feagaiga 78:19; faaopoopo le faamamafa.
18. Alema 34:38.





Saunia e Elder M. Russell Ballard

○ Le Korama a Aposetolo e Toasefululua

Toe Tullitatao

Ia tatou aafia uma sili atu i taimi uma i le galuega faafai feautalai e ala i le suitulagaina o lo tatou feje i le faatuatua.

E atoa ia Setema nei, le ono sefulufa tausaga talu ona ou foi mai la'u misiona i Egelani. E tolu aso talu ona ou foi mai, ae ou auai i se siva Faafeiloai i le Iunivesite o Iuta faatasi ma sa'u uo. Sa ia faamatala mai ia te au se tamaitai lalelei ua lua ona tausaga i le iunivesite e igoa ia Barbara Bowen, o le na ia manatu e tatau ona ou feiloai i ai. Sa ia aumai o ia ma ma feiloai, ma amata loa ona ma sisiva.

Ae paga lea, o le siva lea sa matou ta'ua o le "siva eu," o lona uiga e te siva ma se teine seia oo ina eu pe pōpō mai oe e se isi tagata e fia siva i le teine. Sa tiotio ma lauiloa tele Barbara, o lea sa le'i atoa ai se minute na ma sisiva ai ae eu mai a'u e se isi alii talavou.

Sa lei taliaina lena mea i lo'u mafau-fau. I le aoaoina ai o le taua o le toe tullitatao i la'u misiona, sa ou maua ai le numera o lana telefoni ma valaau i ai i le aso na sosoo ai mo se ma tafaoga faamasani, ae sa pisi tele o ia i le aoga ma isi fegalegaleaiga ma uo. E faafetai ai, i la'u misiona mo le aoaoina o au ina ia finau pea e tusa lava pe ua oo mai le lotovaivai, ma sa iu ai lava ina ma tafafao faamasani. Ma o lena tafaoga na sosoo ai ma isi tafaoga faamasani. Masalo o taimi o na tafaoga faamasani sa mafai ai ona ou faatalitonuina o ia ua na o au lava le faifeautalai ua foi mai

le misiona e moni ma le ola—e agavaa mo ia. O le taimi nei, i le 64 tausaga mulimuli ane, ua toafitu le fanau, ma le toatele o fanau a fanau iti ua avea ma faamaoniga o le upumoni taua e faapea, e tusa lava po o le a le lelei i fea o lau savali, e le mafai lava ona e faatalitonuina se tasi e aunoa ma le tinoū e tullitatao pea.

Atonu o le mafuaaga lea ua ou lagonaina ai se unaiga manino ina ia toe tullitatao i le asō ni savali se lua o a'u savali o konafesi aoao talu ai nei.

I le konafesi ia Oketopa 2011, sa ou augani atu ai ina ia tatou manatuaina le fetalaiga taua lena i le Alii: "Aua o le a faapea ona ta'ua o la'u ekalesia i aso e gata ai, O Le Ekalesia a Iesu Keriso o le Au Paia o Aso e Gata Ai."¹

I lena fetalaiga, ua faamanino mai ai e le Alii e le gata o le faalagiga aloaia lea ae o le igoa foi lea e ao ona valaauina ai Lana Ekalesia. E tusa ai ma Lana tautinoga manino, e le tatau la ona tatou faasino atu i le Ekalesia i se isi lava igoa, e pei o le "Lotu Mamona" po o le "Ekalesia AAG."

O le upu *Mamona* e mafai ona faa-aogaina ma le talafeagai i nisi o tusiga e faasino lea i tagata o le Ekalesia, e pei o paionia Mamona, po o faalapotopotoga, e pei o le Aufaipese a le Tapenekō Mamona. Ua lauiloa tagata

o le Ekalesia o Mamona, ma i fegalegaleaiga ma i latou e le o nisi o lo tatou faatuatua, atonu e talafeagai lo tatou faasino ia i tatou lava o ni Mamona, pe a tatou tuu faatasia lea faamatalaga ma le igoa atoa o le Ekalesia.

Afai e aoao tagata ia faaaoga le igoa sa'o o le Ekalesia e fesootai ma le upu *Mamona*, o le a faamamafaina ai o i tatou o Kerisiano, o tagata o le Ekalesia a le Faaola.

Uso e ma tuafafine, sei o tatou toe tullitatao ma atiae le mausa o le faamamamano atili i taimi uma tatou te auai i Le Ekalesia a Iesu Keriso o le Au Paia o Aso e Gata Ai.

O le savali lona lua ua ou lagona e tatau ona ou toe tullitatao ina lea sa tuu atu i le konafesi aoao na sei mavae atu nei, ina ua ou unaia tagata ia tatalo ina ia taitai atu i se tagata se toatasi o se e mafai ona tuu atu i ai se valaaulia e aoao i le talalelei toefuataiina a o lei oo i le Kerisimasi. E toatele tagata o le Ekalesia na faasoaina mai ia te au nisi o aafiaga faapitoa ona o se taunuuga o lo latou ole atu i le Alii mo ni avanoa faafai feautalai.

Mo se faaitaitaiga, e tasi se faifeautalai ua foi mai le misiona, na tatalo faapitoa ina ia taitai atu "i le tasi" e mafai ona ia aapa atu i ai. Sa oo atu i lona mafaufau le igoa o se uo sa la aoga muamua. Sa ia maua se fesootaiga ma ia i le Facebook, ma ia iloa ai sa tatalo lea tamaitai mo se faamoemoega ma le uiga o lona olaga. Sa ia tullitatao tonu lava i le taimi sa saili ai lea tamaitai mo le upumoni, ma papatiso ai o ia ia Tesema.

Sa tele ni valaaulia faapea na lipoti mai ia te au, ae toalaiti lava i latou na toe tullitatao ina e pei ona faia e lea uso.

O au o se tagata e talitono tele i le mataupu faavae o le tullitatao. E pei ona ta'ua i totonu o le taiala a faifeautalai o le *Tala'i La'u Talalelei*, "o le tuuina atu o se valaaulia e aunoa ma

le tulitatao e pei lava o le amataina o se malaga e aunoa ma le faamaeaina po o le faatau o se pepa ulufale i se konaseti e aunoa ma le alu i totonu o le fale matamata. A aunoa ma le faatinoga e faamaea ai, ua leai lava se aoga o le tautinoga.”²

Ua aoao e le *Tala'i La'u Talalelei* ia tagata uma i le auala e le gata e valaaulia ai ae faapena foi ona tulitatao ai a tatou valaaulia. O le faamoemoe o le galuega faafaifeautalai o loo faauigaina o le valaauliaina o “isi e o mai ia Keriso e ala i le fesoasoani atu ia i latou ia maua le talalelei toefuataina e ala i le faatuatua ia Iesu Keriso ma Lana Togiola, salamo, papatisoga, mauaina o le meaalofa o le Agaga Paia, ma tumau e oo i le iuga.”³

O le valaauliaina e mautinoa lava o se vaega o le faagasologa. Ae ia matauina e tele lava isi mea e faatatau i le galuega faafaifeautalai mo tagata o le Ekalesia nai lo le tau na ona tuu atu o valaaulia i tagata e faalogologo ai i faifeautalai. O loo aofia ai foi ma le tulitatao o faifeautalai i le atiaeina o le faatuatua, le faaosofia o le salamo, ma sauniuniga mo le osiaina o feagaiga, ma le tumau e oo i le iuga.

O lenei mataupu faavae o le tulitatao o loo faaalua i le tusi o Galuega:

“Ua o ae faatasi Peteru ma Ioane i le malumalu. . . .

“Ua ave foi le tasi tagata ua pipili talu ina fanau mai, ua tuuina ifo o ia e i latou i aso fai soo i le faitotoa o le malumalu ua igoa i le Matagofie, e faatoga atu i se mea alofa i e ulu atu i le malumalu;

“Ua iloa mai e ia o Peteru ma Ioane a ulu atu i le malumalu, ona faatoga lea o ia i se mea alofa.

“Ona pulatoa lea o Peteru ma Ioane ia te ia, ua faapea atu, Vaai mai ia ia te i maua.

“Ona naunau mai lea o ia ia te i laua, fā'i e maua se mea mai ia te i laua.



“Ona fai atu lea o Peteru, E leai sa'u ario po o sa'u auro; a o le mea ua ia te au, ou te avatu lea ia te oe, O le suafa o Iesu Keriso o le Nasareta, ina tu ai ia i luga, ina savali.”

O se valaaulia mamana tele lena mai se auauna a le Alii a ea? Ae sa lei uma ai i le valaaulia le galuega a Peteru. O le faamatalaga a le mau e sosoo ai o loo ta'u mai ai ia i tatou e faapea “*ua tago atu foi o ia i lona lima taumatau, ua faatu ia te ia i luga*: ona faamalosiā loa lea o ona vae ma ponaponāvae.

“Ua oso ia i luga ma tu, ua savali foi, *ua ulu faatasi foi ma i laua i le malumalu*, o loo savali ia, ma oso, ma vivii atu i le Atua.”⁴

I se isi faaupuga, sa lei tau na ona faaoga e Peteru lona pule o le perisitua ma valaaulia le tagata lea e tu i luga ma savali. Sa ia toe tulitatao

foi lana valaaulia e ala i le aapa atu i le tagata lea, ma uu lona lima taumatau, sii o ia i luga, ma la savavali faatasi ma ia i totonu o le malumalu.

E tusa ai ma le agaga o le faaitaiga a Peteru, e mafai ona ou fautua atu ina ia tatou aafia uma sili atu i taimi uma i le galuega faafaifeautalai e ala i le suitulagaina o lo tatou fefe i le faatuatua, ma valaaulia se tasi ia le itiiti ifo ma le faatasi i le kuata—pe faafa i tausaga uma—ina ia aooina e faifeautalai faamisiona. Ua saunia [faifeautalai] e aoao atu i le Agaga faatasi ma musumusuga faamaoni loloto mai le Alii. E mafai ona tatou tulitatao faatasi i a tatou valaaulia, ma uu mai lima o isi, sii i latou i luga ma savavali faatasi ma i latou i la latou malaga faaleagaga.

Ina ia fesoasoani ia oe i lenei faagasologa, ou te valaaulia tagata uma,

e tusa lava po o le a sou tofiga o i ai i le taimi nei po o le a foi le tulaga o lou toaga i le Lotu, ia maua se kopi o le *Tala'i La'u Talalelei*. O loo maua i a tatou faletusi ma i luga foi o le initoneti. O le kopi i luga o le initoneti e mafai ona faitau i ai pe siina mai e aunoa ma se tau. O se tusitaiala mo le galuega faafaifeautalai—o lona uiga o se tusitaiala mo i tatou uma. Faitau i ai, suesue i ai, ona faaaoga lea o mea e te aoaoina e fesoasoani ai ia te oe ia malamalama ai i le auala e aumai ai agaga ia Keriso e ala i valaaulia ma tulitatao. E pei ona saunoa ia Peresitene Thomas S. Monson, “O le taimi lenei mo tagata o le ekalesia ma faifeautalai e o mai faatasi ai, ma galulue faatasi, e galueaiina le tovine a le Alii ina ia aumai agaga ia te Ia.”⁵

Na aoao atu e Iesu Keriso Ona soo:
 “E tele le saito e seleseleina, a o le au fai galuega e toaititi ia;
 “O lea ia outou aioi atu ai i le Alii



e ana le saito e seleseleina, ina ia aauina mai e ia ni e galulue i lana saito e seleseleina.”⁶

Ua tali e le Alii lena tatalo i o tatou aso i se aofaiga ua sili ona toatele o faifeautalai faamisiona i le talafaasolopito o le lalolagi. Faatasi ai ma lenei faatelega fou o le afaigaluega faamaoni, ua tuu mai ai foi e le Alii ia i tatou se isi avanoa e fesoasoani ai ia te Ia i lena seleselega tele o agaga.

O loo i ai ni auala aoga mo le au paia e fesoasoani ai ma lagolagoina a tatou faifeautalai maoae. Mo se faataiga, e mafai ona e ta'u atu i faifeautalai o loo e suesueina le *Tala'i La'u Talalelei* ma fai atu ia i latou e faaali mai ia te oe mea o loo la aoaoina i a la suesuega. A o outou feafaasoai i le tasi ma le isi, o le a mautinoa lava le atiaeina o se talitonuga faateleina i le va o le au paia ma faifeautalai faamisiona, e pei lava ona poloaiina e le Alii:

“Ae ia mafai e tagata taitoatasi [ma tamaitai] ona tautala i le suafa o le Atua le Alii, le Faola lea o le lalolagi.”⁷

Ma, “Faauta, na Ou auina atu outou e molimau ma lapatai atu i tagata, ma ua tatau i tagata taitoatasi o e ua uma ona lapataia ona lapatai atu i le la te tuaoi.”⁸

Uso e ma tuafafine, e mafai ona e mafaufauina le aafiaga pe a faaaofia e aiga ma uo ni mea o loo latou aoaoina mai a latou suesuega faaletagata lava ia o le *Tala'i La'u Talalelei* i a latou tusi ma imeli e avatu i a latou faifeautalai faamisiona? E mafai ona e mafaufauina ia faamanuiaga o le a oo mai i aiga pe

a latou iloa ma malamalama atili i mea o le a suesueina ma aoaoina e o latou atalii ma afafine i a latou misiona? E mafai ea ona e amata malamalama i faamanuiaga tulagaese o le alofa tunoa togiola tatou te maua, o ni tagata taitoatasi ma se [au paia atoa], e tusa ma le folafolaga a le Faaola i tagata uma o loo tauaveina se molimau i le faagasologa o le valaauliaina o agaga ia o mai ia te Ia—ona toe tulitatao lea o na valaaulia?

“Ua faamanuiaina outou,” na fetalai mai ai le Alii e auala mai i le Perofeta o Iosefa Samita, “ona o le molimau na outou tuu atu ua tusi faamaumau i le lagi mo agelu e vaai i ai; ma ua latou olioli i luga o outou, ma ua faamagaloina a outou agasala mai ia te outou.”⁹

“Aua o le a Ou faamagaloina outou ia outou agasala ma le poloaiga lenei—ia outou tutumau-mausali . . . i le tuuina atu o le molimau i le lalolagi atoa e uiga i mea na ua ta'u atu ia te outou.”¹⁰

Afai e tatou te tulitataoina, o le a fesoasoani moni le Alii ia i tatou. Ua ou vaai i le olioli le mafaamatalaina lea e o mai faatasi ma valaaulia e musuia e se molimau atoa ai ma tulitatao faamaoni i tagata o le Ekalesia i le lalolagi atoa. A o ou i ai talu ai nei i Atenitina, sa ou uunaia ai le au paia ia valaaulia se tasi i le lotu a o lei oo i le konafesi aoao lenei. Sa faalogo se tamaitiiti e valu tausaga e igoa ia Joshua ma valaaulia lana uo mamea ma le aiga o lana uo i se fale tatala i lo latou uarota i Buenos Aires. Sei ou faitau atu mai se tusi faatoa ou mauaina o loo faamatalaina ai le valaaulia a

Joshua ma lana tulitatao faamaoni:

“Toetoe lava o minute uma e tamoe atu ai [Joshua] i le faitotoa e vaai pe ua latou o mai. Sa ia fai mai na te iloaina lava o le a latou [o mai].

“Ua mavae le afiafi ae lei alu atu le uo a Joshua, ae sa lei faavaivai ai Joshua. Sa ia siaki lava ma le faatua-tua le faitotoa i luma toetiiti o minute uma. Na oo mai le taimi e amata ai ona tapena ese mea ae amata ona tuu puna i luga Joshua ma faasilasila mai, ‘O lea ua o mai! Ua o mai!’ Sa ou tepa ae i luga ma vaaia ai se aiga atoa ua latalata mai i le falesa. Sa tamoe atu i fafo Joshua ma faafeiloai i latou ma fusi i lana uo. Sa latou o mai uma i totonu ma sa foliga na latou fiala tele i le fale tatala. Sa latou aveina ni tamaitusi ma faaalu le tele o le taimi e faamasani ai ma nisi o uo fou. Sa maoae le vaaia o le faatuatua o lenei tamaitiiti laitiiti ma iloa e mafai foi ona avea tamaiti Peraimeri ma ni faifeautalai.”¹¹

O lau molimau lea a o tatou galulue faatasi, i le sailia o le tasi, valaaulia, ma tulitatao faatasi ma le faatuatua ma le faatuatua, o le a ataata mai le Alii i o tatou luga ma le faitau selau o afe o fanau a le Atua o le a maua le faamoemoe ma le filemu i Le Ekalesia a Iesu Keriso o le Au Paia o Aso e Gata Ai. Tau ina ia faamanuiaina i tatou uma e le Alii i a tatou taumafaiga ia faanatinati le galuega o le faaolataga, ou te tatalo faamaualalo ai i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 115:4.
2. *Tala'i La'u Talalelei: O Se Taiala mo le Galuega Faafai'feautalai* (2004), 200.
3. *Tala'i La'u Talalelei*, 1.
4. Galuega 3:1–8; faaopoopo le faamamafa.
5. Thomas S. Monson, “Susū Maia i le Kona-fesi,” *Liahona*, Nov. 2013, 4.
6. Mataio 9:37–38.
7. Mataupu Faavae ma Feagaiga 1:20.
8. Mataupu Faavae ma Feagaiga 88:81.
9. Mataupu Faavae ma Feagaiga 62:3.
10. Mataupu Faavae ma Feagaiga 84:61.
11. Tusi patino, Mat. 10, 2014.



Saunia e Jean A. Stevens

Fesoasoani Muamua i le Au Peresitene Aoao o le Peraimeri

“Aua Le Fefe; Ou Te Ia Te Oe”

Pe a tatou atiina ae le faatuatua sili ma le faalagolago i le Alii, e mafai ona tatou mauaina Lona mana e faamanuia ma laveai ai i tatou.

E itiiti ni nai lagona e faatusatusa i lagona agaalofa o le avea ai ma ni matua. E lei se mea e suamalie atu nai lo le mauaina o se pepe faapelepele, e tuusa'o mai le lagi. Sa o'o se tasi o o'u tuagane i lenei faalogona i se auala sili ona ootia. O lona atalii muamua laitiiti sa fanau e lei o'o i le taimi e tatau ai ma o lona mamafa sa na o le 2 pauna 14 aunese (1.3 kg). Sa faaaluina e Hunter ona uluai masina e lua i le potu tigaina mo pepe faatoa fananau mai i le falemai. O nā masina sa avea ma taimi faamomoloto mo le aiga atoa a o matou faamoemoe ma faatoga atu i le Alii mo Lana fesoasoani.

Sa manaomia e Hunter le Itiiti le tele o le fesoasoani. Sa tauivi o ia e maua le malosi e mafai ai ona ola. E masani ona aapa atu le lima malosi o lona tama agaalofa i le lima itiiti o lona atalii e faamalosi i lona atalii vaivai.

Ma e faapena foi mo fanau uma a le Atua. E aapa mai lo tatou Tama i le Lagi ia i tatou taitoatasi i Lona alofa lemafuaia. E ia te Ia le mana i mea uma ma e finagalo e fesoasoani ia i tatou ia aoao, tuputupuae, ma toe foi atu ia te Ia. E faamatalaina e lenei mea le faamoemoe o lo tatou Tama: “ia

aumaia le tino ola pea ma le ola faava-vau o le tagata.”¹

Pe a tatou atiina ae le faatuatua sili ma le faalagolago i le Alii, e mafai ona tatou mauaina Lona mana e faamanuia ma laveai ai i tatou.

O loo lalagaina e le Tusi a Mamona lenei autu matagofie o le laveaiina o Lana fanau e le mana o le Alii i ona itulau uma. Na folasia mai e Nifae i le mataupu muamua lava o le tusi. I le fuaiupu e 20, tatou te faitau ai, “Faauta, o a'u, o Nifae, o le a ou faaali atu ia te outou le i ai o le alofa mutimutivale agamalua o le Alii i luga o i latou uma o e ua ia filifilia, ona o lo latou faatuatua, e faamalolosi tele ai i latou e oo lava i le mana e laveaiina ai.”²

I le tele o tausaga ua mavae, na ou iloa i se tulaga patino tele ia upumoni na faamatalaina i lenei fuaiupu. Na ou iloa ai le moni o le latalata mai o lo tatou Tama i le Lagi ma le tele o Lona finagalo e fesoasoani ia i tatou.

I se tasi o afiafi a o fotu mai le pogisa, sa matou tietie atu ai ma lau fanau ae ou matauina ai se tamaitiiti o loo savali na o ia i le auala. Ina ua matou pasia o ia, sa ou maua se uuniga uiga ese e tatau ona ou toe foi i tua



ma fesoasoani ia te ia. Ae o le popole ina ne'i fefe o ia po o ai sea tagata ese e tu atu ia te ia i le po, o lea sa faaauau ai ona ou aveina le taavale. Sa toe o'o mai le uunaiga malosi faatasi ma upu i lou mafaufau: "Alu e fesoasoani i lena tamaitiiti!"

Sa ou toe liliu atu i tua ia te ia ma fesili i ai, "E te manaomia se fesoasoani? Sa ou maua se lagona e tatau ona ou fesoasoani ia te oe."

Sa ia savali mai ia i matou ma loimata o loo tafe ifo i ona alafau ma faapea mai, "Ioe! Sa ou tatalo ia i ai se tasi o le a fesoasoani mai ia te au."

O lana tatalo mo se fesoasoani sa taliina i le musumusuga na o'o mai ia te au. O lenei aafiaga o le mauaina o lea ituaiga o taitaiga manino mai le Agaga na tuua ai se lagona e le mafaagaloina o loo i ai pea i lou loto.

Ma o le taimi lenei i le mavae ai o le 25 tausaga ma e auala atu i le alofa mutimutivale agamalu, sa ma toe fesootai ai ma lenei tamaitiiti mo le taimi muamua i nai masina talu ai. Sa ou iloa ina o lena aafiaga sa le na o sa'u tala—o lana tala foi. Ua avea nei Deric Nance o se tamā ma ua fai foi lona lava aiga. E le galo foi ia te ia lenei aafiaga. Na fesoasoani ia i maua e faataatia se faavae o le faatuatua e faafogaina ma tali mai le Atua i a tatou tatalo. Ua ma faaaogaina uma [lenei aafiaga] e aoao ai la maua fanau o loo leoleoina i tatou e le Atua. E le o tuulafoaiina i tatou.

I lena po, sa nofo ai Deric ina ua tuua le aoga mo se gaoioiga ma sa misia ai le pasi mulimuli. I le avea ai ma se talavou, sa ia lagona ma le maotino e mafai lava ona ia oo i le fale, o lea sa amata ai ona ia savali.

Sa te'a le itula ma le afa ae o loo ia savali pea i le auala na o ia. O le mamao mai le aiga, ma le leai o ni fale e iloa atu, sa fefe ai o ia. I le faanoanoa, sa ia savali ai i tua o se faaputuga iliili, sa ia tootuli ai, ma ole atu i le Tama Faalelagi mo se fesoasoani. I nai minute talu ona toefoi ane Deric i luga o le auala, sa ou tu ai e tuuina atu le fesoasoani mo lana tatalo.

Ma i nei tausaga e tele mulimuli ane, ua manatua nei e Deric: "Sa mafaufau le Alii ia te au, o se alii pa'e'e ma lē saunia. Ma e tusa lava po o a isi mea o loo tutupu i le lalolagi, sa Ia silafia lo'u tulaga ma lava lona alofa mo au e auina mai ai le fesoasoani. O loo taliina lava e le Alii au tatalo i le tele o taimi talu mai lena auala tele tuulafoaiina. O Ana tali e le vave ma manino i taimi uma, ae o Lona mafaufau ia te au ua tutusa lava le manino i le taimi nei e pei ona sa i ai i lena po tuuatoatasi. Pe a ou lagona le mamafatu i mea o le lalolagi, ou te iloa o loo ia te Ia i taimi uma se fuafuaga e silafia ai ua ou toe taunuu ma le saogalemu i le aiga."

E pei lava ona faaalua e Deric, e le o tatalo uma e vave ona taliina. Ae e moni e silafia i tatou e lo tatou Tama ma e faafogoga i aioiga o o tatou loto. Na te faataunuuina Ana vavega i le tatalo e tasi i le taimi, i le tagata e toatasi i le taimi.

E mafai ona tatou faatuatua ina o le a Ia fesoasoani mai ia i tatou, e le o le auala moni tatou te mananao ai ae i le auala o le a sili ai ona fesoasoani ia i tatou ia tuputupu ae ai. O le tuuina atu o tatou loto i Lona finagalo e ono faigata, ae e taua i le avea ai e faapei

o Ia ma le mauaina o le filemu ua Ia ofoina mai ia i tatou.

E mafai ona tatou lagonaina, e pei ona faamatalaina e C. S. Lewis: "Ou te tatalo ona e le mafai ona ou faamalaina o'u lava manaoga. . . . Ou te tatalo ona ou te lagona le manaomia i taimi uma e ala ai ma moe ai. E le suia ai le Atua. E suia ai au."³

E tele tala i tusitusiga paia e uiga ia i latou o e tuu atu lo latou faalagolago i le Alii ma e na Ia fesoasoani i ai ma laveaiina. Mafaufau i le taulealea o Tavita, o le na faasaoina mai le oti moni i lima o Koliata malosi e ala i le faalagolago i le Alii. Mafaufau ia Nifae, ma ana aioiga faatuatua i le Atua na aumaia ai le laveaiga mai i ona uso sa saili e faaumatia lona ola. Manatua le taulealea o Iosefa Samita, o le na saili ma le agaga tatalo mo le fesoasoani a le Alii. Sa lavaeaiina o ia mai le mana o le pogisa ma maua ai se tali faava-vega. Sa fetai i latou uma nei ma ni luitau moni ma faigata. Sa taitasi ma galulue i le faatuatua ma tuu atu lona faatuatua i le Alii. Sa latou maua uma Lana fesoasoani. Ma e oo lava i o tatou aso, o loo faaali mai le mana ma le alofa o le Atua i olaga o Ana fanau.

Ua ou vaaia talu ai nei i olaga o Au Paia e faatumulia i le faatuatua i Zimbabwe ma Botswana. I se sauniga anapogi ma molimau i se paranesi laitiiti, sa faalotomauualoina ma musuia ai au i molimau na faasaoina e le toatele—o tamaiti, o le autalavou, ma tagata matutua foi. Sa taitasi ma faasaoina mai se faailoaga mamana o le faatuatua i le Alii o Iesu Keriso. Faatasi ai ma luitau ma tulaga faigata o loo siomia ai i latou, o loo latou soifua i aso taitasi e ala i le tuuina atu o lo latou faatuatua i le Atua. Latou te faamaluina Lona aao i o latou olaga ma e tele lava ina faailoa atu i se fuaitau "Ou te matuai faafetai tele i le Atua."

I nai tausaga ua mavae sa faaitaitaia



ai e se aiga faamaoni lena faalagolago e tasi i le Alii mo tagata o la matou uarota. Sa soifua Arn ma Venita Gatrell i se olaga fiafia ae maua loa Arn i se kanesa faigata. Sa faate'ia le lipoti a fomai—sa toe o ni nai vaiaso e soifua ai. Sa mananao le aiga e toe faatasia mo le taimi mulimuli. O lea na potopoto uma ai le fanau, o nisi mai i nofoaga mamao. Sa na o le 48 itula faapelepele e faatasitasi ai. Sa filifili ma le faaeteete e le au Gatrells se mea na sili ona taua ia i latou—o se ata o le aiga, o se taumafataga faaleaiga i le afiafi, ma se sauniga i le Malumalu o Sate Leki. Sa faapea mai Venita, “Ina ua matou savavali ese mai faitotoa o le malumalu, o le taimi mulimuli lea na matou toe faatasitasi ai i lenei olaga.”

Ae sa latou o ese ma se faamautinoaga o loo i ai se mea e sili atu mo i latou nai lo lenei olaga. Ona o feagaiga paia o le malumalu, ua mafai ai ona latou maua le faamoemoe i folafolaga a le Atua. Ua mafai ona latou faatasia e faavavau.

O le isi lua masina na sosoo ai sa faatumulia i faamanuiaga le mafaitaulia. O le faatuatua o Arn ma Venita ma le faalagolago i le Alii sa faatupulaia e pei ona faamaonia i upu a Venita: “Sa ou tumau. Sa ou aoao e mafai ona e lagonaina le filemu i totonu o taimi faigata. Sa ou iloa o loo silasila mai le Alii ia i tatou. Afai e te faalagolago i le Alii, e moni lava e mafai ona e faatoilaloina soo se luitau o le olaga.”

Sa faapoopo mai se tasi o o la afafine: “Sa matou matā'ia o matou matua

ma vaaia a laua faaitaiga. Sa matou vaaia lo la faatuatua ma le ala na la tau-limaina ai. Ou te le fia talosagaina lava lenei tofotofoga, ae ou te le tuuese. Sa siomia i matou i le alofa o le Atua.”

E moni, o le toesea ai o Arn sa le o se taunuuga sa faamoemoe i ai le au Gatrells. Ae o o latou faigata sa latou le i fesiligia ai lo latou faatuatua. O le talalelei a Iesu Keriso e le o se lisi o mea e fai; ae, e ola pea i o tatou loto. O le talalelei “e le o se avega mamafa, ae e faamama ai avega.”⁴ Tatou te onosaia ai o tatou tofotofoga. Sa tumau le au Gatrells. Sa o latou lagona le filemu i le lotolotoi o o latou tofotofoga. Sa latou pipii mau i le tasi ma le isi ma i feagaiga o le malumalu sa o latou osia ma tausia. Sa o latou tuputupu ae i lo latou gafatia e faalagolago ai i le Alii ma sa faamalosalia i latou e lo latou faatuatua



ia Iesu Keriso ma i Lona mana togiola.

Po o fea lava tatou te maua ai i tatou lava i luga o le ala o le avea ma soo, po o a lava o tatou popolega ma luitau e ono i ai, e le o tuua na o i tatou. E le o faagaloina oe. E pei o Deric, o le Au Paia i Aferika, ma le aiga o Gatrell, e mafai ona tatou filifili e aapa atu mo le aao o le Atua i o tatou manaoga. E mafai ona tatou faafetaiaia o tatou luitau i le tatalo ma le faalagolago i le Alii. Ma i le faagasologa o le a tatou avea atili ai e pei o Ia.

A o fetalai mai ia i tatou taitoatasi, na fetalai mai le Alii, “Aua e te fefe . . . ou te ia te oe: aua le fetepatepai; aua o au lou Atua: ou te faamalosalia oe; . . . Ou te fesoasoani ia te oe; e moni, ou te taofi oe i lo'u lima taumatau e i ai le amiotonu.”⁵

Ou te faasoa atu lau molimau faamaualalo ma le mautinoa e silafia i tatou taitoatasi e le Atua lo tatou Tama ma e aapa mai e fesoasoani ia i tatou. E auala mai i Lona Alo Pele, o Iesu Keriso, e mafai ai ona tatou faatoilaloina luitau o lenei lalolagi ma toe foi atu ai ma le saogalemu i le aiga. Ia tatou maua le faatuatua e faalagolago ai ia te Ia, ou te tatalo ai i le suafa o Iesu Keriso, amene. ■

FAAMATALAGA

1. Mose 1:39.
2. 1 Nifae 1:20.
3. Tautalagia e ala i uiga o C. S. Lewis e pei ona valiina i le William Nicholson, *Shadowlands* (1989), 103.
4. Harry Emerson Fosdick, *Twelve Tests of Character* (1923), 88.
5. Isaia 41:10.



Saunia e Bishop Gary E. Stevenson
Epikopo Pulefaamalumu

○ Lau Fa Minute

O le vavega o le Togiola e mafai ona faaleleia ai ni le atoatoa i a tatou faatinoga.

○ Taaloga talu ai nei o le Olimipeka o le Taumalulu sa mataina i le lalolagi a o tauva le au taaalo sa fai ma sui o atunuu e 89 i taaloga eseese. O lona matagofie, o le toa 10 o nei au taaalo o ni tagata o Le Ekalesia a Iesu Keriso o le Au Paia o Aso e Gata Ai, e toa 3 i latou na maua ni pine ia na lolomiina talu ai nei i le *Church News*: Christopher Fogt, Noelle Pikus-Pace, ma Torah Bright.¹ E ofo atu la matou faamalo i le au taaalo uma na tauva ai. Faamalo atu lava!


Ou te talanoa atu i lenei taeao e uiga i nei taaloga ma taulai atu ou manatu i alii talavou, tamaitai talavou, ma talavou nofofua matutua-ua outou i ai i o outou tausaga taua lea e iloilo ai le ala o o outou olaga. Ua ou maua se lagona maoae o le naunautai e talanoa atu ia te outou.

Mo outou ia lagonaina lena nau-nautaiga, ou te faasoa muamua atu le tala Noelle Pikus-Pace, o se tasi o le au taaalo o le Au Paia o Aso e Gata Ai. I le taaloga a Noelle, o le auivi, e faatupulaia ai e tagata taaalo se malosi a o latou faasee saosaoa atu ma faapalasi muamua atu o latou ulu i luga o se taavale faasee. Faatasi ai ma o latou foliga e faasasaga i le aisa na o nai inisi e va ai, latou te tutuu ai i lalo o le auala aisa mapiopio i le saosaoa e oo atu i le 90 maila (145 km) i le itula.

O le mea e maofa ai, o tausaga o sauniuniga e ono iloilo ai a le o se faamanuiaga po o se toilalopopo e fuafua i mea e tutupu i le va o tuuga malolosi e fa e tai 60-sekone.

O miti a Noelle o le Olimipeka 2006 talu ai na faatamaiaina ina ua lavea i se faalavelave matuia lea na gau ai lona vae. Na toe faaletonu foi ana miti i le Olimipeka 2010 ina ua na o le tasi vaesefulu o le sekone na ia le ausia ai le tulaga mo se pine.²

E mafai ona outou vaai faalemafau-fau i le atuatuvaale sa ia lagonaina, a o



ia faatalitali e amata lana uluai faasee o le Olimipeka o le 2014? O tausaga e tele o sauniuniga o le a faataunuuna i le na o sina taimi itiiti lava. E fa minute le aofai. Sa ia faaaluina ni tausaga e sauniuni ai mo lena fa minute ma o le a faaalu ai se olaga atoa e mafaufau i ai pe a maea.

O faaseega a Noelle sa toetoe lava a leai se mea sese! O le a le galo lava ia i matou lona oso i luga o le tulaga e fusi mai lona aiga ina ua kolosiina le tini, ma alaga, “Ua maea!” Ua tauia tausaga o tapenaga. Sa matou vaaia lana pine a Tamaitai Talavou o asoa i lona ua a o faaula atu i ai ma le pine siliva.³

Atonu e foliga mai e le fetau i le faalagolago atoa o miti Olimipeka a Noelle i mea sa ia faia i le fa minute puupuu. Ae sa ia iloaina, ma o le mafuaaga lena sa ia sauniuni ai ma le filiga. Sa ia lagonaina le taua, le nau-nautai o lana fa minute, ma lo latou taua mo lona olaga atoa o loo toetoe.

Tatou te manatua foi Christopher Fogt, o se sui o le au lea na manumalo i le pine apamemea i le tuuga faasee e toafa tagata. E ui sa ao ona faamaamulu o ia i le maea ai o se lavea matautia i le Olimipeka 2010, ae sa ia filifili lava ia faaauau pea. Ina ua uma se tuuga mataina lea na toe laga ai le toilalo, sa ia manumalo ai i se tau i sa ia matuai sailia ma le filiga.⁴

Ia, mafaufau pe faapefea ona tutusa lou auala i le ola e faavavau ma le “faatinoga fa minute” a nei tagata afeleti. O oe o se tagata e faavavau. Ae e te le'i fanau mai, sa e ola o se agaga. I le afioaga o se Tama Faalelagi alofa, sa e aoao ai ma saunia e sau i le lalolagi mo se taimi puupuu, ma ia faatinoina ma le lelei. O lenei olaga o lou fa minute lea. A o e i ai iinei, o au amioga o le a iloa ai pe e te manumalo i se tau i le ola e faavavau. Na faamatalaina e le perofeta o Amuleka, “O le olaga lenei o le taimi . . . e saunia ai e feiloai ma

le Atua; ioe, faauta o le aso o le olaga lenei . . . e fai ai [au] galuega.”⁵

I se auala, ua leva ona amata lau fa minute. O loo alu le taimi. E foliga mai e talafeagai ai upu a le Aposetolo o Paulo: “tausinio i le ala tanu, ia maua le tau.”⁶

I lea auala lava lea e tasi, e taua ai ni laasaga patino i le faatinoga puupuu lava o se tagata taalo o le Olimipeka—e tuupuna pe oso maualuga mo le au faasee kiona ma le au faasee laupapa, o le fetuunaiga o pioga o tuuga taavale aisa, po o le faasee atu i pa o se ala tifato i lalo—e faapena foi o tatou olaga lea e matuai taua ai ni mea patino—o vaega e siaki ai lea e siitia ai i tatou e ala i a tatou faatinoga faaleagaga i le lalolagi. O nei faailoga faaleagaga o ni sauniga taua o le talalelei ua tuuina mai e le Atua: o le papatisoga, mauaina o le meaalofa o le Agaga Paia, faauuga i le perisitua, sauniga o le malumalu, ma le taumamafa i le faamanatuga i vaiaso taitasi.

“O [ona] sauniga . . . , ua faaalua ai le mana o le faaleatua.”⁷

Ma i le auala lava lea e tasi o le lotopulea i taimi o toleniga e saunia ai se tagata taalo e faatino ni elemene i ana taaloga i le tulaga sili ona maualuga, o le tausia o poloaiga o le a e agavaa ai e maua nei sauniga faaola.

O e lagonaina le naunautaga?

Au uo talavou, po o fea lava o outou i ai i la outou “faatinoga fa minute,” ou te uunaia outou ia mafaufau loloto, “O le a le isi mea e manaomia ona ou faia ia mautinoa ai e maua lou tau?” Atonu i taualumaga o lenei konafesi, e musumusutu atu ai le Agaga ia oe i na mea: ina ia saunia atili ai ma le mafaufau i ai mo se sauniga i lou lumanai po o le mauaina o se sauniga sa leva ona tatau ona e mauaina i se taimi ua mavae. Po o le a lava lena sauniga, ia faatino. Ia faia nei loa. Aua ne’i faatali. O le a vave ona alu lau fa minute, ma o le a e maua



le faavavau e mafaufau ai e uiga i mea sa e faia i lenei olaga.⁸

E manaomia le lotopulea. E tatau ona avea le tatalo i aso uma, o le suesueina o tusitusiga paia, ma le auai i le lotu ma faavae o au aoaoga. O se mamanu faifai pea o le usiusitai i poloaiga, o le tausia o feagaiga ua e osia, ma le mulimuli i tulaga faatonuina a le Alii o loo maua i le *Mo le Malosi o le Autalavou* e manaomia.

Masalo ua e nofouta i mea o lou olaga o loo taufaamataua e faatelegese pe taofia ai lou alualu i luma faaleagaga. Afai o lea, ia mulimuli i lenei apoapoaiga faatusitusiga paia: “Ina tatou tuu ese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosai i le ala tanu o i o tatou luma.”⁹

E le o tuai tele ona salamo. Ae o le a vave ona tuai tele, aua e leai se tasi na te iloa moni le taimi e maea ai lau fa minute.

Ia, atonu e te mafaufau ia te oe lava, “Ua ou maumuina. O lau fa minute ua leva ona le aoga. E sili ai loa ia te au ona tuu.” Afai o lea, ia tu’u le mafaufau faapena, ma aua nei toe

mafaufau faapena. O le vavega o le Togiola e mafai ona faaleleia ai ni lē atoatoa i a tatou faatinoga. E pei ona aoao mai Elder Jeffrey R. Holland:

“Ia te outou . . . o loo faatalatū lava, . . . ou te molimau atu i le mana faafouina o le alofa o le Atua ma le vavega o Lona alofa tunoa. . . .

“ . . . E le tuai lava pe afai o loo fetalai mai le Matai . . . o loo i ai pea le taimi. . . . Aua le tolopoia.”¹⁰

Ia manatua, e le o tuua na o oe. Ua folafola mai e le Faaola o le a Ia le tuua lava oe ia faanoanoa.¹¹ O loo i ai foi lou aiga, o uo, ma taitai o loo faamalosiua atu ia te oe.

E ui lava ina taulai atu lau lauga i le autalavou o le Ekalesia, ae mo matua ma matua matutua, ou te ofo atu mea nei:

Sa faamatalaina talu ai nei e Elder David A. Bednar se auala faigofie e faatautaia ai se iloiloga faaleaiga ina ia faailoga ai le alualu i luma i le ala o feagaiga e ala i sauniga taua. Na pau lava le mea e manaomia o se fasi pepa e i ai ni koluma se lua: o le “igoa” ma le “fuafuaga mo le isi sauniga e sososo ai ma po o sauniga e manaomia.” Sa



ou faia lenei mea talu ai nei, ma lisiina ai tagata taitasi o le aiga. O se tasi o i latou, sa ou tusia ai se atalii pepe o fanau a fanau, o le a vave ona faamanuiaina; o se atalii o fanau a fanau e ono tausaga, o ana sauniuniga mo le papatisoga sa taua; ma se atalii o le a atoa le 18, o ana sauniuniga mo le perisitua ma faaeega paia o le malumalu sa vave ona oo mai. Sa manaomia e tagata uma o i le lisi le sauniga faamanatuga. Sa fesoasoani lenei gaioiga faigofie ia te au ma Lesa i le faataunuuna o le ma matafaioi e fesoasoani ai i tagata taitoatasi o ma aiga i le aluga o le ala o feagaiga, faatasi ai ma se fuafuaga e faatino mo i latou taitoatasi. Atonu o se manatu lenei mo outou, lea o le a taitai atu i talanoaga faaleaiga, o lesona o afiafi faaleaiga, o sauniuniga, e oo lava i valaaulia mo sauniga taua i lou aiga.¹²

I le avea ai foi o au ma se tagata faasee i luga o le aisa, sa matuai ou faagaetia lava i le faatinoga “fa minute” na manumalo i le pine siliva a se tagata afeleti AAG mai Ausetalia, o Torah Bright i le tauvaga afa paipa. Sa ia faafoina le lalolagi a o ia faaumaina se faaseega toetoe lava a leai se mea sese, lea na fauma i le tafeni i tua a o taavili i le 720 tikeri. Peitai, sa sili atu

ona faagaetia ma faatea le lalolagi i le auala na ia aapa atu ai ma faaalua le alofa FaaKeriso i e na latou tauva. Sa ia matauina o le tamaitai faasee a Amerika o Kelly Clark, o lē sa leaga lana faasee muamua i lana taamilosaga mulimuli, sa foliga popole e uiga i lana faasee lona lua. “Sa ia opoina au,” o le tala lea a Clark. “Sa ia opoina au seia oo ina ou toafimalie moni, ma sa to’a ai la’u mānava. O se mea lelei le fusiina o au e se uo.” Na mulimuli ane faatasi atu Kelly Clark ia Torah i luga o le tulaga o ē manumalo i lona mauaina o le pine apamemea.

Ina ua fesiligia e uiga i lenei faatinoga e le masani ai o le agalelei i lana sui tauva, lea semanu e ono lamatia ai lana pine siliva, sa fai mai ai Torah, “O au o se tagata tauva—ou te manao ia ou faia le mea silisili—ae ou te manao foi i e matou te tauva ia faia foi le mea silisili.”¹³

I le mafaufau ai i lenei mea, o i ai se tasi o manaomiaina lau faamalosiuga? se tagata o le aiga? se uo? se uo i le vasega po o se uso o le korama? E mafai faapefea ona e fesoasoani ia i latou i a latou fa minute?

Uo pele e, o loo e i ai i le lotolotoi o se faigamalaga lamatia. I se isi itu, o loo e faataalise atu i lalo o le afa

paipa po o le auala o taavale faasee, ma e mafai ona faigata ona faatinoina ia elemene taitasi pe mimilo i pioga taitasi i le tausinioga i luga o le ala. Ae ia manatua, sa e saunia mo lenei mea mo se taimi umi tele. O lou taimi lenei e faatino ai. O lau fa minute lenei! O le taimi lava lenei!

Ou te faailoa atu lou talitonuga maumaututu i o outou tomai. O loo ia te outou le Faaola o le lalolagi i la outou itu. Afai e te saili atu i Lana fesoasoani ma mulimuli i Lana taitaiga, e mafai la faapefea ona e toilalo?

Ou te faaiu atu i lau molimau i faamanuiaga ua tatou maua i se perofeta soifua, o Peresitene Thomas S. Monson, ma Iesu Keriso ma Lana matafaioi i le avea ai ma o tatou Faaola ma le Togiola, i Lona suafa paia, o Iesu Keriso, amene. ■

FAAMATALAGA

1. Tagai Christine Rappleye, “Mormons in the Olympics: 3 Medals for LDS Athletes at the Winter Games,” deseretnews.com/article/865597546/Mormons-in-the-Olympics-3-medals-for-LDS-athletes-at-the-Winter-Games.html.
2. Tagai Christine Rappleye, “Mormons in the Olympics.”
3. Tagai Sarah Petersen, “Noelle Pikus-Pace Wears LDS Young Women Necklace throughout Olympics,” deseretnews.com/article/865596771/Noelle-Pikus-Pace-wears-LDS-Young-Women-necklace-throughout-Olympics.html.
4. Tagai Amy Donaldson, “Army, Faith Helped Push Mormon Bobsledder Chris Fogt to Olympic Success,” deseretnews.com/article/865597390/Army-faith-helped-push-Mormon-bobsledder-Chris-Fogt-to-Olympic-success.html.
5. Alema 34:32.
6. Tagai 1 Korinito 9:24.
7. Mataupu Faavae ma Feagaiga 84:20.
8. Tagai Alema 34:31–33.
9. Eperu 12:1.
10. Jeffrey R. Holland, “O Le Au Faigaluega i le Tovine,” *Liahona*, Me 2012, 33.
11. Tagai Ioane 14:18.
12. David A. Bednar, talanoaga ma le tusitala.
13. Vidya Rao, “Snowboarder Kelly Clark: Hug from Competitor Helped Me Win Bronze,” today.com/sochi/snowboarder-kelly-clark-hug-competitor-helped-me-win-bronze-2D12108132.



Saunia e Elder David A. Bednar

○ Le Korama a Aposetolo e Toasefululua

Tauave ma le Faigofie a Latou Avega

O avega tulagaese i o tatou olaga taitoatasi ua fesoasoani lea ia i tatou e faalagolago atu ai i le amiotonu, alofa mutimutivale, ma le alofa tunoa o le Mesia Paia.

E i ai sau uo mamae, i le popofou o lana faaipoipoga, sa faatalitonuina o ia ma lona aiga e manaomia sana taavale pikiapu fa uili. Na mautinoa lava e lona toalua na te le manao-miaina ae sa na o le fia manao i se taavale fou. O se talanoaga fiamalie i le va o lenei tane ma le ava na uunaia ai i laua e toe iloilo tulaga lelei ma tulaga le lelei o le faatauina o le taavale.

“Lau pele, ta te manaomia se pikiapu fa uili.”

Sa fesili atu lona toalua, “Aisea ta te manaomia ai se pikiapu fou?”

Sa ia taliina lana fesili i se tali na ia talitonu o se tali atoatoa lea. “Ae faafefea pe a ta manaomia se susu mo le ta fanau i se afa matautia, ma e pau lava le auala ou te oo ai i le faleoloa o se pikiapu?”

Na tali mai ma le ataata lona toalua, “Afai ta te faatauina se pikiapu fou, o le a leai se ta tupe mo se susu—aisea la ta te popole ai e o i le faleoloa i le taimi o se faalavelave faafuasei!”

Sa umi se taimi sa faaauau ai pea ona la fefautuauai faatasi ma na iu lava ina filifili e faatau le pikiapu. E lei leva ona faatauina le taavale fou, ae manao lau uo e faaali mai le aoga o le pikiapu

ma faamaonia mai ana mafuaaga mo le manao e faatau. O lea sa tonu ai ia te ia e tata ma uta se sapolai o fafie mo le latou aiga. O le taimi lea o le tautoulu o le tausaga, ma ua amata ona toulu le kiona i luga o mauga lea sa ia nau-nau ai e saili ni fafie. A o ia tietie atu i luga o le mauga, na faasolo mafafia le kiona. Na iloaina e lau uo ua tulaga lamatia le auala ona o le maseese, ae ona o le talitonuina tele o le pikiapu fou, sa ia alu ai pea.

O le mea e faanoanoa ai, sa mamao tele le mea na alu i ai auala aisā. Ina ua ia seu i tua lana taavale mai le auala e alu ai i le nofoaga na ia fuafua e tata ai fafie, sa mau ai loa o ia iina. Na vivili uma pau fou e fa o le pikiapu i le aisa. Sa vave ona ia iloa ua ia leiloaina se mea e fai aluese mai ai i lenei tulaga matautia. Sa maasiasi ma popole o ia.

Na tonu i lau uo, “Ia, e le na o lou saofai ai iinei.” Sa ia oso i fafo mai le taavale ma amata ona tata ia fafie. Sa ia faatumuina atoa tua o le pikiapu i se uta mamafa. Ona filifili loa lea o lau uo o le a ia toe taumafai tasi lava e aveina mai le taavale mai fafo o le kiona. Ina ua ia faaolaina le taavale ma amata ona aveina, na amata ona minoi

lemu atu i luma. Na agaigai lemu ese atu le pikiapu mai le kiona ma toe foi ai i le auala. Mulimuli ane sa saoloto ai o ia e alu i le fale, o se tagata fiafia ma faamaualaloina.

O A Tatou Lava Avega

Ou te tatalo mo le fesoasoaniga a le Agaga Paia a o ou faamamafaina atu ni lesona taua lea e mafai ona aoao mai i lenei tala e uiga i lau uo, le pikiapu, ma fafie. O le uta. O le uta fafie lea sa maua ai le malosi na manaomia e aluese mai ai mai le kiona, e toe foi ai i le auala, ma agai atu ai i luma. O le uta lea na mafai ai e ia ona toe foi i lona aiga ma lona fale.

Ua tofu i tatou ma se avega o tauave. E aofia ia tatou lava avega ia manaoga ma avanoa, matafaioi ma āiā, mafatiaga ma faamanuiaga, ma filifiliga ma tapulaa. O fesili taiala nei e lua e mafai ona fesoasoani a o tatou iloiloaina





i nisi o taimi ma le agaga tatalo a tatou avega: “Mata o le avega o ou tauaveina o maua mai ai le malosi faaleagaga o le a mafai ai ona ou fetaomi atu i luma ma le faatuatua ia Keriso i luga o le auala lauitiiti ma le vaapiapi ma aloese mai ai i le le alualu i luma? Mata o le avega o ou tauaveina o fatuina ai ia lava le malosi faaleagaga ina ia mafai ai ona ou toe foi i le aiga i le Tama Faalelagi?”

O nisi taimi atonu tatou te talitonu sese ai e faapea, o le fiala o le leai lea o se avega. Ae o le tauaveina o se avega o se vaega manaomia ma le taua lea o le fuafuaga o le fiala. Talu ai o a tatou avega taitoatasi e manaomia ona faatupuina ai le malosi faaleagaga, o lea e tatau ai ona tatou faaeteete ia aua nei avega ma se vaega o o tatou olaga le tele o mea mana-naia ae le manaomia lea o loo faalave-fau ia i tatou ma aveesea ai i tatou mai i mea e sili ona taua moni.

O Le Mana Faamalosi o le Togiola

Na fetalai le Faaola:

“Ia outou o mai ia te au, o outou uma o e tigaina ma mafatia i avega, o a’u foi e malolo ai outou.”

“Ia outou amoina la’u amo, ma ia outou faaaoao ia te au, aua o a’u le agamalu ma le loto maualalo: ona

maua lea e outou o le malologa mo outou agaga.”

“Aua e avegofie la’u amo, o la’u avega foi e mama ia” (Mataio 11:28–30).

O le amo o se pou laupapa, e masani lava ona faaaogaina i le va o ni povi se lua po o nisi manu lea e mafai ai ona la tosoina faatasi se avega. O le amo e tuufaatasia ai ni manu ina ia mafai ona la galulue faatasi ma faataunuuna ai se galuega.

Maufaufau i le valaaulia uigaese a le Alii mo tagata taitoatasi ina ia “outou amoina la’u amo.” O le osia ma le tausia o feagaiga paia e tuufaatasia ai i tatou ma le Alii o Iesu Keriso. O le mea moni lava, o loo augani mai le Faaola ia i tatou ina ia faalagolago atu ma tatou galulue faatasi ma Ia, e ui lava o a tatou taumafaiga silisili e le tutusa ma e le mafai ona faatusalia ia te Ia. A o tatou faalagolago atu [ia te Ia] ma tosoina faatasi a tatou avega ma Ia i le malaga o le olaga nei, e moni lava e avegofie Lana amo, o Lana avega foi e mama ia.

E le o tuua na o i tatou ma e le tatau ona tuua na o i tatou. E mafai ona tatou fetaomi atu i luma i o tatou olaga i aso taitasi faatasi ai ma le fesoasoani faalelagi. E auala mai i le Togiola a le Faaola tatou te mafai ai ona maua le gafatia ma le “malosi i [lo tatou lava] mana”

(“Faaola e ia Ou Alofa,” *Viiiga*, nu. 150). E pei ona folafola mai e le Alii, “O lea, ia faaaauu pea la oulua malaga ma ia olioli o oulua loto; aua faauta, ma tagai, Ou te faatasi ma oulua e oo lava i le iuga” (MF&F 100:12).

Maufaufau i le faataitaiga i le Tusi a Mamona lea na sauaina ai e Amulona ia Alema ma lona nuu. Na oo mai le siufofoga o le Alii i nei soo i o latou puapuaga: “Ina ea ia o outou ulu ma ia faamafanafanaina outou, ona ua Ou iloa le feagaiga na outou faia mai ia te au; ma o le a Ou osifeagaiga ma o’u tagata ma laveai i latou mai le pologa” (Mosaea 24:13).

Ia matauina le taua o feagaiga i le folafolaga o le laveaiina. O feagaiga e mauaina ma faamamaluina i le amiosa’o faapea ma sauniga e faatinoina i le pule tatau ai o le perisitua, e taua lea ina ia maua ai faamanuiaga uma ua avanoa e ala mai i le Togiola a Iesu Keriso. Ma o ona sauniga o le perisitua, ua faaalua mai ai le mana faaleatua i alii ma tamaitai i la le tino, e aofia ai faamanuiaga o le Togiola (tagai MF&F 84:20–21).

Toe mafaufau i le fetalai a le Faaola “Aua e avegofie la’u amo, o la’u avega foi e mama ia” (Mataio 11:30) a o tatou mafaufau i le fuaiupu e sosoo ai i le tala ia Alema ma lona nuu.

“Ma o le a Ou faamamaina foi avega ua tuu i o outou tauau, e oo ia te outou tou te le lagonaina i latou i luga o o outou tua” (Mosaea 24:14).

O le toatele o i tatou e ono mafau-fau o lenei mau o loo fautua mai ai le aveesea faafuasei ma tumau o se avega. Peitai, o le fuaiupu o loo sosoo ai o loo faamatalaina ai le auala na faamama ai le avega.

“Ma o lenei sa oo ina faamamaina avega sa tuu i luga o Alema ma ona uso; ioe, *sa faamalosia i latou e le Alii* ina ia mafai ona latou tauave ma le faigofie a latou avega, ma sa latou gauai atu ma le fiafia ma le onosai i le finagalo atoa o le Alii” (Mosaea 24:15; faapoopo le faamamafa).

E lei vave ona aveesea ia avega ma faigata mai le nuu. Peitai na faamalosia Alema ma ona soo, ma o le faateleina o lo latou malosi na faamamaina ai avega. Na faamalosia nei tagata lelei e ala i le Togiola ina ia *galulue* o ni auauna (tagai MF&F 58:26–29) ma aa *fia* ai o latou tulaga. Ma o “le malosi o le Alii” (Upu a Mamona 1:14; Mosaea

9:17; 10:10; Alema 20:4), na taitaia ai ma le saogalemu ai Alema ma lona nuu i le laueleele o Sara’emila.

E le gata o le Togiola a Iesu Keriso e faatoilaloina ai aafiaga o le Pa’ū o Atamu ma mafai ai ona faamagaloina a tatou lava agasala ma solitulafono, ae o Lana Togiola foi ua mafai ai ona tatou faia mea lelei ma avega ai ma tagata sili ona lelei i ni auala e le oo i ai lo tatou gafatia faaletino. Ua silafia e le toatele o i tatou afai tatou te faia se mea sese ma manaomia le fesoasoani e faatoilalo ai aafiaga o le agasala i o tatou olaga, o le Faaola e mafai ai e i tatou ona mama e ala i Lona mana togiola. Ae, pe ua tatou malamalama foi o le Togiola e mo alii ma tamaitai faamaoni o e usiusitai, agavaa, ma filiga ma ē o loo taumafai ina ia lelei atu ma auauna atu ma le faamaoni sili atu? Ou te mafaufau lava pe ua tatou toilalo e iloa atoatoa lenei vaega faamalosia o le Togiola i o tatou olaga ma le talitonuga sese e tatau ona tatou amoina na o i tatou a tatou avega—e ala i lo tatou lava naunautai, finafinau, ma le



lotopulea, faapea ai ma le ilogofie o o tatou gafatia faatapulaaina.

O le tasi o mea e ao ona iloa, sa afio mai Iesu Keriso i le lalolagi e *maluu* mo i tatou. Ae e tatau foi ona tatou talisapaia le finagalo o le Alii, e ala i Lana Togiola ma e ala mai i le mana o le Agaga Paia, ia *ola* i totonu ia i tatou—e le gata ia taitaia i tatou ae ia faamalosia foi ma faamaloloina ai i tatou.

E Fesoasoani le Faaola i Lona Nuu

Ua faamatala mai e Alema le mafuaaga ma le auala e mafai ai ona fesoasoani le Faaola ia i tatou:

“Ma o le a afio atu o ia, ma mafatia i tiga ma puapuaga ma faaosoosoga o ituaiga eseese uma; ma o le a oo ia te ia nei mea, ina ia mafai ona faataunuuina o le upu ua fai mai, o le a ia ave i ona luga tiga ma ma’i o ona tagata.

“Ma o le a ia ave i ona luga le oti, ina ia mafai ona ia tatalaina fusi o le oti ia ua noatia ai ona tagata; ma o le a ia ave i ona luga o latou vaivaiga, ina ia mafai ona faatumuina ona loto i le alofa mutimutivale, e tusa ai ma la le tino, ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o latou vaivaiga” (Alema 7:11–12).

O lea, e le na o o tatou agasala ma puapuaga na mafatia ai le Faaola—ae mo o tatou tiga ma mafatiaga faaletino foi, o tatou vaivaiga ma faaletonu, lo



tatou fefe ma le toilalo, lo tatou le fiafia ma lotovaivai, lo tatou salamo ma le ta'usalaina, o tatou faanoanoaga ma popolega, o faamasinoga le tonu ma le faaituau o loo tatou aafia ai, ma tiga faalelagona o loo lofituina ai i tatou.

E leai se tiga faaletino, leai se manua faaleagaga, leai se tiga o le agaga po o le loto nutimomoia, leai se ma'i po o se vaivaiga na faafetaiaia oe po o au foi i le olaga faaletino e lei oo muamua i ai le Faaola. I se taimi o le vaivai tatou te ono tagi atu ai, "E leai se tasi na te iloina pe faape'i. E leai se tasi e malamalama i ai." Ae ua silafia ma malamalama atoa i ai le Alo o le Atua, aua sa Ia lagonaina ma tauave a tatou avega taitoatasi. Ma ona o Lana taulaga le iu ma faavavau (tagai Alema 34:14), ua ia te Ia le tiga-alofa atoatoa ma e mafai ona ia faaloaloa mai Lona aao o le alofa mutimutivale ia i tatou. E mafai ona ia aapa mai, pa'i mai, fesoasoani, faamalolo, ma faamalosia i tatou ina ia sili atu nai lo le mea e mafai ona tatou faia ma fesoasoani ai ia i tatou e faia le mea e le mafai ona tatou faia i le na o lo tatou faalagolago atu i lo tatou lava malosi. Ioe, e avegofie Lana amo ma e mama foi Lana avega.

O Se Valaaulia, o se Folafolaga, ma se Molimau

Ou te valaaulia outou ina ia suesue, tatalo, mafaufau loloto, ma taumafai



ia aoao atili i le Togiola a le Faaola a o e iloiloina au oe lava ia avega. O le tele o mea e uiga i le Togiola e le faigofie ona tatou malamalama i ai i o tatou mafaufau faaletino. Ae o le tele o vaega o le Togiola e mafai ma e ao lava ona tatou malamalama i ai.

Mo lau uo, o le uta fafie na sau-niaina ai le malosi e faasaoina ai lona ola. Na le mafai ona minoi le pikiapu gaogao i le kiona, e tusa lava pe o se fa uili. Na manaomia se uta mamafa ina ia maua ai le malosi.

E taua le uta. O le uta na maua ai le malosi lea na mafai ona aveesea mai lau uo, ia toe foi atu ai i luga o le auala, ia fetaomi atu i luma, ma toe foi atu ai i lona aiga.

O avega tulagaese i o tatou olaga taitoatasi ua fesoasoani lea ia i tatou e faalagolago atu ai i le amiotonu, alofa mutimutivale, ma le alofa tunoa o le Mesia Paia (tagai 2 Nifae 2:8). Ou te molimau atu ma folafola atu o le a fesoasoani mai le Faaola ia i tatou e tauave a tatou avega ma le faigofie (tagai Mosaea 24:15). A o tatou amoina faatasi ma Ia e ala i feagaiga paia ma maua le malosi faatagaina o Lana Togiola i o tatou olaga, o le a faateleina ona tatou saili atu ia malamalama ma ola e tusa ma Lona finagalo. O le a tatou tatalo foi mo le malosi e aoao ai mai [faafitauli], ia suiga, pe talia o

tatou tulaga nai lo le tatalo faifaipea ina ia suia e le Atua o tatou tulaga e tusa ma o tatou loto. O le a avea i tatou ma auauna o e gaoioi nai lo le mafaufau o le a faagaoioia (tagai 2 Nifae 2:14). O le a faamanuiaina i tatou i le malosi faaleagaga.

Tau ina ia faia ma avea i tatou taitoatasi ma tagata sili atu le lelei e ala i le Togiola a le Faaola. O le asō o le aso 6 o Aperila. Ua tatou iloa e ala i faaaliga o le asō o le aso moni ma le aso sa'o o le soifua mai o le Faaola. O le aso 6 foi o Aperila lea sa faatutagaina ai Le Ekalesia a Iesu Keriso o le Au Paia o Aso e Gata Ai. (Tagai MF&F 20:1; Harold B. Lee, "O Le Faamalosia o Siteki o Siona," *Liahona*, Oketopa 1973, 2; Spencer W. Kimball, "Why Call Me Lord, Lord, and Do Not the Things Which I Say?" *Ensign*, Me 1975, 4; Spencer W. Kimball, "Remarks and Dedication of the Fayette, New York, Buildings," *Ensign*, Me 1980, 54; *Discourses of President Gordon B. Hinckley, Volume 1: 1995–1999* [2005], 409.) I lenei aso Sapati faapitoa ma paia, ou te tautino atu lau molimau o Iesu o le Keriso o lo tatou Togiola. O loo soifua o Ia ma o le a faamamaina, faamalolo, taitai, puipui, ma faamalosia i tatou. Ou te olioli e molimau atu ai i nei mea i le suafa paia o Iesu Keriso, amene. ■



Saunia e Peresitene Thomas S. Monson

O Le Alofa—o le Ute lea o le Talalelei

*E le mafai ona tatou alolofa moni i le Atua pe afai
tatou te le alolofa i ē o loo tatou malaga faatasi
i lenei faigamalaga o le olaga.*

O u uso ma tuafafine pele, a o auauna atu lo tatou Faaola i tagata, sa fesiligia o Ia e le loia suesue, “Le Aoao e, o le fea poloaiga o i le tulafono ua sili?”

O loo tusia e Mataio le tali a Iesu: “E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

“O le poloaiga muamua lena ma le sili.

“E faapena foi lona lua, E te alofa atu i le lua te tuaoi, ia pei o oe lava ia te oe.”¹

O loo faaiuina e Mareko le tala i le fetalaiga a le Faaola: “E leai lava se tasi poloaiga e sili i na poloaiga.”²

E le mafai ona tatou alolofa moni i le Atua pe afai tatou te le alolofa i ē o loo tatou malaga faatasi i lenei faigamalaga o le olaga. E faapena foi, e le mafai ona tatou alolofa atoatoa i o tatou uso a tagata pe afai tatou te le alolofa i le Atua, le Tama o i tatou uma. Ua tau mai e le Aposetolo o Ioane ia i tatou, “O lenei foi le poloaiga ua tatou maua mai ia te ia, o lē alofa i le Atua [e] alofa foi o ia i lona uso.”³ O i tatou uma o fanau agaga a lo tatou Tama Faalelagi ma, ona o

lena tulaga, ua avea ai i tatou uma ma uso ma tuafafine. A tatou manatua pea lenei upumoni, o le a faigofie lava ona tatou alolofa atu i fanau uma a le Atua.

O le mea moni, o le alofa o le ute lea o le talalelei ma o Iesu Keriso o lo tatou Faataitaiga. O lona soifuaga o se talatuu o le alofa. O ē mamai na Ia faamaloloina, o ē mafatia na Ia siitiaina, o ē agasala na Ia faaolaina. I le faaiuga, na fasiotia o Ia e tagata leaga. Ae o loo tatagi pea mai le mauga o Kolokota upu nei: “Lo’u Tamā e, ia e faamagaloina atu ia te i latou; aua ua latou le iloa le mea ua latou faia”⁴—o le faailoaga silisili lea i la le tino o le agalelei ma le alofa.

O loo i ai le tele o uiga o loo faailoa atu ai le alofa, e pei o le agalelei, onosai, lē manatu faapito, malamalama, ma le faamagalalo atu. I a tatou fegalegaleaiga uma, o nei uiga ma isi uiga o le a fesoasoani ia iloa ai e isi le alofa o loo i totonu o o tatou loto.

E masani lava o lo tatou alofa o le a faaalua i a tatou fegalegaleaiga i aso uma ma le tasi ma le isi. O le mea sili ona taua o lo tatou tomai e iloa ai le manaoga o se isi tagata ona tali atu lea i ai. Ou te faamemelo i taimi uma i le

lagona faamamai o loo faaalua i le solo puupuu lea:

*Sa ou tagi i le po
Ona o le po o le vaai
O le manaoga o se tasi ua ou tauaso ai;
Ae ou te le’i
Lagonaina sina faanoanoa itiiti
Ona o sina agalelei teisi.⁵*

Talu ai nei sa ou iloina ai se faataitaiga ootia o le agalelei alofa—o se faataitaiga sa lei vaaia ni ona taunuuga. O le tausaga e 1933, ona o le Pa’u Tele o le Tamaoiga, sa faigata ai ona maua ni avanoa faigaluega. O le nofoaga sa i le itu i sasae o le Lunaite Setete. Sa faatoa faauu mai lava Arlene Biesecker mai le aoga maualuga. Ina ua maea se sailiga faaumiumi mo se galuega, sa mulimuli ane ona mauaina se galuega i se falegaosi ofu o se su’isu’i. Sa totogi le afaigaluega mo na o ofu taitasi sa sa’o ona latou su’iina atoa i aso taitasi. O le tele lava la o ofu latou te su’iina o le telē foi lena o o latou totogi.

I se tasi aso e lei leva ona amata i le falegaosi ofu, sa fetaiai ai Arlene ma se tulaga sa ia le mautonu ma lē fiafia ai. Sa ia saofai i lana laau su’isu’i ma taumafai e tatoso mai i fafo filo i sana taumafaiga sa le faamanuiaina e faauma le ofu sa ia galue ai. Sa foliga mai na leai ma se tasi e fesoasoani atu ia te ia, ona o loo taufai faananati uma isi tagata su’isu’i ia faauma le tele o ofu latou te mafaia. Sa lagona e Arlene le leai o se faamoemoe. Sa amata ona ia tagi leleoa.

Sa faasaga mai i le isi pito o Arlene ia Bernice Rock. Sa matua o ia ma sa tele atu sona potomasani o se su’isu’i. A o matauina ai le faanoanoa o Arlene, sa tuua ai e Bernice lana lava galuega sa fai ae alu atu i talaane o Arlene, ma tuu atu ma le agalelei ia te ia faatonuga ma se fesoasoani. Sa ia nofo ai lava seia oo ina maua e Arlene le toafimalie



ma sa mafai ai ona faamaeaina ma le manuia le ofu. Ona toe foi atu lea o Bernice i lana masini, ae ua misia le avanoa e faamaea ai le tele o ofu sa mafai ona ia faia, pe ana ia le fesoasoani atu i se isi tagata.

I lenei lava faatinoga e tasi o le agalelei alofa, na avea ai Bernice ma Arlene o ni uo mamae. Mulimuli ane sa tau fai faaiipoipo uma i laua ma fai ni fanau. I se vaimea o le 1950, na tuu atu ai e Bernice, o le sa avea ma se tagata o le Ekalesia se kopi o le Tusi a Mamona ia Arlene ma lona aiga. I le 1960, sa papatisoina ai Arlene ma lona toalua ma le la fanau o ni tagata o le Ekalesia. Mulimuli ane sa faamauina i latou i se malumalu paia o le Atua.

O se taunuuga o le agaalofa na faaalia e Bernice lea na ia tuu ai mea sa ia naunau i ai ae fesoasoani atu i se tasi sa ia le iloaina ae sa le fiafia ma manao-mia le fesoasoani, ua anoanoai ai nei tagata taitoatasi, o e uma o soifua ma maliliu, o loo olioli nei i sauniga faaola o le talalelei.

O aso uma o o tatou olaga tatou te maua ai ni avanoa e faaali atu ai

le alofa ma le agalelei ia i latou o siomiaina i tatou. Sa saunua Peresitene Spencer W. Kimball: “E tataua ona tatou manatuaina o i latou tatou te fetau i ai i pakaga taavale, ofisa, lifi, ma soo se mea lava, o ni vaega na o tagata ua tuu mai e le Atua ia i tatou ia alolofa ma auauna atu i ai. E itiiti lava sina lelei mo i tatou pe afai tatou te talanoa e uiga i usoga lautele o tagata ae e le mafai ona tatou manatu ia i latou o loo siomiaina i tatou o ni o tatou uso ma ni tuafafine.”⁶

E tele lava ina le mafaufauina le oo mai o ni avanoa tatou te faaali atu ai lo tatou alolofa. O se faataitaiga o sea avanoa na faaali mai i se tusiga a se nusipepa ia Oketopa 1981. Sa ou matua fiafia lava i le alofa ma le agalelei na faamatala mai i le tala lea na ou teuina ai le tusiga i au faila mo le silia i le 30 tausaga.

Na faailoa i le tusiga o se malaga tuusao a le Alaska Airline mai Anchorage, Alaska, i Seattle, Uosigitone—o se malaga e 150 le pasese—na toe liliu atu i se aai maotua i Alaska ina ia mafai ona aumai se tamaitiiti na tuga lona

manuaga. Sa motu le uaua o le lima o le tamaitiiti e lua tausaga le matua ina ua pa’u i luga o se fasi tioata a o taalo ai i talaane o lona fale. O le aai lea e 450 maila i saute o Anchorage ma sa mautinoa lava sa le’i i ai i le ālāvaa. Peitai, sa auina atu e fomai sa i ai i le faalavelave se talosaga atuatuvaale mo se fesoasoani, ma o lea sa toe liliu atu ai le vaalele e piki mai le tamaitiiti ma ave o ia i Seattle ina ia mafai ai ona togafiti i se falemai.

Ina ua tulaualeele le vaalele e latalata i le aai maotua lea, sa faailoa atu e fomai i le pailate sa matuai leaga le alu o le palapala o le tama e ono le mafai ai ona saofia le malaga i Seattle. Sa faia se faaiuga ina ia lele atu i le isi 200 maila (320 km) e ese mai le ālāvaa e agai i Juneau, Alaska, le aai pito lata ane o loo i ai se falemai.

Ina ua uma ona momoli atu le tamaitiiti i Juneau, na toe agai atu le malaga i Seattle, lea ua tele itula ua tuai ai mai le taimi faatulagaina. Sa leai ma se pasese na faitio, e ui o le toatele o i latou o le a misia ni fonotaga ma ni malaga fesoatai a vaa. O le mea moni, a o alu pea minute ma itula, sa ao ni a latou tupe, ma maua ai se aofaiga tele mo le tamaitiiti ma lona aiga.

A o lata ina tulaualeele le vaalele i Seattle, sa pati fiafia le pasese ina ua faasilasila atu e le pailate ua ia maua se tala mai le leitio o le a manuia le tamaitiiti.⁷

Ou te mafaufau i upu o le mau: “O le alofa mama o le alofa le pona lea o Keriso, . . . ma o soo se tasi e maua ua i ai ia te ia i le aso gataaga, o le a lelei ia te ia.”⁸

Uso e ma tuafafine, o nisi o o tatou avanoa silisili e faaali atu ai lo tatou alolofa o le a i ai lea i totonu o puipui o o tatou lava fale. O le alofa e tatau ona i ai i le totonugalemu o le olaga faaleaiga, ae o nisi taimi e le o i ai. O loo tele naua le le onosai, tele naua le feinauui, tele naua fetuaiga, ma

tele naua loimata maligi. Sa fesili ma le faanoanoa Peresitene Gordon B. Hinckley: “Aisea e avea ai [tagata] e [sili] ona tatou alolofa i ai ma tagata e tele ina talafo i ai a tatou upu malolosi? Aisea [tatou] te tautatala ai i nisi taimi e peiseai tatou te faamoemoe e matua faamanualia lagona o isi?”⁹ Atonu e eseese lava tali i nei fesili mo i tatou taitoatasi, ae o le mea moni, e le afaina po o a na mafuaaga. Afai tatou te tausia le poloaiga ia fealofani, e tatau lava la ona tatou taulimaina le tasi ma le isi i le agalelei ma le faaloalo.

O le mea moni o le a i ai taimi e manaomia ai ona tuu atu le aoaiga. Peitai, ia tatou manatua le fautuaga o loo maua i le Mataupu Faavae ma Feagaiga—e faapea, pe a talafeagai ai mo i tatou ona aoai se isi tagata, a mavae, ona tatou faaali atu lea o se alofa faateleina.¹⁰

Ou te faamoemoe o le a tatou tau-mafai i taimi uma ina ia manatu ma nofouta i mafauaaga ma lagona ma tulaga o i latou o siomiaina i tatou. Ia aua ne’i o tatou faatiga pe faifai atu. Ae, ia tatou agaaloa ma faamalosi



atu. E tatau ona tatou faaeteete ina ia tatou lē faaumatiaina le talitonuga o le isi tagata e ala i a tatou upu soona lafo po o amioga.

E tatau ona fuifuilua faatasi le faamagalo atu ma le alofa. I o tatou aiga, faapea foi ma a tatou uo, e ono i ai ni lagona faamanualia ma feeseeseaiga. Ou te toe fai atu, e le afaina po o le a le itiiti o le faafitauli. E le mafai ma e le tatau lava ona tuu atu i le tiapolo na te faateteleina ma oo atu ai ina faaumatiaina. O le tuuaia o isi e tumau ai le tiga. Ua na o le faamagalo atu e faamaloloina ai.

O se tamaitai lelei tele ua maliu sa ma feiloai i se tasi aso ae na te’i lava ua ia faamatala mai nisi o mea na faanoanoa ai. Sa ia talanoa e uiga i se faafitauli na tupu i le tele o tautaga na muamua ai ma sa aofia ai se faifaatoaga la te tuaoi, o le sa avea

muamua ma se uo ae sa i ai se latou feeseeseaiga ma lona toalua i le tele o taimi. I se tasi aso sa talosaga atu ai le faifaatoaga pe mafai ona oso atu i se auala alo i totonu o lona fanua e tau atu i lona fanua. I lea taimi sa taofi ai lana tala na faamatala mai ia te au ma, faatasi ai ma se leo gatete, na fai mai, “Tuagane Monson, ou te lei faatagaina o ia e sopo atu i lo matou fanua, i lena taimi ma soo se taimi lava, ae sa fai i ai e savali i le auala umi faataamilo e tau atu i lona fanua. Sa ou sese, ma ua ou salamo ai. Ua maliu o ia, ae maimau pe ana mafai ona ou fai atu ia te ia, ‘Ou te faatoese atu.’ Ou te moomoo maimau pe ana i ai se isi avanoa e toe agalelei atu ai.”

A o ou faalogo atu ia te ia, sa ou manatua le faamatalaga faanoanoa tele a John Greenleaf Whittier: “Mai upu faanoanoa uma lava a le lau-laufaiva po o le peni, o upu lava nei e sili ona faanoanoa: ‘Maimau pe ana!’”¹¹ Uso e ma tuafafine, a tatou taulimaina isi i le manatu alofa ma le agalelei, o le a tatou aloese mai ia faanoanoaga.

O loo faailoaina le alofa i le tele o ala iloagofie: se matafiafia, se talo atu, se faamatalaga agalelei, se faamālō. O isi faailoaga atonu e le iloa tele, e pei o le faaali atu o le fiafia i gaioiga a isi, aoao atu o se mataupu faavae i le agalelei ma le onosai, asiasi atu i se tasi e ma’i pe nofofale. O nei upu ma amioga, ma le tele o isi, e mafai ona fesootai atu ai le alofa.

Sa talitonu Dale Carnegie, o se tusitala lauiloa Amerika ma se faiaoga iunivesite, e faapea ua i ai i totonu



Viena, Auseteria



Saunia e Peresitene Boyd K. Packer

Peresitene o le Korama a Aposetolo e Toasefululua

o tagata taitoatasi lava ia se “mana e faateleina ai le aofaiga atoa [o le] fiafia faalelalolagi . . . e ala i le fai atu o ni nai upu o le agaga faafetai faamaoni i se tasi ua tuuatoatasi pe ua lotovaivai.” Sa ia fai mai, “Masalo o le a galo ia te oe taeao ni upu agalelei e te faia i le asō, ae e faatauaina e le tagata na e faia i ai i lona olaga atoa.”¹²

E mafai ona tatou amata nei, i le aso nei lava, ona faailoa atu le alofa i fanau uma a le Atua, pe o i latou o tagata o o tatou aiga, a tatou uo, nisi tatou te masani, po o ni tagata ese. A tatou ala ae i taeao uma, ia tatou naunau e tali atu i le alofa ma le agalelei i soo se [tagata] tatou te fetau i ai i le ala.

Ou uso e ma tuafafine, o le alofa o le Atua mo i tatou e le mafai ona malamalama i ai. Ona o lenei alofa, na Ia auina mai ai Lona Alo, o le sa lava Lona alofa ia i tatou na foai mai ai Lona soifua mo i tatou, ina ia tatou maua le ola e faavavau. A tatou malamalama i lenei meaalofo lemafaa-tusaliaina, o le a tumu o tatou loto i le alofa mo lo tatou Tama e Faavavau, mo lo tatou Faaola, ma mo tagata uma. Tau ina ia faapena o lau tatalo faatauanau lea i le suafa paia o Iesu Keriso, amene. ■

FAAMATALAGA

1. Mataio 22:36–39.
2. Mareko 12:31.
3. I Ioane 4:21.
4. Luka 23:34.
5. E le o mailoa le tusitala, i le Richard L. Evans, “The Quality of Kindness,” *Improvement Era*, May 1960, 340.
6. *The Teachings of Spencer W. Kimball*, ed. Edward L. Kimball (1982), 483.
7. Tagai “Injured Boy Flown to Safety,” *Daily Sitka Sentinel* (Alaska), Oct. 22, 1981.
8. Moronae 7:47.
9. Gordon B. Hinckley, “Let Love Be the Lodestar of Your Life,” *Ensign*, May 1989, 67.
10. Tagai Mataupu Faavae ma Feagaiga 121:43.
11. “Maud Muller,” i le *The Complete Poetical Works of John Greenleaf Whittier* (1878), 206; faapoopo le faamamafa.
12. Dale Carnegie, i le, for example, Larry Chang, *Wisdom for the Soul*. (2006), 54

○ Le Molimau

Ou te fia faasoaina atu ia te outou na upumoni lea e matua taua lava le iloaina.

○ taimi o taua po o le le mau-tonu o loo i ai se auala e faaleleia ai lo tatou taulai atu i mea e matua taua lava.

O le Tauga Lona II a le Lalolagi o se taimi lea o le atuatuvaile sili faale-agaga mo au. Sa ou tuua lo’u aiga i Brigham City, Iuta, ma sina vaega o se molimau, ma sa ou lagona le manaoga mo se mea e sili atu. Toetiiti lava o lo matou vasega faauu uma o le a agai atu i le taua i ni nai vaiaso. A o ou i ai i le motu o Ie Shima, i le itu i matu o Okinawa, Iapani, sa ou tauivi ai ma le masalosalo ma le le mautonu. Sa ou manao i se molimau patino o le talalelei. Sa ou fia *iloi!*

I se tasi o po lēmamoe, sa ou tuua ai lo’u faleie ma mauulu atu i totonu o se malutaga lea na fatuina i le faatutu o paelo tai 50 kalone sa i ai penisini ua tutumu i oneone ma sa tuu le tasi i luga o le isi e fatu ai sina apitaga. Sa leai se tualuga, ma o lea sa ou tolotolo i ai i totonu, tilotilo i luga i le lagi na faatumulia i fetu, ma tootuli e tatalo.

Na tupu ina ua lata i le ogatotonu o le fuaiupu. E le mafai ona ou faamatala atu ia te outou le mea na tupu pe afai ou te manao e tau atu. E le mafai ona ou faamatalaina, ae e manino lava i le asō e pei lava o lena po i le silia ma le

65 tausaga ua mavae. Na ou iloaina o se faaaliga sili ona patino, ma sili ona uigaese. O le mea sili, ua ou iloaina mo au lava ia. Ua ou *iloaina* mo se faamautinoaga, aua ua tuuina mai ia te au. Ina ua mavae sina taimi, sa ou tolotolo ese mai lena nofoaga ma savali lemu i lo’u moega ma le fiafia tele. Sa ou faaalaina le po atoa i se lagona o le olioli ma le maofa.

Nai lo le manatu o au o se tagata faapitoa, sa ou mafaufau faapea afai e mafai ona oo mai sea ituaiga mea ia te au e mafai foi ona oo atu i soo se tasi. Ou te talitonu pea i ai. I tausaga na mulimuli mai, ua ou iloa ai o lea ituaiga aafiaga o se malamalama e mulimuli i ai ma se avega e amoina i lena lava taimi.

Ou te fia faasoaina atu ia te outou na upumoni lea e matua taua lava le iloaina, o mea sa ou aoaoina ma aafia ai i le toetiiti 90 tausaga o le olaga, ma silia ma le 50 tausaga o avea o se Pulega Aoao. O le tele o mea sa ou aoaoina e pa’ū i le vaega o mea e le mafai ona aoao atu ae e mafai ona aoao mai.

E pei lava o le tele o mea e sili ona taua, o le malamalama lea e avea o se mea taua e faavavau e na o le tatalo patino ma le mafaufau loloto e oo mai ai. O nei mea, faatasi ai ma le anapogi



ma le suesue i tusitusiga paia, o le a valaauina ai ia uunaiga ma faaaliga ma musumusuga a le Agaga Paia. O le a saunia e nei mea i tatou mo faatonuga mai le lagi a o tatou aoao lea mataupu i luga o lea mataupu.

Ua folafola mai e faaaliga “soo se mataupu autu o le atamai tatou te maua i le olaga lenei, o le a tu mai faatasi ma i tatou i le toetutu” ma o le “poto ma le tomai sili atu [o le a mauaina] i le . . . filiga ma le usiusitai” (MF&F 130:18–19).

O se tasi o upumoni e faavavau ua ou iloa e faapea o loo soifua le Atua. O Ia o lo tatou Tama. O i tatou o Ana

fanau. “Matou te talitonu i le Atua, le Tama Faavavau, ma Lona Alo, o Iesu Keriso, ma le Agaga Paia” (Mataupu Faavae o le Faatuatua 1:1).

Mai isi faalagiga uma e mafai ona Ia faaaogaina, na Ia filifili lava ina ia valaauina o Ia o le “Tama.” Na fetalai mai le Faaola, “O lenei, ia faapea ona outou tatalo, Lo matou Tama e, o i le lagi” (3 Nifae 13:9; tagai foi Mataio 6:9). O Lona faaaogaina o le suafa “Tama” o se lesona lea mo tagata uma ina ia malamalama ai i le mea e sili ona taua i lenei olaga.

O le tulaga faamatua o se avanoa paia, ma e tusa ai ma le faamaoni, e

mafai ona avea o se faamanuiaga e faavavau. O le taunuuga sili o gaoioiga uma i le Ekalesia o le mafai lea e se alii ma lana ava ma le la fanau ona maua le fiafia i le aiga.

E le o taofia mai ia i latou o e le faaipoipo po o i latou e le mafai ona maua ni fanau, ia faamanuiaga e faavavau o loo latou sailia ae, mo le taimi nei, e le o mafai ona latou aapa atu i ai. Tatou te le iloa i taimi uma pe faapefea pe o afea o le a oo mai ai faamanuiaga, ae o le a le taofia folafolaga o le uluola e faavavau mai soo se tagata faamaoni o loo osia ma tausia feagaiga paia.

O ou faanaunaga faalilolilo ma olega loimatā o le a pai atu i finagalo uma o le Tama ma le Alo. O le a e mauaina se faamautinoaga patino mai ia i Laua e faapea o le a faatumuina lou olaga ma e leai se faamanuiaga e taua o le a taofia mai ia te oe.

I le avea ai ma se auauna a le Alii, ma galue ai i le tofi lea ua faauuina ai au, ou te tuuina atu ai ia i latou o i ai i ia tulaga se folafolaga o le a leai se mea e taua i lou faaolataga ma faaeaga o le a le mafai ona tuuina atu ia te oe i le taimi e tatau ai. O le a faatumulia ia lima o gaogao i le taimi nei, ma o loto o loo tiga i le taimi nei mai miti ma moomooga le taulau o le a faamaloloina.

O le isi upumoni ua ou iloa ina, e moni le Agaga Paia. O Ia o le sui lona tolu o le Aiga Atua. O Lana galuega o le molimau i le upumoni ma le amiotonu. Na te faaali mai o Ia Lava i le tele o auala, e aofia ai lagona o le filemu ma le faamautinoaga. Na te aumaia le faamafanafanaga, taitaiga, ma aoaiga pe a manaomia. E tumau pea i o tatou olaga atoa le mafutaga a le Agaga Paia e ala i le ola amiotonu.

O le meaalofa o le Agaga Paia ua tuuina atu e ala i se sauniga o le tala-lelei. E faaee atu e se tasi o i ai le pule ona lima i luga o le ulu o se tagata fou



Aai o Mekisiko, Mekisiko

o le Ekalesia ma fai atu upu nei: “Talia le Agaga Paia.”

E le suia i tatou e lenei sauniga i se auala iloagofie, ae afai tatou te faalogo ma mulimuli i musumusuga, o le a tatou maua le faamanuiaga o le Agaga Paia. E mafai e atalii ma afafine taitoatasi a lo tatou Tama Faalelagi ona iloaina le moni o le folafolaga a Moronae: “Ma o le mana o le Agaga Paia e mafai ona outou iloa ai le *moni* o mea uma lava” (Moronae 10:5; faa-poopoo le faamamafa).

O se upumoni faalelagi lea na ou mauaina i lou olaga o lau molimau lea i le Alii o Iesu Keriso.

O le mea tupito ma lagolagoina o mea uma tatou te faia, o loo taula i ai faaaliga uma, o le suafa lea o le Alii, o le pule lea o loo tatou galulue ai i le Ekalesia. O tatalo uma o ofoina atu, e oo lava i tamaiti laiti, e faaiu i le suafa o Iesu Keriso. O faamanuiaga uma, sauniga uma, faauuga uma, o galuega aloaia uma e faia lea i le suafa o Iesu Keriso. O Lana Ekalesia lenei, ma o loo faasuafaina ia te Ia—O Le Ekalesia a Iesu Keriso o le Au Paia o Aso e Gata Ai (tagai MF&F 115:4).

E i ai se mea maoae na tupu i le Tusi

a Mamona lea “na tatalo atu ai [sa Nifae] i le Alii i Tama i le suafa [o le Alii].” Sa faaali mai le Alii ma fetalai atu:

“O le a se mea ua outou mananao ou te tuu atu ia te outou?”

“Ma sa latou fai mai ia te ia: Le Alii e, matou te mananao sei e fofoga mai ia te i matou le igoa matou te faaigoa ai lenei ekalesia; ona o loo i ai ni finauga i totonu o le nuu e faatatau i lenei mataupu.

“Ma sa fetalai atu le Alii ia te i latou: E moni, e moni, ou te fai atu ia te outou, aisea ea ua tomumumu ma finau ai le nuu ona o lenei mea?”

“Latou te lei faitau ea i tusitusiga paia, ia ua fai mai e ao ina outou ave i o outou luga le suafa o Keriso, o lou igoa lea? Ona o le igoa lea o le a valaau ai outou i le aso gataaga;

“Ma o soo se tasi na te ave i ona luga lou igoa, ma tumau seia oo i le iuga, o ia lava lea o le a faaolaina. . . .

“O lea, soo se mea tou te faia, ia outou faia i lou igoa; o lea ia outou faaigoa ai le ekalesia i lou igoa; ma ia outou valaau atu i le Tama i lou igoa ia faamanuia mai o ia i le ekalesia ona o au” (3 Nifae 27:2–7).

O Lona suafa, o Iesu Keriso, “e leai

lava se isi igoa i lalo o le lagi ua foaina mai i tagata e mafaia ona faaolaina ai o i tatou” (Galuega 4:12).

I le Ekalesia ua tatou iloa o Ia: o Iesu Keriso o le Alo o le Atua. O Ia o le Alo e Toatasi na Fanaua e le Tama. O Ia o le na fasiotia ma o Ia o le na toe soifua mai. O Ia o loo tatou Fautua i le Tama. “Manatua o luga lava o le papa o loo tatou Togiola, o lē o Keriso lea, le Alo o le Atua, e ao ina [tatou] atinae ai lo [tatou] faavae” (Helamana 5:12). O Ia o le taula lea e taofia i tatou ma puipuia i tatou ma o tatou aiga i āfā o le olaga.

O Aso Sa taitasi i le salafa o le lalo-lagi lea o loo potopoto faatasi ai au paia o soo se atunuu po o gagana, e faamanuia le faamanatuga i upu lava e tasi. Tatou te ave i o tatou luga le suafa o Keriso ma manatua pea o Ia. O loo tamauina lenei mea i o tatou luga.

Na tautino mai le perofeta o Nifae, “Ua matou tautalatala e uiga ia Keriso, ua matou olioli ia Keriso, ua matou talai atu Keriso, ua matou vavalo e uiga ia Keriso, ma ua matou tusitusi foi e tusa ma a matou valoaga, ina ia mafai ona iloa e a matou fanau po o le a le puna e mafai ona latou tepa taulai i ai mo se faamagaloga o a latou agasala” (2 Nifae 25:26).

E tatau ona tofua maua uma e i tatou sa tatou lava molimau e uiga i le Alii o Iesu Keriso. Ona tatou faasoa atu lea o lenei molimau i o tatou aiga ma isi.

I nei mea uma e le tatau ai ona galo ia i tatou o loo i ai se fili o loo saili patino e faalavelave i le galuega a le Alii. E tatau ona tatou filifili po o ai e mulimuli i ai. O loo tatou saogalemu e faigofie lava e pei o le filifili taitoatasi e mulimuli i le Faaola, faamautinoa o le a tatou tumau faamaoni i Lana itu.

I le Feagaiga Fou, ua tusia ai e Ioane na i ai nisi o e na le mafai ona tautino atu i le Faaola ma Ana aoaoga ma “talu ai ua o ese isi o ona soo e toatele i tua, a e lei toe feoi i latou ma ia.

“Ona faapea atu lea o Iesu i le toasefulu ma le toalua, Pe tou te fia o ese foi?

“Ona tali mai lea o Simona Peteru ia te ia, Le Alii e, a matou o ea ia te ai? O ia te oe upu o le ola e faavavau.

“Ua matou talitonu, ma ua matou iloa o oe o le Keriso, o le Alo o le Atua soifua” (Ioane 6:66–69).

Na maua e Peteru lena mea lea na le mafai ona iloina e soo uma o le Faaola. O le tuuto faamaoni atu ia Iesu Keriso, o le tatou talia lea o Ia o lo tatou Faaola ma faia mea uma i lo tatou malosi e ola ai i Ana aoaoga.

Mai tausaga uma ua ou ola ai ma aoao atu ma auauna atu, ma mai le faitau miliona o maila ua ou faimalaga ai i le salafa o le lalolagi, ma i aafiaga uma ua ou maua, e i ai se upumoni maoae ou te fia faasoa atu. O lau molimau lea i le Faaola o Iesu Keriso.

Na tusia e Iosefa Samita ma Sini Rikitone lenei mea e uiga i se aafiaga paia:

“Ma o lenei, ina ua mavae le tele o molimau ua tuuina mai e uiga ia te ia, o le molimau mulimuli lenei, i molimau uma, ma te tuu atu e uiga ia te ia: O loo soifua o ia!

“Aua sa ma vaai ia te ia” (MF&F 76:22–23).

O a laua upu o au upu ia.

Ou te talitonu ma ou mautinoa o Iesu o le Keriso, o le Alo o le Atua ma o loo soifua o Ia. O Ia o le Alo e Toatasi na Fanaua e le Tama, ma e “ala mai ia te ia, ma o ia, ua i ai lalolagi ma na foafoaina, ma o e ua nonofo ai o atalii ma afafine fanauina mo le Atua” (MF&F 76:24).

Ou te tuuina atu lau molimau o loo soifua le Faaola. Ua ou *iloa* le Alii. O au o Lana molimau. Ua ou iloa Lana taulaga maoae ma le alofa e faavavau mo fanau uma a le Tama Faalelagi. Ou te tuu atu lau molimau faapitoa i le lotomaualalo ato ma le mautinoa a’ia’i i le suafa o Iesu Keriso, amene. ■



Saunia e Elder William R. Walker

○ Le Fitugafulu

Ola Tutumau i Faatuatuaga

O le a matua faamanuiaina i tatou taitoatasi pe afai tatou te iloa tala o le faatuatua ma le ositaulaga sa taitaia ai o tatou tuua ia auai i le Ekalesia a le Alii.

Ou te fiafia i talafaasolopito o le Ekalesia. Atonu e pei o le toatele o outou o lo’u faatuatua lava ia e faamalosalia pe a ou aoao e uiga i le tuuto maoae o o tatou tuua o ē na taliaina le talalelei ma sa ola tutumau i faatuatuaga.

I le masina ua mavae, sa faamanatu ai e talavou matagofie e 12,000 mai le Itu o le Malumalu o Gilbert Arisona le faamaeaina o le latou malumalu fou i faafiagi mataina, ma le faatinoina o lo latou tautinoga ia ola amiotonu. O le autu o le latou faafiagi o le “Ola Tutumau—i Faatuatuaga.”

E pei ona faia e na talavou faamaoni i Arisona, e tatau foi ona tautino atu tagata taitoatasi o le Au Paia o Aso e Gata Ai ia “ola tutumau i faatuatuaga.”

Fai mai upu o le pese, “Ia tutumau i faatuatuaga na pele i matua” (“Vaivai ‘Ea Fanau a Siona,” *Viiga*, nu. 159).

E mafai ona tatou faaopoopo i ai le, “Ia tutumau i faatuatuaga na pele i tatou matua matutua.”

Sa ou mafaufau pe na silafia e na talavou naunautai taitoatasi o Arisona a latou lava talafaasolopito o le Ekalesia—pe na latou silafia le talafaasolopito o le auala na avea ai o *latou* aiga

ma tagata o le Ekalesia. O le a avea ma se mea matagofie pe afai e silafia e Au Paia uma o Aso e Gata Ai tala o le liuaina o o latou tuua.

E tusa lava pe o oe o se tupuaga o paionia pe leai, o le talatuu o paionia Mamona o le faatuatua ma le ositaulaga, o lou talatuu lena. O le talatuu tautupu o Le Ekalesia a Iesu Keriso o le Au Paia o Aso e Gata Ai.

O se tasi o mataupu e sili ona matagofie i le talafaasolopito o le Ekalesia na tupu ina ua aoao atu e Uilifoti Uutilafi, o se Aposetolo a le Alii, le talalelei a Iesu Keriso i Peretania Tele i le 1840—na o le 10 tausaga talu ona faavaeina le Ekalesia.

Sa taulai atu e Uilifoti Uutilafi ma isi Aposetolo a latou galuega i eria o Liverpool ma Preston i Egelani, ma sa matua faamanuiaina tele. O Elder Uutilafi, o lē sa mulimuli ane avea ma Peresitene o le Ekalesia, sa tatalo e le aunoa i le Atua e taialaina o ia i lenei galuega taua tele. O ana tatalo na taitai atu ai i ni musumusuga e malaga i se isi nofoaga ese e aoao atu ai le talalelei.

Sa aoao i tatou e Peresitene Monson pe a tatou maua lenei musumusuga mai le lagi e faia se mea—ia tatou faia

nei loa—tatou te lē tolopoina. O le mea tonu lena sa faia e Uilifoti Uutilafi. Faatasi ai ma le taitaiga manino mai le Agaga e “malaga i saute,” na toetoe lava a tuua ai e Elder Uutilafi i le taimi lava lena ma malaga atu ai i se vaega o Egelani ua faaigoaina o Herefordshire—o se atunuu faifaatoaga i sautesasae o Egelani. O iina sa ia feiloai ai i se faifaatoaga faamanuiaina e suafa ia John Benbow, lea sa talia ai o ia “ma le loto fiafia ma le agaga faafetai” (Uilifoti Uutilafi, i le Matthias F. Cowley, *Uilifoti Uutilafi: History of His Life and Labors as Recorded in His Daily Journals* [1909], 117).

O se vaega e silia ma le 600 tagata, o e na faaigoaina i latou lava o Usoga Tuufaatasi, sa “tatalo mo le malamalama ma le upumoni” (Uilifoti Uutilafi,

i le *Aoaoga a Peresitene o le Ekalesia: Uilifoti Uutilafi* [2004], 91). Sa auina atu e le Alii ia Uilifoti Uutilafi o se tali i a latou tatalo.

O aoaoga a Elder Uutilafi sa vave ona fua mai ai ni taunuuga, ma sa papatisoina le toatele. Sa faatasi atu i ai Polika Iaga ma Willard Richards i Herefordshire, ma na ofoofogia le faamanuiaina ai o Aposetolo e toatolu.

I ni nai masina, sa latou faatulagina ai paranesi e 33 mo tagata e 541 na auai i le Ekalesia. Sa faaauau pea la latou galuega maoae, ma na iu ai na toetoe o tagata uma o le Usoga Tuufaatasi na papatisoina i totonu o Le Ekalesia a Iesu Keriso o le Au Paia o Aso e Gata Ai.

O le tina o le tama o le tina o lo’u tama o Hana Maria Eagles, o sē tasi

o uluai tagata na faafofoga ia Uilifoti Uutilafi. Sa ia logoina lona toalua, o Ropati Harisi le Itiiti, e faapea sa ia faalogo i le afiga a le Atua ma sa ia naunau ia papatiso. Sa le’i fiafia Ropati e faalogo atu i le lipoti a lona toalua. Sa ia tau atu ia te ia o le a la o faatasi i le isi lauga e tuuina atu e faifeautalai Mamona, ma o le a ia faasa’oina le faifeautalai.

A o nofo latalata i luma o le faapopotoga, faatasi ai ma se naunautaiga ia lē tosina atu i le lauga, ma atonu e mafai ona faapalopalo i le faifeau asiasi mai, na vave ona to’ia Ropati e le Agaga, e pei ona oo ai lona toalua. Sa ia iloaina e moni le savali o le Toe-fuataiga, ma sa papatisoina ai o ia ma lona toalua.

O le la tala o le faatuatua ma le tuuto e talitutusa ma le isi faitau afe o tala: ina ua latou faalogo i le savali o le talalelei, sa latou iloaina e moni!

E pei ona fetalai mai le Alii, “O a’u mamoe e faalogo mai i latou i lo’u leo, ua ou iloa foi i latou, ua latou mulimuli mai foi ia te au” (Ioane 10:27).

I le faalogo ai i le leo o le Leoleo Mamoe, sa latou tuuto atu ma le atoatoa o latou olaga i le ola ai i le talalelei ma mulimuli i le taitaiga a le perofeta a le Alii. I le tali atu i le valaau e faapopototo i Siona, sa latou tuua o latou aiga i Egelani, ma sopoia le Vasa o Atalani, ma faapopototo atu faatasi ma le Au Paia i Navu, Ilinoi.

Sa latou taliaina le talalelei ma o latou loto atoa. A o taumafai e faamautu o latou aiga fou [i Navu], sa latou fesoa-soani atu i le fausiaina o le Malumalu o Navu e ala i le faasefuluiaiina o a latou galuega—i le faaaluina lea o aso lona 10 uma e galulue ai i le fausiaina o le malumalu.

Sa matua nutimomoia o latou loto ina ua latou maua le tala e uiga i le maliu a lo latou perofeta pele, o Iosefa Samita, ma lona uso o Ailama. Ae sa



latou faaaauau pea! Sa latou tutumau i faatuatuaga.

Ina ua sauaina le Au Paia ma tuliese mai Navu, sa lagona e Ropati ma Maria le faamanuiaina tele i le mauaina o o laua faaeega paia i le malumalu, i sina taimi puupuu ae latou te le i sopoia le Vaitafe o Misisipi ma agai atu i sisifo. E ui sa latou lē mautonu i mea o le a i ai o latou lumanai, ae sa latou mautinoa lava e uiga i o latou faatuatua ma o latou molimau.

Faatasi ai ma le fanau e toaono, sa faigata ona latou savavali i le palapala a o latou sopoia Aioua i la latou malaga i sisifo. Sa latou fausia mo i latou lava se fale le tumau i autafa o le Vaitafe o Misuri lea sa ta'ua mulimuli ane o Uinita Kuota.

O nei paionia lototoa sa faatalitali mo se taitaiga faaaposetolo i le auala ma po o afea o le a latou agai atili ai i sisifo. Na suia fuafuaga a tagata uma ina ua tuuina atu e Polika Iaga, o le Peresitene o le Korama a le Toasefulu-lua, se valaau mo alii e volenitia e au-auna atu i le Vaegaau a le Iunaite Setete lea sa taua o le Autau Mamona.

Sa avea Ropati Harisi le Itiiti ma se tasi o alii paionia Mamona e silia ma le 500 o ē sa tali atu i lena valaau mai ia Polika Iaga. Sa ia auai i le [Autau Mamona], e tusa lava pe o le a tuua ai lona toalua maitaga ma le fanau iti e toaono.

Aisea na ia faia ai ma isi alii lea mea?

E mafai ona tuuina atu le tali i upu lava a le tamamatua o lo'u tamamatua. I se tusi sa ia tusia mo lona toalua ina ua faia se malologa puupuu a le autau e agai atu i Santa Fe, sa ia tusia, "Ua atili ona malosi lou faatuatua [ma pe a ou mafaufau i mea sa tau mai e Polika Iaga ia i matou], ou te talitonu e tutusa lava e peiseai na tau mai e le Atua Sili ia te au."

I se aotelega, sa ia iloa sa ia faalogo i se perofeta a le Atua, e pei ona sa



faia e isi alii. O le mea lena sa latou faia ai lena mea! Sa latou iloa sa taitaiina i latou e se perofeta a le Atua.

I lena lava tusi, sa ia faamatalaina ai ona lagona alofa mo lona toalua ma le fanau ma sa ia faamatalaina ana tatalo e le aunoa ina ia faamanuiaina o ia ma lana fanau.

Mulimuli ane i le tusi, sa ia faia ai se faamatalaga mamana: "E le tatau ona ta faagaloina mea sa ta faalogo i ai ma [lagonaina] i totonu o le Malumalu o le Alii."

I le tuufaatasia ai ma lana uluai molimau e faapea "o loo taitaia i matou e se Perofeta a le Atua," o nei apoapo-aiga paia e lua ua avea e pei o ni mau ia te au.

I le mavae ai o le sefuluvalu masina talu ona malaga ese atu ma le autau, sa toefaatasia ai ma le saogalemu Ropati Harisi ma lana pele o Maria. Sa laua tumau ma le faamaoni i le talalelei toefuataiina i o laua olaga atoa. Sa laua maua se fanau e 15, e 13 na soifua o ni tagata matutua. O lo'u tinamatua o Fannye Walker, o Raymond, Alberta, Kanata, sa avea o se tasi o a laua fanau a fanau e 136.

Sa mitamita Tinamatua Walker i le mea moni e faapea o lona tamamatua

sa auaina atu i le Autau Mamona, ma sa ia manao ia iloa uma e fanau a lana fanau. O lea la ua avea au ma tamamatua, ua ou malamalama i le mafuaaga na taua tele ai ia te ia. Sa ia manao e liliu atu loto o fanau i o latou tama. Sa ia manao ia iloa e fanau a lana fanau o latou tupuaga amiotonu—aua sa ia iloa o le a manuia ai o latou olaga.

O le tele o lo tatou lagonaina o le fesootai ma o tatou tuua amiotonu, o le a atili foi lena o lo tatou faia o filifiliga poto ma le amiotonu.

Ma e moni lenei mea. O le a matua faamanuiaina i tatou taitoatasi pe afai tatou te iloa tala o le faatuatua ma le ositaulaga sa taitaia ai o tatou tuua ia auai i le Ekalesia a le Alii.

Mai le taimi muamua sa faalogo ai Ropati ma Maria ia Uilifoti Uutilafi o loo aoao atu ma molimau atu i le Toefuataiga o le talalelei, sa laua iloa e moni le talalelei.

Sa laua iloa foi e tusa lava pe o a tofotofoga po o faigata o le a la o'o i ai, o le a faamanuiaina lava i laua mo le faamaoni ai i le faatuatua. Na toetoe lava foliga mai sa laua lagonaina upu a lo tatou perofeta i aso nei, o lē na saunoa mai, "E leai se taulaga e telē naua . . . ia maua ai [le] faamanuiaga

[o le malumalu]" (Thomas S. Monson, "O Le Malumalu—O Se Sulu Ta'iala i le Lalolagi," *Liahona*, Me 2011, 92).

O loo lolomiina i pito o le tupe siliva e lua pauna a le Malo o Peretania, "Manuia i Galuega a Tagata Faatuatua." A ou mafaufau i o tatou tuua paionia, ou te lagona ua tatou manuia *uma* ona o le faatuatua o i latou na muamua atu.

E ui lava na oo mai le apoapoaiga mai se tusi a Ropati Harisi, ae ou te talitonu e toatele naua ni tuua o le a auina atua le savali lava lea e tasi i a latou fanau ma fanau a fanau: Muamua, e le tatau ona tatou faagaloina aafiaga ua tatou mauaina i le malumalu, ma e le tatau ona tatou faagaloina folafolaga ma faamanuiaga e oo mai ia i tatou taitoatasi ona o le malumalu. Lona Lua, e le tatau ona tatou faagaloina o loo taitaiina i tatou e se perofeta a le Atua.

Ou te molimau atu o loo taitaiina i tatou e se perofeta a le Atua. Ua toefuatai mai e le Alii Lana Ekalesia i aso e gata ai e ala i le Perofeta o Iosefa Samita, ma e le tatau ona tatou faagaloina o loo taitaiina i tatou e ala i se faagasologa lemamotusiaina o perofeta a le Atua mai ia Iosefa ia Polika ma faaauau mai ai lava i Peresitene taitasi o le Ekalesia na sosoo ai seia oo mai i lo tatou perofeta i aso nei—o Thomas S. Monson. Ou te iloa o ia, ou te faamamalu o ia, ma alofa ia te ia. Ou te molimau atu o ia lava o le perofeta a le Alii i le lalolagi i le aso.

O le manao o lou loto, faatasi ai ma lau fanau ma le fanau a fanau, o le a tatou faamamaluina le talatuu a o tatou tuua amiotonu—o na paionia Mamona faamaoni o ē na naunau e tuu mea uma i luga o le fata faitaulaga ia osi ai taulaga ma puipuia ai lo latou Atua ma lo latou faatuatua. Ou te tatalo o le a taitasi i tatou ma tutumau moni i faatuatua na pele i matua. I le suafa paia ma mamalu o Iesu Keriso, amene. ■



Saunia e Elder L. Tom Perry

O Le Korama a Aposetolo e Toasefululua

Usiusitai e ala i lo Tatou Faatuatua

O le usiusitai o le faatusa lea o lo tatou faatuatua i le atamai ma le mana o le pule silisiliese, o le Atua lea.

O le ma afiafi faaleaiga ma Sister Perry i po o Aso Gafua taitasi ua faafuasei ona faateleina le toatele. O lo'u uso, o lona afafine, o le tuagane o Barbara, ma le tama teine a lo'u tuafafine ma lona toalua ua masi'i mai i le eria o loo ma nonofo ai. Ua pau lea o le taimi ua faamanuia ai au i le nonofo latalata mai o lo'u aiga ia te au talu mai lo'u laitiiti. I lena taimi, sa nonofo lo'u aiga i le poloka lava e tasi ma le toatele o tagata o le aiga lautele o lo'u tina. O le fale o tamamatua o Sone sa i talaane o le matou fale i le itu i matū, a o le fale o le uso matua o lo'u tina ia Ema sa i talaane o le matou fale i le itu i saute. I le itu i saute o le poloka sa nofo ai le isi uso matua o lo'u tina ia Sosefina, i le itu i sasae o le poloka na nofo ai le tuagane matua o lo'u tina ia Alema.

I le taimi o lou laitiiti, sa matou faifai mea ma tagata o lo matou aiga lautele i aso uma ma fefaasoai ni taimi e galulue ai, taaalo, ma feasiafia'i. Sa lē mafai ona matou faia ni mea faalelei e aunoa ma se lipoti e vave ona oo atu i o matou tina. Ua eseese o matou olaga i le taimi nei—ua salalau solo le toatele o tagata o aiga. E tusa lava pe o nonofo felataa'i i le tasi ma le isi, ae

e le masani ona sosoo ia fale. Peitai, e tatau lava ona ou talitonu o tulaga a o ou laitiiti ma le taimi lenei e tai pei lava o sina vaega o le lagi, i le felataa'i o mea e nonofo ai tagata pele o aiga. Ua avea lea ma se faamanatu faifai pea ia te au e uiga i le natura o le iunite faaleaiga.

A o ou tuputupu ae, sa i ai se ma mafutaga faapitoa ma lou tamamatua. O a'u o le atalii ulumatua i le aiga, sa ou saluina le kiona mai le ala savali i le taumalulu ma tausia le lotoa i le taumafanafana mo lo matou aiga, le fale o tamamatua, ma fale a uso o lo'u tina e toalua. E masani lava ona nofonofo tamamatua i luma o le poletito a o ou moaina lana vao. Pe a uma ona ou [moaina le vao], ona ou saofai lea i luma o le faasitepu ma ma eva ai. O na taimi o ni manatuaga faapelepele mo au.

I se tasi aso sa ou fesili ai i lou tamamatua pe faapefea ona ou iloa o loo ou faia pea le mea sao, ona o le tele o filifiliga ua aumaia e le olaga. E pei o le masani a lou tamamatua, e tali mai lava ia te au ma se aafiaga mai le olaga faifaatoaga.

Sa ia aoao mai ia te au e uiga i le aoaoina o ni solofanua se lua ina



ia mafai ona la galulue faatasi. Sa ia faamatala mai e tatau lava ona iloa i taimi uma e solofanua po o ai o loo taitai. O se tasi o ki o vaega manaomia e pulea ai ma taitaia ai se solofanua o le faagutu lea. Afai e talitonu se tasi o le vaega e le manaomia le usitaia o le manaoga o le o loo faatautaia ia solofanua, o le a le tosaina lava e le vaega ma galulue faatasi e faateleina lo latou gafatia.

Sei o tatou iloiloina le lesona na aoaoina ai au e lou tamamatua e faa-aoga ai lenei faataitaiga. O ai le tagata o loo faatautaia le vaega o solofanua? Na talitonu lou tamamatua o le Alii. O Ia lea o loo i ai se faamoemoega ma se fuafuaga. O Ia foi o le faiaoga ma le gaosimea o le vaega a solofanua ma, i le isi itu, o solofanua taitasi. E silafia e le o loo faatautaia le vaega o solofanua le mea sili, ma e pau le aualea e iloa ai e le solofanua o loo ia faia pea le mea sao o le usiusitai lea ma mulimuli i le taitaiga a le o loo faatautaia vaega o solofanua.

O le a se mea na faatusa i ai e lou tamamatua le faagutu? Na ou talitonu i lena taimi, e pei o lo'u talitonu i le taimi nei, na aoaoina au e lou tamamatua ina ia mulimuli i uunaiga a le Agaga Paia. Ia te ia lava, o le faagutu e faaleagaga.

O se solofanua usiusitai, lea e avea o se vaega o solofanua aoaoina lelei, e na o sina uunai itiiti lava e manaomia mai le o loo faatautaia le vaega o solofanua e faia ai le mea tonu lea na te manao e fai. O lea tamai uunai e tutusa ma le leo filemu ma le itiiti lea e fetalai mai ai le Alii ia i tatou. I le faamamaluina ai o lo tatou faitalia, e lei avea lava o se uunaiga fai faamalosi.

O alii ma tamaitai e lē amanaiaina ia uunaiga malu a le Agaga o le a tele ina aoaoina, e pei ona aoaoina e le atalii faamaumau oa, e ala i taunuuga masani o le le usiusitai ma le ola le tapasaina. Pe ana le mavae taunuuga masani na faalotomaulalo ai le atalii faamaumau oa ma “atamai ai lea o ia” ma faalogo i musumusuga a le Agaga o tau atu ia te ia e toe foi i le fale o lona tama (tagai Luka 15:11–32).

O le lesona la na aoao ai au e lou tamamatua o le saunia i taimi uma ia maua le uunaiga lemu a le Agaga. Sa ia aoaoina au o le a ou maua pea sea uunaiga pe a ou aluese mai le ala. Ma o le a le tausalaina au e ni measese sili atu ona tuga pe afai ou te faatagaina le Agaga e taitaia au i au faaiuga.

E pei ona tau mai e le Iakopo 3:3, “Faauta, ua tatou avane faagutu i gutu

o solofanua, ia latou usiusitai mai ia te i tatou, ua tatou liliu ai foi o latou tino uma.”

E tatau ona tatou nofouta i a tatou faagutu faaleagaga. E oo lava i sina uunai mai le Matai, e tatau ona tatou naunau ia sui atoa lo tatou ala. Ina ia faamanuiaina i le olaga, e tatau ona tatou aoaoina o tatou agaga ma tino ia galulue faatasi i le usiusitai i poloaiga a le Atua. Afai tatou te usitaia ia uunaiga mālū a le Agaga Paia, o le a mafai ona tuufaatasia ai o tatou agaga ma tino i se faamoemoega o le a toe taitai atu ai i tatou i lo tatou aiga e faavavau e mau ai faatasi ma lo tatou Tama faavavau i le Lagi.

O la tatou mataupu faavae o le faatuatua lona tolu, ua aoao ai i tatou e uiga i le taua o le usiusitai: “Matou te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei.”

O le ituaiga o usiusitai lea na ta'ua e lou tamamatua i lana faataitaiga e uiga i vaega o solofanua e manaomia ai foi se faatuatuaina faapitoa—o lona uiga, o se faatuatua a'ia'i i le o loo faatautaia le vaega [o solofanua]. O le mea lea, o le lesona na aoaoina ai



au e lou tamamatua, e fesootai foi i le mataupu faavae muamua o le talalelei—faatuatua ia Iesu Keriso.

Na aoao mai le Aposetolo o Paulo: “A o le faatuatua, o le faalagolago lea i mea ua faamoemoe i ai, o le mautinoa lea o mea e le o vaai” (Eperu 11:1). Ona faaoga lea e Paulo o faaitaiga a Apelu, Enoka, Noa, ma Aperaaamo e aoao atu ai le uiga o le faatuatua. Sa ia taulai atu i le tala ia Aperaaamo, aua o Aperaaamo o le tama o le au faatuatua:

“O le faatuatua na anaana ai Aperaaamo, ina ua valaauina o ia e alu i le mea o le a maua e fai mona fanua, na ia alu foi e lei iloa po o fea a alu i ai.

“O le faatuatua sa aumau ai o ia i le nuu na folafolaina, ina o fai mo tagata ese. . . .

“O le faatuatua foi na maua ai e Sara lava le malosi e fanau ai, na fanau foi o ia ina ua mavae tausaga o lona malosi, aua na manatu o ia e faamaoni mai o ia na folafola mai” (Eperu 11:8–9, 11).

Ua tatou iloa e ala mai i le atalii o Aperaaamo ma Sarai, o Isaako, na tuu atu ai se folafolaga ia Aperaaamo ma Sarai—o se folafolaga o fanau “o le a toatele pei o fetu o le lagi, pei o le one-one foi i le matafaga e le mafaitaulia”

(tagai fuaiupu 12; tagai foi Kenese 17:15–16). Ona sosoo lea ma le tofotofoina o le faatuatua o Aperaaamo i se auala e manatu le toatele o i tatou e le mafai ona mafaufauina.

Sa ou mafaufau i le tele o taimi i le tala ia Aperaaamo ma Isaako, ma ou te le o talitonu lava ua ou malamalama atoatoa i le faatuatua ma le usiusitai o Aperaaamo. Masalo e mafai ona ou vaai faalemaufau ia te ia o tapenaina ma le faatuatua ina ia malaga ese vave i se tasi o taeao, ae faafefea ona ia savali i lona ala atoa i autafa o lona atalii o Isaako, i le malaga e tolu aso i le auvae o le Mauga o Moria? Na faafefea ona latou amoina fafie mo le afi i luga o le mauga? Na faafefea ona ia fausia le fatafaitaulaga? Na faafefea ona ia saisaia Isaako ma faataatia o ia i luga o le fatafaitaulaga? Na faafefea ona ia faamatala atu ia te ia o ia o le a osi ai le taulaga? Ma pe na faafefea ona ia maua le malosi e sii ai i luga le naifi e fasioti ai lona atalii? O le faatuatua o Aperaaamo na faamalosi ai o ia ina ia mulimuli ma le atoatoa i le taitaiga a le Atua seia oo i le taimi faavavega ina ua valaau mai le agelu ia te ia mai le lagi, ma faailoa mai ia Aperaaamo ua pasi lana suega tiga. Ona toe tau mai

lea e le agelu a le Alii le folafolaga i le feagaiga faaAperaaamo.

Ua ou iloa o luitau o loo fesootai ma le mauaina o le faatuatua ia Iesu Keriso ma o le usiusitai o le a sili atu ona faigata mo nisi [tagata] nai lo isi. Ua ia te au le tele o tausaga o aafiaga e iloa ai e ui e mafai ona matua eseese ia uiga o solofanua, ma o lea, o nisi o solofanua e mafai ona faigofie atu pe sili foi ona faigata le aoaoina, ma ua sili atu le eseese o tagata. O i tatou uma o se atalii po o se afafine o le Atua, ma ua i ai so tatou tala uigaese o le muai olaga ma le olaga faaletino. Ona o lenei mea, e le o tele ai ni vaifofo o le a aoga mo tagata uma. Ma o lea ua ou iloa atoa ai le natura o tofotofoga ma mea sese o le olaga, ae o le mea e sili ona taua, o le manaomia pea o le mataupu faavae lona lua o le talalelei, o le salamo.

E moni foi o le taimi lea na soifua ai lou tamamatua sa avea o se taimi sili ona faigofie, aemaise lava pe a faatatau lea i filifiliga o le mea sao ma mea sese. E ui e ono talitonu nisi tagata popoto ma malamalama, e manaomia e o tatou taimi sili ona faigata ni vaifofo sili ona faigata, ae ou te matuai le talitonu lava ua sao i latou. Ae, ou te talitonu i lo’u mafaufau o mea faigata o lenei vaitaimi e manaomia ai mea e sili ona faigofie, e pei o le tali na tuu mai e lou tamamatua i lau fesili faamaoni e uiga i le auala e iloa ai le eseese o le va o le sao ma le sese. Ou te iloa o le mea o loo ou ofoina atu i lenei aso o se metotia faigofie, ae ou te molimau atu na aoga tele mo au. Ou te fautuaina atu lena mea ia te outou ma luitau outou ina ia faaitaitai i au upu, ma afai tou te faia, ou te folafola atu o le a latou taitaiina [e lou leo] outou i ni filifiliga manino pe a lofituina outou i ni filifiliga, ma o le a taitaiina outou [e au upu] i tali faigofie o fesili lea e faanenefu ai e atamamai ma i latou ua manatu ua popoto.

O le tele lava o taimi tatou te mafaufau ai i le usiusitai o le mulimuli-taia lea o ni poloaiga po o ni faatonuga mai se pulega maualuga e aunoa ma le mafaufau i ai. O le mea moni lava, i lona tulaga silisili, o le usiusitai o le faatusa lea o lo tatou faatuatua i le atamai ma le mana o le pule silisiliese, o le Atua lea. Ina ua faatino e Aperamo lona faatuatua ma le usiusitai le maluelue i le Atua, e oo lava ina ua poloaiina e osi le taulaga i lona atalii, na laveaiina lava; o ia e le Atua. E faapena foi, pe a tatou faaalua le faatuatua e ala i le usiusitai, o le a laveaiina i tatou e le Atua i le taimi mulimuli.

O i latou o e faalagolago atoatoa ia i latou lava ma na o o latou manaoga ma faanaunaga e mulimuli i ai ua matuai faatapulaa lava pe a faatusa lea ia i latou o e mulimuli i le Atua ma maua lona atamai, mana, ma mea-alofa. Na i ai se faaupuga faapea, “o se tasi e gauai atu ia te ia lava o se tagata lea e itiiti lona mafaufau.” O le usiusitai malosi ma le mataalia e faatatau i soo se mea e le vaivai. O le ala lea o loo tatou tautino atu ai lo tatou faatuatua i le Atua ma faagavaaina i tatou lava ina ia maua mana o le lagi. O le usiusitai o se filifiliga. O se filifiliga i le va o o tatou lava malamalama ma malosi faatapulaa ma le poto ma le silisiliese le faatapulaaina o le Atua. E tusa ai ma le lesona na tuuina mai e lou tamamataua ia te au, o se filifiliga ina ia lagona le faagutu faaleagaga i o tatou gutu ma ia mulimuli i le taitaiga a le o loo faatautai mai.

Ou te faamoemoe o le a tatou aveva ma suli o le feagaiga ma fanau a Aperamo e ala i lo tatou faatuatua ma e ala i le mauaina o sauniga o le talalelei toefuataina. Ou te folafola atu o loo avanoa faamanuiaga o le ola faavavau mo tagata uma o e faatuatua ma usiusitai. I le suafa o Iesu Keriso, amene. ■



Saunia e Elder Lawrence E. Corbridge
O Le Fitugafulu

O Le Perofeta o Iosefa Samita

O faaaliga na sasaa mai i luga o Iosefa Samita na faamautu ai o ia o se perofeta a le Atua.

O Le Uluai Faaaliga

O se alii talavou sa faitauina le Tusi Paia, ma tau lana vaai i se fuaitau o mau. O le taimi lea o le a suia ai le lalolagi.

Sa ia naunau ia iloa po o fea o lotu o le a mafai ona taitai atu o ia i le upu-moni ma le faaolataga. Sa ia faaitaia toetoe lava o mea uma, ma o lea ua ia liliu atu ai i le Tusi Paia ma faitau ia upu nei: “A e afai ua leai se poto i so

outou ina ole atu ia i le Atua, o le foai tele mai i tagata uma ma le le toe tau-taua; ona foaiina mai ai lea ia te ia.”¹

E mafaufau i ai o ia i le tele o taimi. O le uluai susulu o le malamalama na ati atu i le pogisa. O le tali ea lea, o le ala e aluese ai mai le atuatuvaale ma le pogisa? Mata e faigofie faapenei? Ole atu i le Atua ma o le a Ia tali mai? Na filifili o ia mo se taimi umi pe tatau ona ia fesili i le Atua pe tumau ai pea i le pogisa ma le atuatuvaale.

Ma e ui i lona naunau sa i ai, na te lei tamoe i se tulimau filemu ma fai faatopetope se tatalo. E na o le 14 ona tausaga, ae sa na fia vave iloa, peitai e le o ia o se tagata faanatinati. O lenei tatalo sa le o se tatalo masani. Sa ia filifili le mea e alu i ai ma le taimi e faia ai. Sa ia saunia e talanoa i le Atua.

Ona oo mai lea o le aso. O le taeao o se aso matagofie ma le manino, i le amataga o le tautotogo o le [1820].² Na savali atu ai na o ia i le filemu o le togavao e lata ane i lalo o laau o loo faamalumu mai i ona luga. Sa ia tau-nuu i le nofoaga lea na ia muai filifilia e alu i ai. Sa ia tootuli ma tuuina atu manaoga o lona loto.

Sa ia faamatalaina le mea na sosoo ai na tupu:





“Na ou vaaia ai se malamalama faaniutu i luga ae tonu lava o lou ulu, ua sili atu le pupula i le la, ua alu ifo malie lava seia oo mai i ou luga.

“. . . Ina ua oo mai le malamalama i ou luga, sa ou vaaia ni Tagata se toalua, o lo laua pupula ma le mamalu e le mafaamatalaina, o tutu mai i ou luga ae i le ea. Sa fetalai mai le tasi o i laua ia te au, ma fofoga mai ia te au i lou igoa ma fetalai mai, ao tusi ane i le tasi—[Iosefa,] *O Lou Atalii Pele lenei. Faalogo ia te Ia!*”³

E na o le 24 tausaga mulimuli ane, o le a maliu ai Iosefa Samita ma lona uso o Ailama ona o mea na amata iinei.

Tetee

Na fai mai Iosefa i lona 17, na tau atu e se agelu ia te ia o lona “igoa o le a tauleleia ma tauleagaina i totonu o atunuu uma, . . . i totonu o nuu uma.”⁴ O loo faaaauu pea ona faataunuuna lenei valoaga ofoofogia i lenei vaitaimi a o salalau atu Le Ekalesia a Iesu Keriso o le Au Paia o Aso e Gata Ai i le lalolagi atoa.

O le tetee, faitio, ma le ita o soa ia o le upumoni. Soo se taimi lava e faaalua ai se mea moni e faatatau i le faamoemoega ma le taunuuga o

tagata, o le a i ai lava pea se vaega e tetee i ai. Na amata ia Atamu ma Eva i le Faatoaga i Etena, ma faaaauu atu ai i le galuega talai a Keriso, ma oo mai i o tatou aso, na i ai lava pea ma o le a avea pea o se taumafaiga ina ia faasese, taitai ese, tetee, ma faatoilalo le fuafuaga o le ola.

Ia saili mo le Tagata na matua sili ona sauaina ma le le amiotonu nai lo isi uma tagata lea na sili ona faiesea, tofotofoina, ma teenaina, sauaina, tuulafoaiina, ma faasatauroina, o se Tasi na afio ifo . . . i lalo o mea uma, ma o iina o le a e maua ai le upumoni, o le Alo o le Atua, o le Faaola o tagata uma. Aisea na latou le tuu ai pea ia o Ia?

Aisea? Aua o Ia o le upumoni, ma o le a teena pea lava le upumoni.

Ona saili lea o se tasi o le sa au-maia se isi molimau ia Iesu Keriso ma isi tusitusiga paia, saili mo se tasi sa avea ma mea faigaluega lea na toefuataiina le atoaga o le talalelei ma le Ekalesia a Iesu Keriso i le fogaeleele, saili mo ia ma faamoemoe e maua ai le tele o mea leaga na faia i ai e tagata. Aisea e le tuu ai pea o ia?

Aisea? Aua na ia aao atu le upumoni, ma o le a teena pea lava le upumoni.

O Le Tafe Mai o Faaaliga

O faaaliga na sasaa mai i luga o Iosefa Samita na faamautu ai o ia o se perofeta a le Atua. Sei o tatou tagai i nisi o na mea, tau lava ina tagai i nisi o upu o le malamalama ma le upumoni o faaaliga e ala ia te ia lea na susulu matilatila e iloa ai le eseese e talitonuga masani o lona vaitaimi ma i tatou:

- O le Atua o se tagata faaeaina ma patino, o le Tama Faavavau. O Ia o lo tatou Tama.
- O le Atua le Tama, Iesu Keriso, ma le Agaga Paia o ni tagata mavaevae.⁵
- Ua sili atu outou i lo tagata. O outou o fanau a le Atua le Tama Faavavau, ma e mafai ona e avea e faapei o Ia⁶ pe afai o le a e maua le faatuatua i Lona Alo, salamo, maua sauniga, maua le Agaga Paia, ma tumau seia oo i le iuga.⁷
- O le Ekalesia a Iesu Keriso i aso nei e tutusa lelei lava ma le Ekalesia na Ia faavaeina i le taimi o Lana galuega i la le tino, faatasi ma perofeta ma aposetolo, Perisitua Mekisateko ma le Perisitua faa-Levi, toeaina, faitaulaga sili, tiakono, aao, epikopo, ma fitugafulu, e pei ona faamatalaina uma mai i le Tusi Paia.

- Sa taofia le pule o le perisitua mai le lalolagi ina ua mavae le maliliu o le Faaola ma Ana Aposetolo ma sa toefuataiina mai i o tatou aso.
- E lei motusia faaaliga, ma e lei tapunia ia lagi. O loo fetalai mai le Atua i perofeta i nei vaitaimi, ma o le a ia fetalai mai foi ia te oe ma au.⁸
- E tele atu isi mea pe a mavae lenei olaga nai lo le na o le lagi ma seoli. E i ai tikeri o le mamalu, ma e taua tele mea o tatou faia i lenei olaga.⁹
- E sili atu nai lo mauaina o se talitonuga e aunoa ma galuega ia Keriso ua tataua ona tatou “vaai [atu] ia te [Ia] i mafaufauga uma,”¹⁰ “faia mea uma [tatou] te faia i le suafa o le Alo,”¹¹ ma ia “manatua pea o ia ma tausi i ana poloaiga . . . ina ia [tatou] maua pea lona Agaga e faatasi ma i [tatou].”¹²
- O le faitau piliona o se soifua mai ma maliliu e aunoa ma le talalelei ma sauniga manaomia mo le faaolataga e le o leiloloa. E auala mai i le Togiola a Keriso, o le a “mafai ai ona faaolaina [tagata uma], e ala i le usiusitai i tulafono ma sauniga o le Talalelei,”¹³ lea o loo faagaioia mo e uma o soifua ma e ua maliliu.¹⁴
- E lei amataina mea uma i le fanau mai. Sa outou nonofo muamua i le afioaga o le Atua o Sona atalii po o se afafine ma saunia mo lenei olaga faaletino.¹⁵
- O le faaipoipoga ma aiga e le o se tu masani lea a tagata sei vagana ai ua tatou feoti. O le faamoemoega o nei mea ina ia faavavau e ala i feagaiga tatou te osia ma le Atua. O le aiga o le mamanu o le lagi.¹⁶

Ma o lenei mea ua na o se vaega o le tafe mai o faaaliga na sasaa mai i luga o Iosefa Samita. O fea na o mai uma ai nei mau faaaliga na tuu atu ai le malamalama i le pogisa, le manino i le masalosalo, ma musuia ai,

faamanuia, ma faaleleia le fia miliona o tagata? O fea e sili ona talafeagai, o lē e mafaufauina e ia lava nei mea uma po o lē, sa ia maua se fesoasoani mai le lagi? Pe o tusitusiga paia sa ia saunia o foliga mai o ni upu a tagata po o ni afioga a le Atua?

Faaiuga

E leai se feteenaiga e uiga i mea na ausia e Iosefa Samita, ua na o le auala na ia faia ai ma le mea sa ia faia ma le mafuaaga. Ma e le tele ni filifiliga. A le o ia o se tagata faafoliga, o ia la o se perofeta. A le o lona faia na o ia o mea sa na faia, sa na maua la se fesoasoani mai le lagi. Tagai i faamaoniga, ae tagai i faamaoniga uma, ma mea uma na tutupu i lona olaga, e le na o se vaega se tasi. O le mea e sili ona taua, fai e pei o le taulealea o Iosefa ma “ole . . . i le Atua, o le foai tele mai i tagata uma ma le le toe tautaua; ona



foaiina mai ai lea ia te ia [outou].”¹⁷ E le na o le pau lea o le ala tou te iloa ai le moni o le Tusi a Mamona ma Iosefa Samita, o le mamanu foi lea e iloa ai le moni o mea uma lava.¹⁸

O Iosefa Samita sa avea ma se perofeta a le Atua, e pei o Thomas S. Monson i lenei vaitaimi. E ala mai ia Iosefa Samita, na toe “tuu atu ai i tagata i luga o le lalolagi, [ia ki o le malo o le Atua] ma . . . o le a taavale atu ai luma le talalelei . . . e pei . . . o le maa na tofi mai le mauga e aunoa ma lima . . . , seia tumu ai le lalolagi atoa.”¹⁹

O le Atua o lo tatou Tama Faavavau, ma o Iesu o le Keriso. Tatou te tapuai atu ia i Laua. E le mafaatusalia a Laua Fofoaga, o le ata o le faaolataga, ma le taulaga togiola a le Tamai Mamoe a le Atua. I lenei tisipenisione, ua tatou faataunuuna ai le fuafuaga a le Tama ma fetagofi atu ai i fua o le Togiola ma ua na o le usiusitai i tulafono ma sauniga o le talalelei na toefuataina e ala mai i le Perofeta o Iosefa Samita e mafai ai. Ou te molimau atu ia i Laua —le Atua le Tama Faavavau ma Iesu Keriso, le Faaola o le lalolagi. Ou te molimau atu ai i le suafa o Iesu Keriso, amene. ■

FAAMATALAGA

1. Iakopo 1:5.
2. Iosefa Samita—Talafaasolopito 1:14.
3. Iosefa Samita—Talafaasolopito 1:16–17.
4. Iosefa Samita—Talafaasolopito 1:33.
5. Tagai Mataupu Faavae ma Feagaiga 130:22.
6. Tagai Mataupu Faavae ma Feagaiga 50:24.
7. Tagai 2 Nifae 31; 3 Nifae 27.
8. Tagai Moronae 10:3–5.
9. Tagai Mataupu Faavae ma Feagaiga 76.
10. Mataupu Faavae ma Feagaiga 6:36.
11. Mose 5:8.
12. Mataupu Faavae ma Feagaiga 20:77.
13. Mataupu Faavae o le Faatuatua 1:3.
14. Tagai Mataupu Faavae ma Feagaiga 76; 128; 138.
15. Tagai Mataupu Faavae ma Feagaiga 49:17; 138; Mose 3:5; 6:36.
16. Tagai Mataupu Faavae ma Feagaiga 131:1–2; 132:5–33.
17. Iakopo 1:5.
18. Tagai Moronae 10:3–5.
19. Mataupu Faavae ma Feagaiga 65:2.



Saunia e Elder Michael John U. Teh
○ Le Fitugafulu

O Le Mea Ua I Ai Lo Outou Oa

Afai tatou te le faaeteete, o le a amata ona tatou tulitausi'oina mea faaletino e sili atu i lo mea faaleagaga.

I le faatoa maea ai o le konafesi aoao ia Oketopa 2007, sa fai mai se tasi o le usoga ia te au masalo pe tusa ma le fitu tausaga ona faatoa ou toe oo lea i lenei aafiaga lofituina. Sa ou fiasia ma fai atu ia te ia o le a ou mafaufau i ai o la'u "fitu tausaga o le mau." Ia, o au lenei; ua faamutaina nei la'u fitu tausaga o le mau.

Ia Ianuari talu ai, sa ma maua ai ma la'u manamea o Grace se tofiga e asiasi atu ai i le au paia i Filipaina ia na afaina i se mafuie tele ma se afa fulifaō matautia. Sa ma fiasia ona o lea tofiga o se tali lea i a ma tatalo ma o se molimau o le alofa mutimutivale ma le lelei o se Tama i le Lagi alofa. Sa maua ai sina faamalieina o lo ma faananau e faailoa patino atu ia i latou lo ma alolofa ma le popole.

O le toatele o le au paia sa matou feiloai sa nonofo lava i apitaga le tumau e pei o faleie, o nofoaga autu o nuu, ma falelotu o Ekalesia. O aiga na ma asia sa na o se vaega na i ai tualuga po o le leai foi o ni tualuga o fale. Sa le tele ni mea i tagata e toe tau amata ai, ma o nai mea sa latou maua sa tafesea uma. Sa palapala ma otaota mea uma. Peitai, sa tumu i latou i le lotofaafetai mo ni nai fesoasoaniga

sa latou maua ma sa faagaetia e ui i o latou tulaga faigata tele. Pe a ma fesili atu ia i latou pe o a mai le taulima-ina o faigata, sa tali mai tagata uma i se tali maumaututu, "O loo manuia." Sa manino lava, o lo latou faatuatua ia Iesu Keriso na latou maua ai le faamoemoe o le a iu lava ina lelei mea

uma. Mai lea fale i lea fale, i lea faleie i lea faleie, na aoaina ai maua ma Sister Teh e nei Au Paia faatuatua.

I taimi o mala ma faalavelave, ua i ai i le Alii se ala e toe faataulai ai i tatou i mea tatou te faamuamua. E faafuasei lava, o mea faalelalolagi uma na tatou matua galulue malosi ai ia maua ua le toe taua. Ua na o le pau le mea ua taua nei o o tatou aiga ma a tatou mafutaga ma isi. Sa faamatalaina e se tasi tuafafine lelei i le ala lenei: "Ina ua pe atu le vai ma ua oo i le taimi e amata ai galuega faamama, sa ou fetilofa'i solo i lo'u fale ma mafaufau, 'Oka, matua anoanoai a'u faaputuga lapisi i nei mau tausaga.'"

Ou te masalo ua maua e lenei tuafafine se vaaiga sili atu, ma i le agai i luma o le a filifili ai ma le faaeteete po o a mea e talafeagai ae o a foi mea e mafai ona ia soifua e aunoa ma le manaomia.

I le galulue ai ma le tele o tagata i le gasologa o tausaga, ua ma fiasia lava e



matau se faatelega o le malosi faaleagaga. Ua ma vaaia uma foi se faatelega ma le leai o ni meatotino faalelalolagi i nei tagata faamaoni o le ekalesia.

Ona o se mea e manaomia, o le tele o i tatou e aafia i le sailia o tupe ma le mauaina o nisi o oloa faalelalolagi ina ia mafai ai ona tausia o tatou aiga. E manaomia ai se vaega tele o o tatou taimi ma le gauai. E leai se mutaaga o mea e ofo mai e le lalolagi, ma o lea e taua tele ai lo tatou aoaoina ia iloa po o le a le taimi e lava ai mo i tatou. Afai tatou te le faaeteete, o le a amata ona tatou tulitauis’oina mea faaletino e sili atu i lo mea faaleagaga. Ona avea lea o la tatou sailiga mo le faaleagaga ma le faavavau o se mea e faamulimuli nai lo le faamuamua. O le mea e faanoanoa ai, ua foliga mai o loo i ai se lagona malosi ia maua pea lava pea ma ia umiaina mea sili ona fou ma sili ona lata mai.

E faapefea ona tatou mautinoa tatou te le o tosina atu i lalo i lenei ala? Ua tuu mai e Iakopo le fautuaga lenei: “O le mea lea, aua le faaalua tupe mo mea ua leai se aoga, po o a outou galuega mo mea e le ma’ona ai. Faaologo mai ia te a’u ma le filiga, ma ia manatua upu ua ou tautala atu ai; ma o mai i le Paia e Toatasi o Isaraelu, ma taumamafa fiafia i mea e le faaleagaina, pe mafai ona pala, ma tuu mai o outou agaga e fiafia i le lololo.”¹

Ou te faamoemoe e le o i ai se tasi o i tatou o loo faaalua ni tupe mo mea lē aogā pe galue foi mo mea e le o faamalieina ai.

Na aoao atu e le Faaola le vaega lenei i Tagata Iutaia ma sa Nifae:

“Aua tou te teuina mo outou lava oia i luga o le lalolagi, i le mea o i ai le mogamoga ma le ele e faaleagaina, ma osofaia e tagata gaioi ma gaioi ai:

“A ia outou teuina mo outou lava oia i le lagi, i le mea e le o i ai se mogamoga po o se ele e faaleagaina,



ma osofaia e tagata gaioi pe gaioia:

“Ona o le mea e i ai lau oa, o iina o le a i ai foi lou loto.”²

I se isi nofoaga, na tuu atu ai e le Faaola lenei faataoto:

“Na fua tele mai le fanua o le tasi tagata mauoa:

“Ona manatunatu ifo lea o ia, ua faapea, Se a se mea ou te faia, aua e leai sa’u mea e faaputu ai a’u fua?

“Ua fai ane foi o ia, O lenei le mea ou te faia; ou te sa’ena o’u fale saito, a e faia ia tele; ou te faaputu i ai a’u fua ma a’u mea lelei uma.

“Ou te fai ifo foi i lo’u agaga, Lo’u agaga e, ua ia te oe mea lelei e tele ua teuina mo tausaga e tele; ina nofonono filemu ia, ina ai ia, ma inu ma ia e olioli.

“A ua fetalai atu le Atua ia te ia, O oe na le vale, e aamiina atu lou agaga nai ia te oe i le po nanei; a e fai ma ai mea ia ua e saunia?

“O loo faapea foi lē faaputu oa ia te ia, a e le mauoa i le Atua.”³

Sa tuuina mai e Peresitene Dieter F. Uchtdorf le fautuaga lenei e lei mamao tele atu:

“O loo silasila mai lo tatou Tama Faalelagi i o tatou gafatia moni. O loo Ia silafia mea e uiga ia i tatou ia tatou te le iloa e i tatou lava. Na te uunaia i tatou i o tatou olaga e faataunuu le fuafuaga faamoemoeina o lo tatou foafoaga, ina ia ola i se olaga amiotonu, ma ia toe foi atu ai i Lona afoaga.

“Aisea la, tatou te tuuto atu ai le tele o lo tatou taimi ma le malosi i mea lē tumau, e matuā lē taua, ma e papa’u? Pe ua tatou mumusu ea e vaai atu i le

faavalevlea o le tulitulimatāgauina o mea lē taua ma lē tumau?”⁴

Ua tatou iloa uma lava o le tatou lisi o oa faalelalolagi o loo i ai le faamaua-luga, tupe, mea totino, pule, ma viiga a tagata. Ua latou le toe faatauaina le taimi ma le gauai atu, o lea o le a ou taulai atu ai i mea o le a maua ai a tatou oa i le lagi.

O a nisi oa i le lagi e mafai ona tatou faaputuina mo i tatou lava? Mo le amataga, o le a lelei mo i tatou le mauaina o uiga faaKeriso o le faatua-tua, faamoemoe, lotomauualalo, ma le alofa mama. Ua loa ona fautuaina i tatou ia “[tuu] ese le tagata o le lalolagi ma . . . [avea] e pei o se tamaitiiti.”⁵ O le apoapoaga a le Faaola e mo i tatou uma ia tauivi ina ia atoatoa e faapei o Ia ma lo tatou Tama Faalelagi.⁶

Lua, e manaomia ona faaalua atili o tatou taimi taua ma taumafaiga i le faamallosia o sootaga faaleaiga. O le taunuuga, “o le aiga ua faauuina e le Atua. O le iunite sili lea ona taua i le olaga nei ma le faavavau.”⁷

Tolu, o le auauna atu i isi o se uiga auau mama lea o se soo moni o Keriso. Sa Ia fetalai, “Aua na faia e outou i le tasi o e aupito itiiti o o’u uso nei, o a’u lea na outou faia i ai.”⁸

Fa, o le malamalama i le mataupu faavae a Keriso ma le faamallosia o a tatou molimau o se galuega o le a aumaia ai le fiafia moni ma le faamalieina. E manaomia ona tatou suesueina i taimi uma ia afioga a Keriso e pei ona maua i totonu o tusitusiga paia faapea ai ma upu a perofeta soifua. “Aua

faauta, o afiga a Keriso o le a ta'u mai ai ia te outou mea uma e tatau ona outou faia.”⁹

Sei ou faamaea atu i le tala a se tina matua e 73 tausaga ua maliu lana tane sa matou feiloai i la matou malaga i le Atua Filipaina:

Ina ua lulu le mafuie i le motu o Bohol, o le fale lea na la galulue malosi ai ma si ona toalua ua maliu e fau sa solo i lalo i le elele ma fasiotia ai lana tama teine ma lana tama. Ua tuua nei na o ia, ma e manaomia lona galue e tausi o ia lava. Ua amata ona ia aveina tagamea (e ta lima) ma e ao ona alu faatele i luga ma sau i lalo mai le mauga tele i le aso e la'u mai le vai. Ina ua ma asia o ia, o loo nofo pea i se faleie.

O ana upu la nei: “Elder, ua ou taliaina mea uma ua finagalo le Alii ia ou oo i ai. E leai ni ou lagona faa-tautee. Ou te faapelepele i la'u pepa malumalu ma teuina i lalo o lo'u aluga. Faamolemole ia silafia ou te totogi atoa la'u sefuluai mai sina tamai tupe ou te maua mai le faiga o tagamea. E tusa lava po o le a le mea e tupu, o le a ou totogi pea le sefuluai.”

Ou te molimau atu o mea tatou te faamuamuaaina, faanaunauga, mausa, manaoga, meaai e fia ai ai, ma tuina-nauga o le a i ai se aafiaga tuusao i lo tatou olaga e sosoo ai. Ia tatou manatua i taimi uma le fetalaiaga a le Faaola: “Aua o le mea ua i ai lo outou oa, e i ai atoa foi ma o outou loto.” Tau ina ia i ai o tatou loto i le mea sa'o, o la'u tatalo lea, i le suafa o Iesu Keriso, amene. ■

FAAMATALAGA

1. 2 Nifae 9:51.
2. Mataio 6:19–21; tagai foi 3 Nifae 13:19–21.
3. Luka 12:16–21.
4. Dieter F. Uchtdorf, “E Uiga i Faanoanoaga ma Filifiliga,” *Liahona*, Nov. 2012, 22–23.
5. Mosaea 3:19.
6. Tagai 3 Nifae 12:48.
7. *Tusitaulima 2: Taitaiina o le Ekalesia* (2010), 1.1.1.
8. Mataio 25:40.
9. 2 Nifae 32:3.



Saunia e Elder Marcos A. Aidukaitis

○ Le Fitugafulu

Ae Afai Ua Leai Se Poto i So Outou

O le a faaali mai e le Atua le upumoni ia i latou e saili atu ai e pei ona faamatalaina mai i totonu o tusitusiga paia.

I le tasi aso, sa suesue ai lo'u atalii e 10 tausaga e uiga i le faiai o le tagata i le Initoneti. E fia manao o ia e avea ma fomai tipitipi i se aso. E le faigata le matauina e poto atu o ia i lo au.

Matou te fiafia i le Initoneti. I le fale matou te fesootai ai ma aiga ma uo e auala i ala o faasalalauaga faale-agafesootai, i i-meli, ma i isi auala. O le tele o meaaoga a la'u fanau e fai i le Initoneti.

Po o le a lava se fesili, afai tatou te manaomia nisi faamatalaga, tatou te sailia le initoneti. I ni nai sekone e anoanoai anomea tatou te mauaina. E ofoofogia lenei mea.

Ua saunia e le Initoneti le tele o avanoa mo le aoaoina. Peitai, e manao foi Satani ia tatou malaia, ma na te mimiloa ai le faamoemoega moni o mea. Na te faaaogaina lenei meafaigalua sili e faalauiloa ai le masalosalo ma le fefe ma ia faatamaia ai le faatua-tua ma le faamoemoe.

I le anoanoai o mea o loo maua i le Initoneti, e tatau ona tatou iloilo ma le faaeteete po o fea e faatatau i ai a tatou taumafaiga. E mafai e Satani ona faapisiina, faalavelave mai, ma faaleagaina i tatou e ala i le faavasegaina o faamatalaga, ma o le tele lava o ia mea, o lapisi.

E le tatau ona fealualuai se tasi i lapisi.

Faafofoga i le taiala lenei, ua tuuina mai i tusitusiga paia: “Ua tuuina mai i tagata taitoatasi le Agaga o Keriso, ina ia mafai ona iloa e ia le lelei mai le leaga; o le mea lea, ou te faaali atu ai ia te outou le ala e faamasino ai; ona o mea uma e valaau mai ia fai le lelei, ma faatauana mai ia talitonu ia Keriso, ua auina mai i le mana ma le meaalofa a Keriso; o le mea lea e mafai ai ona outou iloa . . . ua mai le Atua.”¹

I se lagona moni, o loo tatou feagai ma le faaaitaui lava e tasi na fetai ai ma Iosefa Samita i lona talavou. E tele foi taimi tatou te iloa ai ua leai so tatou lava poto.

I le malo o le Atua, o loo talisapaia ai ma uunaia le sailiga mo le upumoni, ma e leai ma se mea na te taofia pe fefe i ai. Ua fautuaina malosi tagata o le Ekalesia e le Alii Lava Ia ia saili mo le malamalama.² Sa Ia fetalai, “Ia outou saili ma le filiga . . . ; ioe, ia outou saili mai totonu o tusi sili ona lelei upu o le poto; saili i le aoaoina, e ala lava lea i le suesue ma le faatua-tua foi.”³ Peitai, e mafai faapefea ona tatou iloa ina le upumoni i se lalolagi ua faateleina ana

osofaiga tuusao i luga o mea e faatatau i le Atua?

Ua aoaoina i tatou e tusitusiga paia i le auala e faia ai:

Muamua, e mafai ona tatou iloina le upumoni e ala i le matauina o ona fua.

I Lana lauga maoae i le Mauga, na fetalai ai le Alii:

“E faapea foi laau lelei taitasi ma fua mai i fua lelei; a o le laau leaga e fua mai i fua leaga. . . .

“O lea foi tou te iloa ai i latou i o latou fua.”⁴

Sa aoao mai e le perofeta o Mamona leni lava mataupu faavae e tasi ina ua ia faapea mai, “O a latou galuega tou te iloa ai i latou; aua afai ua lelei a latou galuega, ua lelei foi i latou.”⁵

Matou te valaaulia tagata uma ia suesue i fua ma galuega a leni Ekalesia.

Mo i latou e naunau e fia iloa le upumoni o le a mafai ona iloina le eseese o loo faia e le Ekalesia ma ona tagata i nuu o loo latou atiae ai. O le a latou matauina foi le siitiaina o olaga o i latou e mulimuli i ona aoaoga. O i latou e suesueina nei fua o le a mauaina ai o fua o Le Ekalesia a Iesu Keriso o le Au Paia o Aso e Gata Ai e suamalie ma e manaomia.

Lua, e mafai ona tatou mauaina le upumoni e ala i le faataitaiina o le afioga [a le Atua] ia i tatou lava.

Sa aoao mai le perofeta o Alema:

“O le a tatou faatusaina le afioga i se fatu. . . . Afai e te tuu ane se avanoa, e mafai ona toto ai o se fatu i lou loto, faauta, afai o se fatu moni, [ma] . . . afai e te le tiaia i fafo i lou le talitonu, . . . faauta, o le a amata ona malena ae i totonu o lou fatafata; ma . . . o le a amata ona e fai ifo ia te oe lava—Ua tataua ona lelei leni fatu, . . . ona ua amata ona faalauteleina ai lo’u agaga; ioe, ua amata ona faamalalalama ai lo’u malamalamaaga, ioe, ua amata ona suamalie ia te au. . . .

“ . . . Ma o leni, . . . pe le faamalosia ea [e] leni mea lou faatuatua? Ioe, o le a faamalosia ai lou faatuatua. . . .

“ . . . Ona e fua mai fatu taitasi i ona lava foliga.”⁶

Oka se valaaulia ina maoae mai se perofeta a le Alii! E mafai ona faatusatusa leni mea i se faataitaiiga faasaieni-tisi. Ua valaaulia i tatou ia faataitai le afioga, ua tuu mai ia i tatou ni tapulaa, ma ua tau mai ia i tatou le taunuuga o le suesuega, pe afai tatou te mulimuli i faatonuga.

O lea, ua aoaoina i tatou e tusitusiga paia e mafai ona tatou iloina le upumoni e ala i le matauina o ona fua, po o le, faataitaiina i le tagata lava ia, faaavanoaina o se nofoaga mo le afioga i o tatou loto, ma tausi i ai, e pei o se fatu.

Peitai, o loo i ai foi se auala lona tolu e iloa ai le upumoni, ma e ala

lena i faaaliga faaletagata lava ia.

Ua aoao mai e le Mataupu Faavae ma Feagaiga vaega e 8 e faapea o faaaliga, o le malamalama lea—“o se malamalama e uiga i soo se mea [tatou] te ole [atu] ai i le faatuatua, ma le loto faamaoni, ma le talitonu o le a [tatou] maua.”⁷

Ma ua tau mai e le Alii ia i tatou le auala o le a tatou maua ai leni faaaliga, “O le a Ou tau atu ia te oe i lou mafaufau ma lou loto, e ala i le Agaga Paia, lea o le a oo atu i ou luga ma lea o le a mau i lou loto.”⁸

O lea, ua aoaoina i tatou e mafai ona maua faaaliga e ala i le ole atu i le faatuatua, faatasi ma se loto faamaoni, ma le talitonu o le a tatou mauaina.

Peitai ia matau mai sa matua faamaino mai e le Alii ina ua Ia lapatai mai, “Ia manatua a aunoa ma le faatuatua e le mafai ona e faia se mea; o lea ia





Pleasant Grove, Iuta, ISA

ole mai ai i le faatuatua.”⁹ E manaomia e le faatuatua ia galuega—e pei o le suesueina i lou mafaufau, ona ole atu ai lea i le tatalo pe le moni.

Na fetalai le Alii:

“Afai ua sao, o le a Ou faia ia mu lou loto i totonu ia te oe; o lea, o le a e lagona ai ua sao.

“Ae afai ua le sao, o le a e le maua ni lagona faapena, ae o le a e maua se mafaufauga papa o le a fai ai ia galo ia te oe le mea ua sese.”¹⁰

E mate le faatuatua pe a aunoa ma galuega.¹¹ O lea, “ia ole atu ma le faatuatua, aua lava ne’i masalosalo.”¹²

E i ai sa’u uo, e le auai i le ekalesia, lea sa faailoa maia ia te au e le o ia o se tagata faaleagaga. O le a ia le suesueina lava tusitusiga paia pe tatalo ona e fai mai o ia e le mafai ona malamalama i afioga a le Atua, pe mautinoa foi o loo i ai se Atua. O lea uiga faaaliga ma o le a taitai atu ai i le itu faafeagai o faaaliga, e pei ona faamatala mai e Alema. Fai mai a ia, “Ma o lea o ia o le e faamaaa lona loto, o ia lava lea na te maua le vaega itiiti o le afioga.”

Ae sa toe faaopopo mai Alema, “ae o ia o le e le faamaaa lona loto, o ia lea e tuuina mai i ai le vaega tele o le afioga, seia oo ina tuuina mai ia te ia, ia ona iloa mealilo a le Atua,

seia oo ina ia iloina atoatoa.”¹³

O Alema ma atalii o Mosaea o ni faataitaiga o le mataupu faavae o le manaomiaina e le faatuatua o galuega. I le Tusi a Mamona, tatou te faitau ai:

“Sa latou suesue i tusitusiga paia ma le filiga, ina ia latou iloa le afioga a le Atua.

“Ae sa le ona pau lea; sa latou tuu atu i latou lava i le tatalo tele, ma le anapogi; o lea na i ai ia i latou le agaga o valoaga, ma le agaga o faaaliga.”¹⁴

O le ole atu ma se loto faamaoni e tutusa le taua ma lenei faagasologa. Afai tatou te saili atu ma le faamaoni i le upumoni, o le a tatou faia mea uma i lo tatou malosi ia maua ai, lea e mafai ona aofia ai le faitauina o tusitusiga paia, o i le lotu, ma le faia o le mea sili tatou te mafaia e tausi i poloaiga a le Atua. O lona uiga foi o loo tatou loto e faia le finagalo o le Atua pe a tatou mauaina.

O le faatinoga a Iosefa Samita ina ua ia saili mo le poto o se faataitaiga atoatoa lea o le uiga o le i ai o se loto faamaoni. Sa ia fai mai na ia manao ia iloa po o fea o lotu sa moni, ina ia “[ona] iloa le lotu [e] auai.”¹⁵ E oo foi lava ae lei tatalo o ia, sa saunia o ia e faatino le tali o le a ia mauaina.

E tatau ona tatou ole atu i le faatuatua ma i se loto faamaoni. Ae e le na o

le pau ai lena. E tatau foi ona tatou talitonu o le a tatou mauaina se faaaliga. E tatau ona tatou faatuatuaina le Alii ma ia i ai le faamoemoe i Ana folafolaga. Manatua mea ua tusiaina: “A e afai ua leai se poto i so outou, ina ole atu ia i le Atua, o le foai tele mai i tagata uma ma le le toe ta’uta’ua, ona foaiina mai ai lea ia te ia.”¹⁶ Oka se folafolaga ina a matagofie!

Ou te valaaulia tagata uma ia sailia le upumoni mai soo se metotia o nei metotia ae maise lava mai le Atua e ala i faaaliga faaletagata lava ia. O le a faali mai e le Atua le upumoni ia i latou e saili atu i ai e pei ona faamatalaina mai i totonu o tusitusiga paia. E manaomia ai nisi taumafaiga sili atu nai lo le tau na ona saili i le Initoneti, ae e tauia.

Ou te molimau atu o le Ekalesia moni lenei a Iesu Keriso. Ua ou vaaia ona fua i nuu ma i olaga o le faitau afe o tagata, e aofia ai tagata o aiga; o lea ua ou iloa ai e moni. Ua ou faataitaia foi le afioga i lo’u olaga mo le tele o tausaga ma ua lagonaina ona aafiaga i lo’u agaga; o lea ua ou iloa ai e moni. Ae o le mea e sili ona taua, ua ou iloina lona lava moni mo au lava ia e ala i faaaliga e auala mai i le mana o le Agaga Paia; o lea ua ou iloa ai e moni. Ou te valaaulia outou uma ia faia lea lava mea e tasi. I le suafa o Iesu Keriso, amene. ■

FAAMATALAGA

1. Moronae 7:16.
2. Tagai Mataupu Faavae ma Feagaiga 88:78.
3. Mataupu Faavae ma Feagaiga 88:118.
4. Mataio 7:17, 20.
5. Moronae 7:5.
6. Alema 32:28, 30–31.
7. Mataupu Faavae ma Feagaiga 8:1.
8. Mataupu Faavae ma Feagaiga 8:2.
9. Mataupu Faavae ma Feagaiga 8:10.
10. Mataupu Faavae ma Feagaiga 9:8–9.
11. Tagai Iakopo 2:17.
12. Iakopo 1:6.
13. Alema 12:10.
14. Alema 17:2–3.
15. Iosefa Samita—Talafaasolopito 1:18.
16. Iakopo 1:5.



Saunia e Elder D. Todd Christofferson
○ Le Korama a Aposetolo e Toasefululua

○ Le Toetu o Iesu Keriso

O Iesu le Nasareta o le Togiola toetu, ma ou te molimau atu i mea uma o mulimuli mai e uiga i le moni o Lona Toetu.

○ se lagona lofituina o le toilalo ma le faanoanoa na fusia ai Ona soo a o puapuagatia Iesu ma maliu ai i luga o le satauro ma tuuina atu Lona tino i le tuugamau. E ui i le faatele ona ta’u atu e le Faaola Lona maliu ma le toetu, ae sa latou te lei malamalama lava. Peitai, o le aoauli faanoanoa o Lona Faasatauroga na vave ona sosoo ai ma le taeao olioli o Lona Toetu. Ae sa na o le pau le mea na oo mai ai lena olioli ina ua ave le au soo ma molimau patino o le Toetu, aua na oo lava i le tautinoga a agelu ua toetu o Ia sa lei muai malamalama i ai—o se mea sa matuai lē mafauina lava.

O Maria le Makatala ma nai isi tamaitai faamaoni na vave o mai i le tuugamau o le Faaola i lena taeao o le Aso Sa, e aumai mea manogi ma suauu e faamaea ai le uuina o le tino o le Alii lea na amata uu ina ua vave tuuina i le tuugamau ae ua tulata i le Sapati. I lea taeao faapitoa, sa faafeiloaia ai i latou e se tuugamau avanoa, ua fuli ese le maa na pupuni ai, ma sa tautino mai agelu e toalua:

“Se a le mea tou te saili ai le ua soifua i e ua oti?”

“E le o iinei o ia, a ua tu; ia outou

manatu i lona fetalai atu ia te outou, ina o i Kalilaia o ia,


“Ua faapea atu, E tatau ona tuuina atu o le Atalii o le tagata i lima o tagata agasala, ma ia faasatauroina, ma toe tu mai i le aso tolu.”¹

“O mai, ina matamata i le mea na tuu ai le Alii.

“Ina o atu ia ia vave, lua te tau atu i ona soo, ua toe tu mai o ia nai e ua oti.”²

E pei ona poloaiina ai e agelu, na vaai atu Maria le Makatala i totonu o le tuugamau, ae na foliga mai na pau lava le mea na ia matauina ua leai se tino o le Alii. Sa tele’a’i atu o ia e ta’u atu i Aposetolo, ma na mauaina Peteru ma Ioane ma ta’u atu ia i laua, “Ua latou aveeseina le Alii i le tuugamau; matou te le iloa foi le mea ua latou tuuina ai o ia.”³ Na taufetuli atu Peteru ma Ioane i le nofoaga ma faamaonia ai e moni lava ua avanoa le tuugamau, ua vaai i le “ie na tanumia ua tuu . . . ma le solosolo sa i lona ao . . . ma taataai i le tasi mea.”⁴ Na foliga mai o Ioane lea na muai iloa le savali matagofie o le toetu. Na ia tusia “ua vaai atu ona talitonu lea o ia,” ae o isi i lena taimi, “e lei iloa ai e i latou le Tusi, e toe tu [Iesu] nai e ua oti e tatau ai.”⁵

Na o ese Peteru ma Ioane, ae nofo ai pea Maria ma le tagi. I lena taimi na toe foi atu agelu ma fesili atu ma le alofa ia te ia, “Funa e, se a le mea e te tagi ai? Ua faapea atu ia ia te i laua, Aua ua latou ave ese lou alii, ou te lei iloa foi le mea ua latou tuuina ai





o ia.”⁶ I lena taimi na tu le Faaola toetu i ona tua ma fetalai atu, “Funa e, se a le mea e te tagi ai, O ai ea e te sailia? A o le fafine, fa te ia o le leoleo ia o le fanua, ua fai mai ia te ia, Le alii e, afai ua e ave ese ia te ia, tau mai ia ia te au po o fea le mea ua e tuuina ai o ia; ona ou aveeseina lea o ia.”⁷

Na tusia e Elder James E. Talmage: “O Iesu lava lea na ia talanoa i ai, o lona Alii pele, ae na te lei iloaina. E tasi lava le upu mai Lona fofoga na suia ai lona mafatia tiga i le matuai fiafia. ‘Ua fetalai atu Iesu ia te ia, Maria e.’ O le siufofoga, o le matāleo, o le fofoga mālū sa ia faalogo ma fiafia i ai i aso na muamua atu na ia le toe lagonaina ai le matuitui o le faanoanoa lea na lofituina ai o ia. Sa ia faliu atu, ma vaaia le Alii. I le olioli tele ai sa ia aapa atu ai e opo mai o Ia i ona lima, ma tau atu na o upu faatauana ma migao, ‘Raponi e,’ o lona uiga, Lou Matai pele.”⁸

Ma sa avea lenei tamaitai faamanuaina ma uluai tagata na vaai ma talanoa i le Keriso toetu. I se taimi mulimuli ane i lena lava aso sa Ia faaali atu ia Peteru i Ierusalem po o se mea e latalata i ai;⁹ i soo e toalua i le ala i Emau;¹⁰ ma i le afiafi i Aposetolo e toa 10 faapea ma isi, lea na faafuasei ona Ia faaali atu ia i latou, ma fetalai atu, “Ia outou vaavaai mai i ou lima ma ou vae, aua o au lava lenei; ia outou tagotago mai ia te au, ma ia vaavaai mai; aua o le agaga e leai sona aano ma ni ivi, pei o au nei ua outou vaavaai i ai.”¹¹ Ona toe faatalitoinuina atili lea o i latou ona sa “lei talitonu i latou ona ua olioli, ma ua ofo,”¹²

Na Ia taumafaina se fasi i’a tunu ma le melikerio i o latou luma.¹³ Mulimuli ane sa Ia faatonuina i latou, “E fai foi outou ma molimau ia te au i Ierusalem ma Iutaia uma lava, ma Samaria, e oo lava i le tuluiga o le lalolagi.”¹⁴

E ese mai i nei molimau maumaututu i Ierusalem, ua i ai ia i tatou le galuega lemafaatusalia a le Alii toetu i tagata anamua o le Itulagi i Sisifo. Na Ia afio ifo mai le lagi i le laueleele o Nuuma, ma valaaulia le motu o tagata na potopoto ai, pe a ma le 2,500, ina ia taitoatasi ma o atu uma, ma pa’i atu o latou lima i Lona itu ma tagotago i pu o fao i Ona lima ma Ona vae.¹⁵

“Ma ina ua uma ona latou o atu uma ma molimau mo i latou lava, sa latou alalaga faatasi, ua fai mai:

“Osana! Ia faamanuina lava le suafa o le Atua Silisili Ese! Ma sa latou faapauu i lalo i vae o Iesu, ma tapuai atu ia te ia.”¹⁶

O le Toetu o Keriso na faaalai ai e tutoatasi ma faavavau lava o Ia. “Aua faapei o le Tama e i totonu ia te ia lava le ola; e faapea foi ona foai mai e ia i le Atalii, ia i totonu ia te ia lava le ola.”¹⁷ na fetalai mai ai Iesu:

“O le mea lea e alofa mai ai le Tama ia te au, aua ou te tuuina atu lou ola, ina ia ou toe au mai ai.

“E leai se tasi na te aveeseina ia te au, a e peitai au, ou te tuuina atu e au lava. O ia te au le pule e tuuina atu, o ia te au foi le pule e toe au mai ai.”¹⁸

E le faalagolago le Faaola i meaa po o vai po o le okesene po o soo se isi lava elemene, mana, po o se tagata

mo le ola. O Ia o Ieova ma le Mesia, o Ia o le O A’u Silisili, o le Atua e soifua i Lona lava mana.¹⁹ O loo soifua ma e soifua pea e faavavau.

E ala i Lana Togiola ma le Toetu, ua manumalo ai Iesu Keriso i vaega uma o le Pa’ū. O le oti faaletino o le a na o sina taimi le tumau, ma e oo lava i le oti faaleagaga ua i ai sona mutaaga, aua o le a tatou toe foi uma i le afioaga o le Atua, mo na o sina taimi le tumau, ina ia faamasinoina. E mafai ona tatou tuuina atu atoa lo tatou faatuatuaga ma le talitonuga i Lona mana ina ia faatolaloina mea uma ma aumaia ia i tatou le ola e faavavau.

“Aua ua oo mai le oti talu le tagata, ua oo mai foi le toe tutu o e ua oti talu le tagata.

“Aua faapei ona oti uma ia Atamu e faapea foi ona faaolaina uma ia Keriso.”²⁰

I upu a Elder Neal A. Maxwell: “O le manumalo o Keriso i le oti na faamutaina ai faigata faaletagata. I le taimi nei ua na o faigata a le tagata lava ia, ma o nei foi mea e mafai ona laveaiina ai i tatou e ala i le mulimuli i aoaoga a ia o le na laveaiina i tatou mai le oti lautele.”²¹

O le faamalieina o manaoga o le faamasinotonu, ua afio ai nei Keriso i le nofoa o le faamasinotonu; pe atonu tatou te faapea, o Ia o le faamasinotonu, e pei lava foi o Ia o le alofa.²² E faapena foi, e le gata i le avea ai ma Atua ua atoatoa, ae o Ia foi o se Atua alofa mutimutivale.²³ O lea, ua faasa’oina ai e le Faaola ia mea uma. E le tumau le faailogagata i le olaga faaletino, e oo lava i le oti, aua na Ia toefuatai mai le ola. E leai se manua, le atoatoa, faalataina, po o le sauaina e le tauia i le iuga ona o Lana faamasinotonu mulimuli ma le alofa mutimutivale.

I lena lava faailoga e tasi, tatou te tali atu ai ia te Ia mo o tatou olaga, a tatou

filifiliga, ma a tatou amioga, e oo lava i o tatou manatu. Ona sa Ia togiolaina i tatou mai le Pa'ū, ua moni ai o Ia e Anaina o tatou ola. Na Ia tautino mai:

“Faauta, ua ou tuu atu ia te outou lau talalelei, ma o le talalelei lenei ua ou tuu atu ia te outou—e faapea, ua ou sau i le lalolagi e fai le finagalo o lou Tama, aua na auina mai au e lou Tama.

“Ma na auina mai au e lou Tama ina ia sii ae au i luga o le satauro; ma a mavae ona sii ae o au i luga o le satauro, ina ia mafai ona ou aumai o tagata uma ia te au, ina ia pei ona sii ae o au i luga e tagata ia faapea foi ona sii ae i luga o tagata e le Tama, e tutu i ou luma, e faamasinoina i a latou galuega.”²⁴

Mafaufau mo sina taimi i le taua o le Toetu i le iloaina ai atoatoa o le faasinomaga moni o Iesu le Nasareta ma foia ai finauga ma fesili faalefilisofia o le olaga. Afai e moni lava na toetu Iesu, o lona uiga e mautinoa lava o Ia o se tagata paia. E leai se tagata ola ua i ai se mana e toe ola mai ai pe a mavae le oti. Ona sa toetu o Ia, e le mafai ai la ona faapea o Iesu ua na o se kamuta, se faiaoga, se aoao, po o se perofeta. Ona sa toetu o Ia, e ao la ona aveia Iesu ma se Atua, o le Alo e Toatasi na Fanaua o le Tama.

O lea, o mea sa Ia aoaoina e moni; e le mafai ona pepelo le Atua.²⁵

O lea, o Ia o le Foafua o le lalolagi, e pei ona Ia fetalai mai.²⁶

O lea, e moni le lagi ma seoli, e pei ona Ia aoao mai.²⁷

O lea, e i ai se lalolagi o agaga lea sa Ia asiasi i ai ina ua mavae Lona maliu.²⁸

O lea, o le a Ia toe afio mai, e pei ona fetalai e agelu,²⁹ ma “nofotupu patino i luga o le fogaelele.”³⁰


O lea, o le a i ai se toetutu ma se faamasinoga mulimuli mo tagata uma.³¹

Ona o le moni o le Toetu o Keriso, o masalosaloga la e uiga i le mana silisiliese, malamalama atoatoa, ma le

agalelei o le Atua le Tama—o le sa tuuina mai Lona Alo e Toatasi na Fanaua mo le togiolaina o le lalolagi—ua le moni ia. O masalosaloga e faatatau i le uiga ma le faamoemoega o le olaga e le faamaoniaina. E moni lava ua na o Iesu Keriso le suafa po o le ala lea e oo mai ai le olataga i tagata. E moni le alofa tunoa o Keriso, ua maua uma ai le faamagaloina ma le faamamaina o le tagata agasala ua salamo. E moni e sili atu le faatuatua i lo mea e mafaufauina po o se mea e fatuina e le mafaufau. O

loo i ai le upumoni silisili ma le lautele, ma e i ai ni tulaga faatonuina lē faaituau ma lēmasuia e pei ona Ia aoaoina.

Ona o le moni o le Toetu o Keriso, o le salamo mai la i soo se soliga o Lana tulafono ma poloaiga o se mea e mafai ona fai ma ia vave ona faia. E moni vavega a le Faaola, e pei lava o Lana folafolaga i Ona soo ina ia latou faia foi lea lava mea e tasi, e oo lava i galuega sili atu.³² O Lana perisitua ua mautinoa lava o se mana moni lea e “pulea le talalelei ma umia le ki o





mealilo o le malo, o le ki lava lea o le malamalama e uiga i le Atua. O lea, o ona sauniga, ua faaalua ai le mana o le faale-atua.”³³ Ona o le moni o le Toetu o Keriso, o le oti la e le o lo tatou mutaaga lea, ma e ui foi e faatamaia e ilo o tatou tino, ae tatou te iloa atu le Atua i o tatou tino.³⁴

Na faamatala e Peresitene Thomas S. Monson se alii e suafa ia Robert Blatchford, i le 100 tausaga ua mavae “i lana tusi *God and My Neighbor*, na ia matuai osofaia lava talitonuga faaKerisiano ua taliaina, e pei o le Atua, Keriso, tatalo, ma le tino ola pea. Na ia tautino ma le toa, ‘Ou te tautino atu ua ou faamaonia mea uma na ou manao e faamaoniaina atoatoa ma le sa’o e faapea e leai se Kerisiano, po o le a lava lona maoae ma lona atamai, e mafai ona taliina mai au finauga pe masalomia mea ua ou finauiina.’ Sa matua malosi ona talitonuga sese na le mafai ai ona talia ni fautuaga mai nisi. Ona tupu lea o se mea na faate’ia ai. Na faafuaseia ona suia ona manatu sese. . . . Sa amata lemu ona ia toe foi i le faatua-tua sa ia taufaifai ma ula i ai. O le a le mea na mafua ai lenei suiga tele i ona manatu? *Na maliu lona toalua*. Faatasi ai ma se loto nutimomoia, sa ia alu atu ai i totonu o le potu sa taoto ai lona tino maliu. Sa ia toe vaai i foliga sa ia alofa tele i ai. Ina ua alu ese mai o ia i fafo, sa ia faapea atu i se uo: ‘O ia lava le la, ae e le o ia le la. Ua suia mea uma. O se mea sa i ai muamua iina ua aveesea. Ua le toe tutusa o ia.

O le a se isi mea e mafai ona aluese, e ese mai le agaga?”³⁵

Pe moni ea na maliu ma toetu mai le Alii? Ioe. “O mataupu faavae autu o lo tatou talitonuga o molimau a Aposetolo ma Perofeta, e faatatau ia Iesu Keriso, e faapea na Ia maliu, ma tanumia, ma toetu mai i le aso tolu, ma afio ae i le lagi; ma o isi mea uma e faatatau i lo tatou talitonuga ua na o ni faaopoopoga i ai.”³⁶

A o latalata le fanau mai o Iesu lea na valoia, sa i ai faatasi i totonu o tagata sa Nifae ma sa Lamana anamua i latou o e sa talitonu, e ui o le toatele na masalosalo. Mulimuli ane, na oo mai ai le faailoga o Lona fanau mai—o se aso ma se po ma se aso sa leai se pogisa—ma na iloa e tagata uma.³⁷ E oo lava i lenei vaitaimi, o nisi e talitonu i le Toetu moni o Keriso, ae toatele lava e masalosalo pe le talitonu. Ae o nisi ua iloa. I le faaiuga, o le a vaai ai ma iloa e tagata uma; e moni, “o le a tootuli tulivae uma, ma tautino atu laulaufaiva uma i ona luma.”³⁸

Seia oo i lona taimi, ou te talitonu i le toatele o molimau i le Toetu o le Faaola o loo maua o latou aafiaga ma molimau i le Feagaiga Fou—o Peteru ma ona soo o le Toasefululua ma le pele o Maria le Makatala, faatasi ai ma isi. Ou te talitonu i molimau o loo maua i le Tusi a Mamona—o Nifae le Aposetolo ma le motu o tagata e lemai- loa i le laueleele o Nuumau, faatasi ai ma isi. Ma ou te talitonu i le molimau a Iosefa Samita ma Sini Rikitone o e, i le mavae ai o le tele o isi molimau na

folafola mai ai le molimau sili o lenei tisipenisione mulimuli, “o loo soifua o ia! Aua sa ma vaai ia te ia.”³⁹ I lalo o le vaaiga a Ona fofoga e silafia mea uma, ou te tu atu ai o se molimau, o Iesu le Nasareta o le Togiola toetu, ma ou te molimau atu i mea uma o mulimuli mai e uiga i le *moni* o Lona Toetu. Tau ina ia e mauaina le talitonuga maumaututu ma le mafanafana o lona lava molimau e tasi, ou te tatalo ai i le suafa o Iesu Keriso, amene. ■

FAAMATALAGA

1. Luka 24:5–7.
2. Mataio 28:6–7.
3. Ioane 20:2.
4. Ioane 20:5, 7.
5. Ioane 20:8, 9.
6. Ioane 20:13.
7. Ioane 20:15.
8. James E. Talmage, *Jesus the Christ*, 3rd ed. (1916), 681.
9. Tagai Luka 24:34; 1 Korinito 15:5.
10. Tagai Mareko 16:12; Luka 24:13–35.
11. Luka 24:39.
12. Luka 24:41.
13. Tagai Luka 24:42–43.
14. Galuega 1:8.
15. Tagai 3 Nifae 11:14–15.
16. 3 Nifae 11:16–17.
17. Ioane 5:26.
18. Ioane 10:17–18.
19. Tagai Esoto 3:14.
20. 1 Korinito 15:21–22.
21. *The Neal A. Maxwell Quote Book*, ed. Cory H. Maxwell (1997), 287.
22. Tagai 1 Ioane 4:8.
23. Alema 4:2:15; tagai foi Mosaea 15:8–9.
24. 3 Nifae 27:13–14.
25. Tagai Enosa 1:6.
26. Tagai, mo se faaitaiga, 3 Nifae 9:15.
27. Tagai, mo se faaitaiga, Mataupu Faavae ma Feagaiga 76.
28. Tagai Mataupu Faavae ma Feagaiga 138.
29. Tagai Galuega 1:10–11.
30. Mataupu Faavae o le Faatuatua 1:10; tagai foi Topical Guide, “Jesus Christ, Millennial Reign.”
31. Tagai, mo se faaitaiga, 2 Nifae 9:15.
32. Tagai Ioane 14:12.
33. Mataupu Faavae ma Feagaiga 84:19–20.
34. Iopu 19:26.
35. Thomas S. Monson, “Ou te Iloa o Loo Soifua Lo’u Togiola!” *Liahona*, Me 2007, 23.
36. *Aooga a Peresitene o le Ekalesia: Iosefa Samita* (2007), 49.
37. Tagai 3 Nifae 1:15–20.
38. Mosaea 27:31.
39. Mataupu Faavae ma Feagaiga 76:22–23.



Saunia e Peresitene Thomas S. Monson

Seia Tatou Toe Feiloai

Ia i ai ma ia faatasi ma i tatou le Agaga na tatou lagonaina i nei aso e lua a o tatou faatinoina a tatou galuega i aso uma.

Ou uso e ma tuafafine, oka se konafesi ina a matagofie. Ua fafagaina i tatou faaleagaga a o tatou faalogologo atu i upu musuia a alii ma tamaitai na saunoa mai ia i tatou. Ua matua faagaetia musika, o savali na sauniaina ma fofogaina e ala uunaiga a le Agaga Paia, ma o tatalo foi na faalatalata atili atu ai i tatou i le lagi. Ua siitiaina i tatou i auala uma a o tatou auai faatasi ai.

Ou te faamoemoe o le a tatou faaluina le taimi e toe faitau ai i savali o le konafesi pe a maua i luga o le LDS.org i totonu o nai aso ma pe a lolomiina i lomiga o le a sosoo ai o mekasini o le *Ensign* ma le *Liahona*, aua ua onomea i ai lo tatou toe iloiloina ma toe suesueina ma le toto'a.

Ou te iloa tou te afaatasi ma au i le faailoaina o lo tatou lotofaafetai faamaoni i uso ma tuafafine o e na faamaloloina i lenei konafesi. Sa latou auauna atu ma le lelei ma na faia ni sao iloga i le galuega a le Alii. Ua atoa-toa lo latou tuuto.

Ua tatou lagolagoina foi, e ala i le siilima, ia uso ua valaauina i tofiga fou o tiutetauave. Matou te faafeiloai atu ia i latou ma manao ia latou iloa ua matou tulimatai atu e auauna faatasi ma i latou i le galuega a le Matai.

A o tatou mafaufau loloto ai i mea ua tatou faalogo i ai, e ao ona tatou naunau ia faia ni mea lelei atu nai lo mea na tatou faia i le tuanai. E ao ona tatou agalelei ma agaalofa atu ia i latou e le tutusa o tatou talitonuga ma

o tatou tulaga faatonuina. Na aumai e le Faaola i lenei lalolagi se savali o le alofa ma le agalelei i alii ma tamaitai uma. E tatau lava ona tatou mulimuli i Lana faataitaiga i taimi uma.

O loo tatou fetaiiai ma le tele o luitau ogaoga i le lalolagi i aso nei, ae ou te faamautinoa atu ia te outou o loo manatu mai lo tatou Tama Faalelagi ia i tatou. O le a Ia taialaina i tatou ma faamanuiaina i tatou pe a tatou tuu atu lo tatou faatuatua ma le faalagolago ia te Ia ma o le a Ia fesoasoani mai ia i tatou i soo se faigata tatou te oo i ai.

Ia i ai faamanuiaga o le lagi ia i tatou uma taitoatasi. Ia faatumulia o tatou aiga i le alofa ma le faaalalo alo atoa ai ma le Agaga o le Alii. Ia tatou fafagaina pea e le aunoa a tatou molimau o le talalelei, ina ia avea ma se puipuiga mo i tatou i le faasagatau mai o tu'iga a le tiapolo. Ia i ai ma ia faatasi ma i tatou le Agaga na tatou lagonaina i nei aso e lua a o tatou faatinoina a tatou galuega i aso uma, ma ia maua pea i tatou i taimi uma o loo faia le galuega a le Alii.

Ou te molimau atu e moni lenei galuega, o loo soifua lo tatou Faaola, ma o loo Ia taialaina ma taitaia Lana Ekalesia i luga o lenei fogaeleele. Ou te tuu atu ia te outou lau tautinoga ma lau molimau o loo soifua le Atua lo tatou Tama Faavavau ma e alofa ia i tatou. O Ia moni o lo tatou Tama, ma e patino ma moni lava o Ia. Tau ina ia tatou iloaina Lona naunau e fia latalata mai ia i tatou, ma Lona naunau e faia soo se mea e fesoasoani ai ia i tatou, ma le tele o Lona alofa ia i tatou.

Ou uso e ma tuafafine, ia faamanuia outou e le Atua. Ia i ai Lona filemu folafolaina faatasi ma outou i le aso ma aso uma.

Ou te faatofa atu seia tatou toe feiloai foi i le isi ono masina, ma ou te faia ai nei mea i le suafa o Iesu Keriso, lo tatou Alii ma le Faaola, amene. ■





Saunia e Rosemary M. Wixom
Peresitene Aooa o le Peraimeri

O Le Tausiga o Feagaiga e Puipuia ai i Tatou, Saunia ai i Tatou, ma Faamalosia ai i Tatou

O i tatou o ni tamaitai osifeagaiga o vaitausaga uma o loo savalia le ala faaletino ina ia toe foi atu ai i Lona afioaga.

Uso e, matou te alolofa ia te outou. A o asiasi atu i Mekisiko talu ai nei, sa ou maua ai se vaaiga i le usoga o loo tatou lagonaina i lenei po. Vaai faalemafaufau i lenei vaaiga: Sa faatoa uma la matou Peraimeri i le taeao o le Aso Sa, ma sa matou taape atu ma tamaiti ma faiaoga i le alasavali tumutumu. Na matala mai le faitotoa o le vasega a Tamaitai Talavou i lena lava taimi, ma ou vaaia ai tamaitai talavou ma o latou taitai. Sa matou feopoai uma. Faatasi ai ma le pipii mai o tamaiti i lou lausakete ma le siomia o au e tamaitai, sa ou manao e faaali atu ou lagona ia sa i ai i lena lava taimi.

Ou te leiloa faaSipaniolo, o lea na o upu faaPeretania lava na oo mai i lou mafaufau. Sa ou vaai atu i o latou

foliga uma ma fai atu, “O i matou o afafine a lo matou Tama Faalelagi, e

alofa ia i matou, ma e matou te alolofa ia te Ia.” Na amata ona fai faatasi mai tagata uma i le taimi lava lena, i le faaSipaniolo. Sa matou i ai iina i le ala-savali tumutumu, ma taulotoina faatasi le mau autu a Tamaitai Talavou a o matou fai atu, “O le a matou laulaututu e fai ma molimau o le Atua i taimi uma ma mea uma, ma i nofoaga uma.”

Ua tatou potopoto faatasi i lenei po i le lalolagi atoa, o ni Ana so’o, ma se manao e puipuia ma lagolagoina le malo o le Atua. O i tatou o afafine a lo tatou Tama Faalelagi. O i tatou o ni tamaitai osifeagaiga o vaitausaga uma o loo savalia le ala faaletino ina ia toe foi atu ai i Lona afioaga. O le tausiga o feagaiga e puipuia ai i tatou, saunia ai i tatou, ma faamalosia ai i tatou.

O loo tatou faatasi ai i lenei po ma teineiti o le vaitausaga o le Peraimeri. O nisi o outou sa faia talu ai nei lena laasaga muamua i luga o le ala i le ola e faavavau i le sauniga o le papatisoga.

Vaavaai solo i ou autafa. E tele avanoa o i le lumanai a o outou vaavaai atu i tamaitai o e na faia feagaiga ma ua saunia e faaali atu ia te outou le auala i le aluga o le ala o i luma atu.

Afai ua 8, 9, 10, pe 11 ou tausaga, pe o i le Nofoaga Autu mo Konafesi,



Aai o Mekisiko, Mekisiko

i tou aiga, po o se falesa i le salafa o le lalolagi, faamolemole pe mafai ona outou tutu i luga? Susu maia i le sauniga aoao a tamaitai. Ia faamolemole ia tutu ai pea aua e matou te mananao e valaaulia la outou sao i lenei po. O le a ou hamuina se pese Peraimeri. Ma o le taimi lava tou te iloa ai le fati, e mafai ona outou usu mai loa faatasi ma au. Ia, e tatau ona outou pepese ina ia lagona e tagata uma outou.

*Aoao mai ia ou iloa lona alofa;
Aoao au ia tatalo i le Tama;
Aoao ia ou iloa mea sao e fai;
Aoao mai au, ia ou savali ai.*

Tutu pea, teine, ae usu mai e tagata uma e 12 tausaga ma matutua atu le fuaiupu lona lua.

*O mai tamaiti tatou aoao nei
I poloaiga ia tausī lelei,
Ina ia tatou toe faatasi ma Ia—
Savali pea i le malamalama.¹*

Oka se matagofie. Ia alala loa i lalo. Faafetai.

I le avea ai ma tamaitai i vaitausaga uma ua tatou savavali i *Lona* malamalama. O la tatou malaga i le ala e patino ma o loo mumu lelei i le alofa o le Faaola.

Tatou te ulu atu i le faitotoa o le ala i le ola e faavavau faatasi ma sauniga ma feagaiga o le papatisoga, ona tatou maua lea o le meaalofo o le Agaga Paia. Na fesiligia i tatou e Elder Robert D. Hales, “O [tatou] malamalama ea ma o malamalama ea a [tatou] fanau, afai [tatou] te papatiso e suia i [tatou] e faavavau?”

Sa ia faamalalama mai foi “a tatou malamalama i a tatou feagaiga o le papatisoga ma le meaalofo o le Agaga Paia, o le a suia o tatou olaga ma o le a amata ona tatou tuuto atoa atu i le malo o le Atua. A oo mai



faosoosoga ia i tatou, afai o le a tatou faalogo, o le a faamanatu mai ia i tatou e le Agaga Paia ua uma ona tatou folafola atu ina ia manatua lo tatou Faaola ma usitai i poloaiga a le Atua.”²

A o tatou fetagofi atu i vaiaso taitasi i le faatusa o le faamanatuga, ua tatou faafouina a tatou feagaiga o le papatisoga. Sa saunoa mai Elder David A. Bednar: “A tatou tutu i le vai o le papatisoga, tatou te tepa taulai atu i le malumalu. Tatou te tautino atu e manatua pea le Faaola ma tausī i Ana poloaiga e fai ma sauniuniga e auai i sauniga paia o le malumalu.”³

O sauniga o le malumalu e taitai atu ai i faamanuiaga silisili o loo avanoa e auala mai i le Togiola a Iesu Keriso. O sauniga na e tatau mo lo tatou faaeaga i le malo selesitila. A o tatou taumafai e tausī a tatou feagaiga, o le a amata ona mouese atu o tatou lagona vaivai ma le le atoatoa, ae o le a atili anoa ai sauniga ma feagaiga o le malumalu. E talia tagata uma ina ia savalia lena ala i le ola e faavavau.

Ou te maofa i le malolosi o teineiti, tamaitai talavou, ma tamaitai ua ou feiloai i ai i le salafa o le lalolagi ua mausali o latou vae i lenei ala. Sei ou faasoia atu nisi o faaitaiga o teineiti ma

tamaitai o le feagaiga sa ou feiloai i ai.

O Luana sa 11 tausaga ina ua ou asia lona aiga i Buenos Aires, Atenitina. Ona o se faalavelave na tupu i lona laitiiti, na le mafai ai ona tautala Luana. E lei tautala o ia mo le tele o tausaga. Sa nofo filemu o ia a o matou talatalanoa. Sa ou faamoemoe ia tau lava o sina musumusū mai ia te ia. Sa ia pulatoa mai ia te au e pei o fai mai sa le manaomia ni upu ia ou iloa ai lona loto. Ina ua maea se tatalo, sa matou tutu i luga o le a o ese mai ae tuu mai e Luana se atavali ia te au. Sa ia tusia le ata o Iesu Keriso i le Faatoaga o Ketesemane. Sa ou iloa i lena taimi ma le leotele ma le manino lana molimau. Na osia e Luana se feagaiga i le papatisoga ina ia tu o se molimau o le Atua “i taimi uma ma i mea uma, ma i nofoaga uma.”⁴ Sa ia malamalama i le Togiola a Iesu Keriso, lea na molimauina i lana ata. Mata sa ia iloina lena mea, e ala i le mana faamalosi ma le gafatia o le Togiola, e mafai ai ona faamaloloina o ia ma toe tautala ai? Talu mai lena aso i le tolu tausaga ua mavae, ua alualu i luma Luana i lana taumafaiga ia tautala. Ua auai nei o ia i le Tamaitai Talavou faatasi ma ana uo. O le faamaoni i le feagaiga sa ia osia i le papatisoga,

o loo faaauau ai pea ona ia faasoa atu lana molimau i le Faaola.

Ua tosina atu le autalavou i le lalolagi atoa i malumalu. I Lima, Peru, sa ou feiloai ai i se tama ma ona afafine e toatolu i fafo o le faitotoa ulufale o le malumalu. Sa ou vaaia le malamalama i o latou mata. O afafine e toalua sa matuai pipili lava ma sa saofafai i nofoa faataavalevale. O le afafine lona tolu, a o fesoasoani atu i manaoga a ona uso, sa ia faamatala mai e faapea e toalua isi ona uso o loo i le fale. E nonofo foi i laua i nofoa faataavalevale. Sa le mafai ona la malaga mo le 14 itula i le malumalu. E matua taua lava le malumalu i lenei tama ma ona afafine ma o lea na o mai ai i latou e toafa i le malumalu i lena aso—o le toalua o i latou e na o le matamata lava i le toatasi lea e mafai ona papatiso mo e ua maliliu ma faatino lena sauniga paia. Faapei o Nifae, sa latou “fiafia . . . i feagaiga a le Alii.”⁵

O se tamaitai nofofua sa ou iloa e faatauaaina ia sauniga faalevaiaso o le faamanatuga ma ona folafolaga paia “ina ia [ona] maua pea lona Agaga e faatasi ma [ia].”⁶ O lena mafutaga faifaiepa o se folafolaga lea e faamaluluina ai galu o le tuuatoatasi. Na te maua ai lona malosi e faatofuina ai o ia lava i le atiaeina o ana taleni ma se manaoga e auuina atu i le Alii. Sa ia iloa ina le olioli sili i le alofa atu i tamaiti uma i lona olaga, ma a ia sailia le filemu naua, o le a e mauaina o ia i le malumalu.

Ma le tagata mulimuli, o se tina matua i le vaitausaga o le 90 sa ia vaaia le tuputupu ae o lana fanau ma fanau a fanau ma le fananau mai o fanau a fanau a fanau. E pei o le toatele o i tatou, sa faatumulia lona olaga i faanoanoaga, mafatiaga, ma le olioli lemafaamatalaina. Sa ia tautino mai afai na te toe tusia le tala o lona soifua, o le a ia le filifili e faaafua ai

nisi o mataupu ua uma ona tusiaina. Peitai, sa ia fai mai ma le ataata, “E tatau ona ou ola ai pea mo sina taimi ma vaai pe faapei le faaiuga!” O loo faaauau pea ona ia pipiimau i feagaiga o le ala.

Na aoao mai Nifae:

“Pe a uma ona outou i ai i lenei ala lauitiiti ma le vaapiapi, ou te fesili atu pe ua uma ona faia o mea uma? Faauta, ou te fai atu ia te outou, E leai. . . .

“O le mea lea, e tatau ai ona outou fetaoimi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afai tou te fetaoimi atu i luma, ma taumamafa fiafia i le afiga a Keriso, ma tumau e oo i le iuga, faauta, ua faapea ona fetalai mai o le Tama: O le a outou maua le ola e faavavau.”⁷

Ua tatou i ai uma i lena ala. O le po nei, ua tatou pepese e uiga i le savavali i le ala o le malamalama. I le avea ai ma tagata taitoatasi, tatou te malolos. Faatasi ai ma le Atua, e le mataofiofia i tatou.

Na fetalai mai le Alii ia Ema Samita, “Ia sii ae i luga lou loto ma olioli, ma pipii i feagaiga ua e faia.”⁸

Ua tatou olioli faapea o le tausia o a tatou feagaiga o le a tatou lagona ai le alofa o lo tatou Tama Faalelagi ma lo tatou Faaola o Iesu Keriso. Ou te molimau atu o loo soifua i Laua. I le suafa o Iesu Keriso, amene. ■

FAAMATALAGA

1. “Aoa Mai Ia Ou Savali i le Malamalama,” *Viiga*, nu. 187; po o le *Tusipese a Tamaiti*, 70.
2. Robert D. Hales, “O Le Papatisoaga: O Le I Ai i le Malo ma ni O o le Malo,” *Liahona*, Ian. 2001, 6, 7.
3. David A. Bednar, “Taofia ma le Mamalu o se Igoa ma Tulaga,” *Liahona*, Me 2009, 97.
4. Mosaea 18:9.
5. 2 Nifae 11:5.
6. Mataupu Faavae ma Feagaiga 20:77.
7. 2 Nifae 31:19–20.
8. Mataupu Faavae ma Feagaiga 25:13.





Saunia e Bonnie L. Oscarson
Peresitene Aoao o Tamaitai Talavou

Le Usoga: Oka, so Tatou Manaomiaina o le Tasi ma le Isi

*E tatau ona tatou taofia le taulai atu i o tatou eseese
ae ia vaavaai i mea ua tatou tutusa ai.*

Sa tatou vaai i lenei vitio i ni atunuu se valu ma faalogo i isi gagana ese e iva. Mafaufau pe fia isi gagana ua faaopoopo i lenei fuaiupu mulimuli. E ese le ofoofogia o le iloaina, i le avea ai ma se usoga i le lalolagi atoa ua mafai ona tatou sii ae o tatou leo i molimau i le upumoni faavavau o i tatou o afafine o se Tama Faalelagi alofa.

O se faamanuiaga sili le i ai iinei i lenei sauniga faasolopito ma lauga atu i tamaitai uma o le Ekalesia e tai valu tausaga ma matutua atu. O loo i ai se malosiaga maoae i lo tatou lotogatasi i lenei afiafi. A o ou vaai atu ia i tatou uma o potopoto faatasi i le Maota Autu mo Konafesi ma mafaufau i le faitau afe o isi o loo maimoa i lenei faasalalauga mai nofoaga i le salafa o le lalolagi, o le tuufaatasia o le mana o a tatou molimau ma le faatuatua ia Iesu Keriso ua mautinoa lava ua fatuina ai se tasi o faatasiga mamana a tamaitai ua sili ona faatumulia i le faatuatua i le talafaasolopito o le Ekalesia, a le o lenei o le [talafaasolopito o le] lalolagi.

O le afiafi nei ua tatou olioli ai i le tele o a tatou matafaioi eseese o ni tamaitai i le Ekalesia. E ui tatou te eseese ma tulaga ese i le tele o auala, ae ua tatou faailoa atu foi o i tatou uma o afafine o le Tama Faalelagi lava e tasi lea ua avea ai i tatou o ni uso. Ua tatou auaatasi i le fausiaina o le malo

o le Atua faapea ma feagaiga ua tatou osia, e tusa lava po o a o tatou tulaga. O lenei faatasiga tuufaatasi, e aunoa ma se masalosalo, o se usoga faatamaitai sili ona faamamaluina i luga o le fogaelele!¹

O le avea ma usoga e tau mai ai e i ai se sootaga lemamotusiaina i lo tatou va. E tausi e le tasi uso le isi, e leoleo e le tasi le isi, e fefaamafanafanaai le tasi ma le isi, ma e i ai iina mo le tasi ma le isi i taimi lelei ma taimi faigata. Na fetalai mai le Alii, “Ou te fai atu ia te outou, ia tasi outou; ma afai tou te le tasi e le a a’u outou.”²

E uunaia i tatou e le fili ina ia tatou faitio pe sailiili masei le tasi i le isi. E manao o ia ia tatou taulai atu i o tatou eseese ma faatusatusaina i tatou lava i isi. Atonu e te fiafia e faamalositino mamafa mo se itula i aso taitasi ona e te maua ai se faalogona lelei, ae ou te mafaufau o se savali i luga o ni faasitapu nai lo le alu i le lifi o se taunuuga faamalositino maoae lea. E mafai lava la ona tatou uo, a ea?

I le avea ai o i tatou o ni tamaitai e mafai ona tatou matua faitio ia i tatou lava. A tatou faatusatusaina i tatou



Sini, Ausetalia



lava i isi o le a tatou lagonaina pea le le atoatoa po o le ita i isi. Na saunoa Sister Patricia T. Holland i se tasi taimi, “O le manatu autu, e le mafai ona tatou tauina i tatou o ni tagata Kerisiano ae faaauau pea ona faamasinoina e le tasi le isi—po o i tatou lava—i se tulaga matua.”³ Sa ia ta’ua e leai se mea e tatau ai ona aveesea lo tatou agalelei atu ma le tulaga faaleusoga. E manaomia le tau lava ina tatou malolo ma olioli i o tatou eseese paia. E manaomia ona tatou iloa tatou te mananao uma e auauna atu i le malo e faaoga ai a tatou taleni ma mealofofa tulaga ese i o tatou lava ala. Ona mafai lea ona tatou olioli i la tatou usoga, ma i a tatou fegalegaleaiga, ma amata ona auauna atu.

O le mea moni, tatou te matuai manaomia moni lava le tasi ma le isi. E masani lava ona sailia e tamaitai se faauooga, lagolago, ma ni mafutaga. E tele naua mea tatou te aoao mai le tasi ma le isi, ma e tele lava ina tatou faatagaina papupuni o o tatou lava vaivaiga e taofia ai i tatou mai le fiafia i fegalegaleaiga ia e ono avea ma faamanuiaga silisili i o tatou olaga. Mo se faataitaiga, e manaomia e i tatou o tamaitai ua matutua teisi atu mea e ofoina mai e outou teineiti o le vaitausaga o le Peraimeri. E mafai ona matou aoao le tele o mea mai ia te outou e uiga i le auaunaga ma le alofa faaKeriso.

Sa ou faalogo talu ai nei i se tala matagofie e uiga i se teineitiiti e igoa ia Sara, lea sa maua e lona tina se avanoa e fesoasoani ai i se isi tina i lana uarota e igoa ia Brenda, lea na aafia lona tuasivi ma le faiai. E fiafia

Sara e o ma lona tina e fesoasoani ia Brenda. Na te tuuina le kulimi i lima o Brenda ma fofo ona tamatamailima ma ogalima aua e tele lava ina tiga. Ona aoao lea e Sara e fālō lemu lima o Brenda i luga o lona ulu e faamalosi ai ona musele. E selu e Sara le lauulu o Brenda ma talatalanoa ma ia a o tau-tuaina e lona tina isi ona manaoga. Na aoaoina e Sara le taua ma le olioli i le auauna atu i se isi tagata ma malamalama ai e oo lava i se tamaitiiti e mafai ona ia faia se eseese tele i le olaga o se tagata.

Ou te fiafia i le faataitaiga o tatou mauaina i le mataupu muamua o Luka lea o loo faamatala ai se mafutaga fiafia i le va o Maria, le tina o Iesu, ma lona tausoga o Elisapeta. Na avea Maria ma se tamaitai talavou i le taimi na tau atu ai ia te ia lana misiona ofoofogia ina ia avea ma tina o le Alo o le Atua. I le taimi muamua, atonu na foliga o se tiutetauave mamafa le tauaveina toatasi. Na tuuina atu e le Alii Lava Ia ia Maria se tasi la te tauaveina faatasi lana avega. Na auala mai i le savali a le agelu o Kaperielu, na tuuina atu ai ia Maria le igoa o se tamaitai faatuatua ma agaalofa lea e mafai ona ia liliu atu i ai mo le lagolagosua—o lona tausoga o Elisapeta.

Na faasoaina e lenei tamaitai talavou ma lona tausoga o le sa “matuai matua lava,”⁴ se sootaga masani i a laua maitaga faavavega, ma e mafai ona ou vaai faalemafau atu i le taua tele ia i laua uma o masina e tolu sa la faaaluina faatasi a o la talatalanoa faatasi ai, femalamalamaai ma le tasi

ma le isi, ma lagolago e le tasi le isi i o laua valaauga tulagaese. O i laua o se faataitaiga matagofie o le fetausiai faatamaitai i le va o augatupulaga eseese.

E mafai e i tatou o e ua matutua teisi atu ona i ai se aafiaga maoae i tupulaga laiti ifo. A o laitiiti lou tina, e leai se tasi o ona matua na malos i le Lotu. E oo lava i le lima o tausaga, e savali toatasi i le lotu ma auai i ana sauniga—Peraimeri, Aoga Sa, ma le sauniga faamanatuga—e eseese uma taimi.

Sa ou fesili i lou tina talu ai nei pe aisea na ia faia ai lena mea i vaiaso taitasi ae sa na le maua se lagolagosua po o se faamalosiuga mai le aiga. Na ia tali mai: “sa i ai ni ou faiaoga Peraimeri sa alofofa ia te au.” Na popole nei faiaoga ia te ia ma aoao atu ia te ia le talalelei. Na latou aoaoina o ia e i ai sona Tama o i le Lagi e alofa ia te ia ma o lo latou popolega mo ia na ia sau ai i lea vaiaso ma lea vaiaso. Na fai mai lou tina ia te au, “O se tasi na o faatosinaga sili ona taua i le amataga o lo’u olaga.” Ou te faamoemoe o le a mafai ona ou faafetai atu i na uso i se aso! E leai se papupuni o tausaga pe a oo i auaunaga faaKeriso.

O ni nai vaiaso ua mavae atu sa ou feiloai ai i se peresitene o Tamaitai Talavou a le siteki i Kalefonia lea na tau mai ia te au le valaauina talu ai nei o lona tina ua 81 tausaga e avea ma faufautua o le Maea Meite. Sa matua lofituina au, o lea sa ou valaau ai i lona tina. Ina ua talosagaina Sister Val Baker e lona epikopo la te feiloai, sa ia tulimatai atu i le valaauina o ia e avea o se tagata o le potutusi po o le tusi talafaamaumau a le uarota. Ina ua talosagaina o ia e galue o se faufautua o le Maea Meite i Tamaitai Talavou, o lana tali vave atu, “Ua e mautinoa?”

Na tali atu ma le faamaoni lana epikopo, “Sister Baker, e le o sese; o lenei valaauga e mai le Alii.”

Sa ia fai mai e leai se isi ana tali nai lo le, “Ioe.”

Ou te fiafia i le musumusuga na lagona e lenei epikopo i le tele o mea e mafai ona aoao e Maea Meite e toafa o lana uarota mai le tomai, aafiaga, ma faataitaiga o le olaga atoa o lenei uso matua. Ma e mate mai po o ai e alu i ai Sister Baker pe a ia manaomia se fesoasoani i le setiina o lana itulau o le Facebook?

Ou te mafaufau i le fesoasoani sili e mafai ona avea ai uso o le Aualofa i le faafeiloaia o tamaitai talavou lea ua faatoa i ai i Tamaitai Talavou. E masani lava ona lagonaina e o tatou uso talavou le lei o so latou nofoaga po o se mea e tutusa ai ma i latou o i le Aualofa. Ae latou te lei aulia le 18, latou te manaomia taitai o Tamaitai Talavou ma tina o e o le a molimau atu e uiga i faamanuiaga maoae o le Aualofa. Latou te manaomia se lagona naunautai i le avea ai o se vaega o lona faalapotopotoga faamamaluina. Pe a amata ona auai atu tamaitai talavou i le Aualofa, o le mea e sili ona latou manaomia o se uo lea e nofo i ona autafa, o se lima e opoina o latou tauau, ma se avanoa e aoao ma au-auna atu ai. Ia tatou tufai aapa uma atu e fesoasoani le tasi i le isi e ala i suiga ma taimi taua o o tatou olaga.

Faafetai i tamaitai uma o le Ekalesia o e o aapa atu i vaitausaga ma aganuu eseese ina ia faamanuiaina ma au-auna atu i isi. O loo au-auna atu tamaitai talavou i fanau Peraimeri ma tagata matutua. O tamaitai nofofua o soo se vaitausaga o loo faaalua le tele o taimi e tausia ai manaoga o i latou o loo siomia i latou. Ua tatou iloa le faitau afe o tamaitai talavou o e ua faaalua ia masina e 18 o o latou olaga e faasoa atu ai le talalelei i le lalolagi. Ua faamautinoa mai nei mea, e pei ona ta'ua e la tatou viiga pele, "O le galuega a agelu lava, ua tuuina mai [i tamaitai]."⁵

Afai o i ai ni papupuni, o lona uiga o i tatou lava ua faia na papupuni.



Viena, Auseteria

E tatau ona tatou taofia le taulai atu i o tatou eseeseaga ae ia vaavaai i mea ua tatou tutusa ai; ona mafai lea ona amata ona tatou iloina o tatou faamoemoega sili ma ia ausia mea lelei silisili i lenei olaga. Sa saunua mai Sister Marjorie P. Hinckley i se tasi taimi, "Oka, so tatou manaomiaina o le tasi ma le isi. E manaomia e i matou ua matutua outou o loo talavou. Ma e faamoemoe, e manaomia e outou o talavou nisi o i matou ua matutua. O se tulaga faaagafesootai le manaomia e tamaitai o tamaitai. Tatou te manaomia ni faigauo mafana ma faamalieloto ma le faamaoni o le tasi i le isi."⁶ E sao lava Sister Hinckley; oka, so tatou manaomiaina o le tasi ma le isi!

Uso e, e lei se isi vaega o tamaitai i le lalolagi ua mauaina ni faamanuiaga silisili nai lo i tatou o tamaitai o le Au Paia o Aso e Gata Ai. O i tatou o tagata o le Ekalesia a le Alii, ma e tusa lava po o a o tatou tulaga faaletagata lava ia, e mafai ona tatou olioli i faamanuiaga atoatoa o le mana o le perisitua e ala i le tausia o feagaiga ua tatou osia i le papatisoga ma i le malumalu. Ua i ai o tatou perofeta soifua o loo taitaia ma aoaoina i tatou, ma ua tatou olioli i le meaalofo sili o le Agaga Paia, lea o loo galue o se faamafanafana ma se taiala o o tatou olaga. Ua faamanuiaina i tatou ia galulue soosootauau ma tuagane amiotonu a o tatou faamalosi aiga ma au-aiga. Ua tatou maua le malosi ma le mana o sauniga o le malumalu ma le anoanoai o isi mea.

E le gata i le faafiafiaina i nei faamanuiaga ofofofia uma, ua tatou maua le tasi ma le isi—o uso i le talalelei a Iesu Keriso. Ua faamanuiaina i tatou i natura agamalua ma limafoai lea e fesoasoani ia i tatou ia faatino le alofa ma le au-aunaga faaKeriso ia i latou o siomia i tatou. A o tatou tagai i tala atu o o tatou eseeseaga i tausaga, aganuu, ma tulaga ina ia tausia ma au-auna le tasi i le isi, o le a faatumulia i tatou i le alofa le pona o Keriso ma musumusuga ia e taitaia i tatou ina ia iloa ai po o le a le taimi ae po o ai foi e au-auna atu i ai.

Ou te tuuina atu ia te outou se valaaulia lea na tuuina atu muamua, e se peresitene aoao o le Aualofa ina ua saunua atu, "Ou te valaau atu ia te outou ina ia le gata ia alolofa atili i le tasi ma le isi, ae ia *sili atu* ona loloto le alofa o le tasi i le isi."⁷ Tau ina ia tatou iloa lo tatou manaomiaina tele o le tasi ma le isi, ma tau ina ia loloto le alofa o le tasi i le isi, o lau tatalo lea, i le suafa o Iesu Keriso, amene. ■

FAAMATALAGA

1. Tagai Barbara B. Smith, "The Bonds of Sisterhood," *Ensign*, Mat. 1983, 20–23.
2. Mataupu Faavae ma Feagaiga 38:27.
3. Patricia T. Holland, "'One Thing Needful': Becoming Women of Greater Faith in Christ," *Ensign*, Oct. 1987, 29.
4. Luka 1:7.
5. "As Sisters in Zion," *Hymns*, no. 309.
6. *Glimpses into the Life and Heart of Marjorie Pay Hinckley*, ed. Virginia H. Pearce (1999), 254–55.
7. Bonnie D. Parkin, "Filifiliaina o le Alofa Moni: O Lea Mea Lelei," *Liahona*, Nov. 2003, 106.



Saunia e Linda K. Burton
Peresitene Aoa o le Aualofa

Manaomia: Lima ma Loto e Faanatinati le Galuega

E mafai ona tatou ofo atu ni lima e fesoasoani ai ma loto e faanatinati ai le galuega ofoofogia a le Tama Faalelagi.

Uso pele, matou te alofa tele ia te outou! A o tatou matamata i lena vitio matagofie, sa e vaaia ou lava lima o aapa atu e fesoasoani i se tasi i luga o lena ala o feagaiga? Sa ou mafaufau i se teineitiiti o le Peraimeri e igoa ia Brynn o lē e na o le tasi lona lima ma e na te faaaogaina lena lima e aapa atu ai e faamanuia lona aiga ma ana uo—o le Au Paia o Aso e Gata Ai ma isi tapuaiga. E lē lalelei ea o ia? Ma e faapena foi outou! Uso e, e mafai ona tatou ofo atu ni lima e fesoasoani ai ma loto e faanatinati ai le galuega ofoofogia a le Tama Faalelagi.

E pei foi o tatou uso faamaoni i tusitusiga paia, e pei o Eva, Sarai, Maria, ma le toatele o isi sa iloina lo latou faasinomaga ma le faamoemoga, e silafia foi e Brynn o ia o se afafine o le Atua.¹ E mafai foi ona tatou iloa lo tatou tupuaga paia o ni afafine faapelepele o le Atua ma le galuega taua ua ia te Ia mo i tatou e fai.

Na aoao mai le Faaola, “Ai se tasi e fia fai lona finagalo, e iloa ai e ia le mataupu.”² O a mea e manaomia ona tatou iloa ma faia ia “toe mafuta ai ma

ia i se aso”?³ E mafai ona tatou aoao mai le tala o le alii talavou mauoa o lē na fesili ia Iesu po o le a se mea e manaomia ona ia faia e maua ai le ola e faavavau.

Sa tali atu Iesu ia te ia, “Afai e te fia oo i le ola, ia e tausi i poloaiga.”

Sa fesili le alii talavou ia te Ia pe o lē fea [o poloaiga] e ao ona ia tausia. Ona faamanatu lea e Iesu ia te ia nisi o Poloaiga e Sefulu ua tatou masani uma i ai.



Sa tali le alii talavou, “Ua ou tausia na mea uma talu ina ou itiiti: se a se mea o toe ou te lei faia?”

Ua faapea atu Iesu, “Afai e te manao ina ia atoatoa ona lelei o lau amio, ia e alu ma e faatau atu au mea, i le e avatu ai i e matitiva, ona ia te oe lea o le faulaigāoloa i le lagi: i le e sau ma mulimuli mai ia te au.”⁴

Sa valaauina o ia e Iesu ia avea ma se vaega o Lana galuega—le galuega o se so’o. E tutusa lava le tatou galuega. E ao ona tatou “tuu ese mea o [le] lalolagi, . . . pipii i [a tatou] feagaiga,”⁵ ma o mai ia Keriso ma mulimuli ia te Ia. O mea na e faia e so’o!

Ia, uso e, ‘aua nei o tatou amata faanoanoa i lo tatou lava alualu i luma ona sa fetalai le Faaola i le alii talavou mauoa e uiga i le avea ma [sē] e atoatoa. O le upu *atoatoa* i lenei tala sa faaliliuina mai se upu Eleni o lona uiga o le “silisili.” A o tatou taumafai i le mea silisili e agai i luma i le ala o feagaiga, o le a sili atu lo tatou avea ma [tagata] silisili ma atoatoa i lenei olaga faaletino.

E pei o le alii talavou mauoa i aso o Iesu, o nisi taimi e faaosoosoina ai tatou ia fiu pe toe foi i tua ona atonu tatou te manatu e le mafai ona tatou faia na o i tatou. Ma e sa’o i tatou! E le mafai ona tatou faia ni mea faigata ua talosagaina i tatou e fai e aunoa ma se fesoasoani. E oo mai le fesoasoani e ala i le Togiola a Iesu Keriso, le taitaiga a le Agaga Paia, ma i lima fesoasoani a isi.

Sa molimauina talu ai nei e se uso faamaoni nofofua le mauaina o le malosi e ala i le Togiola, e faaaoga ai ona lima fesoasoani ma se loto naunautai e tausi ai le fanau e toafa na tuua e lona uso ina ua maliu o ia i le kanesa. O lena mea na faamanatu mai ia te au se mea na saunoa ai Elder Neal A. Maxwell: “O mea faigofie uma sa faia e le Ekalesia ua maea ona faia. Ma o le taimi nei, o le faia o le galuega,

ma lo tatou usiusitai, o le a tofotofoina i nisi o auala mataina.”⁶ Ua auina mai outou i le lalolagi i lenei tisipenisione o aso ona o tagata ua avea ai outou ma mea ua e saunia e fai! E tusa lava po o a mea o le a taumafai Satani e faatau-anau ai i tatou e mafaufau i ai po o ai i tatou, ae o lo tatou faasinomaga moni o tatou o so’o o Iesu Keriso!

Sa avea Mamona ma se so’o moni, o lē sa soifua i aso “sa faamaaa [ai] loto uma, . . . ma sa leai se amioleaga tele faapea sa i ai i totonu o le fanau uma a Liae.”⁷ Mata e te manao e ola ai i na aso? Ma na folafola atu ma le lototoa e Mamona: “Faauta, o au o se soo o Iesu Keriso, le Alo o le Atua.”⁸

E te le alofa ea ia Mamona? Sa ia iloa lelei o ia ma lana misiona ma sa le’i faalavelaveina e mea leaga na siomia ai o ia. O le mea moni, sa ia faatauina lona valaauga o se meaalofa.⁹

Mafaufau o se faamanuiaga lava le valaauina e tuuina atu a tatou meaalofa o le avea ma soo i aso uma i le Alii, ma folafola atu i upu ma galuega, “Faauta, o a’u o se soo o Iesu Keriso!”

Ou te fiafia i le tala na faamatalaina



Gilbert, Arisona, ISA

e Peresitene Boyd K. Packer e uiga i se uso pele sa amusia mo le mulimuli i fautuaga a le perofeta ina ia teuina ni meaai. O le tagata na faitio na fautua atu faapea afai e oo mai taimi leaga, o le a fai atu ana taitai ia te ia e faasoa atu ana meaai na teu i isi. O lana tali faigofie ma maumaututu o se soo moni e faapea, “O le mea taua o le a i ai sa’u mea e aumai.”¹⁰

Ou te alofa i tamaitai o le Ekalesia, laiti ma matutua. Ua ou vaaia lo outou malosiaga. Ua ou vaaia lo outou faatuatua. E i ai se mea tou te foai atu, ma ua outou loto e foai atu. Tou te faia lenei mea e aunoa ma le faalau-iloaina pe faalauaitelaina, ma taulai atu i le Atua ua tatou tapuai i ai ae le

o outou lava, ma le leai o se manatu i se tau i o le a outou mauaina.¹¹ O mea na e faia e soo!

Sa ou feiloai talu ai nei i se tamaitai talavou i Filipaina o lona aiga sa lē toaaga i le Ekalesia i le na o le 7 o ona tausaga, ma le tuua na o ia e savali i le auala lamatia i le lotu i lea vaiaso ma lea vaiaso. Sa ia faamatalaina lana filifiliga i le 14 o tausaga o le a ia tumau moni i ana feagaiga ina ia mafai ona agavaa o ia e tausia lona aiga i le lumanai i se fale e “manuia i le mana o le perisitua.”¹² O le auala sili e faamalositia ai se aiga, i le taimi nei po o le lumanai, o le tausia lea o feagaiga, ma folafolaga ua tatou osia ma le tasi ma le isi ma i le Atua.

O mea na a soo e fai!

Sa asia e se uso faamaoni mai Iapani ma lona toalua la matou misiona i Korea. Sa lei tautala o ia i le faaKorea ma sa faatapulaa lona tomaita e tautala faaPeretania, ae sa ia te ia se loto naunautai e faaoga ana meaalofa tulaga ese ma lima fesoasoani e faia ai le galuega a le Alii. O mea na e faia e so’o! Sa ia aoaoina a matou faifeautalaita i le auala e faia ai se vaega o meataulima i pepa—o se gutu e mafai ona tatala ma tapuni. Ona ia faaoga lea o nai upu faaPeretania sa ia silafia e aoao ai faifeautalaita ia “tatala o latou gutu” ina ia faasoa atu le talalelei—o se lesona o le a lē galo lava ia i latou, e faapena foi a’u.

Vaai faalemafaufau mo se minute ia te outou ma a’u a o tutu faatasi ma le isi faitau miliona o uso ma tuagane





leotele” Ou te faaiu atu i upu o se pese o le Peraimeri:

*Matou o [afafine] feagaiga.
Aoa o le talalelei i o matou olaga.
Upu mea e fai matou te molimau ai:
Matou te talitonu ia Iesu Keriso.*¹⁴

I le avea ai ma soo moni, tau ina ia ofo atu o tatou loto naunautai ma o tatou lima fesoasoani e faanatinati ai Lana galuega. E le afaina pe afai, e pei o Brynn, e na o le tasi lava o tatou lima. E le afaina pe afai tatou te le'i atoatoa ma silisili ona lelei. O i tatou o soo tuuto o e aapa atu ma fesoasoani i le tasi ma le isi i luga o le ala. E aapa atu lo tatou usoga o tamaitai i le salafa o augatupulaga i na uso faatuatua o e ua maliliu. Faatasi ai, i le avea ai ma usoga ma i le lotogatasi ai ma perofeta soifua, tagata vaai, ma tali faaaliga ma ki toefuataiina o le perisitua, e mafai ai ona tatou sava- vali faatasi, o ni soo, o ni auauna o i ai le loto naunautai ma lima e faanatinati ai le galuega o le faaolataga. A tatou faia lena mea, o le a avea i tatou e pei o le Faaola. Ou te molimau atu ai i le suafa o Iesu Keriso, amene. ■

FAAMATALAGA

1. Tagai “Brynn,” *Ilds.org/media-library/video/2011-01-007-brynn*.
2. Ioane 7:17.
3. “O Le Atua lo'u Tama,” *Viiga*, nu. 184; po o le *Tusipese a Tamaiti*, 2–3.
4. Tagai Mataio 19:16–22.
5. Mataupu Faavae ma Feagaiga 25:10, 13.
6. Neal A. Maxwell, “The Old Testament: Relevancy within Antiquity” (lauga i faiaoga o le Matagaluega o Aoga a le Ekalesia, Aok. 16, 1979), 4; si.lds.org.
7. Mamona 4:11–12.
8. 3 Nifae 5:13.
9. Tagai Moronae 7:2.
10. I le Boyd K. Packer, “The Circle of Sisters,” *Ensign*, Nov. 1980, 111.
11. Tagai 2 Nifae 26:29–30.
12. “O Loo Tautalaga Iinei Le Alofa,” *Tusipese a Tamaiti*, 102–03.
13. M. Russell Ballard, “O Tamaitai o le Amiotonu,” *Liahona*, Tes. 2002, 34.
14. “Uu Lima i le Lalolagi Atoa,” *Liahona*, Oke. 2003, F12–13.

i Lana Ekalesia, o loo o atu ma le lototoa i luma, ma faia mea e faia e ni soo—auauna ma alolofa atu e pei o le Faaola. O le a le uiga ia te oe o le avea ma se soo o Iesu Keriso?

O taofu ma ofutino Lima Fesoasoani a Mamona ua laeiina e le faitau selau afe o soo e lē manatu faapito o Iesu Keriso o e opogiina le avanoa e tuuina atu ai auaunaga faaletino. Ae o loo i ai isi auala e auauna atu ai o ni soo tuuto. Vaai faalemafaufau ma a'u i nisi o faailoga faigofie faaleagaga o le “manaomia le fesoasoani” e faatatau i le galuega o le faaolataga:

- Manaomia le fesoasoani: mo matua ia tausi a'e a latou fanau i le malamalama ma le upumoni
- Manaomia le fesoasoani: mo afafine ma atalii, uso ma tuagane, tamaitai ma tamaloloa o aiga, tausoga, tina ma tama matutua, ma uo moni e galulue o ni faufautua ma ofo atu lima fesoasoani i luga o le ala o feagaiga
- Manaomia le fesoasoani: mo i latou o e faalogo i musumusuga o le Agaga Paia ma faatinoina uunaiga e maua.
- Manaomia le fesoasoani: mo i latou o e ola i le talalelei i aso uma i auala faigofie ma faatauva

- Manaomia le fesoasoani: mo talafaa-solopito o aiga ma tagata faigaluega o le malumalu ia faatasia aiga e faavavau
- Manaomia le fesoasoani: mo fai-feautalai ma tagata o le au paia e faasalalau atu le “tala fiafia”—o le talalelei a Iesu Keriso
- Manaomia le fesoasoani: mo ni tagata laveai ia saili i latou ua leiloa lo latou ala
- Manaomia le fesoasoani: mo e tausi feagaiga ia tutu mausali mo le upu-moni ma le mea sa'o
- Manaomia le fesoasoani: mo soo moni o le Alii o Iesu Keriso

I tausaga ua tuanai, sa tuuina mai ai e Elder M. Russell Ballard se avea'i malosi i tamaitai o le Ekalesia ina ua ia saunoa:

“E amata atu nei seia oo i le aso e toe afio mai ai le Alii, Na te manaomia ni tamaitai i aiga uma, o uarota uma, o nuu uma, ma malo uma, o e e tulai mai i le amiotonu ma faaaliga i a latou upu ma a latou tagata, 'O au lenei, auina atu au.’

“O la'u fesili, 'O le a avea ea oe ma se tasi o na tamaitai?’”¹³

Ou te faamoemoe o le a mafai e i tatou taitoatasi ona tali atu ma se “Ioe!



Saunia e Peresitene Henry B. Eyring
Fesoasoani Muamua i le Au Peresitene Sili

O Afafine o le Feagaiga

O le ala e tatau ona tatou uia i la tatou malaga e toe foi atu i lo tatou Tama Faalelagi . . . ua faailogaina i feagaiga paia faatasi ma le Atua.

Ua aoaoina i tatou i le mana faaleagaga i le po nei. Ou te tatalo o le a goto ifo i o outou loto ia upu na tautalagia e nei taitai tuafafine maoae e pei ona ou lagonaina.

O se sauniga faasolopito lenei. O tamaitai uma o le Ekalesia e valu tausaga ma matutua atu ua valaauliaina e auai faatasi ma i tatou i lenei po. O le toatele o i tatou na tatalo ia faatasi mai le Agaga Paia ma i tatou. O lena faamanuiaga na faamatuuina mai a o tatou faalogologo atu i nei tuafafine o saunoa mai ma faalogologo atu foi i musika musuia. Ou te tatalo ia faaauau pea ona faatasi mai le Agaga ma i tatou a o ou tuuina atu ni nai upu faamalosiau ma le molimau e faaopoopo atu i mea ua uma tautalagia—ma e aemaise lava ina ia molimau atu o mea ua uma ona tauina mai ia i tatou o le mea lea e finagalo le Alii tatou te faalogo i ai.

O le a ou talanoa atu i le po nei e uiga i le ala—lea ua uma faamatalaina i le asō i ni auala matagofie—ma e tatau ona tatou uia i la tatou malaga e toe foi atu i lo tatou Tama Faalelagi. O lena ala ua faailogaina i feagaiga paia faatasi ma le Atua. O le a ou talanoa atu ia te outou e uiga i le olioli i le

osia ma le tausaiaina o na feagaiga ma fesoasoani atu i isi i le tausaiaina.

E toatele outou na papatisoina talu ai nei ma mauaina le meaalofa o le Agaga Paia e ala i le faaee atu o lima. Ia te outou, o lena manatuaga e fou lava. O isi na papatisoina i se taimi ua leva, o lea o le manatuaina o ou lagona o lena aafiaga o le feagaiga atonu ua tau le manino, ae o nisi o na lagona e toe foi mai pe a e faalogo i tatalo o le faamanatuga.

E leai ma se tasi o i tatou o le a tutusa ni mea e manatuaina o le aso na tatou osia ai lena feagaiga paia o le papatisoga ma mauaina le meaalofa o le Agaga Paia. Ae na tatou tofua maua uma le faamaoniga a le Atua. Ma sa tatou lagonaina le naunau e faamagalalo ma ia faamagaloina faapea ai ma se naunautaiga faateleina ia faia le mea sa’o.

O le loloto o le goto ifo o na lagona i le taele o lou loto sa faalagolago tele lea i le ala na saunia ai oe e ni tagata agaalofa. Ou te faamoemoe o outou na faatoa o mai talu ai nei i le malo [e ala i le papatisoga] ua faamanuiaina i le nofo ai i talaane o lou tina. Afai o oe lena, e mafai ona e ata atu ia te ia i le taimi nei e faafetai atu i ai. Ou te manatuaina le lagona o le lolioli ma le lotofaafetai a o ou saofai ai i tua o lou tina a o matou malaga atu i le fale mai lo’u papatisoga i Filatofiā, Penisilevania.

O lo’u tina o le tagata lea sa sauniaina ma le faaeteete au mo le osiaina o lena feagaiga faapea ai ma isi na mulimuli mai ai. Sa faamaoni o ia i lona tiute mai le Alii:

“O lenei foi, o le tulaga e oo i ai le i ai o matua e fai fanau i Siona, po o



Raymond, Alberta, Kanata



Palamaira, Niu Ioka, ISA

i soo se tasi o ona siteki ua faatulagaina, ae latou te le aoaoina i latou ia malamalama i le mataupu faavae o le salamo, faatuatua ia Keriso le Alo o le Atua soifua, ma e uiga i le papatisoga ma le meaalofa o le Agaga Paia e ala i le faaee o lima, pe a valu tausaga le matutua, ia i ai le agasala i luga o ulu o matua.

“Aua o le a avea lenei mea o se tulafono i e nonofo i Siona, po o soo se tasi o ona siteki ua faatulagaina.

Ma ia papatisoina a latou fanau mo le faamagaloina o a latou agasala pe a valu tausaga le matutua, ma maua le [Agaga Paia].”¹

Sa faia e lo’u tina lana vaega. Sa ia sauniaina lana fanau i upu e pei lava o upu a Alema, o loo tusia i le Tusi a Mamona:

“Ma sa oo ina fai atu o ia ia te i latou: Faauta, o vai nei o Mamona (ona sa faapea ona ta’ua o ia vai) ma o lenei, ona ua outou mananao e o mai i le lafu a le Atua, ma ta’ua o ona tagata, ma outou loto e tauave avega a le tasi, ina ia māmā;

“Ioe, ma outou loto e faanoanoa faatasi ma e faanoanoa; ioe, ma faamafanafana atu ia te i latou o e e manaomia le faamafanafanaga, ma tutu o ni molimau a le Atua i taimi uma ma i mea uma, ma i nofoaga uma atonu tou te i ai, seia oo lava i le oti, ina ia mafai ona togiolaina outou e le Atua, ma faitauina faatasi ma i latou o

le uluai toetutu, ina ia mafai ona outou maua le ola e faavavau—

“O lenei ou te fai atu ia te outou, afai o le manao lea o o outou loto, se a se mea tou te tetee ai i le papatisoina i le suafa o le Alii, o se molimau i ona luma ua outou ulu atu i se feagaiga faatasi ma ia, o le a outou auauna atu ia te ia ma tasi ana poloaiga, ina ia mafai ona liligi atili tele mai e ia lona agaga i luga o outou?”

“Ma o lenei ina ua faalogo mai tagata i nei upu, sa pati o latou lima i le olioli, ma alalaga mai: O le manao lea o o matou loto.”²

Atonu sa lei pati o outou lima ina ua outou muai faalogo i lena valaaulia ia osifeagaiga e ala i le papatisoga, ae mautinoa lava sa outou lagonaina le alofa o le Faaola ma se tautinoga sili atu ia tausia isi mo Ia. E mafai ona ou fai atu “e mautinoa” ona o na lagona o loo i ai i le taele o loto o afafine uma o le Tama Faalelagi. O le vaega lena o lou tupuaga paia mai ia te Ia.

Sa Ia aoaoina oe ae e te lei sau i lenei olaga. Sa Ia fesoasoani ia te oe ia malamalama ma taliaina o le a e oo i tofotofoga, faaososoga, ma avanoa e filifilia atoatoa mo na o oe lava. Sa e iloina na i ai i lo tatou Tama se fuafuaga o le fiafia ia e saogalemu ai i na tofotofoga ma ia e fesoasani ai e aumai isi ma le saogalemu mai i o latou foi tofotofoga. O lenei fuafuaga ua faailogaina i feagaiga ma le Atua.

Ua tatou saoloto e filifili pe tatou te osia ma tausia na feagaiga. E toalaiti lava nai Ona afafine ua mauaina le avanoa i lenei olaga e aoao ai e uiga i na feagaiga. O outou o nisi o na vaega toalaiti faamanuiaina. O outou, tuafafine pele, o outou taitoatasi, o se afafine o le feagaiga.

Sa aoaoina outou e le Tama Faalelagi ae e te le i fanau mai e uiga i aafiaga o le a e oo i ai pe a e tuua o Ia ma sau i le lalolagi. Sa aoaoina oe o le auala e toe foi atu ai ia te Ia o le a le faigofie. Sa Ia silafiaina o le a faigata tele mo oe le faimalaga ai e aunoa ma se fesoasoani.

Ua faamanuiaina oe e le gata i le mauaina o le ala e osia ai na feagaiga i lenei olaga ae ua siomiaina foi e isi o le a fesoasoani atu—o e, e pei foi o oe, o ni afafine o le feagaiga a le Tama Faalelagi.

Ua outou lagonaina uma faamanuiaga o le potopoto faatasi ai i lenei po o ni afafine o le Atua o e foi ua osifeagaiga e fesoasoani atu ma taitai oe e pei ona latou folafola ai latou te faia. Ua ou vaaia mea ua outou vaaia o ni tuafafine o le feagaiga e tausia lena tautinoga e faamafanafana ma fesoasoani atu—ma faia ma le fiafia.

Ou te manatua le matafiafia o Sister Ruby Haight. O ia o le faletua o Elder David B. Haight, o le sa avea ma se uso o le Korama a Aposetolo e Toasefulu-lua. A o talavou sa auauna atu o ia o se peresitene o le siteki o Palo Alto i Kalefonia. Sa ia tatalo, ma popole mo teineiti i le vasega o le Maea Meite i lana lava uarota.

O lea sa musuia ai Peresitene Haight e talosaga atu i le epikopo e valaau Ruby Haight e aoao na teineiti talavou. Sa ia iloina o le a avea o ia ma se molimau a le Atua o le a siitia-ina, faamafanafana, ma alofa i teineiti i lena vasega.

Sa 30 tausaga na matua ai Sister Haight i teineiti sa ia aoaoina. Ae i le

40 tausaga talu ina mavae ona ia aoaoina i latou, o taimi uma la te feiloai ai ma lo'u toalua, o le sa avea ma se tasi o teineiti i lana vasega, na te faaloaloa mai lava lona lima, ma fai mai ia Kathy, "Talofa e! La'u Maea Meite." Sa ou vaaia se mea e sili atu i lo lana atata. Sa ou lagonaina lona alofa naua mo se tuafafine sa ia alofa pea i ai e pei o sana lava ia tama moni. O ona fofoga fiafia ma le tusaafia na oo mai i le vaaia o se tuafafine ma se afafine o le Atua o loo savali pea i le ala o feagaiga e foi atu i le aiga.

E fiafia foi le Tama Faalelagi ia te oe i soo se taimi Na te vaaia ai oe o e fesoasoani atu i se tasi o Ona afafine ia agai i luma i le ala o feagaiga i le ola e faavavau. Ma e fiafia o Ia i taimi uma e te taumafai ai e filifili le mea tonu. E le gata ina Ia silafia lou tagata ae o le tagata foi e mafai ona avea ai oe.

Atonu e i ai ni ou matua faalelalogi o e manatu e sili atu le tagata e mafai ona e avea ai i lo le tagata e te manatu e mafai ona e avea ai. Sa faapena lo'u tina.

O le mea sa ou leiloaina a o ou talavou e faapea e silafia e lo'u Tama Faalelagi, lo outou Tama Faalelagi se gafatia sili atu i Lana fanau i lo le mea e vaaia e i tatou po o o tatou tina faalelalogi ia i tatou. Ma po o le a foi le taimi e te i ai i luga o lena auala e agai atu i lou gafatia, e aumaia ai lava le fiafia ia te Ia. Ma e mafai ona e lagonaina Lana faamaoniga.

Na te silafia lena gafatia mamalu i totonu o Ona afafine uma po o fea lava o latou i ai. Ia, e tuu e lena mea se tiutetauave tele i luga o outou taitoatasi. Ua Ia faamoemoeina oe ia taulimaina tagata uma e te feiloai i ai o se atalii po o se afafine o le Atua. O le mafuaaga lena ua Ia poloaiina ai i tatou ia alolofa i o tatou tuaoi e pei ona tatou alolofa ia i tatou lava ma ia faamagalo atu ia i latou. E oo atu ou



lagona o le agalelei ma le faamagalo atu i isi e fai ma ou tofi paia mai ia te Ia i le avea ai ma Ona afafine. O tagata taitasi uma e te feiloai i ai o ia o Sona atalii po o se afafine faaleagaga faapelepele.

A outou lagonaina lena lagona sili faaleusoga, o mea tatou te manatu ua tatou fevaevaeai ai, o le a mou ese. Mo se faataitaiga, e fefaasoai e tuafafine talavou ma matutua atu o latou lagona faatasi ma faamoemoeaga o le malamalama ma le taliaina. E sili atu lo outou tutusa i le avea ai o ni afafine o le Atua nai lo o outou eseeseaga.

Faatasi ai ma lena malamalamaaga, e tatau i tamaitai talavou ona tulimatai atu i lo latou ulufale atu i le Aualofa o se avanoa e faatupulaia ai la latou li'o o tuafafine ia o le a latou iloina, faamemelo i ai, ma alolofa i ai.

O lena lava tomai e tasi e vaaia ai mea e mafai ona avea ai i tatou ua faateleina i aiga ma i le Peraimeri. O loo tupu i afiafi faaleaiga ma polokalama a le Peraimeri. O loo musuiaina le fanau iti e tautatala i mea maoae ma ofoofogia, e pei ona latou faia i le taimi na

tatala ai e le Faaola o latou laulaufaiva ina ua Ia aoaoina i latou i le mavae ai o Lona toetu mai.³

E ui atonu o loo osofaia e Satani tuafafine i le talavou o o latou olaga, ae o loo musuiaina e le Alii tuafafine i tulaga sili atu ona maualuluga o le faaleagaga. Mo se faataitaiga, o loo aoaoina e tamaitai talavou o latou tina i le faaaogaina o le FamilySearch e saili ai ma laveai ia tuua. O nisi o tuafafine talavou ou te iloina o loo filifili e o i le taeo po e faatino papatisoga sui i malumalu e aunoa ma soo se faatauanau e ese mai le agaga o Elia.

I misiona i le salafa o le lalolagi, o loo valaauina ai tuafafine e auuuna atu o ni taitai. Ua fatuina e le Alii le manaoga mo a latou auuunaga e ala i le pa'i atu i loto o tuafafine i se aofaiga tele ia auuuna atu. Ua vaaia e le toatele o peresitene o misiona le faateleina o le mamana o tamaitai faifeautaloi e tala'i ma aemaise o ni taitai faafailele.

E tusa lava pe e te auuuna atu o se faifeautaloi faamisiona pe leai, e te mauaina lava lea tomai e tasi e faamauoaina ai lau faaipoipoga ma le tomai



e tausi ae ai se fanau tamalii e ala i le mulimuli i faataitaiga a tamaitai maoae.

Mafaufau ia Eva, le tina o tagata ola uma. Sa saunoa Elder Russell M. Nelson i le mea leni e uiga ia Eva: “Ua faamanuiaina pea i tatou ma tagata uma ona o le lototele naua ma le atamai o Eva. E ala i le taumafa muamua i le fua, sa ia faia ai le mea na manaomia ona faia. Sa lava foi le atamai o Atamu e faia ai lena lava mea e tasi.”⁴

Ua i ai i afafine uma o Eva le gafatia e aumai ai ia lava faamanuiaga e tasi i lona aiga ia na aumaia e Eva i lona aiga. Sa matua taua tele o ia i le faavaeina o aiga lea ua tatou maua ai le lipoti leni o lona foafoaga: “Ma sa fetalai ane Atua: Ina tatou faia ia o se fesoasoani e tatau ai mo le tane, aua e le lelei ona nofo toatasi o le tane, o le mea lea o le a tatou faia ai se fesoasoani e tatau mo ia.”⁵

Tatou te iloa ia fesoasoaniga uma na faia e Eva ia Atamu ma lona

aiga. Ae tatou te iloaina o se tasi o meaalofo sili na ia tuu atu, lea foi e mafai e outou taitoatasi ona tuu atu: sa ia fesoasoani i lona aiga ia iloaina le ala e toe foi atu ai i le aiga, pe a foliga mai ua faigata le ala i luma atu. “Ma o Eva, lana ava, sa faalogo atu i nei mea uma ma sa fiafia, ua fai mai: Ana le seanoa la ta solitulafono po ua le maua e i taua ni fanau, ma po ua le mafai ona ta iloa le lelei ma le leaga, ma le olioli o le togiolaina o i ta’ua, ma le ola e faavavau ua tuu mai e le Atua ia i latou uma o e e usiusitai.”⁶

Ia e mulimuli i lana faataitaiga.

E ala i faaaliga, na iloa ai e Eva le ala e toe foi atu ai i le Atua. Sa Ia iloaina o le Togiola a Iesu Keriso e mafai ai ona maua le ola e faavavau o aiga. Sa ia mautinoa lava, e pei foi ona outou mafaia, a o ia tausia ana feagaiga ma lona Tama Faalelagi, o le a fesoasoani atu le Togiola ma le Agaga Paia ia te ia ma lona aiga i soo se faanoanoaga ma tiga e oo atu. Sa

ia iloaina e mafai ona ia faatuatuaina i Latou.

“Ia e faatuatua ia Ieova ma lou lotou atoa; a e aua le faalagolago i lou lava atamai.

“Ia e manatua o ia i ou ala uma, ona faatonuina ai lea e ia lava ou ala.”⁷

Ou te iloa na fetaiia Eva ma faanoanoaga ma tiga, ae ou te iloaina foi sa ia mauaina le olioli i le iloaina e mafai ona toe foi atu o ia ma lona aiga e mau faatasi ma le Atua. Ou te iloa o le toatele o outou o loo i ai iinei o loo fetaiia ma faanoanoaga ma tiga. Ou te tuu atu ia te outou au faamanuiaga, ina ia faapei foi o Eva, ia mafai ona outou lagonaina le olioli lava e tasi sa ia lagonaina, a o outou faimalaga ai e toe foi atu i le aiga.

E i ai sa’u molimau mautinoa o loo leoleoina outou e le Atua le Tama i le alofa. E alofa o Ia ia te outou taitoatasi. O outou o Ona afafine o le feagaiga. Ona e alofa ia te oe, o le a Ia saunia le fesoasoani e te manaomiaina e agai ai oe lava ia ma isi i luma e toe foi atu ai i Lona afioaga.

Ou te iloa ua uma ona totoi e le Faola le tau o a tatou agasala uma ma o loo molimau mai le Agaga Paia i le upumoni. Ua e lagonaina lena mafanafana i leni sauniga. E i ai sa’u molimau o ki uma lea e fusia ai feagaiga paia ua toefuataiina mai. O loo umiaina ma faaaogaina i aso nei e lo tatou perofeta soifua, o Peresitene Thomas S. Monson. Ou te tuu atu nei upu faamafanafana ma le faamoemoe ia te outou, o Ona afafine o le feagaiga faapelepele, i le suafa paia o Iesu Keriso, amene. ■

FAAMATALAGA

1. Mataupu Faavae ma Feagaiga 68:25–27.
2. Mosaea 18:8–11.
3. Tagai 3 Nifae 26:14.
4. Russell M. Nelson, “O Le Tumau i le Lotolotoi o Suiga,” *Ensign*, Nov. 1993, 39.
5. Aperramo 5:14.
6. Mose 5:11.
7. Faataoto 3:5–6.

Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoao, e mafai ona faaaoga i suesuega a le tagata lava ia, afaifi faaleaiga, ma isi aoaoga. O le numera o loo faasino i le itulau muamua o le lauga.

FAILAUGA

TALA

Neil L. Andersen	(18) O se Lora na tu atu mo le faaiipoipoga e masani ai e ui lava i le tauemuina ma le valaauina i igoa.
M. Russell Ballard	(78) O M. Russell Ballard na "tulitaaoina" Barbara Bowen, o lē na ia feiloai i ai i se siva a le kolisi, amata ona tafao faamasani i ai, ma na iu lava ina faaiipoipo i ai. O se tamaititi e valu tausaga na valaauina lana uo ma le aiga o lana uo i se faletatala a le uarota i Buenos Aires.
David A. Bednar	(87) O se loli na maua le malosi e aluese mai ai mai le kiona ina ua uma ona ua faatumulia i se avega mamafa o fafie.
Linda K. Burton	(122) O se tamaitai talavou i le atu Filipaina na tumau faamaoni i ana feagaiga. Na aoao atu e se uso lapani na asiasi atu i Korea ia faifeautalati.
Quentin L. Cook	(44) Na tusi atu Vilate Kimball i lona toalua e uiga i le "aoaoga faavae ofoofogia" o le papatisoga mo e ua maliluu, e pei ona faaalua mai e Iosefa Samita.
Henry B. Eyring	(22) Na malaga atu Heinrich Eyring i Amerika, auai i le Ekalesia, auaina i ni misiona faamaoni se tolu, ma tuua mo lona aiga se talatuu o le faamoemoe. (62) O Henry B. Eyring na mavanuina e toa o lona tamaititi: o lona tama, lona taitai Perisitua Arona, o se maligi a le I.S., ma se tagata taalo i le pesipolo o Joe DiMaggio. (125) I le mavae ai o le fasefulu tausaga talu ona valaauina e aoao atu Kathy Johnson (faletua o le lumanai o Henry B. Eyring), o loo faaalua pea e Ruby Haight le alofa ma le popole mo ia.
Donald L. Hallstrom	(53) E ui i tapulaa faaletino, sa auaina atu se alii faamaoni i Initia i se misiona ma saunia ai ma lona aiga ina ia faamaonia i le Malumalu o Hong Kong i Saina.
Jeffrey R. Holland	(6) O ni tamaitai faifeautalati e toalua na savavali ese e auua ma le fai atu o se upu i se alii na palauvale ia i lava, tatogi meaa i ia i lava, ma taumafai e po se tasi o i lava.
Thomas S. Monson	(66) O se aliivaa o le neivi e 18 tausaga le matua e tatalo i po uma e ui lava i le taufaifai mai o isi o lana vaega. O se alii talavou na molimau i le taimi o le sauniga faamanatuga ae mulimuli ane vaai i lena lava aso o ulaina se sikaleti. (91) Sa avea ni tamaitai se toalua ma uo mo le olaga atoa ina ua uma ona fesoasoani le tasi i le isi e aoao lana galuega e avea o se tagata suisui i le fale gaosi lavalava. E lei tomumumu pasese i luga o se faigamalaga o le vaalele ina ua aluese mai le ala o le vaalele ina ia pikiina se tamaititi na lavea ma aveina atu o ia i le falemai. Na faanoanoa se tamaitai i le faatagaina o se tuaoi e fai sona auala 'alo i lona fanua.
Russell M. Nelson	(29) Na faaalua e le afafine o Russell M. Nelson o Emily le lototele ma le faatuatua a o ua lata ona oti o ia i le kanesa.
Bonnie L. Oscarson	(119) Na aoaoina e se tamaitai talavou le olioli i le auaina atu i isi ao la tausai ma lona tina se tamaitai e maua i le mai o le tuasivi ma le faiai. O se tamatai ua 81 tausaga ua valaauina e faasoa atu lona atamai, aafiaga, ma faataitaiga o se faufautua o le Maeta Meite a le uarota.
Boyd K. Packer	(94) Na mauaina e Boyd K. Packer se faaliga faaleagaga e uiga i le moni o le talalelei a o tatalo ai i se lafitaga i le taimi o le Tava lona II a le Lalolagi.
Ronald A. Rasband	(9) O se teineitiiti o le vasega lima na maua i se asiasio, ma na puipuia e agelu.
Linda S. Reeves	(15) Ua aoaoina e Linda S. Reeves lana tama teine i le auala e maua ai le toomaga e ala i le Togiola a le Faaola ina ua uma ona vaai lana tama teine i ni ata mataga i luga o le televise.
Randall L. Ridd	(56) Ua filifili se alii talavou e auaina atu i se misiona nai lo le faaiipoipo ina ua mavae le faatepaina o ia i le tagata sa ia i ai i le muai olaga.
Richard G. Scott	(32) O le alofa ma le faataitaiga o le tinamatua a Richard G. Scott ma lona toalua i le lumanai na fesoasoani ia te ia i lona alualu i luma faaleagaga.
Jean A. Stevens	(81) Na uuaia Jean A. Stevens e ave se alii talavou i lana taavale o le sa misi le pasi e alu ai i le fale mai le aoga. Na pipiimau tagata o le aiga o Gattrell i le talalelei ina ua uma ona iloa e maua Brother Gattrell i se kanesa faigata.
Gary E. Stevenson	(84) O le tagata AAG e taalo Olimipeka o Noelle Pikus-Pace ua manumalo i se pine siliva i le auivi ina ua mavae tausaga o faataitaiga ma sauniuniga. O le tagata taalo Olimipeka a le AAG o Torah Bright ua faaalua le alofa faa-Keriso e ala i le fusi atu i se tagata tauva popole o le afa paipa.
Michael John U. Teh	(106) O se tamaitai Filipino e 73 ona tausaga ua tumau faamaoni i le talalelei ina ua mavae se mafuie ma se afa fulifao na maliluu ai lona aiga.
William R. Walker	(97) Ua auai Robert ma Maria Harris i le Ekalesia ma tumau faamaoni ma faatuatua i le talalelei e ui lava i faigata ma le tuu eseeseina.
Claudio D. Zivic	(39) Ua alu Claudio D. Zivic i se ala sese e ala i le mulimuli i se isi tagata sopo.
W. Craig Zwick	(41) Ua faaalua e W. Craig Zwick ma lona faletua le alofa o le tasi i le isi ina ua uma ona ia puna ese mai ma lana tama pepe mai le latou loli ua faatumulia i le asu.

O Le Avea o le Konafesi ma Vaega o o Tatou Olaga

Mafaufau e faaoga nisi o nei gaoioiga ma fesili e fai ma vaega amata mo talanoaga faaleaiga po o mafaufauga loloto faaletagata lava ia.

Mo Tamaiti

- Na aoao mai Peresitene Dieter F. Uchtdorf, Fesoasoani Lua i le Au Peresitene Sili, e mafai ona tatou filifili ina ia loto faafetai e tusa lava po o a ni mea faigata na tutupu i o tatou olaga (itulau 70). O le loto-faafetai o le a fesoasoani ia i tatou ia sili atu ona fiafia ma agalelei atu ma ia faatuatua ma faalagolago i le Atua. O le a sou lagona pe a e lotofaafetai? O le a se mea e mafai ona e faia e lagona ai le lotofaafetai i aso taitasi?
- Na faamatalaina e Bonnie L. Oscarson, peresitene aoao o Tamaitai Talavou, ia Sara, o se teine talavou sa o ma lona tina ina ia fesoasoani ia Brenda, o se tamaitai e afaina lona tuasivi ma lona faiai. Na palasiina e Sara le lauulu o Brenda, tuu le kulimi i ona lima, fofo ona tamatamailima ma oga-lima, ma fesoasoani ia te ia e falo (itulau 119). Mafaufau e uiga i auala e mafai ona e auuina atu ai. E tusa lava pe e te talavou, e tele mea e mafai ona e faia.
- Na aoao mai Elder L Tom Perry o le Korama a Aposetolo e Toasefululua e uiga i le ala na faaoga ai e

se tagata o loo faatautaia ia faagutu e taitaiina lemu atu ai se vaega o solofanua (itulau 100). E sili le atamai o le tagata o loo faatautaia, ma e mulimuli le solofanua i le taitaiga a le tagata o loo faatautaia, e pei lava ona silafia e le Alii le mea e sili ona lelei mo i tatou, ma e mafai ona tatou fiafia pe a tatou mulimuli ia te Ia. O le faagutu e pei lava o uunaiga a le Agaga Paia. O anafea na e lagonaina ai le taialaina o oe



e le Agaga Paia? Na faapei sona lagona?

- O Jean A. Stevens, fesoasoani muamua i le au peresitene aoao o le Peraimeri, na faamatalaina se tala e uiga i se tamaititi na misi le pasi mulimuli o le aso ma sa savali i le fale (itulau e 81). I le tele o maila o totoe e alu ai, sa fefe o ia ma tootuli e tatalo. I se taimi mulimuli ane, na uunaia Sister Stevens e le Agaga e tu ma fesoasoani ia te ia. E mafai ona e mafaufau i ni taimi na tali mai ai le Tama Faalelagi i au tatalo? Na faapefea ona e fesoasoani e tali se tatalo a se isi tagata?

Mo Le Aulavou

- Na aoao mai Peresitene Thomas S. Monson e tatau ona tatou “lototele e fai atu ai leai pe a tatau ai, le lototele e fai atu ai ioe pe a talafeagai ai, le lototele e faia ai le mea sao ona e sao.” A o e suesue i lana saunoaga (itulau e 66), mafaufau e uiga i luitau o loo e feagai ai. O le a se fuafuaga e mafai ona e faia e atina ae ai lenei ituaiga o le lototele?
- Na faamanatu mai ia i tatou e Elder Jeffrey R. Holland o le Korama a Aposetolo e Toasefululua faapea afai tatou te alolofa i le Faaola, o le a tatou tausia Ana poloaiga ma alolofa atu i isi e pei ona Ia faia (itulau e 6). E pei lava ona tatou faia lena mea, e tatau ona tatou tutu e sauni e puipui o tatou talitonuga “i le amio solia ma le agaalofa.” E te silafia se tasi e tetee i soo se tasi o ou talitonuga? E faapefea ona faaaloogia oe ao e talanoaina ma puipuia na talitonuga?
- O le tele o failauga na talanoa tuusa’o atu i le aulavou. Mo se faataiga, na tuuina mai e Elder Neil L. Andersen o le Korama a Aposetolo e Toasefululua ni nai fautuaga i le aulavou i le auala e manumalo



ai i “asiosio faaleagaga,” e pei o le mauaina o le filemu i le malumalu (itulau e 18). A o e faitauina lana lauga ma isi lauga o le konafesi aoao, mafaufau e tusi i lalo ni manatu i le ala e tumau malosi ai.

- O se tasi o mea leaga sili i lenei vaitaimi o ponokalafi. Na saunoa Linda S. Reeves, fesoasoani lua i le au peresitene aoao o le Aualofa, o faamama sili e tetee atu ai i lea ituaiga mea leaga o se molimau loloto ma faamaoni lea i le talalelei a Iesu Keriso (itulau e 15). O le a le malosi o lou faamama faaletagata lava ia? O le a se mea e mafai ona e faia e faamalosi ai?

Eyring, Fesoasoani Muamua i le Au Peresitene Sili, o le tele o lona fiala o loo ia nofo aitalafu ai i le tama o lona tama matua lea sa auai i le Ekalesia, auaina atu ma le faamaoni, ma tumau mausali e oo i le iuga, ma tuua ai mo lona aiga se talatuu o le faamoemoe (itulau e 22). Mafaufau e faia se lisi o tagata uma i lou aiga ma tusi i lalo po o a feagaiga ma sauniga e manaomia ona latou faaaau ai pea i le ala o le feagaiga. Fai se fuafuaga e fesoasoani ai i tagata o lou aiga ia mauaina isi o latou feagaiga. E mafai ona e suesueina auala mo au feagaiga ia sili atu ona taua lana matafaioi i lou


olaga ina ia mafai ona e tuuina atu i lou aiga se talatuu o le faamoemoe.

- Na tautino mai e Elder David A. Bednar o le Korama a Aposetolo e Toasefululua o mafatiaga e mafai ona taitai atu ai i tatou e faalagolago i “le amiotonu, alofa mutimutivale, ma le alofa tunoa o le Mesia Paia,” o le “o le a fesoasoani ia i tatou e tauave ma le faigofie a tatou avega” (itulau e 87). A o e faitauina lana saunoaga ma saunoaga amata i le itulau e 9, 18, 70, 81, ma le 106, vaavaai mo ni auala e mafai ai ona fesoasoani le Faaola ma Lana talalelei ia te oe e feagai ma luitau o le olaga.
- O le mataupu aoaoina a le autalavou ia Me o loo taulai atu i perofeta ma faaaliga. I le ave ma se vaega o lau talanoaga faaletalalelei ma le autalavou i le fale ma i le lotu, mafaufau e suesue ia saunoaga mai ia Elder Lawrence E. Corbridge (itulau e 103) ma Marcos A. Aidukaitis (itulau e 108) o le Fitugafulu, ma vaavaai mo tali i fesili nei: Aisea na le tuua ai e tagata na tauleagaina Iosefa Samita o ia? E mafai faapefea ona tatou iloa le upumoni i se lalolagi ua faateleina ona osofaia ia aoaoga o le talalelei? ■

Mo Tagata Matutua

- Na aoao mai Peresitene Thomas S. Monson, a tatou malamalama i le “meaalofa lemafaatusaliaina” o le Togiola, ua faatumulia i tatou i le alofa mo le Tama Faalelagi, le Faaola, ma fanau uma a le Atua (itulau e 91). E mafai faapefea e lenei malamalama ona faaleleia au suesuega i le soifuaga o le Faaola ma le Togiola i le taimi o suesuega faaletagata lava ia ma faaleaiga o tusitusiga paia ma pe a i ai i le vasega i le lotu?
- Na saunoa mai Peresitene Henry B.





Matauina le Tulaga Alualu i Luma o Malumalu, Lagolagoina o Taitai Fou i le Konafesi Aoao

I le aluga o le ono masina ua mavae, “na agai i luma le galuega a le Ekalesia e aunoa ma se faalavelave,” na saunoa ai Peresitene Thomas S. Monson i lana saunoaga amata i le Konafesi Aoao lona 184 Faaletausaga a le Ekalesia.

I le toe manatunatu ai e uiga i le faapaiaga o le Malumalu o Gilbert Arisona i le aso 2 o Mati, 2014, tulimatai atu i le faapaiaga o le Malumalu o Florida Fort Lauderdale o loo loma, ma i le faatalitalia o le faamaeaina ma le faapaiaga o malumalu i le tele o vaega o le lalolagi i le faagasologa o le 2014 ma le 2015, na ta’ua ai e Peresitene Monson faapea afai ae faamaeaina uma ia malumalu ia na faasilasila atu talu ai nei, o le a 170 malumalu o loo faagaoioia i le lalolagi atoa.

“E ui o loo matou tulaui atu a matou taumafaiga i le faamaeaina o

malumalu na faasilasila atu talu ai nei ma o le a le toe faasilasilaina nisi malumalu fou i se taimi vave i le lumanai,” na ia saunoa ai, “o le a faaauau pea le faagasologa o le fuafuaina o manaoga ma le sailia o nofoaga mo ni malumalu i le lumanai. Ona toe fai atu ai lea o ni faasilasilaga i konafesi aoao i le lumanai. O i tatou o ni tagata fau malumalu ma ni tagata e o i malumalu.”

I le taimi o le konafesi, sa lagolagoina ai se sui fou o le Au Peresitene o Fitugafulu, fa au Pulega Aoao fou, se au peresitene aoao fou o le Aoga Sa, ma Fitugafulu Eria e 42.

Sa valaauina Elder Lynn G. Robbins i le Au Peresitene o Fitugafulu.

Sa lagolagoina Elder Jörg Klebingat o Kyiv, Iukureini, ma Elder Chi Hong (Sam) Wong o Hong Kong, Saina, e auauna atu i le Korama Muamua a Fitugafulu. O Elder Larry S. Kacher

o Midway, Iuta, ma Elder Hugo E. Martinez o Arecibo, Puerto Rico, sa lagolagoina e avea ma sui o le Korama Lua a Fitugafulu.

O Elder Tad R. Callister, o le sa auauna atu i le Au Peresitene o Fitugafulu ma o se tasi o le Korama Lua a Fitugafulu, ua lagolagoina e avea ma peresitene aoao o le Aoga Sa, ma John S. Tanner ma Devin G. Durrant ma fesoasoani muamua ma le lua.

Tagai i se lisi atoa o le lagolagoina ma le faamalologa i itulau e 26–27, ma maua ai le tala o soifuaga o Elder Robbins, o Fitugafulu faatoa valaauina, ma au peresitene aoao o le Aoga Sa e amata i le itulau e 141.

O le vaiaso na muamua atu i le konafesi aoao, na faia ai le uluai sauniga aoao a tamaitai—mo tamaitai uma, tamaitai talavou, ma teineiti e valu tausaga ma matutua atu—i le Maota Autu mo Konafesi. O lenei sauniga e suitalaga i sauniga aoao a le Aualofa ma sauniga aoao a Tamaitai Talavou talu ai. O savali uma mai le sauniga a tamaitai e mafai ona maua i itulau e 116–28.

A o lumanai foi le konafesi, na toe faatulagaina ai ia sui faatonu aoao o Tamaitai Talavou, faatasi ai ma tuafafine na valaau mo le taimi muamua lava mai nofoaga e le gata i le Aai o Sate Leki, e aofia ai Peru; Aferika i Saute; Iapani; Pasila; ma Brooklyn, Niu Ioka, ISA. Faitau ia tala o soifuaga ma tagai i ata i [lds.org/callings/young-women](https://www.lds.org/callings/young-women).

“Na aumaia e le Faaola i lenei lalolagi se savali o le alofa ma le agalelei i alii ma tamaitai uma,” na saunoa mai ai Peresitene Monson i le faaiuga o le konafesi aoao. “E tatau lava ona tatou mulimuli i Lana faataitaiga i taimi uma.” Na ia faamautinoa atu ia tagata o le Ekalesia ma isi o faafofoga mai “o loo manatu mai lo tatou Tama Faalelagi ia i tatou. O le a Ia taialaina i tatou ma faamanuiaina i tatou pe a tatou tuu atu lo tatou faatuatua ma le faalagolago ia te Ia.” ■

NA VALAAULIA TUSIATA E ULU ATU I LE TAUVAGA

Ua valaaulia e le Falemataaga o Talafaasolopito o le Ekalesia ia tusiata o le Au Paia o Aso e Gata Ai ina ia mamauina ni galuega fou o le faatufugaga mo le Tauvaga lona 10 o Faatufugaga Faavaomalo. Ua uunaia tusiata e faaoga a latou taleni e fatu ai ni faatufugaga e atagia ai le autu o le faaaliga, "Tau Mai Tala ia Iesu." Mo leni tauvaga faapitoa, e tataua ona taulai atu galuega i na o tala mai le Feagaiga Fou.

O loo maua i faamatalaga ma le lesitalaga i le initoneti lds.org/artcomp, ma o tusiata ua lesitala o le a maua ni faamatalaga ua uma ona faafou. O le a taliaina lesitala mai le aso 3 o Novema, 2014, seia oo i le aso 27 o Fepuari, 2015. O faasalalaua faatusiata uma, sitaile, ma auala faaleaganuu e taliaina. E tataua i tagata auai ona 18 tausaga pe matutua atu. O le a faamasinoina galuega e auina mai, ma o galuega o le a filifilia o le a faaaliga i le Falemataaga o Talafaasolopito o le Ekalesia ma i luga o le Initoneti e amata atu ia Oketopa 2015.

O LE A MAUA AOAOGA MO TAITAI O AUSILALI I LE LDS.ORG

Ina ia sili atu ona faafetaia'ia manaoga o se Ekalesia tuputupu ae, ua fuafuaina e le au peresitene aoao o le Aualofa, Peraimeri, Tamaitai Talavou, Alii Talavou, ma le Aoga Sa e tuuina atu se aoaoga faaletausaga i le lalolagi atoa e ala atu i le Initoneti. Ua faamoe-moe o leni aoaoga o le a maua i le LDS.org i le ogatotonu o le tausaga i tausaga taitasi i le tele o gagana.

Ua faamutaina ia fonotaga faaleaaoaoga mo taitai lea na faia i le Aai o Sate Leki faatasi ai ma le konafesi aoao ia Aperila. O le a faaauau pea ona saunia e au peresitene aoao o ausilali ma o latou sui faatonu ia aoaoga i sauniga o siteki e tele tuufaatasi, e pei ona atofaina.

O Le a Fatuina e se Ata Tifaga Fou se Avanoa e Feiloai ai i Mamona

Ei ai ni taimi e te mafaufau ai mai-mau pe ana i ai se auala faigofie e tau atu ai i isi, o tagata o le Au Paia o Aso e Gata Ai o tagata masani o e mauaina le faamoemoega ma le taitaiga ao taulai atu o latou olaga ia Iesu Keriso? O le ata tifaga lea i soifuga e le o toe umi ae faalauiloa mai e le Ekalesia o le a fesoasoani ia te oe ina ia faia.

Feiloai i Mamona e amata i se vaaiga fiafia i le auala o matele ina sese ai le vaaiga a isi i tagata o le Ekalesia. Ona folasia mai lea o ni aiga se toaono, o tofu faasoa mai ni aafiaga patino ma faamatala mai le ala na fesoasoani ai le talalelei ia i latou i o latou olaga. O i latou na faaaliga e aofia ai:

O Le Epikopo. O Jermaine Sullivan ma lona faletua o, Kembe, mai Atlanta, Georgia, ISA, o loo galulue e fatuina le lotogatasi i se alalafaga eseese a o tausaga le la fanau tama laiti e toatolu.

O Le Faiaoga. O Ken Niuma-talolo, o le faiaoga autu o le au lakapi a le I.S. Aoga a le Neivi i Annapolis, Maryland, ISA, ma lona faletua, o Barbara, faatasi ai ma le lagolago a le la fanau ma le afaigaluega o faiaoga, ia tausaga le aso Sapati ia paia.

O Le Fuavaalele Lole. O Gail Halvorsen, o se tagata atamai e 93 tausaga o le Taua Lona II a le Lalolagi, ma lona faletua o Lorraine, 90, mai Amado, Arisona, ISA, o faamanatu atu i tamaiti le taua o le auauna atu. I le avea ai pea o se pailate, e faapau mai e Brother Halvorsen lola mai se vaalele e pei ona ia faia i le taimi o le Airlift Berlin i le taua.

O Le Tagata Fusu. O Carolina Marin, o se tagata e fusu karate mai San José, Costa Rica, ma lona faiaoga



I se fale tatala mo tagata, na faafeiloai ai e Peresitene ma Sister Uchtdorf ia Carolina Marin o Costa Rica.

ma le toalua, o Milton, e faapaleniina a laua matafaioi o ni taitoalua ma matua i se fanau laiti faatasi ai ma le la fiafia i le tauvaga.

O Le Fesoasoaniga Aagalofa. E faamamaluina e Bishnu ma Mangala Adhikari, o Kathmandu, Nepal, ia talitonuga ma le talatuu o lo laua nuu moni. O Brother Adhikari o se enisinia o le na fausia auala, aoga, ma polokama o vaimama lea ua faamanuiaina ai le tele o nuu laiti.

O Le Tina Faifeautalai. O Craig ma Dawn Armstrong ma lo la atalii o Anthony, mai le Aai o Sate Leki, Iuta, ISA, ua faamatala mai le auala na avea ai Sister Armstrong ma se tina nofotoatasi e leai se fale ae ona feiloai ai ma faifeautalai. O le talalelei na la faasoaina atu na fesoasoani ia te ia i le liliuina o lona olaga. Sa ia faaipoipo mulimuli ane ia Craig, ma ua suia atoa ai le tala ina ua alu Anthony i se misiona faafaifeautalai i Aferika i Saute e faasoa atu le talalelei lea na matua faamanuiaina ai lona tina.

Feiloai i Mamona o le a faaaliga i le Joseph Smith Memorial Building i le Aai o Sate Leki, Iuta, ISA, ma isi nofoaga ia sei faamautuina. ■

O Le Aoao Atu i le Lotu e Tatau ona Mulimuli i Faataitaiga a Keriso

“O loo matou taumafai e mulimuli i tulagavae o le Faaola o le aoao atu,” o le tala lea a le peresitene aoao fou o le Aoga Sa, o Tad R. Callister, ina ua mavae le konafesi aoao.

O lona uiga o le faia o fesili musuia e fesoasoani ai i tagata ina ia liua, o lana tala lea. O le sini o le “fesoasoani ia i latou ia malamalama ma lagonaina le Agaga o le talalelei i o latou olaga.”

Sa ia fai mai ua faagaetia lava o ia i le mataupu aoaoina mo le autalavou i le initoneti o le *Sau, Mulimuli Mai ia te Au*, lea e aofia ai saunoaga aupito lata mai mai le konafesi aoao faapea foi ma faasalalaua e gaosia e le Ekalesia. O le auai ua suia tautalaga, sa ia fai mai, ma “o loo i ai se suiga patino mai le na ona aoao atu o se lesona ia taumafai e suia ai i manaoga o tamaiti aoga i le vasega.”

Sa ia faaopoopo mai o le *Sau, Mulimuli mai ia te Au* ua fesoasoani i le aumaia o le liua ae le na o le tuuina atu o faamatalaga. “Ou te manatu o le a tatou faatuina se augatupulaga o talavou o faiaoga sili ona lelei i le lalolagi, o matua sili ona lelei i le lalolagi,” na ia saunoa ai, “aua ua latou mauaina nei lenei aafiaga ao talavou ae le o le faatali seia oo ina [latou] matutua . . . ina ia iloa ai pe faapefea ona aoga le aoao atu ma le malamalama.”

O Iesu Keriso o le Faiaoga Sili, o le tala lea a Brother Callister, ma o a tatou aoaoga i le lotu e tatau ona aumai ai tagata ia Keriso. O le faamamafaina mai o le manaomia ona aoao atu ma le manino ma le maoti o aoaoga faavae, na ia saunoa ai faapea, “soo se taimi lava tatou te taumafai ai e mulimuli i faataitaiga a le Faaola, ua tatou i ai i tulaga lelei.” ■



FAATUPULAIA LE AU MAIMOA A LE MORMON CHANNEL

E faitau miliona o tagata faalogologo ma le au maimoa i le lalolagi atoa e fiafia i le Mormon Channel, lea ua faasalalauina i le gagana Peretania ma le Sipaniolo i le 24 itula i le aso, fitu aso o le vaiaso, mai le Lotoa o le Malumalu i le Aai o Sate Leki, luta, ISA.

Sa faalauiloa atu lenei ala o faasalalaua aloaia mo le Ekalesia i le lima tausaga talu ai. O le toatele o le Au Paia o Aso e Gata Ai e fiafia e faasoaina atu ona anotusi ma uo o le au paia ma isi. O anotusi e leai se totogi ma e aofia ai sologa e tolu o le leitio o lauga ma musika ma vitio puupuu o Savali FaaMamona.

Saili le Mormon Channel i mormonchannel.org ma i le YouTube, iTunes, Roku, Tumblr, Facebook, ma le Twitter. E leai se totogi o polokalama o masini feaveai mo le iOS ma o loo avanoa foi mo tagata e faaaogaina le Android.

O Aoaoga Mo O Tatou Taimi

Mai ia Me 2014 e oo atu ia Oketopa 2014, e tatau ona saunia lesona o le Perisitua Mekisateko ma le Aualofa i Aso Sa lona fa mai se lauga se tasi pe sili atu, na tuuina mai i le konafesi aoao ia Aperila 2014. Ia Oketopa 2014, e mafai ona filifili mai lauga mai le konafesi aoao ia Aperila 2014 po o Oketopa 2014. E tatau i peresitene o siteki ma itu ona filifili po o fea saunoaga o le a faaogaina i o latou eria, pe mafai ona latou faamatuueseina atu leni tiutetauave i epikopo ma peresitene o paranesi.

O i latou e auai i lesona i Aso Sa lona fa ua fautuaina ina ia suesue mua-mua i le lauga filifilia. O loo maua lauga o le konafesi i le tele o gagana i le conference.lds.org. ■

O Tekinolosī ma Ala Faasalalau Faaagafesootai ua Faalauteleina Atu ai i le Lalolagi Atoa le Oo Atu o le Konafesi Aoao

E faapoopo i le sili atu nai lo le 100,000 sa auai i sauniga e lima o le Konafesi Aoao lona 184 Faale-tausaga i le Maota Autu mo Konafesi i le Aai o Sate Leki, Iuta, ISA, e sili atu ma le faitau miliona o tagata na maimoaina pe na faalogo i sauniga i gagana e 95 e ala atu i faasalalauga i le televise, leitio, satellite, ma le Initoneti.

E ui na nofoia e tagata e 21,000 ia le Maota Autu mo Konafesi i le Aai o Sate Leki, ae na faatoateleina le au maimoa o le konafesi aoao i le maimoa mai o le faitau miliona o tagata o le Ekalesia ma isi mai le salafa o le lalolagi. Mo le silia ma le 50 tausaga, ua faaliliuina e le Ekalesia ia taualumaga i le tele o gagana. I le taimi nei, o tekinolosī ua mafai ai ona maimoa tuusao mai i le silia ma

le 200 o atunuu i le lalolagi atoa.

E faapoopo atu i faasalalauga i falelotu i le lotoifale, ua faasalalauina atu e le Ekalesia ia konafesi e tuusao atu i le LDS.org, BYUtv, BYUtv International, le Mormon Channel, Roku, Facebook, ma le YouTube. Ua faateleina pe tusa ma le 30 pasene ia tagata na maimoaina i luga o le initoneti ia le konafesi aoao ia Oketopa 2013 e faatusatusa lea i le konafesi talu ai.


O le toatele foi na auai i le konafesi aoao e auala atu i ala o faasalalauga faaagafesootai. O se anoanoai o tweets faatasi ai ma le hashtag #ldsconf o loo i ai i le Twitter i le taimi o sauniga taitasi e lima o le konafesi, ua avea ai le konafesi aoao ma se tasi o autu sili ona talanoaina i luga o le Twitter i na

vaitaimi. Mo se faataitaiga, i le vaitaimi o Oketopa 2013, e 155,000 tweets e faatatau i le konafesi aoao na faasalalau ai. (O tweet taitasi o se faamatalaga patino o mataitusi e 140 po o lalo ifo.)

E ala atu i ona alaata o faasalalauga faaagafesootai aloaia, na tuuina i ai e le Ekalesia ni savali tuusao mai le konafesi i le tele o gagana, ma e uunaia ai isi e faasoa atu na savali. I le taimi o le konafesi aoao ia Oketopa 2013, o le toatele o tagata faapoopo na maimoa pe faalogologo i savali o le konafesi aoao ina ua ia vaaia ni faamatalaga i luga o faasalalauga faaagafesootai. Na faasoa mai faamatalaga i le gagana Peretania, Sipaniolo, ma le Potukale.

Ua avanoa nei taualumaga o le konafesi i se au maimoa sili ona lautele. ■

Ua maua nei taualumaga o le konafesi i le lautele o le au maimoa, e faafetai ai i tekinolosī ma ala o faasalalauga faaagafesootai.



Ua Tau Atu e le Uepisaite le Auaunaga, Faatuatua

Ua tuuina atu e le Au Paia o Aso e Gata Ai le auaunaga ma faasoa atu lo latou faatuatua i le lalolagi atoa. O lipoti e uiga i ia ituaiga gaoioiga ua faaalua i luga o uepisaite o potu o talafou i le atunuu, lea e aoteleina e le aunoa i newsroom.lds.org, o le punaoa aloaia a le Ekalesia mo le au faasalalau o talafou, taitai faitofa, ma tagata lautele.

I le eria o le Pasefika, o le Au Paia o Aso e Gata Ai ua sapolaiina ia vai, meaai, iliafi, faamama o vai, afa-leoleo, ma isi sapolai mo faalavelave faafuasei e fesoasoani i tagata Toga ina ua mavae le faatamaiga e le Afa

Teropika o Ian. I Samoa, na auai le autalavou a le AAG i se gaoioiga e lua-aso o le tuufaatasiga o tapuaiga eseese i faamalosiuga faaleagaga, musika, siva, ma taaloga.

I Pasila, o tagata o le Ekalesia o ofuina ni ofutino o Mamona Lima Fesoasoani na fesoasoani i taumafaiga faamama ma le tufatufaina o sapolai ina ua mavae le lologa na faaleagaina ai nuu tuaoi ma pisinisi, ma tuua ai le toatele ua leai ni fale. O isi nofoaga, na fesoasoani tagata o le ekalesia i le tufatufaina atu o nofoa faataavalevale e 211 i tagata o i ai manaoga faapitoa lea na foai mai e le Auaunaga

I Kuatemala, na potopoto le silia ma le 500 autalavou o le Au Paia o Aso e Gata Ai e fesoasoani e totoina ni laau e 1,944.



Agaalofa a le Ekalesia. O le faifai pea o foai i Pasila ua oo atu ai nei le aofai i le toaititi 700 nofoa.

I Aferika, ua afaatasi ia faalapopotoga o le atunuu ma le lalolagi atoa ma Galuega Agaalofoa a le AAG, o le aao foai a le Ekalesia, i se uluai polokalama a le malo i Kana e aveesea ai le misela ma le rupela e ala i le faia o tui puipui a le fanau mai le pepe e oo atu i le 14 tausaga. I Nigeria ma Kana, o se aso o Lima Fesoasoani na faamanuaina ai le faitau afe o tagata i nuu e 100 ao pulupululima faatasi tagata o le Au Paia o Aso e Gata Ai i soo se vaitausaga i le fausiaina o auala laupapa, toto laau, vali ia fale, ma faamama ma faamatagofie ia le alalafaga. I Zimbabwe, e silia ma le 60 talavou AAG na volentia e ofo atu toto. Ma i Aferika i Saute, o le tagata o le Au Paia o Aso e Gata Ai o Nozibele Makanda, o le tina o le fanau e toaono, na filifilia e avea o se pulenuu o Queenstown, o se aai e 200,000 tagata.

I Amerika Tutotonu, sa galulue le silia ma le 500 talavou AAG i Kuatemala faatasi ai ma le malo i le lotoifale e totoina ni laau e 1,944. I Costa Rica, na avea falelotu a le AAG ma tulaga o le aoina mai o susu, ma e 370 volentia a le Ekalesia na fesoasoani e tilivaina atu i supamaketi o loo auai i le gaoioiga o le tuuina atu mo i latou e le tagolima.

Ma i Kanata, na galulue le Au Paia o Aso e Gata Ai ma Talanoaga FaaKerisiano-Iutaia o Montreal (Quebec) ina ia saunia faatalanoaga o le vitio a o lei faia suesuega a le malo i tulaga faatauaina. O na faatalanoaga na talanoaina ai le lagolagoina o le tautinoga o le nuu i le faaaloalo, malamalama, faapalepale, ma saolotoga i tapuaiga, faamamafaina o le tumau pea o le taua o tapuaiga i olaga o le toatele o tagatanuu o Quebec.

Mo se lisi o uepisaite o le potu o talafou o atunuu faavaomalo i gagana eseese, tagai i le mormonnewsroom.org/newsroom-country-sites. ■

O le Nofoga Autu mo Tagata Asiasi mai o le Malumalu o le Aai o Mekisiko o loo i ai le tele o faaaliga lea e aoao atu ai ia upumoni o le talalelei e faamalosia ai aiga.



Toe Tatalaina ia Nofoga Autu mo Tagata Asiasi mai i le Malumalu o le Aai o Mekisiko

I le masina e sosoo ma lona toe tatalaina, na silia ma le 30,000 malo na asiasi mai i le Nofoga Autu mo Tagata Asiasi mai i le Malumalu o le Aai o Mekisiko, lea e lua tausga na toe faafouina ma faalauteleina ai. O faaaliga uma i le taimi nei e faaSi-paniolo ma e aofia ai ma le uluai faasalalaua na faia faapitoa lava mo le aofia Mekisiko. O le nofoaga autu ua toe faafouina o le uluai nofoaga autu foi lea ua i ai se vaega o le faaaliga atoa ua mamauina faapitoa mo le aoaoina o mataupu

faavae o le talalelei i tamaiti.

O lenei nofoaga autu mo tagata asiasi mai o le lona tolu pito i tele lea o ia ituaiga fale e 17, o le tele lava o nei nofoaga e i talaane o le malumalu po o se saite iloga o le Ekalesia. O se nofoaga autu mo tagata asiasi mai o loo fausiaina i le taimi nei e latalata i le malumalu ua fausia i Roma, Italia, ma o loo maua nofoaga autu i Egelani, Niu Sila, Hawaii, ma i setete e iva i le konetineta o le I.S. Ua mamauina nofoaga autu, e faafeiloai ai le Au

Paia o Aso e Gata Ai o loo malolosia ma e ua le o toe toaaga mai faapea ma i latou o isi tapuaiga, e le gata i le faamasani atu o tagata i le Ekalesia ae ia fesoasoani foi ia i latou ina ia malamalama i ona talitonuga ma uunaia se naunautaiga ina ia aoao atili e uiga i le Faaola ma le Toefua-taiga o le talalelei. Latou te tuuina atu foi savali e faamalosia ai aiga.

O Mekisiko o se taula i le Ekalesia, ma le silia ma le 1.2 miliona tagata auai, silia ma le 200 siteki, ma malumalu e 12. ■



I le taimi o lo latou aafiaga i le NAF, sa maua ai e faifeautalai ia aoaoga e uiga i le aoaoina atu o le talalelei a Iesu Keriso.

Fesoasoani ia Nofoga Autu mo le Aoaoina o Faifeautalai e Faanatinati le Galuega o le Faaolataga

I le lalolagi atoa, ua saunia e nofoaga autu mo le aoaoina o faifeautalai e 15 ia le aoaoina o le silia ma le 85,000 o faifeautalai mai atunuu e 143. I se tuufaatasa e aoaoina e faifeautalai ia gagana e 55 mai faiaoga e 1,600, ona auauna atu lea i le lua tausaga i ni misiona e 405 i le silia ma le 150 atunuu.

Faatasi ai ma le tuputupu ae i le aofai o faifeautalai talu mai le suia o tausaga manaomia ia Oketopa 2012, ua taulimaina e le NAF se aofaiga tele o faifeautalai nai lo se isi lava taimi muamua. Ma le le itiiti ifo ma le tasi le NAF i itulagi uma, e le goto lava le la i le aoaoina.

E masani lava ona taunuu faifeautalai i se NAF faatasi ai ma se faavae o le malamalama faalelotu

na maua mai aoaoga i le aiga ma le Ekalesia. E tuuina atu e le nofoaga autu mo le aoaoina o faifeautalai ni aoaoga faaopoopo e aofia ai le auala e aoao atu i le ala na aoao ai Iesu Keriso ma le auala e valaaulia ai tagata ia mulimuli ia te la. E faataitai e faifeautalai ni tulaga faaleaoaoga, maua aoaoga o le gagana pe a talafeagai, faalogo i lauga o faigalotu faalevaiaso mai taitai o le Ekalesia ma le afaigaluega o le NAF, ma auai i avanoa o le auaunaga.

O le NAF aupito sili ona tele o loo i ai lea i Provo, Iuta, ISA. E sauniaina aoaoga mo le faitau afe o faifeautalai i gagana e 55. O le NAF e lona lua le tele o loo maua lea i le Aai o Mekisiko,

Mekisiko. Ia Luni 2013 sa toe siitia atu mai se tamai fale i se lotoa e 90-eka lea na faofaleina se aoga maua luga maoti a le Ekalesia, o Benemerito de las Amerika. O le nofoaga sa i ai muamua na mafai ona faofaleina pe tusa ma le 125 faifeautalai i se taimi; o le nofoaga fou ua mafai ona faofaleina le silia ma le 1,000.

O loo i ai nisi NAF i Buenos Aires, Atenitina; São Paulo, Pasila; Santiago, Chile; Bogotá, Kolomupia; Santo Domingo, Dominican Republic; Preston, Egelani; Accra, Kana; Aai o Kuatemala, Kuatemala; Aukilani, Niu Sila; Lima, Peru; Manila, Filipaina; Johannesburg, Aferika i Saute; ma Madrid, Sepania. ■

Ua Faaaogaina e le Ekalesia ia Mataupu Faavae o le Uelefea i le Toe Faaleleia o Filipaina

masina talu ona taia e le Afa o Haiyan ia Filipaina ia Novema 2013, ma faaleagaina ai le toetiiti 1.2 miliona o fale ma fasiotia ai le silia ma le 6,200 tagata, o loo faaauau pea ona tuuina atu e le Ekalesia le toomaga laveai, fesiitaiga o taumafaiga mai tali o mala i le toomaga laveai e umi atu. O se tasi o taumafaiga faapitoa na faamanuiaina e aofia ai ni tagata volenitia o e na aoaoina le fausiaina o fale mo i latou e le o i ai lava ni malutaga.

O tagata nei o le nuu na aafia i le afa o loo faitaulia faatasi ma le toatele o e na faaalua le agaga faafetai mo le fesoasoani sa latou mauaina mai le Ekalesia, e ui lava e le o i latou o ni Au Paia o Aso e Gata Ai:

- O se tamaitai sa lalafi i le falesa Mamona i le taimi o le afa ua iloina mulimuli ane, ua faaleagaina lona fale ina ua pau i ai i luga ni niu. Latou te lei mauaina ma lona aiga ni mea e toe fau ai, ae na fesoasoani ia tagata volenitia e fausia se fale fou, ma o loo ia fesoasoani nei i se isi aiga e fausia se fale. “Na ou aoao e galulue faatasi ma i latou o e foi e manaomia le fesoasoani iinei, ina ia mafai ona tatou toe faaleleia faatasi mai [le afa],” o lana tala lea.
- O se alii ua leai se galuega ina ua faatamaia le pisinisi lea sa ia galue ai ma o loo ia aoaoina i le taimi nei e fausia ni fale mo lona aiga ma isi. “Tatou te iloa e tatau ona



Ua tutuiina e tagata volenitia ia laupapa i le faavaa o se fale fou i Tacloban, Filipaina.

tatou fesoasoani i le tasi ma le isi ina ia vave ona faamaeaina le galuega,” o lana tala lea, ma faaopoopo mai ua ia faafetai mo taumafaiga laveai a le Ekalesia.

Fai mai le Epikopo Pulefaamalumu o Gary E. Stevenson, faatasi ai ma le tausiga o e matitiva ma lē tagolima, “o loo tatou vaaia foi le galueaina o le mataupu faavae o le ola faalagolago o le tagata ia te ia lava i le taimi nei, ma e ese le matautia nai lo lena.” Sa ia fai mai, “O se tasi o mea lea matou te taumafai e faia o le saunia lea o anomea ao saunia e [tagata e faaaogaina] galuega. Soo se tasi o loo mauaina se fale o loo galulue foi e fausia e malutia ai i latou lava.”

O loo fono ia taitai o le Ekalesia i le lotoifale ma sui o fesoasoaniga agaalofa ma taitai o nuu i le lotoifale e tuuina atu ni aoaoga faamatata ma le faamaoniga i tagata o e ua aoaoina ni tomai faakamuta. Ua faaaogaina ia punaoa o Tupe Faaagaga mo Aoga e aumai ai ni kamuta atamamai e toa 20 e fesoasoani i le aoaoina, ma le 2,000 o le 3,000 o fale na faamoemoeina ua uma ona faamaeaina.

Ua faaalua e le auaoaga i le lotoifale lo latou aoaoina e ala i le fausiaina o fale e 10 ina ia mau ai le faamaoniga a le malo ma se pusa faigaluega mai le Ekalesia, e mafai ai e i latou ona saili ni galuega lelei. O loo i ai se manaomia tele mo tagata faufale lea

ua ioeina ai e le Matagaluega o Toomaga a le Katoliko e faafaigaluega le faitau selau o kamuta na aoaoina e le Ekalesia AAG.

Fai mai Epikopo Stevenson e toa 500 tagata o le Ekalesia sa auai i se fonotaga lea na faamatalaina ai e taitai faale-ekalesia ia aoaoga o le galuega ma le faamaoniga, “ma ao faamatalaina lenei mea ia i latou, sa latou patipati faamālō ma loimata, ma le iloina o le a mafai ona latou iloa le ala . . . e saunia ai mo o latou aiga.”

Na galulue foi le Ekalesia ma nisi o faalapotopotoga agaalofa faapea foi ma le malo Filipaina i se taumafaiga faifaipea ina ia tilivaina atu meaai, vai, sapalai faafomai, pusa o vilavaa faafomai, afi faaleoleo, pusa mo malutaga, pusa mo le kukaina o meaai, meafagota, ma ni fatu mo le totoina.

Ua iloa e le Ekalesia o le auala sili ona lelei e tali atu ai i faalavelave faalenatura o le galulue lea i le lotoifale, faatauina o sapalai manaomia i le atunuu na aafia, i le latalata i le faalavelave e mafai ai. E le gata o le a faamautinoa e lenei mea o loo talafeagai ia oloa mo le eria, ae o le a fesoasoani foi i le fausiaina o faaletonu o le tamaoaga i le lotoifale.

Ua fautuaina tagata i le lalolagi atoa ina ia tatalo mo i latou o i eria o loo pagatia e mamao ese mai mea o latou nonofo ai, ma mafaufau ina ia faateleina a latou foai o le taulaga anapogi po o le foai atu i le tupe o le fesoasoani alofa a le Ekalesia. ■

Ua Fesoasoani le Polokalama o le Faamamaina o le Suavai i le Faitau Miliona o Tagata i Aferika

Mo le silia ma le luasefulu tausaga, ua auai le Ekalesia i ni galuega faatino o le faamamaina o le suavai i le silia ma le 100 atunuu. I Aferika lava ia, o nei galuega faatino ua faamanuiaina ai olaga o le silia ma le fa miliona tagata e ala i le sauniaina o vaieli, polokalama o le sefeina ma le tilivaina o le suavai, faapea ma le faamamaina o le suavai.

O se tasi o ia galuega faatino na faia i le Motu o Idugo, mai le talafatai i Mozambique. O le toatele o le 15,000 o tagata o loo nonofo i le motu e galulue i faatoaga a aiga, fagota i sami tuaoi o le Vasa Initia, pe galulue i le mimitiina o vaituloto ina ia ao mai ai le masima mai le suasami. E leai se vai, eletise, auala, po o ni taavale i le motu. O vaa e gaosilima po o tamai paopao o le auala lea e te oo ai i le motu.

Mo le tele o seneturi, na o le pau le puna o vaiinu i Idugo o vaieli papau ia e eliina i lima. E faaauau pea ona faatumulia vaieli i palapala ma lapisi. Latou te aumaia ni vai palapala, e faigata ona maua. I le taimi o le vaitau o timuga, e amata ona palapala, ma mafua ai le kolela, manavatatā, ma isi ma'i.

Ina ua faalogo faifeautalai mo fesoasoaniga agaalofa a le Ekalesia e uiga i le tulaga o Idugo, sa latou feiloai ma taitai o le alalafaga iina. Sa latou galueaina faatasi se fuafuaga mo Auaunaga Agaalofa a le Ekalesia ina ia saunia ni mea e faaoga, meafai-galuega, ma faatonuga i le fausiaina



I le Motu o Idugo, Mozambique, ua auai atu ia tagata o le nuu ma tagata iloga o le lotoifale i se sauniga lea e amata ai le faaogaina aloaia e le nuu o se vaieli.

o vaieli sima e 10 e uamea tapuni, e mafai ona tausai ai ni tagata se toa 1,000. O le a saunia e faifeautalai ni aoaoga o le tumama ma le maloloina, ao tagata o le nuu o le a saunia ia galuega leipa uma mo le fausiaina ma le faatumauina o le tausiga o vaieli.

Mai se tulaga o sauniuniga i le motu autu, e fa utā o loli pugasasaa o iliili, 300 taga sima, lua utā oneone, uamea, ma sima e fausia i le uamea o loo aveina atu i le motu. Na tilivaina sapolai i totonu o le motu i vae po o taavale tosolima. Sa toluapi nisi o tagata o le Ekalesia mai Quelimane, Mozambique, i le motu mo le tolu masina e fesoasoani ai i le aoao atu ma le fausiaina.

Sa mamanuina vaieli e faataga ai ia alavai o vaitimu, e faaititia ai le faatamaiaga. I nisi o nuu, sa fausia e tagata o le motu ia pa laau laupapa ma auala piliki e siomia ai vaieli, e faaoga ai piliki na latou aoaoina e fai i mea na foai mai e le Ekalesia.

I sauniga aloaia, sa tuuina atu ai ia vaieli i tagata o nuu taitasi. O le tele o tagata o e sa galulue i vaieli na faailoa mai le agaga faafetai i o latou tomāi

fou na faatoa aoaoina—faia o piliki, galulue ma sima ma faamalosiā ai i le sila, ma le faaogaina o meafai-galuega—o le a mafai ai ona latou maua ni galuega faaopoopo. O isi sa faaalā le agaga faafetai mo le avanoa e aoao ai tomāi faaletaitai.

I le sosoo ai ma le isi vaitau timuga, e lei i ai se faamai e mafua mai vai na lipotia mai i nuu o i ai vaieli.

E tusa ai ma le Faalapotopotoga o le Soifua Maloloina o le Lalolagi, e sili atu nai lo le tasi piliona tagata i le lalolagi atoa e le maua ni vai mama. Faafetai i le polokalama o vai mama a le Ekalesia, ua faaititia lena fuainumera e ala i le polokalama lea o loo aofia ai tagata o nuu i le fuafuaina ma le faagaioia o galuega faatino, saunia o galuega leipa e fausia ai mea o loo manaomia, mauaina o aoaoga, ma le faatumauina o punaoa ua uma ona faamaeaina.

E le gata i galuega faatino o vai mama i Aferika, o loo lagolagoina e le Ekalesia ni taumafaiga o suavai mama i Asia, Amerika Tutotonu, Europa Sasae, Initia, Initonesia, Atumotu o le Pasefika, Amerika i Saute, Asia Sautesasae, ma isi nofoaga i le lalolagi atoa. ■



Elder Lynn G. Robbins

Au Peresitene o Fitugafulu

Talu mai le valaauina o se Pulega aoao ia Aperila 1997, ua olioli Elder Lynn G. Robbins i “faamanuiaga matagofie o le iloa lelei o le Au Paia i le lalolagi atoa.”

“E te lagonaina se sootaga patino ma tagata po o fea lava e te alu i ai,” o lana tala lea.

Ua faamoemoe Elder Robbins e faaauau pea ona feiloai atu i le Au Paia o Aso e Gata Ai ao auauna atu o se tasi o le Au Peresitene o Fitugafulu.

Na fanau Lynn Grant Robbins i le aso 27 Oketopa, 1952, i Payson, Iuta, ia Joshua Grant ma Evelyn R. Robbins. Sa ia faaaluina lona olaga talavou i Springville, Iuta, lea na ia feiloai ai ia Jan Nielson, o lē na ia silafia talu mai lona laitiiti. Sa la faaipoipo i le aso 27 o Iuni, 1974, i le Malumalu o Manti Iuta ma o ni matua o se fanau e toafitu; e 15 fanau a la fanau.

Na maua e Elder Robbins se faailoga o le tagata malaga i le gagana Sipaniolo ma le saienisi faaupufai mai le Iunivesite o le Setete o Iuta ma se MBA i pulega faavaomalo mai le Aoga Faauu a Amerika o le Pulega Faavaomalo i Glendale, Arisona, ISA. O ia o se tasi na faavaeina ma o le sui peresitene sinia o le Franklin Quest.

Sa auauna atu Elder Robbins o se peresitene o le Misiona a Montevideo Iurukuei ina ua ia maua lona valaauga i le Korama lona Lua a Fitugafulu. E tolu tausaga mulimuli ane na avea o ia ma se sui o le Korama Muamua a Fitugafulu. Sa ia auauna atu o se peresitene o le Eria a Amerika i Saute, o le Eria a Amerika Tutotonu, ma le Eria a Amerika i Matu i Sisifo. Sa ia auauna atu foi i le Eria a Amerika i Matu Tutotonu.

O se faamanuiaga maoae o lenei auaunaga o le avanoa lea e toe foi atu ai i Atenitina, lea sa ia auauna atu ai o se faifeautalai faamisiona. A o i ai i Atenitina o se faifeautalai talavou, sa ia auauna atu i Jujuy, o se eria e tasi le paranesi. Ina ua ia toe foi atu i le eria i le tele o tausaga mulimuli ane, na ia maua se siteki o le Ekalesia ma le tele o iunite.

“E te vaaiina lena mea i le lalolagi atoa,” o lana tala lea. “O se aso lenei o vavega.” ■



Elder Jörg Klebingat

Korama Muamua a Fitugafulu

O Elder Jörg Klebingat na ola i se olaga o le naunautai. E talitonu o ia i le ususitai, tausia o poloaiga, ma mulimuli i uunaiga a le Agaga.

Na fanau i le aso 19 o Tesema, 1967, ia Klaus-Peteru ma Doris Elke Klebingat, na ola ae Elder Klebingat i Zweibrücken, Siamani, e aunoa ma le aafiaga a le talalelei. A o talavou, sa ia feiloai i se tagata o le Ekalesia i se konaseti o musika, ma na avea le toalua ma uo.

“Pe a ou asiasi atu i la’u uo fou, sa faagaetia au i lona aiga,” na ia toe manatua. “Sa ou lagonaina le Agaga i lona aiga ma mana’o ina ia auai i le lotu.”

O le taimi o lena sauniga muamua a le Ekalesia sa ia faalogo ai i le Tusi a Mamona. Na tuuina atu e lana uo ia te ia se kopi ma lana molimau e moni, ma sa tuua e Elder Klebingat le sauniga ma le naunautai ia sailiili mo ia lava.

“Sa ou oo i se mea vaimeia i le 1 Nifae ae ou maua la’u molimau e moni le tusi,” o le tala lea a Elder Klebingat. “O le mauaina o se molimau e uiga i le Perofeta o Iosefa Samita sa avea foi ma se taimi taua tele mo au. I la’u misiona, ou te fesili pea i au soa pe mafai ona ou faamatalaina lena vaega o le tala.”

Ao lei malaga atu i lana misiona i le Misiona a Colorado Denver, na auauna atu Elder Klebingat auauna atu i le ami a Siamani mo le 18 masina. Sa faamauiina o ia ia Julia Poltorak i le Malumalu o Sate Leki, i le aso 21 o Tesema, 1992. E toatolu le la fanau.

Sa mauaina e Elder Klebingat se faailoga i le gagana Rusia mai le Kolisi o Ricks ma mulimuli ane, maua se tikeri o le matuaofaiva i uiga faalepulega mai le Iunivesite o Polika Iaga. Sa ia galue o se faufautua o le pulega o pisinisi mo Price Waterhouse ma Arthru Andersen ma i le tele o galuega mo le Ekalesia.

Ao lei maua lana valaauga, sa auauna atu Elder Klebingat o se sui o talavou nofofua matutua a le siteki, peresitene o le korama a toeaina, peresitene o Alii Talavou, fautua maua-luga, peresitene o le paranesi, ma le epikopo. O le a faamutaina lana auaunaga o se peresitene o le Misiona a Ukraine Kyiv ia Iuni 2014. Sa lagolagoina o ia o se tasi o le Korama Muamua a Fitugafulu i le aso 5 o Aperila, 2014. ■



Elder Chi Hong (Sam) Wong

*Korama Muamua a
Fitugafulu*

I le avea ai ma se tagata fou liliu mai ma se tamaitiiti aoga i le Iunivesite o Polika Iaga-Hawaii, sa sili atu le tele o mea na mauaina e Elder Chi Hong (Sam) Wong nai lo le na o se aoaoga—sa ia maua se malamalama mautinoa o loo i ai se Atua na te silafia “ia faamatalaga auiliili o o tatou olaga.”

Na fanau i le 25 o Me, 1962 i Hong Kong, Saina, ia Ngan Kan ma Fat Wong, o Elder Wong o se tasi o le fanau e toa-fitu na ola ae i se tamai fale mautotogi.

I le galuega sa ia feiloai ai ia Carol Lu, lea na faailoa ia te ia le talalelei. Sa papatisoina le tagata sailiili talavou i le aso 14 o Fepuari, 1982.

O le tausaga mulimuli ane, i le aso 9 o Iulai, 1983, na ia faaipoipo ai ia Carol. Sa la masii atu i Laie, Hawaii, ISA, ina ia mafai ona ia auai i le aoga. Talu ai ona o lana visa o se visa a le tamaitiiti aoga, sa na o le 20 itula i le vaiaso na mafai ona galue ai Elder Wong. “Sa ma matua faaaogaina lava le ma faatuatua ma tatalo,” sa ia fai mai o le mea lea sa manaomia e tausia ai lona aiga.

Sa ia galue malosi ina ia maua se sikolasipi, ona ia aveina lea o le tele o itula sa mafai ona ave e faatagaina e le iunivesite. “Sa lei faigofie,” o lana tala lea. “O le taimi lava tatou te maua ai lena aafiaga tatou te iloa e mafai lava ona faalagolago i le mana o le lagi.”

Sa faamauina i le au Wongs i le Malumalu o Laie Hawaii i le aso 9 o Aokuso, 1984, ma na fanau mai le la tama muamua; na iu ina auai mai le isi toatolu o tamaiti i totonu o le aiga. “O na tausaga sa sili ona faapitoa, sili ona paia,” o le tala lea a Elder Wong.

Sa maua e Elder Wong se faailoga o le tagata malaga i le saienisi i le tausitusi ma se paaga a saienisi i le saienisi komepiuta; ona o ia lagonaina lea o le manaomia o le “toe foi atu i Hong Kong e auauna atu.”

Mulimuli ane sa ia maua se MBA mai le Iunivesite o Hong Kong Open. O Elder Wong o le tagata na faavaeina ma o le faapaaga o se pisinisi ma le kamupani feutagai lelei ma sa galue foi o se vaega e faataitaia ma suesueina anomea lea na ia amata o se suetusi sinia ma na tuua le kamupani o avea ma pule faatonusili lagolago.

A o lei lagolagoina o ia i le aso 5 o Aperila, 2014, o se sui o le Korama Muamua a Fitugafulu, sa avea o ia o se epikopo, peresitene o siteki, ma Fitugafulu Eria. ■



Elder Larry S. Kacher

*Korama Lona Lua a
Fitugafulu*

I na ua mavae le tele o uunaiga ao avea ma talavou matua, na amata ona iloina e Elder Larry S. Kacher se mana sili atu o taialaina o ia i lona olaga. I le 19 o ona tausaga, o le lagonaina o le Agaga na taitai ai o ia i le talalelei a Iesu Keriso—o se suiga lea ua faia ai se eseese tele.

Na fanau o ia i le aso 12 o Fepuari, 1952, i le lona lua aupito i matua o le fanau e toalima ia Alapati ma Elaine Kacher; sa ia ola ae i Bloomington, Minesota, ISA.

Ina ua maea le aoga maualuga, sa alu o ia i Europa e faase'e, ma ina ua mavae le silia ma le ono masina iina, sa ia lagonaina e tatau ona ia toe foi atu i le fale. O le taimi lava na i ai i le aiga, sa ia lagona na pei sa ia manao e alu i se isi mea ae na te lei iloa po o fea. Na fuafuaina e se uo o le olaga faatamaitiiti e masii atu i Iuta, ma sa filifili Elder Kacher e siitia atu faatasi ma ia. Ao i ai i Iuta, sa lesitala Elder Kacher i le Iunivesite o Polika Iaga, aoao e uiga i le Ekalesia, ma papatiso ai.

“A o aoaoina i matou e faifeautalai, sa ou lagonaina le moni,” o lana tala lea. “A o ou tatalo, sa ou lagona e moni le Ekalesia.”

Sa ia filifili e auauna atu i se misiona ma na valaauina i le Misiona a Tahiti Papeete i le 1973. Ina ua toe foi i le fale, sa ia toe foi atu i le aoga i le BYU, lea na ia feiloai ai ia Pauline Miller. Sa la faaipoipo i le Malumalu o Manti Iuta i le aso 29 o Oketopa, 1976, ma o ni matua o se fanau e toaono ma matua o matua o fanau a fanau e toa 11.

Sa maua e Elder Kacher se faailoga o le tagata malaga i mataupu tau le mafaufau ma se failoga o le matuaofaiva i le amio taulepulega—mai le BYU. Na aofia i lana galuega feutagaiga i se kamupani tele faaleatunuu ma faavaomalo.

A o lei lagolagoina o ia i le aso 5 o Aperila, 2014, o se sui o le Korama Lua a Fitugafulu, sa auauna atu Elder Kacher o se peresitene o le paranesi, peresitene o le korama a toeaina, epikopo, ma fesoasoani i le peresitene o le siteki. Sa ia pulefaamalumalu i le Misiona a Suitiselani Nineva mai le 2000 i le 2003. I ni nai tausaga ina ua ia toe foi mai mai Suitiselani, sa aveina o ia e lana galuega i Abu Dhabi, United Arab Emirates, lea sa valaauina e auauna atu o se Fitugafulu Eria i Sasae Tutotonu. ■



Elder Hugo E. Martinez

Korama Lona Lua a Fitugafulu

I le 1982, ao i ai uma Elder Hugo E. Martinez ma lona faletua, o Sister Nuria Alvarez de Martinez, ia laua aoaoga faafomai i Misisipi, ISA, ae tuitui faafuasei mai le faitotoa o i luma.

Sa tutu mai iina ni faifeautalai Mamona se toalua.

“Sa ma tatalaina le ma fale ia i laua, ae sa ma leiloaina se mea e uiga i Le Ekalesia a Iesu Keriso o le Au Paia o Aso e Gata Ai. Ma te leiloaina foi se mea e uiga i le Aufaipese a le Tapeneko,” na fai mai ai Elder Martinez, ma ataata.

Peitai, sa tatagi pea ia lesona o le talalelei lea na faasoatu e faifeautali i le ulugalii talavou. E lei umi ae la taliaina le valaaulia a faifeautalai ina ia papatisoina.

“Ma e ma te lei toe tepa lava i tua talu mai lona taimi.”

I le aso 5 o Aperila, 2014, sa valaauina ai Elder Martinez i le Korama lona Lua a Fitugafulu, avea ai ma uluai Pulega Aoa o mai le atu Karipeane. Ua iloina le “lofituina” o ia e ala i lona tofiga fou.

“Ae e oo mai ia te au se lagona manaia o le filemu ma faailoa mai ia te au e pule le Alii,” o lana tala lea.

Sa faamauina Hugo ma Nuria Martinez i le Malumalu o Sate Leki i le aso 3 o Oketopa, 1983 ina ua mavae le tausaga ma le tasi masina talu ona uma le la papatisoga. O i laua o ni matua o se fanau e toalima ma fanau a fanau e toalima.

Sa fanau Elder Martinez n i le aso 10 o Ianuari, 1957, i Mayagüez, Puerto Rico, ia Hugo E. Martinez-Sandin ma Daly Morales-Alamo de Martinez. A o avea ma se alii talavou, sa ia filifili e mulimuli i ala faapolofesa a lona tama, ma avea ma se fomai tipitipi. Sa ia maua lona faailoga faafomai mai le Iunivesite o Puerto Rico (1981), ma faamaeaina lona nofoaga tumau i le Iunivesite o le Misisipi (1984). Sa ia faaitaitai i mea tau vailaau seia oo ina malolo atu i le 2004.

O se taimi puupuu talu ona uma lona papatisoga, sa valaauina o ia e avea ma se faiaoga o le Aoga Sa o le autalavou. Sa ia auuina atu mulimuli ane o se epikopo, fesoasoani i le au peresitene o le siteki, peresitene o le itu, ma le fesoasoani i le au peresitene o le Misiona a Puerto Rico San Juan. Sa ia pulefaamalumalu i le Misiona a Guatemala Guatemala City Central ma sa auuina atu o se Fitugafulu Eria, ina ua valaauina o ia e avea ma se Pulega Aoa. ■



Tad R. Callister

Peresitene Aoa o le Aoga Sa

O le tele o tausaga ao lei valaauina i lona valaauga o i ai nei o se peresitene aoa o le Aoga Sa, na i ai se matafaioi taua o le Aoga Sa i le olaga o Tad R. Callister.

A o galue Brother Callister o se peresitene o le Aoga Sa i se uarota i le Iunivesite o Polika Iaga, na ia masani ai i lona toalua i le lumanai, o Kathryn L. Saporiti, lea sa ia faaipoipo i ai i le aso 20 o Tesema, 1968, i le Malumalu o Los Angeles.

O i laua o ni matua o ni afafine se toalua ma atalii e toafa; ma e toa 24 foi fanau a la fanau. “O le tele ia o mea lelei e tutupu pe a fai o oe o le peresitene o le Aoga Sa,” o le tala lea a Brother Callister.

Na fanau o ia i le aso 17 o Tesema, 1945, i Glendale, Kalefonia, ia Reed Eddington ma Norinne Callister, sa ia tautino mai o ia—e pei o Nifae—na fanau mai i ni “matua lelei.”

“O lo’u tama sa avea ma o’u epikopo a o ou tuputupu ae,” o le tala lea a Brother Callister. “E masani ona ia tauaveina solo ni tamai kata, ma e na te taulotoina upu ma mau ma Siekisipia.”

E pei o lona tama, na taulai atu Brother Callister i se galuega faaletulafono. Ina ua uma ona faauu i le tautesitisi mai le Iunivesite o Polika Iaga, sa ia auai i le aoga faaloia i le Iunivesite o Kalefonia, Los Angeles, ma mauaina le faailoga o le matuaofaiva i le tulafono o lafoga mai le Iunivesite o Niu Ioka. Sa ia faigaluega o se loia i le ofisa loia a Callister & Callister.

I le taimi o lona valaauga, faatoa faamalolo mai lava Brother Callister mai lona valaauga i le au Peresitene o Fitugafulu ma i le Korama Lua a Fitugafulu, lea na ia galue ai talu mai le 2008.

A o lei oo i lona taimi, sa ia auuina atu o se peresitene o le Misiona a Kanata Toronto Sasae, Fitugafulu Eria, sui risone, peresitene o le siteki, epikopo, peresitene o le misiona a le siteki, peresitene o le korama a toeaina ma, o se alii talavou, o se faifeautalai i le Misiona a Setete a Atlantic Sasae.

O le tuuina mai o ni manatu faaalua e uiga i suiga o le a oo mai i mataupu aoaoina a tagata matutua o le Aoga Sa, na saunoa ai Brother Callister, “O le mataupu aoaoina, ioe, e sili ona taua, ae e le taua e pei o le auala o loo aoaoina atu ai tagata. O le mea aupito sili ona taua o lo tatou aoaoina i le ala a le Faaola, tatou te aoaoina atu e ala i le Agaga, ma tatou te aoaoina mo le liuaina.” ■



John S. Tanner

Fesoasoani Muamua i le Au Peresitene Aoao o le Aoga Sa

Mai lona tamaitiiti, na maua e John Sears Tanner le olioli i le aoaoina.

Na faalatelele atu lena fiafia i lana aoga, matata, ma le tele o ona avanoa e aoao atu ai le talalelei: muamua i le avea ai ma se faifeautalai i le Misiona a Pasila i Saute ma avea ai ma se epikopo, peresitene o le siteki, fautua maua, faiaoga o Aoaoga Faavae o le Talalelei, peresitene o le Misiona a Pasila São Paulo i Saute (lea e faaiuina i le taumafanafana lena), ma i le taimi nei o le fesoasoani muamua i le au peresitene aoao o le Aoga Sa.

“Afai e sao le [aoo atu], e i ai le Agaga Paia iina ma e te lagona le fiafia o le aoaoina; e te lagona e pei o e i ai i luga o se nofoaga paia,” o le tala lea a Peresitene Tanner.

Na fanau i le Aai o Sate Leki, Iuta, i le aso 27 o Iulai, 1950, ia William Coats Tanner Jr. ma Athelia Sears Tanner, o Peresitene Tanner na tuputupu ae i Pasadena i Saute, Kalefonia, ISA, o le lona lima o le fanau e toa 13. Na fatuina e ona matua se siosiomaga oa i totonu o le aiga, e aofia ai se autu malosi o le talalelei. “Ou te le manatua le aoaoina o se isi lava mea i le lotu ou te lei aoaoina mai le fale,” o lana tala lea. Sa ia atiina ae ai foi se faamemelo atu mo tusi lea sa ai tausia ao tulimatai atu i se faailoga o le gagana Peretania mai le Iunivesite o Polika Iaga ma se faailoga faafomai i le gagana Peretania i le Iunivesite o Kalefonia, Berkeley.

Ao i ai i BYU, sa ia feiloai ai ia Susan Winder. Na atiina ae e le toalua se faauoga malosi lea sa la fausia mulimuli ane ai se mafutaga mafana. Sa la faaiipoipo i le Malumalu o Sate Leki i le 1974. Na la tausia faatasi se fanau e toalima.

Sa amata e Peresitene Tanner lana galuega faaleaoaoga i le avea ai ma se polofesa lagolago i le Iunivesite o le Setete o Florida. Na avea o ia ma se tasi o faiaoga i le BYU i le 1982; sa ia faigaluega iina talu mai lena taimi o se fesoasoani, paaga, ma polofesa o le gagana Peretania, ma o le taitaifono o le matagaluega ma sui peresitene o le aoga.

Na fai mai o ia, o le vaega sili ona taua o le aoaoina o le talalelei, e sau lea mai se mea sa ia aoaoina vave i lana matata: o le aoaoina e le tataua ona sau mai se nofoaga o le fefe po o le faamaualuga ae mai se nofoaga o le alofa—mai le alofa moni, o le alofa mama o Keriso. ■



Devin G. Durrant

Fesoasoani Lua i le Au Peresitene Aoao o le Aoga Sa

Ina ua valaauina Devin G. Durrant e avea ma fesoasoani lua i le au peresitene aoao o le Aoga Sa, e mafai e le toatele o tagata o le Ekalesia ona toe tepa i tua i aso o lona mamalu i se ofutaalo pasiketipolo a le Iunivesite a Polika Iaga.

O taaloga, ioe, na avea ma se matafaioi taua i le olaga o Peresitene Durrant. Na oo lava ina ia faaaluina se vai-tau e tauva ai i le NBA e faasaga i tagata taaalo iloga i le Iunaite Setete. Ae ua sili atu o ia nai lo se tagata taalo afeleti tautaua: o se faifeautalai i Madrid, Sepania, o se toalua, o se tama, o se tama matua, o se tusitala, o se alii faipisinisi, o se tagata faamaoni, ma o le peresitene o le Misiona a Texas Dallas mo le lua ma le afa tausaga ua mavae.

Fai mai ai Peresitene Durrant, lea na fanau i le aso 20 o Oketopa, 1960, i Brigham City, Iuta, na taua le matafaioi na faia e lona olaga faatamaitiiti i le sauniaina o ia mo nei matafaioi taitasi o le olaga. O ona matua, o George ma Marilyn Durrant, o ni faiaoga talenia.

“E moni, sa la aoao atu e ala ia la upu—ae e moni lava, o aoaoga maoae sa ou mauaina i totonu o le aiga o le matauina lea o i laua i le ala sa la ola ai.”

Ua silafia lelei e Peresitene Durrant ma lona faletua, o Julie Mink Durrant, le taua o faiaoga malolosi i le sauniaina o faifeautalai i le lumanai.

“O [faifeautalai i le lumanai] ua aoaoina lelei e o latou matua i le aiga, ma o latou faiaoga i le lotu ma i polokalama maoae o le seminare ma inisitituti.”

O le polokalama o le Aoga Sa, sa ia faaopoopo mai, ua mafai ai e faiaoga ma tamaiti aoga o vaitausaga uma “ona aoao atu i le ala a le Faaola.”

Na faaiipoipo Peresitene ma Sister Durrant i le Malumalu o Sate Leki i le aso 23 o Aperila, 1983, ma o ni matua o fanau e toaono ma fanau a fanau e toaono.

Ao lei valaauina i lona valaauiga o se peresitene o le misiona, sa ia auauna atu o se epikopo, fesoasoani i le au peresitene o le siteki, sui o le au peresitene o le Aoga Sa a le siteki, ma le faiaoga inisitituti.

Sa ia maua se faailoga o le tagata malaga i Suesuega FaaAmerika mai le Iunivesite o Polika Iaga ma se MBA mai le Iunivesite o Iuta. O ia o le pule o le kamupani faatau fanua. ■



Faatupulaia o le Malamalama, saunia e Elspeth Young

I le 1830, sa tuu atu ai e Isaac Morley ia Mary Elizabeth Rollins e 12 tausaga le matua na te faaaogaina lana kopi fou lava o le Tusi a Mamona. Talu ai ona sa na o le pau lea o le kopi o le Tusi a Mamona i Katelani, Ohio, i lena taimi, sa feauauuai ai Mary Elizabeth lea faatoa papatisoina ma lona aiga i le faitauina o le tusi e oo lava i le tuneva o le po.

I taeao po lava na sosoo ai, na ia toe susueina le tusi ma taulotoina laina amata o le 1 Nifae. O le malamalama i le atavali o se faatusa lea o le malamalama sa faatumulia ai Mary Elizabeth ao ia faitauina.



“A o tatou mafau fau loloto i savali ua tatou faalogo i ai, e ao ona tatou naunau ia faia ni mea lelei atu nai lo mea na tatou faia i le tuana’i,” o le saunoaga lea a Peresitene Thomas S. Monson i le sauniga faaiu o le Konafesi Aoo Faaletausaga Iona 184 o le Ekalesia. “E ao ona tatou agalelei ma agaalofa atu ia i latou e le tutusa o tatou talitonuga ma o tatou tulaga faatonuina. Na aumai e le Faaola i leni lalolagi se savali o le alofa ma le agalelei i alii ma tamaitai uma. E tatau lava ona tatou mulimuli i Lana faataitaiga.”

O LE EKALLESIA A
IESU KERISO
O LE AU PAIA O ASO
E GATA AI